

A. 8881. Mur

38085/B vol II

Behr

J. ANDREAE MURRAY

EQVITIS ORDINIS R. DE WASA

M. BRITANN. REGIA CONSIL. AVL. MEDIC. PROFESSORIS P. O.
HORTI R. BOTAN. PRAELECTI, SOCIETATVM SCIENTIARVM
STOCKHOLM. GOTTING. VPSAL. GOTHENB. LVND. FLORENT.
LVGDVN. ET BATAVO - FLESING. MEDICARVM PARIS.
NANC. ET HAFN. ATQVE OECONOMICARVM BERN.
CELL. ET GEORGOPHIL. MEMBRI

OPVSCVLA

IN QVIBVS

COMMENTATIONES VARIAS

TAM MEDICAS

QVAM

AD REM NATVRALEM

SPECTANTES

RETRACTAVIT EMENDAVIT AVXIT

CVM FIGVRIS AENEIS

VOLUMEN SECVNDVM

GOTTINGAE

APVD JO. CHRIST. DIETERICH

1786.

24 MAY 1911
[Faint, illegible text]

1377410

24 MAY 1911

[Faint, illegible text]

[Faint, illegible text]

[Faint, illegible text]

[Faint, illegible text]

[Faint, illegible text]

[Faint, illegible text]

[Faint, illegible text]

[Faint, illegible text]



PERILLVSTRI
REGIAE SOCIETATI MEDICAE
PARISIENSI

QVAE

OPERIBVS AVSISQVE PRAECLARISSIMIS

VINDICEM EGIT

GENTIS SVAE IN RE MEDICA EXISTIMATIONIS

CVIVS LAVDEM

IN CHIRVRGICA

VLTRO IAM DVDVM CELEBRARVNT

EXTERI AEQVI

SECUNDUM
OPUSCULORUM
VOLUMEN

INSTA PIGNORIS
OBSERVANTIAE PERENNIS

CONSECRAT

AUCTOR

T I T V L I
 COMMENTATIONVM
 VOLVMINIS SECVNDI.

XI. De Ascaride lumbricoide	Pag. I.
XII. De limitanda laude librorum medicorum practi- corum vsui populari destinatorum	47
XIII. De Catechu	77
XIV. De dulcium natura et viribus	139
XV. Spinae bifidae ex mala ossium confor- matione initia	191
XVI. De medendi tineae capitis ratione paralipomena	223
XVII. De tempore exhibendi emetica in febris intermitten- tibus maxime opportuno	255
XVIII. Vindiciae nominum triuialium stir- pibus a Linneo Equ. impertitorum	293
XIX.	

-
- XIX. Praestet vno medico an pluribus
iunctim vti ? 333
- XX. De vermibus in lepra obuiis iuncta
leprosi historia 351
- XXI. De lumbricorum fetis 401
- XXII. De materia arthritica ad verenda
aberrante 413
- XXIII. Succi Aloës amari initia 471
-

XI.

DE

ASCARIDE LUMBRICOIDE

L I N N.

VERMIVM INTESTINALIVM

APVD HOMINES

VVLGATISSIMO



DE
ASCARIDE LVMBRICOIDE

L I N N. *)

§. 1.

Serius enituit naturae scrutatorum in vermium historia expolienda sagacitas, quam reliquorum animantium, et adhuc in multis eiusdem momentis cespitat, siue characteres, quibus ab affinibus haec animalium classis distinguitur, consideres, siue discrimina, quae ordinem, genus vel speciem, condunt, siue specierum numerum. Innumera insuper nos latent de structura horum interna, generationis modo, genio, vitae genere.

Possem hoc, nisi prolixitatem nimiam metuerem, multis exemplis comprobare. Ex hisce elucesceret, esse vermes, qui loco saniei albidae verum sanguinem rubrum vehant, alium quendam *a*), cuius arteria rubrum, vena album, continet;

A 2

*) Dissertatio acad. a. 1779. publici iuris facta.

a) *Nais digitata* MÜLL. descripta in EIVSD. *Verm. terrest. ac flumiatil. Hist. Vol. I. P. 2. p. 23.*

tineat; non male quibusdam caput adscribi, ratione vel habita oris, vel organorum sensoriorum quorundam, gustus scilicet ab ore vix separandi, visus siue tactus, cui inserviunt tentacula, vel prominulae cuiusdam partis antice conspiciendae, vel confluxus cuiusdam cirrhorum, pilorum, barbae rel. antice notabilis, vel extremitatis progressus initium capientis, licet vix ulli vermium cerebrum loco quodam protuberante, ut in perfectioribus animalibus, collectum suisque organis sensoriis instructum, tribui possit, quum vermibus potius substantia medullae spinali analoga competat. Pateret inde, non omnes vermes pedibus destitui, sed in quibusdam horum vicibus setas perfungi; quosdam esse hermaphroditos, alios sexus duplicis, quosdam viuiparos, alios, et plerosque quidem, ouiparos; amplioris ambitus, quam vulgo creditur, esse mirabilem illam eorum propagationem, quae diuisione transuersa partium vel natura vel vi absoluitur, et redintegrationem membrorum illis ablatorum. Constaret porro, aliquot vermes, a LINNEO ad Intestina sua relatos, maiori iure Molluscis adsociari; non satis aptum esse cl. ADANSON aliorumque quorundam consilium, conchyliis secundum vermis latentis indolem disponendi, quum de multis testaceis vera vermis forma adhuc lateat, rara insuper opportunitas contingat, vermem succosum in testa examinandi, et indago vermis saepe haud sine elegantissimae testae diffractione vel iactura fieri possit; nec Lithophyta ad Hydras vel Nereides rel. reduci posse, nisi examen in locis natali-

natalibus instituat, vbi vermiculi lapideam materiem inhabitantes succosi et expansi sunt. Quantum vero inconstantiae adhucdum obtineat in generum ac specierum limitibus constituendis, mox apparebit cuilibet, vel vnice *Elenchum Zoophytorum* ill. PALLASII et *Historiam vermium terrestrium et fluuiatilium* ill. OTT. FRID. MÜLLERI cum systemate b. LINNEI conferenti. Specierum numerus, prout in generibus diu iam cognitis posteriori tempore insigniter creuit; ita nominatim infusoriorum vermium tribus recentiori multorum studio valdopere aucta, qui vermes tam despecti adeo habiti, vt serius longe, quam alii, indicibus vniuersalibus mandarentur.

Sed non est, vt ob hosce reliquosque supra indicatos defectus oscitantiae indagatores naturae reos faciamus, sed horum causae in ipsa vermium indole potissimum quaerendae. Obstacula haud exigua parit polymorpha eorum natura, exigua multorum moles, difficilior extincta vita conservatio. Maximam vero difficultatem pariunt remotissima et alienissima a nostris vermium habitacula, dum nimirum vel ex oceani abyssis vel abditis terrae cryptis petendi sunt, vel putrido fomite delectantur. Multi quoque non nisi extispiciis animalium diuersissimae naturae, praesertim piscium, vel spontaneo ex hisce secessu, innotuere.

§. 2.

Sed de vermibus in intestinis hominum nidulantibus iure quodam nostro videmur accuratiorem et certiore notitiam, quam de vlla alia vermium tribu exposcere posse, siquidem hosce, vt vulgatissimam morborum causam, cuilibet medicorum scrutandi, tam apud aegros, quam in cadaueribus, commodissima occasio suppetit, nec ea illis exilitas corporis contingit, quae tot aliis. Negari etiam nequit, sub felici isto historiae naturalis cum medicina connubio, quod recentiori aetate merito arridet, multa de horum structura, vitae genere, propagationis modo, rel. in lucem fuisse producta, quae antea delituerant, erroresque multos fuisse discussos, qui antiquitus de hisce inualuerant, vltiori adeo sagacitate species quasdam nouas intestinales praeter vulgo cognitae fuisse detectas. Ast dolendum nihilominus, in horum cognitione multas adhuc superesse lacunas, et super variis momentis ambiguum reddi animum diuersitate effectorum virorum, aliis nominibus celebratissimorum.

An eadem species, quae in primis viis hominum sedem figunt, etiam extra corpus humanum vel apud bruta vel in rebus vita cassis vere reperiuntur, nisi de omnibus, certe de quibusdam, adhuc disputatur. Quidam admittunt de vna vel altera specie in brutis quoque occurrere, alii, ne hoc quidem concedentes, hominum intestinis hosce vermes peculiares esse sustinent. Ascaridem vermicula-

micularem LINNEVS *b*) in paludibus, in radicibus plantarum putrescentium, vti et in intestino recto equorum, obuam venire asserit, in piscibus, Gado Callaria et Gado Lota, Suecus quidam medicus, FAXE *c*): sed ill. PALLAS *d*) ortum Ascaridum minutarum valde incertum pronuncians, eas a vermibus bulbos plantarum depascentibus et palustribus distinguit, et adhuc serius diligens harum observator cel. PHELIVM *e*) maxime dubitauit, an vnquam istae extra animale regnum procreentur. Hisce intestina tantum crassa, nominatim rectum, vulgo sedes tribuuntur: sed et ascendisse in ipsum ventriculum insignem earum cateruam vomitu, per sal vesicum copiose ingestum fuscitato, memorabile exemplum legitur *f*). Dum LINNEVS Taeniam in ochra acidulari Iaernensium, TISSOTVS in fonte quodam Heluetico, MENNANDERVS in palude, VNZERVS in puteo, se conspexisse referunt; alii *g*), Taenias animalibus genuinas declarantes, arbitrantur istas ab animali quodam illuc excretas, vel ex intestinis piscium profectas, et dubitant, an in aqua vitam suam producturae fuissent. Sectio cadauerum, et Taeniarum per vomitum non omnino rara expulsio,

A 4

pariter

b) *Syst. nat. T. I. Ed. 12. p. 1076.*

c) *Provinc. med. Berättelser, Fortsättning p. 282.*

d) *Diff. de insectis viuientibus intra viuientia in Thes. Diff. SANDIF. Vol. I. p. 259.*

e) *Hist. physiol. ascarid. p. 73.*

f) *Medical Transactions, Vol. I. p. 53. seq.*

g) PHELIVM *l. c. p. 73.* PALLAS in *n. nordisch. Beyträgen, Vol. I. p. 41. sq.*

pariter docent, eas non crassa tantum intestina inhabitare. Mouebantur adhuc ante aliquot annos dubia contra vulgarem sententiam, quod vermes cucurbitini non nisi articuli Taeniae disiuncti sint, istique sua, quod minus credibile, specie diuersi reputabantur *h*). Et licet sint, qui singularem articulum in integrum vermem succrescere posse putant, nuperrimis tamen effatis confirmatur, quod LINNEVS iam a. 1748. apertis verbis declarauit, incrementum Taeniam capere in extremo tenuiori nouis articulis in conspectum prouenientibus, siue iam exstiterint minutissimi, siue serius ex germine latente protrudantur.

Notissima sunt de Taeniae capite discidia: non amplius quidem litigamus, qualis pars ita dicenda sit, sed etiamsi in quadriga tuberculorum veram eius naturam iam ponamus, in omnibus tamen speciebus hactenus detegi non potuit, (e. g. non in Taenia vulgari LINN.), nec certo adhuc constat, an intra haec vel in horum fastigio oscula exstent; ita nondum plane euictum, quod oscula articularum modo transmittant oua, nec iisdem simul et vis nutrimentum hauriendi, quod valde probabile, competat *), vt de aliis sententiarum diuortiis et lacunis, quae adhuc supersunt in Taeniarum historia, nihil dicam. Fac vero, singulas species vermium intestinalium et extra corpus huma-

h) Vid. e. c. CONSOLIN in *Journ. de med.* T. 20. p. 445.

*) Vid. ill. PALLAS solida argumenta in *n. nord. Beytr.* Vol. 2. p. 69. 72. sq.

humanum fuisse visas, et, prout vulgo existimatur, cibo potuque vel ouorum vel minutorum vermium forma intestina nostra ingredi: memorabile tamen, praeter Fasciolae duo exempla, quorum vnum recensuit Eques A ROSENSTEIN *i*), alterum MONTINVS *k*), et praeter Gordium, nullam aliam speciem vel in cibo culinaria arte praeparato, vel in potu haustrui destinato, repertam. Nonne iam ex hocce argumento, vt alia multa graua hic reticeam, valde probabile fit, quod recentissimi helminthologi tantopere vrgent, vermes vel eorum oua nobis connata esse. Interim etiam audiendus ill. PALLAS *) est, qui non dubitat, oua quoque vermium extra corpus disseminari posse, absque iactura vitae suae varias mutationes sustinere, et dein, quando cum cibo potuque iterum in comoda corpora delata fuere, in vermes succrescere. Ad generationis vermium et vitae generis abditas leges enucleandas anatome omnino quam plurimum confert: sed si vnicam Ascaridem lumbricoidem excipias, in cuius structuram iam dudum sollerter inquisitum est, de reliquorum fabrica, microscopio et artificiosa sectione eruenda, non nisi proximis hisce annis accuratiora cognouimus, vt tamen supersint vermes, e. c. Fasciola, Gordius, quorum interna structura nos adhuc latet, et in ipsa Ascaride lumbricoide adhuc sexus diuersitas ill.

A 5

MÜLLERO

i) Von d. Kinderkrankheiten, Ed. mea 4. p. 46. et nota subiecta.

k) Vet. Acad. Handl. 1763. p. 115.

*) V. n. nord. Beyträge Vol. 2. p. 80.

MÜLLERO dubia videatur. Attamen haec animalcula ob noxas, quas generi humano inferunt, si quae vnquam, SWAMMERDAMIORVM indagine dignissima sunt.

Practicis praeterea non leue in diagnosi incommodum parit, quod vermes tot mala pariant, quae saepenumero a causis longe diuersis oriuntur, ita vt pro axiomate iure habeatur, nullum fere morbum, vtut grauem, existere, quin natales suos a vermibus ducere posset; vnde, si qua subitanea atroxque aegritudo absque alia notabili causa incidit, vel morbus natura sua mitis insolitorum symptomatum satellitio stipatur, sagacior quilibet suspicionem latentium vermium concipit. Imo etiam si vulgares maxime istae molestiae ex vermibus, vt pruritus narium, annulus coeruleus circa oculos, salivae affluxus iusto copiosior ad os, pavor in somno, mutabilis faciei color, foetor oris, fames dira ante ientaculum captum, intumescencia abdominis, colici dolores, conuulsivae affectiones, reliqua, sentiantur: haecenus non licet ex hisce solis ad veram vermium praesentiam concludere, donec per os vel alium vere reiectos fuisse constiterit. Taenia nominatim easdem multiformes scenas excitat, quae in malo hysterico vel hypochondriaco alias occurrunt, tantoque facilius imponere etiam peritioribus medicis potest, quoniam diu saepe sine partium vel articulorum aliqua separatione intra canalem intestinale nidulatur. A similitudine sine dubio cum pruritu infimae intestini recti

recti partis, perinaei et genitalium vtriusque sexus ex *Ascaridibus*, *Ascaridodea HIPPOCRATIS* 1) nomen suum traxerunt. — Et quum experientia constet, non vnā eandemque medelam cuilibet vermium speciei tollendae sufficere, optabile quam maxime esset, symptomata habere perspecta, quibus altera species ab altera distinguatur; sed et haec hucusque nos deficiunt.

§. 3.

Quidquid vero horum defectuum sit, nullus aegrius naturae obseruatoribus condonatur, quam quod, ne in ea quidem singulare vermium intestinalium momenta sufficienter inquisuerint, vel in iis non omnino conueniant, quae extrinsecus obuia sponte quasi oculis sese exponunt, et ad discernendam rite speciem faciunt, qua in re si qua labes obtinet, historiam totam vermis mancā futuram, nec symptomatum modum causamque iuste posse explicari, nec ipsam curationem nisi infirmo fulcro inniti, sponte intelligitur. Valet hoc praecipue de verme, qui *Lumbricus* a practicis dici solet.

§. 4.

Veterum in cognitionem non nisi tres vermium intestinalium species venerunt; quo in numero medici tantum non omnes ad LINNEI vsque tempora substiterunt. Suntque hi

1) *Lum-*

1) Vid. BRENDÉLII *Progr. Ascaridodea Hippocratis interpretans.*

1) *Lumbricus*, qui vel simpliciter ita vocatur, vel, quod consuetius, *Lumbricus teres*, item, quod non satis apte, *Lumbricus rotundus* denominatur, Graecis ἑλμινσ τρογγυλα, vnde nomen Gallicum le Strongle ortum; *Ascaris lumbricoides* LINN.

2) *Taenia*, siue *Lumbricus latus*, Graecis ἑλμινς πλατεια; cum *Vermibus cucurbitinis*, quos similitudine Σικυρ σπέρμα referre iam annotauit HIPPOCRATES. Et pauci modo anni effluxerunt, quod de Taeniarum structura functionibusque partium cum propagationis et incrementi vermium modo certiora cognouerimus, intra quod temporis spatium obseruationes sollertissimae PALLASII, MÜLLERI, BLOCHII, GOEZII, WERNERI, in publicam lucem prodire, quorum quoque cell. virorum operosae indagini debemus, quod quatuor Taeniae species a LINNEO descriptae et hominum intestinis adiudicatae, scil. *Solium*, *vulgaris*, *lata*, *canina*, multarum aliarum in animalibus repertarum sodalio locupletatae sint.

3) *Ascaris*, Ασκαρις, quod nomen male in vermibus cucurbitinis designandis COVLETVS adhibuit; *Ascaris vermicularis* LINN.

Sed ferius hospitem horum infestorum numerus auctus.

4) Accessit LINNEO auctore *Lumbrici terrestris* Varietas γ, *Lumbricus intestinalis* LINN.

5) *Fascio-*

m) *Syst. nat. Ed. 12. Tom. I. p. 1323.*

5) *Fasciola intestinalis* LINN. autem iam a. 1748. in Differtatione de Taenia n) inter reliquos vermes significata prodiit, licet rarissime apud homines exstare referat, quae tamen raritas certe in Hallandia et Scania locis syluestribus, vbi copia piscium lacustrium vescuntur, non locum habet o).

6) *Gordius*, qui argillaceo LINN. simillimus excepto colore, vtqui in humano niueus, non vt in altero flaescens, est, cl. medici ANTONII ROLANDI fil. MARTIN p) tristi praecipue in proprio corpore experientia confirmatus.

7) Inter omnes vero vermes rarissime et ferissime Trichuridis RÖDERERI mentio facta est.

Omitto ex intestinalium censu mirum quendam vermem longitudinis 18 ad 20 pollicum et, vbi latissimus est, pollicis sesquialterius diametri, teretem, versus extrema angustiolem, instructum capite graciliori oblongo antrorsum complanato, ore triangulari, articulis vltra duas lineas amplis et quasi inflatis, sanguine scatentem, quum hic ipse hepatis potius quam intestinorum incola censendus sit. Nam licet ille post dirissimos dolores aliasque graues affectiones vno exemplo *) vita aegri superstitite et subsequente sanitate per aluum secesserit, alio

n) *Amoen. acad. Tom. 2. p. 63.*

o) MONTIN in *Vet. Acad. Handl. 1763. p. 115.*

p) Vid. *Vet. Acad. Handl. 1771. inde a pag. 261.*

*) PAISLEY in *Medical Essays and Obs. of Edinb. Vol. 2. p. 333. sqq. Tab. 4. fig. 1. 2.*

alio *) morte post biduum pedissequa; in isto tamen icterus praecessit, et in hoc hepar exesum apparuit, et ductus hepaticus et choledochus valde dilatatus. Non memini plura similia exempla mihi obuiam venisse, praeter illud non satis accurate descriptum a CYPRIANO MAROJA apud CLERICVM **), qui ipse MAROJAM reprehendens, quod pro verme habuerit, polypum declarat. Licet me quidem non lateat, polypos saepe obseruatoribus imposuisse, vt vermes conspiceret se crederent: longe magis artificiosa horum hospitum structura tamen apparet, nisi in descriptionibus vel iconibus vitium subsit, quam vt polyposa istis natura tribui posset.

§. 5.

In hoc vermium numero magna intercedit similitudo inter Fasciolam dictam et Taeniam, quae vtraque plana est, itemque versus alterum extremum insigniter angustatur; vnde historiam, quam de Taenia viua, in pisce Brama cocto per prandium cum aliis hospitibus conspecta, ill. A ROSENSTEIN narrat (vid. §. 2.), ad Fasciolam ill. A LINNÉ q) refert. Sed in Taenia articuli adsunt, in Fasciola desunt. Maiori vero adhuc similitudine iunguntur Lumbricus (praecipue si et de terrestri sermo sit) et Ascaris lumbricoides. Quae tanta est, vt et celebratissimi

*) BOND in *Medical Observ. and Inquiries Vol. I. p. 68. Tab. 2. fig. 2.*

**) *Hist. lator. lumbric. p. 280.*

q) *Syst. nat. Ed. 12. T. 1. p. 1078.*

fimi naturae indagine viri plerique vel in dignoscendis iis vermibus impegerint, vel saltim omiserint in scriptis notas, discernendis iis omnium reliquarum aptissimas. Vnde partes, quae vni horum tantum competunt, saepe et alteri affinguntur, et alteruter effectuum malignorum quorundam in corpore nostro reus fit, qui ob fabricam diuersam ab eo concitari nequaquam possunt. Conueniunt scilicet longitudine praecipue et figura tereti inter sese quam maxime. Quibus vero momentis differant, in sequentibus iunctim significabo.

§. 6.

Lumbricum terrestrem (Germanis Regenwurm) et vulgatissimum istum vermem teretem spithamae circiter longitudinis, in intestinis nidulantem (Germanis Spuhlwurm), notum est ill. LINNEVM *r*), non specie sed varietate tantum differre, sustinuisse. Varia quidem contra arctissimam hanc cognationem mota sunt dubia, in quae quilibet sine amplo scrutinio incidere potest, scilicet cingulum istud, plerumque in terrestribus obuium, deesse vulgari intestinali, hunc proxime dictum esse attactu rigidiores, non ita arctare et vicissim expandere posse annulos ac alterum, non colore bruno sed ex albido carneo tinctum esse, destitui demum setis in terrestri haud aegre in inferiori eius secundum longitudinem parte conspiciendis. Sed sunt, quae regeri contra haec posse aliqua specie veritatis visa fuerunt. Quod ad cingulum dictum Lumbricorum terre-

r) *Syst. nat. p. 1076. Amoen. acad. Vol. 5. p. 134.*

terrestrium, extremo antico propius, attinet: LINEVS illud maunlt dici annulum carnosum, rectissime autem ephippium dicitur, quoniam deorsum corpus eo non tegitur. Hoc licet plerumque vermes hi instruantur, non tamen perpetuo in hisce adest. Mihimet ipsi aliquoties Lumbrici terrestres obuenerunt, quauis ephippii nota destituti, idemque contigit aliis *). In ambiguo autem relinquo, an ab anni tempore hic defectus dependeat, an ab aetate tenella, quod quodammodo eo probabile fit, quod minoris magnitudinis hi, quos vidi, vermes erant, et ephippium hocce tanto manifestius est, quo maior vermis existit; vel an coeundi tempore modo adsit †). Imo ephippio non omnem vermem tere-tem intestinalem carere, patet ex obseruationibus cl. VAN PHEL SVM ‡) et VAN DEN BOSCH §), quorum ille exemplum eiusmodi delineat, hic semel simile se vidisse refert. Victus, temperies aëris et ratio habitaculi, in quo versantur, colorem et mollitiei corporis gradum mutare potest, prout REDI ¶),

Lumbri-

*) MÜLL. *verm. terrestr. et fluuiatil. Hist. Vol. 1. P. 2. p. 23.* WICHMANN in *Beschäftig. d. Berl. Gesellsch. naturf. Freunde, Vol. 3. p. 231.* BLOCH *Abhandl. v.d. Eingeweide - Würmern, p. 29.*

§) In tenellis vermibus non praesto esse et tempore coeundi modo comparere, auctor est cl. BLOCH (l.c.): ast rarissime in maioribus deficit hoc cingulum, vt. si ista obseruatio vera sit, per totum fere annum coitum ab iis exerceri, crederes.

‡) *Verhandeling over de Wormen, p. 163. Tab. 5. ex citatione cl. V. D. BOSCH.*

u) *Hist. constit. vermin. p. 12. seq. in nota.*

v) *Observ. circa animal. viv. in corp. animal. viuor. p. 156.*

Lumbricos terrestres ex mora sedecim ad viginti dierum in aqua albidos euasisse, dein in terram iterum immisos pristinum colorem recuperasse, obseruauit. Setarum autem Lumbricorum terrestrium vera indoles haud ita pridem modo rite innotuit. Indagine enim mea α) constitit, non trifariam eos, vt LINNEVS voluit, nec quadrifariam, vt RAIVS, WILLISIVS, PALLAS, esse aculeatos, sed octifariam, hoc est, quatuor paria setarum subtus decurrere per totum corporis tractum excepto ephippio, hasque non retrorsum dirigi, sed triplicem plagam respicere, et ita esse mobiles, vt lumbricus mox easdem emittat, mox retrahat. Ab harum setarum praesentia b. LINNEVS argumentum adeo combinandi terrestres et intestinales Lumbricos desumit: quum contra ea alii in intestinalibus teretibus longis setas istas nunquam se conspexisse asseuerant; e. c. TYSON y), PALLAS α), et b. VOGEL a). Sed ex reliquis notis ab istis additis, non varietatem Lumbrici terrestris, sed Ascaridem lumbricoidem LINN., istos cell. viros ante oculos habuisse, manifestum est.

§. 7.

α) MURRAY *Observat. de vermibus in lepra et lumbricorum fetis*, p. 67. sq. Vid. et intra *Opusc. Vol. 2. Commentatio 20.*

y) *Phil. Trans. Vol. 13. p. 155.*

α) *Diff. cit. in Coll. SANDIF. p. 259. 260.*

a) *De cognosc. et curand. morb. p. 644.*

Opusc. Vol. II. B

§. 7.

Quum igitur tam facile sit, in dignoscendo utroque verme errorem committere: sciendum, *Lumbricum verum* eumque terrestrem vno extremo esse manifeste obtusum, altero acuminatum, si extenditur, omnino quidem esse teretem, si autem contrahitur, subtus esse planiorem, quin, versus obtusius extremum s. posticum, angulatum, segmentis constare, secundum LINNEVM centum, secundum aliorum computum autem pluribus, ephippio plerumque cingi eum locum occupante, quem, si deficeret illud, annuli 26tus et sequentes ad 30-um occupaturi essent, setis demum numerosis significatis constare. Hae notae cuilibet attentiori mox et sine operoso illo scrutinio sese repraesentant, et sufficere poterunt, ita vt non opus sit, alias magis abditas persequi. Quoniam vero icon accurata ad cognitionem huius vermis plurimum confert, citare licebit eam, quam ipse adornaui nec fide nec elegantia destitutam *b*). Auctoribus vero, qui de eo egerunt, colligendis peculiarem operam impendit cel. MÜLLER *c*). Sed praeter dicta discrimina externa, quoad sexum et internam structuram, multa in lumbrico terrestri alia sunt. Hermaphroditici generis esse, dubio vacat. Viscerum internorum eiusdem situm, figuram, functiones, penitus cognoscere qui gestiant, hisce satisfaciunt diligentissime haec omnia scrutati WILLIS *d*) et

REDI

b) Vid. *Obs. meae cit. Tab. 2. et Opusc. l. c.*

c) *Verm. terrestr. et fluviatil. hist. Vol. 1. P. 2. p. 24.*

d) *Exercit. de anim. brut. p. 21. sq. Ed. Genev.*

REDI *e*), quorum posterior etiam testatur, a ver-
mibus figura similibus, in hominum vel animalium
intestinis obuiis, haec viscera discrepare insigniter,
assentiente ex propria autopsia ill^{ri} VAN DOEVERN *f*).

§. 8.

Transgredior ad *Ascaridis lumbricoidis* LINN.
descriptionem, eam praecipue, quae practicum
usum secum fert, de genere ipso primum dicturus.

Non dubito illi characteri generico suffragari,
quem ill. A LINNÉ *g*) in medium protulit, corpore
nempe tereti filiformi, vtraque extremitate attenuato,
hoc genus distingui. Cel. MÜLLER *h*) vocat ge-
neratim vermem altera extremitate attenuatum,
quae descriptio eatenus mihi nonnihil displicet,
quod et ad Lumbricum terrestrem applicari potest.
Fateor, hoc genus vermes coniungere ore diuersos,
sed nihil ad rem, quum discrimina ista in quibus-
dam sine microscopio non detegantur, et omnino
notae istae praeferendae, quae oculo sponte sua
sefe representant.

§. 9.

In Systemate LINNEI mentio fit tantum dua-
rum eius specierum, quae ipsae sunt:

B 2

1.) *Asca-*

e) *Observ. circa animal. vivent. p. 132. sqq.*

f) *Diff. de verm. intestinal. p. 14.*

g) *Syst. l. c. p. 1076.*

h) *L. c. p. 34.*

1.) *Ascaris vermicularis*; pollicaris LINN. *Syst. nat.* p. 1076. Pollicis igitur longitudinem modo pro differentia specifica notauerat. Equidem dicere eam malle *pollicarem seta caudae nulla*. Caudam itaque eius dubito setaceam cum MÜLLERO vocare, sed maiori iure arbitror subulatam posse dici, qua voce in descriptione etiam ven. GOEZE vititur. Ample hancce intestini recti vulgarem hospitem tam physiologice quam pathologice descripsit cl. PHEL-SVM i) et adiutus microscopio figuras quoque eius praestitit, praecedentibus omnibus elegantiores. Huius ope finem anticum reperit crassiorum altero et non nihil obtusum, quae tamen diuersitas non pugnat contra characterem generis, quum gradus attenuationis extremorum varius esse possit, ipse praeterea PHEL-SVM vermem media parte crassissimum agnoscat, et extremorum ista discrepantia vix nudo oculo appareat. Aliorum vero momentorum, quae extrinsecus comparent, varia eum vel perperam obseruasse vel plane neglexisse, nuperius cel. GOEZE *) nos edocuit. Sic cl. PHEL-SVM ori aperturam transversam tribuit, quum e contrario vermis antice tribus tuberculis et canali fuctorio terminetur; et fini posteriori articulos et secundum vnicum exemplum aliquid pedunculorum simile adscribit. Quod vtrumque illis denegat oculatissimus GOEZE. Hic insuper sexum distinguere voluit, interna viscera sollertissime scrutatus, unde et colligitur vermem hunc viuiparum esse.

2.) *Asca-*

i) *Historia physiologica ascaridum, cum figg.* Leouard. 1762. item *Hist. ascaridum pathologica*, 1765.

*) *Versuch e. Naturgeschichte der Eingeweide-Würmer.* p. 97. 102. sqq. Tab. 5.

2.) *Ascaris lumbricoides*; spithamea. LINN. *l. c.* p. 1076.

Ascaris antice acuminata. MÜLL. *verm. Hist. Vol. I. P. 2. p. 35.* ID. in *Hann. Magazin* 1773. n. 27.

Lumbricus teres. TYSON in *Phil. Transactions Vol. 13. n. 147. p. 154. fig. 1-4.* quae partium internarum praecipue rationem habent.

Lumbricus teres. REDI (Versio Lat.) de *animalculis vivis in corpor. animal. viv. p. 49. Tab. 10. fig. 1-4.*

Vermi tondi de' Vitelli e degli Uomini. VALLISNERI *Opere fisico mediche Vol. I. p. 271-282.* quorum effatorum maior pars ad vermes vitulorum pertinet, qui et soli *Tab. 34. 35. depinguntur.*

Lumbricus teres. CLERICI *Hist. lat. lumbr. p. 218-251. Tab. 4. fig. 1-4. Tab. 10. 11.* Hic modo REDI et VALLISNERI observationes Latine versas sistit, eorumque figuras maiori elegantia transcribendas curavit.

Lumbricus intestinalis humanus teres. KLEIN *Tentam. herpetol. p. 62. Icones Tab. 1. fig. 3. Tab. 2. fig. 1-7.* spectant ad vermes lupae.

Lumbricus intestinalis. PALLAS *Diff. de infest. vivent. intra viventia* in SANDIF. *Thef. Diff. Vol. 1. p. 258.*

— — PHELSUM *oyer de Wormen Tab. 4. fig. 5. 6.* (teste WERNER.)

Ascaris lumbricoides. ODHELIVS in *K. Vet. Acad. Handl. 1776. p. 140. sqq. Tab. 4.*

Ascaris lumbricoides. BLOM *l. c.* 1776. p. 313. *sqq.*
Tab. 8. fig. 1. 2. A. B.

Stomachida. PEREBOOM *descriptio et iconica delineatio
 noui generis vermium, Stomachidae, cum Tabula.*
Corruptela modo discrepare a nostro arbitror.

Spuhlwurm, Ascaris Lumbricoides. BLOCH *von den
 Eingeweide - Würmern*, p. 29. *Tabulae adiectae*
pertinent ad vermes brutorum.

Ascaris lumbricoides. WERNER *verm. intestinal. expo-
 sitio*, p. 75. *fig. 144 - 158.*

Ascaris hominum, der menschliche eigentlich so
 genannte Spuhlwurm. GOEZE *Naturgesch. der
 Eingeweide - Würmer*, p. 65. Hic pariter nonnisi
vermes brutorum depingit.

Vtut multae de *Ascaride lumbricoide* imagines
 comparuerunt, paucae tamen ad vermes huius
 speciei in hominibus reperiundos spectant; nec si
 istas figuras, quas TYSON et WERNER praestiterunt,
 excipiam: reliquae labe sua carent. Reliqua ad
 historiam eius pertinentia mox iunctim complectar.

Serius receptae sunt a LINNEO duae aliae
 species, scilicet

3.) *Ascaris trichiura*; cauda capillari longitu-
 dine corporis. LINN. *Mant. plant.* 2. p. 543. Equi-
 dem illam describo per *Ascaridem pollicarem seta
 caudae filiformi corpus duplo excedente*. Est haec ipsa
Trichuris ROEDERERI, quam iste primum Gottingae
 hieme a. 1760. et 61. in cadaueribus humanis de-
 textit,

textit, et de qua paullo post coram Societate Reg. scientiarum Gottingensi *k*), exposuit. Postea illam cell. WRISBERG *l*), WAGLER *m*), WERNER ***), BLOCH ****), GOEZE *****), descriptionibus sollerti- bus et passim elegantibus delineationibus ab obli- vione vindicarunt. Addendum est, ill. PALLAS † partem, quam cum aliis indicatis obseruatoribus caudam dixi, pro antica parte vermis habere, assentiente GOEZIO. Mirum, quod tam sero ana- tomicorum attentionem in se conuerterit, quum ta- men ill. WRISBERG †† in omnibus fere cadaueribus illam reperiri innuat, et Brunsvigae quoque, Lipsiae, Berolini et alibi, visi hi vermes fuerint, etiam in animalibus quibusdam, nisi in hisce, vtut similes, specie discrepauerint.

4.) *Ascaris sesquipedalis*. LINN. *Mant. plant.* 2. pag. cit. Triuiale nomen differentiam specificam etiam absoluit. Refert beatus vir, esse albam, crassitie fili, et granis quasi albis refertam. Mihi ceteroquin ignota.

B 4

§. 10.

k) *Gelehrte Anzeig.* 1761. n. 25.

l) *Obseruat. de animalc. infus.* p. 6. sqq. item EI. *De- scriptio trichuridum* in praefatione Ed. 2. WAGLERI *Tract. de morbo mucoso*, 1783.

m) *Diff. de morbo mucoso*, p. 41. sqq. *Tab. 3. fig. 4. a. b.*

***) *Loc. cit.* p. 85. *fig. 138-143.*

****) *Loc. cit.* p. 32. *Tab. 9. fig. 7-12.*

*****) *Loc. cit.* p. 114. *Tab. 6. fig. 1-5.* quae figurae omnibus reliquis praestant.

† *N. nordisch. Beytr.* Vol. I. p. 111. GOEZE l. c. p. 113.

†† *Praefatio ad libr. cit.* p. 6. 8. in nota b.

§. 10.

Ast redeundum ad Ascaridem lumbricoidem. Haec colorem albidum vel in carneum inclinantem prae se fert. Magnitudine nonnunquam spithamam excedit, saepe minor, raro ad pedis mensuram peruenit. Quo plures numero, eo mole minores esse solent. Mas plerumque minor foemina est, vt et inde sexus aliquando probabiliter distinguí possit. Crassitie aequat pennam anserinam. Aegrius ob firmiorem corporis compagem digito prementi cedit, nec sub motu mutua angustatio et expansio annulorum oculis manifesta est. Quadrifariam per totam corporis longitudinem lineae quatuor *) aequali distantia decurrunt, transuersim autem copia circulorum notatur, qui rugas potius annulares quam veros annulos referunt, tamque subtiles sunt, vt in computum redigi nequeant, et in minoribus omnino disparent, ne oculo quidem armato conspiciendi. Si musculosam naturam lineis et circulis dictis adscribere liceat, vt videtur fieri posse, commodior et simplicior structura fingi vix potest ad multiplices vermis motus absoluendos. Longitudinalibus enim fibris annuli propius sibi inuicem accedunt, et motus serpentini perficiuntur; circularibus vermis se potest angustare, viscera contenta comprimere, foeces ouaque excludere; ambarum autem sine dubio iuncto officio gyros peragit et terebrando obstacula sibi obuia vincit. Interrumpitur peripheria annulorum lineis dictis. Corpus ceteroquin illi est omnino laeue et lubricum, neque ephippio

*) WERNER l. c. p. 76.

ephippion cinctum nec fetis ullis abdominalibus, qualicunque modo conspiciatur vel contrectetur, et quaecunque eiusdem sit aetas, quicunque vigor, exasperatum. Hisce notis quum a lumbrico vero discrepet, tum potissimum antico suo extremo discernitur. Scilicet in hoc tubercula vel papillae tres, globosae, occurrunt, basi inter se iunctae, sursum liberae, eiusdem omnino coloris ac reliquum corpus, quarum nexu triangulare spatium formatur, in cuius media parte foramen vel potius tubulus hiat. Ill. PALLAS os trilabiatum vocat; ill. MÜLLER idem designat per apicem tuberculo triplici, item per os papillare. Omnium primus (a. 1676.) eiusdem, ni fallor, mentionem iniecit BORRICHIVS *), qui illud nomine trium verrucularum siue cotyledonum, quibus vermis intestinis adhaereat, significat, et aliquot annos post (a. 1683.) RYSON, qui *their mouth*, inquit, *is compos'd of three Lipps* n). Digna etiam sunt ob accuratorem VALISNERII o) de hac parte verba, quae hic inferantur. "Caput, ait, digitis pressum e limbo interiori descripti circuli (hoc intelligitur extrema annularis particula) tres emittit prominentias subrotundas, optime inter se distinctas, veluti tres monticulos, quorum singulorum superficies, quum sibi inuicem omni ex parte contiguae esse, nisi in paruulo angulo, propter formae suae dispositionem, nequeant, media quaedam inde emergit inter ipsos triangula-

B 5

ris

*) *Aët. med. et phil. Hafn. Vol. 4. p. 157.*

n) *Phil. Trans. Vol. 13. p. 155. fig. 1. 2. a. a.*

o) Vid. CLERICI *Hist. lat. lumbr. p. 224.*

ris cauitas, in cuius centro foramen cernitur, lumbrici osculum, oesophagique principium constituens, quod ipsum fistula quaedam parua est." Conferri cum elegante hac descriptione figurae ab isto praestitae p) merentur. Ista quidem nititur exemplis e vitulis petitis, sed eadem omnia in vermibus humanis deprehendit. Pluries memini, me in humanis, quum de vermibus intestinalibus in praelectionibus agerem, auditoribus iam dudum partem hanc commonstrasse, adeo conspicuam, ut microscopii opé non indigerem. Functionem et vsum horum tuberculorum illustrant ea, quae in verme huius speciei insignioris longitudinis et crassitie equino et in spiritu vini seruato obseruauimus. In hoc super tribus istis tuberculis nodulus obtinuit, qui primo aspectu a tuberculis distinctus videbatur, sollertiori autem indagine in tres partes per easdem fissuras diuisus comparebat, quae sese ad basin tuberculorum terminabant. Hacce conformatione emergebant tria labia, intrinsecus angulo acuto instructa et compagis tam durae et velut cartilaginosa, ut cultelli apex allidens sonitum excitaret. Anterior igitur pars labiorum speciem prae se tulit dentium cartilaginosorum, qui si vulnerent, plagam, triangularis formae, quasi ab hirudinibus, excitent, necesse est. Nodulus iste ante tuberculorum trigam prostrans non in vermibus quidem humanis

p) VALLISNERI *Opere fisico-mediche* T. I. Tab. 34. et elegantiores apud CLERICVM l. c. Tab. 10. vbi fig. 4. os trinode luculentissime comparet. Conf. et *Vet. Acad. Handl.* a. 1776. Tab. 8. fig. C. WERNER l. c. Tab. 6. fig. 145.

humanis existit, sed functio tuberculorum tamen, si versus centrum complicentur et nixu vermis magis indurentur, videtur eadem in hisce esse. Passim enim haecce diduci quasi ex articulo mobili vidit cl. GOEZE *), ut rictus inter haec manifestus conspiceretur, quod dum fieret, subinde emitti tubulum suctorium medium obseruauit. Hisce tuberculis sine dubio tunicam villosam intestinorum apprehendit, dum tubulo medio liquorem nutritium sugit, quin maiori conatu discindere ipsas intestinorum fibras valet. Huic iniuriae tanto facilius par erit, quum, asseuerante GOEZIO, tuberculis hisce media parte incisurae transversales competant; utinam haec quoque depinxisset.

Vt igitur maxime obuia signa vermium, quorum comparatio nostra heic refert, vna complectar: dixerim *Lumbricum terrestrem*, vermem teretem, circiter spithameum, altero extremo attenuatum, annulatum, octofariam aculeatum; *Ascaridem lumbricoidem* autem vermem teretem, circiter spithameum, utrinque attenuatum, rugose annulatum, nudum, ore trinodi.

Praeter hanc speciem REDI q) memorat aliam illi valde similem eiusdem longitudinis sed cauda compressa, quam et cel. MÜLLERVS r) vidit.

§. 11.

*) L. c. p. 67.

q) De animalibus vivis, p. 54.

r) Verm. hist. l. c. p. 36.

§. 11.

Multum omnino luminis etiam medicis affert: scrutinium partium Ascaridis, de qua ago, internarum. Hoc ipso optime perfuncti sunt TYSON *s*), REDI *t*), VALLISNERI *u*), KLEIN *x*), GOEZE ***), WERNER ****), qui ipsi in quibusdam quidem inter se differunt, forsitan ideo, quod quidam istorum, praeter humanos huius speciei vermes, alios apud bruta obuios rimati fuerint: sed in essentialibus partibus conueniunt. Subsistam vero vnice in humanis, licet specie reliqui vix differre videantur, et circa hosce modo de iis internis partibus agam, quarum natura repetitis obseruationibus extra dubium posita est, et ea momenta praesertim illustrare possunt, quae medico scitu sunt necessaria.

Cutis ista rugoso annularis, quae superficiem externam constituit, insigniter crassa est, prout vi, quam culter incidens adhibere debet, et oculo percipitur. Vnde interna viscera obscure tantum perlucet, quum e contrario in vermibus vitulinis gyri isti mirabiles visceris cuiusdam interni hand aegre per cutem distinguantur. Sub cute latere musculum, varii obseruatores memorant, cuius fibras

s) *Phil. Trans. Vol. 13. inde a pag. 154. cum annexa Tab.*

t) *L. c. p. 44. sq. Tab. 10.*

u) *L. c. et apud CLERIC. l. c. t. 11.*

x) *Phil. Trans. Vol. 36. p. 269. sqq. Tab. I. dein in Herpetol. p. 63. sqq.*

**) Eingeweidewürmer, p. 68. sqq.*

****) Verm. intestin. p. 77. sqq. Tab. 7.*

fibras de humano nullibi follerter satis descriptas reperio, in Lumbricis terrestribus TYSON spirales vidit, in Ascaridibus lumbricoideis vitulinis tam longitudinaliter quam transuersim dispositas mirumque in modum contextas VALLISNERI obseruauit. Sub incisione cutis multum laticis submucosi promanat, qui forsitan latet in vesiculis minutis, quales in interiori superficie vermium huius speciei ex lupi renibus KLEINVS inuenit. Profundius si adigitur culter, copia humoris limpidi erumpit, et vna cum hoc canales diuersae latitudinis, quorum subtilissimi gyros multiplici modo tortos et implicatos formant. *Duplicis hi canales generis sunt. Alterum nutritioni est dicatum, alterum generationi.*

§. 12.

*Alimentaris canalis simplex est, originem suam capit ab ore sine tenuissimo, sed mox dilatatur, instar conii per longitudinem ad minimum transuersi digiti, tum recta via secundum TYSONEM aequabilis, REDIVM et VALLISNERIVM autem mox angustior mox crassior, ad anum vsque pergit, qui ipse ostium minutum constituit transuersale prope posticum extremum distantia vnus et dimidia lineae deorsum situm *). Refert igitur canalis hic ventriculum siue intestinum elongatum. Subcandidi est coloris et cauo suo pulticulam continet coloris sublutei, cui plures bullae aëreae immiscentur.*

§. 13.

*) WERNER l. c. Tab. 6. fig. 146. 147.

§. 13.

Alterius canalis siue *generationi inservientis* multo adhuc mirabilior natura est. Si observationibus REDII et VALLISNERI de hac ipsa vnice inhies, hermaphroditos hosce vermes esse crederes. Imo VALLISNERI non veretur eos hermaphroditos peculiaris rarique generis vocare. Vterque vero fatetur in omnibus, quotquot inciderint, formam huius visceris fuisse eandem, sine vlllo vel minimo discrimine. In quatuor duntaxat vermibus deprehendit canalem hunc situ et figura discrepantem: sed arbitratur hosce alius fuisse speciei, vtpote quum et cauda non teres sed circa extremum paullum obtrita ac plana existisset (Vid. supra §. 10. ad finem). Accessit ad horum partes adhuc nuper ill. MÜLLER *), quippe qui, etiamsi tam in maiores quam in minores vermes multos inquisierit, nulla sexus discrimina se detegere potuisse affirmat. Verum dubitari nequit, sexum duplicem distinctum ascaridi lumbricoideae competere, quum, quod praeterito iam seculo fide dignissimus TYSON descriptione et figuris accuratis demonstravit, eodem duplici subsidio nuperrime propria indagine cl. WERNER confirmaverit.

§. 14.

In *foeminis* igitur generationis organi haec est ratio. Lacteo colore tinctum incipit tubo exiguo **), sensim ampliato siue infundibuliformi, qui antice terminatur orificio, tertia circiter parte longitudinis
totius

*) *Vet. Acad. Handl.* 1779. p. 334.

**) WERNER *l. c.* Tab. 7. fig. 155.

totius vermis vel tres fere pollices in linea abdominali ab ore, distante, postice diuarcatur in duo crura ampla. Haec distantia notabili a cauda gracilescunt in canaliculos fila referentes, qui ipsi innumeros gyros mirifice implicatos et hinc inde viscus alimentare obuoluentes agunt, tandem fissa in tria vel quatuor in imo ventre fluctuantia fila desinunt. Ad VALLISNERI mentem canalis hic verme duodecuplo longior est, contra REDIVM, qui quintuplam longitudinem modo eum constituere pronunciauit. Hic et inciso verme mox prorumpit. Crura dicta, *cornua uteri* dicit TYSON, *ouaria* autem nuncupat VALLISNERI, quoniam lentis adiumento referta esse ouorum prodigiosa copia constat; filiiformes canaliculos TYSON et VALLISNERI *vasa spermatica* vocant. Tubus iste infundibuliformis crura iungens apud TYSONEM *vagina uteri* audit. *Vulua* igitur orificium externum eius dici debet. Ouuulorum myriades coaceruatim natant in cornubus uteri intra humorem spissiusculum, semini humano non absimilem, referuntque granulatas particulas extus villosas *), vel, ut TYSON **) eas describit, asperas, quas limpidior humor intercedit, in quarum autem medio linea gyriformis apparet, quod pro futuri animalis stamine, etsi dubitanter, cl. WERNER pronunciat. Haecce tamen in vtero bicorni comprehensa oua imperfecta vel rudimentum ouorum declarat cl. GOEZE ***), perfecta autem inuenit in cana-

*) WERNER loc. cit. fig. 158.

**) Phil. Transf. l. c. fig. 4.

***) GOEZE l. c. p. 69.

canaliculis filiformibus f. vasis spermaticis liquido niuei coloris refertis.

Structura vero *marium* peculiaris, praeunte TYSONE, haec est. *Pene* instruuntur intra posticum extremum recondito, longitudinis fere seminis hordei, tempore coitus emittendo, ad cuius radicem canalis quidam incipit, crassus, sensim progrediendo amplior, lacteum succum vehens, isti cel. viro *vesicula seminalis* dictus. Degenerat hic denique subita contractione in congeriem vasculorum filiformium mirifice conuolutorum, descriptis de foeminis similibus, sed breuiorum. Hanc congeriem *testis* nomine insignit, quoniam complexu subtilissimorum eiusmodi vasorum secretoriorum vera testiculorum natura absoluitur.

Mares esse foeminis rariores, ne verbulo quidem indicat TYSON: cur tamen cll. REDI et VALISNERI in tanto numero, quem inciderunt, non nisi vermes conspexerunt, secundum TYSONEM sexus foeminei notas prae se ferentes? Ratio iam patet, etenim et obseruatione extra Angliam et Italiam repetita constat, foemineos huius speciei vermes masculis longe esse numerosiores, ita vt proportio istorum ad hosce fere vt 100 ad 1 sit *). Id adhuc noto, descriptionem, quam cl. REDI (Vide supra §. 13.) de structurae diuersitate in quatuor istis vermibus, qui et externa forma discreparunt, reliquit, congruere eximie cum ea descriptione, quam de maribus acutissimus TYSON praestitit.

§. 15.

*) GOETZE l. c. p. 38.

§. 15.

Ex illa alimentaris organi et generationis partium adumbratione diiudicari potest pretium asserti quorundam, qui viuiparos hosce vermes asseuerarunt. AMATVS LVSITANVS *y*) ex narratione alius refert, post exhibitum medicamen praegrandem vermem teretem fuisse deiectum, et ex hoc, quum caput eius calcaretur, prodierunt alios vermes. Sed copia exstat aliorum testium, qui idem propriis suis oculis conspexisse sibi videntur. Ita BORRELLVS *z*) inquit, "vermem crassum ab hominis corpore eductum, forteque pedibus exenteratum non sine admiratione vidi vermiculis innumeris refertum esse." In cadauere hydropici PLATERVS *a*) vermes viuos narrat se inuenisse, aliis rursus minoribus repletos. PANAROLVS *b*) adeo meminit vermium ligno collisorum, ex quibus vermes subtiles longitudine sex digitorum prodierint, qui tanquam serpentes parui mouerentur. Adeo ludit interdum imaginationis vis, vt vitam tribuat rebus vita callis!

Qui hosce putatitios vermes, figura, magnitudine, conuolutionibus suis a veris vermibus mirifice discrepantes, nonnisi pro visceribus descriptis, nominatim vasculis istis filiformibus generationi

in-

y) *Curat. med. Cent. 5. n. 46. p. 513.*

z) *Hist. et obs. Cent. 1. Obs. 89.*

a) *Obs. lib. 3. p. m. 657.*

b) *Obs. med. Pentec. 5. obs. 15.*

inferuientibus habet, non errabit. In hac re consentientes habeo plurimos, ex vetustioribus auctoribus BORRICHIVM *), TYSONEM, VALLISNERIVM, ex nuperis SWIETENIVM c), VAN DEN BOSCH d), quibus post praestitam primam huius dissertationis editionem vi observationum numerosarum subscribunt cll. MÜLLER **) et GOEZE ***), ut mirer, quod cl. ODHELIVS e) paucos ante annos adhuc fasciculos extra abdomen in duobus vermibus, quos aquae indiderat, erumpentes, pro argumento assumeret, hosce vermes esse viuiparos, et quod adhuc serius cl. PEREBOOM † adeo huic erroneae sententiae adhaeserit, ut et in titulo commentationis suae significaret agi *de lumbrico, utut mortuo, parturiente*. Quem vero cl. BLOM f) describit delineatque appendicem vermiformem, maiori cuidam vermi ad anum per fila duo adhaerentem, vermiculum eiusdem speciei casu affixum esse, existimo. Iconem adiungo vermis a me ipso delineati, in quo, praeter fasciculum filamentorum, ductus multiplicis generis formantium, longe propendentem, canalis tertiam circiter lineae partem crassus anfractus sui portione notabilii

*) *Acta Hafn. l. c. p. 157.*

c) *Comment. in BOERN. Aph. T. 4. p. 702.*

d) *Hist. epid. verm. p. 11.*

**) *K. Vet. Acad. Handl. 1779. p. 331. sqq.*

***) *Naturg. d. Eingeweidewürmer, p. 11. p. 70. 89.*

e) *K. Vet. Acad. Handl. a. 1776. p. 141. sqq.*

† *De Stomachida. Conf. fig. 6.*

f) *Vetenfsk. Ac. Handl. 1776. l. et tab. supra cit.*

notabili protuberare conspicitur. Prolapsus hicce contigerat tam in hoc verme, quam in aliis tribus, aquae aetate a. 1777. immerfis, post moram aliquot dierum per rimam trium vel plurium linearum, in medio fere corpore comparentem. Canalis dictus crassior vermis depicti coloris grisei, hinc profundioris, quam corpus ipsius vermis, fuit, et vermiculo simillimus, nec ouarium fuit, sed, vt sectione constitit, tubi alimentaris pars, foecibus plena. Vix vnquam arbitror, per orificium istud ad tertiae circiter partis anticae limitem prolapsum viscerum horum fieri, vt quidem SWIETENIVS vult, qui rimae voce hic vtitur, certe perpetuum hoc non est, vt ex meis obseruationibus et figura 2. cl. ODHELII patet. Violentam igitur disruptionem cutis accuso. Haec vero non solum accidit extra corpus animale, quando vermis maceratione in aqua emollitur et expansione aëris contenti vltcrius ad rupturam disponitur. Sed naturalis haecce mutatio est, vermibus in ipsis intestinis adhuc latentibus, per quam oua foecundata ex foeminis aetate prouectioribus in intestinorum cauum excutiantur, quo postea, fauente diathesi corporis, vermiculos excludant. In maribus, quantum notum, intra intestina haec disruptio non locum habet, etiamsi protracta maceratione in aqua accadat *). Sunt et aliae vermium species, in quibus idem phaenomenon viscerum propendentium per rimam enatam visum est **).

C 2

Si

*) GOEZE l. c. p. 11. 89.

**) MÜLLER in *Vet. Ac. Handl.* 1779. v. 331.

Si viuipari hi vermes essent, sane, vt in aliis eius generis vermibus solet, intra peculiare receptaculum sagaces obseruatores viuos vermiculos deprehensuri fuissent, et hi ipsi torculari artificiose fabrefacto et caute applicato exprimi sese paterentur, quorum vero neutrum assequi successit *). Ovipari igitur hi vermes sunt declarandi.

§. 16.

Et hanc Ascaridem lumbricoidem omnium intestinalium esse vermem maxime vulgarem sustineo, et vulgo pro vera Lumbrici specie, quam ill. A LINNÉ varietatem terrestris γ , intestinalem, vocat, haberi. Vnde tot contra LINNEVM insultus, qui, si dicendum quod res est, ad quemlibet alium aeque ac ad eum spectant, quum ille de verme plane diuerso loqueretur. Hic igitur vermis praecise intelligendus, dum practici medici Lumbrici teretis mentionem iniiciunt. Tanquam rariorem eum licet Lumbrico vero, de reliquo satis vulgarem, declarauerit LINNEVS **): hanc Ascaridem tamen vnice TYSON, VALLISNERI, REDI, PALLAS aliique significant, qui sagacitate industriaque singulari vermium teretium longorum humanorum naturam prosequuti sunt. Declaravi iam alibi g), me ad rariores euentus referre verorum Lumbricorum ex primis viis reiectionem, quin fateor, hucusque nunquam alios teretes longi generis mihi obuenisse, quam Ascarides haec.

§. 16.

*) GÖTZE l. c. p. 11.

**) *Amoën. acad. Vol. 5. p. 134.*g) In nota ad ROSENST. *Anw. v. d. Kinderkr. Ed. 3. p. 466.*

§. 17.

An igitur narrata Lumbricorum verorum in intestinis humanis commoratio erroribus vel commentis accensenda? Vetat id iam LINNEI auctoritas. Et nisi existimandum, in vniuersum in Suecia copiosius, quam alibi, Lumbricos veros in intestinis hominum nidulari: saltim tamen agnoscendum, summo viro aliquoties de hominibus excretos obuennisse; an casu deglutitos? Copiose plebem in Suecia Ascaridibus lumbricoideis corripere, tradit cl. HIORTH *h)*. Dubium vero vix est, vermes istos humanos, quos ephippio cinctos conspexerunt cll. PHEL SVM et VAN DEN BOSCH (vid. §. 6.), Lumbricos fuisse. Tanto maiorem fidem merentur, quibus vtrumque genus teretium vermium longorum vna ab hominibus secedens obseruare datum fuit, sub qua opportunitate comparationis suspicio euanescit omnis, ne in denominandis iis error commissus fuerit. Sic narrat ill. A ROSENSTEIN *i)*, infanti quadrienni, emaciato valde et debilitato, post tantillum spiritus frumenti potum quatuor vlnas Taeniae et decem vermes ex Lumbricorum et Ascaridum illis similium genere secessisse. Aliudque eiusmodi exemplum nobiscum communicauit cl. MONTIN *k)* de virgine nobili, quae praeter Fasciolas, Vermes cucurbitinos, Taenias disruptas, aliquot Lumbricos, vti et aliquot Ascarides lumbricoideas per aluum diuersis temporibus ex medicina adhibita exclusit.

C 3

Simul

h) Fortsättn. af Provinc. med. berättelser, p. 131.

i) Lib. cit. p. 470.

k) Vet. Acad. Handl. 1763. p. 113. sqq.

Simul ex hisce elucet, Ascarides nuperrime dictas non semper solas comparere, sed subinde aliarum specierum comitatu esse stipatas.

§. 18.

Puerilem hae praecipue aetatem vexant. Saepe tamen et adultos corripunt, eos praecipue, qui viscosis putrescentibusque cibis vtuntur, vt plerumque infimae fortis homines, et in bellis haud raro milites; et in hisce sese putridis febribus vulgo associare solent, et quibusdam temporibus et aliis morbis, ita vt vix vllus morbus sese absque molestissimorum horum hospitem consortione exferat.

Quo frequentiores numero adsunt, eo minores mole deprehenduntur, sine dubio ob nutrimenti penuriam; et contra. Plerumque magna caterua collecti adsunt, ita vt subinde horum vermium centenos numeremus. ROSENSTEINVS *l*) intra nouem dies vermes 90 (existimo huius generis) a puella expulit. Teste BENIVENIO *m*) infans septennis vermes 152 excreuit. Ad GABVCINI, apud MOVFETVM *n*), testimonium puella, ingesto anthelminthico, 177 vermes deiecit. Et HOLLERIVS *o*) senem octoginta duorum annorum ex MVSA sistit, cui 500 vermes secesserunt. Imo PEREDIA *p*) nouit infan-

l) *L. c. p. 454.*

m) *De abditis, cap. 85.*

n) *Insector. Theatrum, p. 297.*

o) *De morb. intern. lib. 1. in schol. ad cap. 54.*

p) *De curand. morb. lib. 1. cap. 5.*

infantem nobilem, intra aliquot dies millia fere vermium et intra quatuor horas quadraginta vermes deiicientem.

In hominibus intestinum ieiunum praecipue occupant, docente cadauerum sectione, vltra cuius medium haud facile videntur ascendere, nisi copia nimia praesto sint, quae et causa est, cur subinde vomitu reiiciantur, vt in febribus verminosis contingit, imo per nares prorepant. Altiora alias non facile petunt, amaritiem bilis, vt credibile est, fugientes: ad indicatum vero locum chymi gratia potissimum eos allicit, et copia valuularum conuiuentium, quae ibidem exstat, morae opportunitatem praebet. Rarius extra intestina in viscerum aliquo reperti sunt, quorum renes tamen crebrius quam aliam vllam partem domicilium commodasse obseruationibus euincitur. Subinde ipsa intestina perfodiunt, et vel in cauum abdominis cadunt, vel in aliud vicinum viscus irrepunt, vel vlcere in integumentis enato superficiem corporis petunt.

§. 19.

Extra corpus humanum in aliis animalibus sedem subinde hos vermes figere, dubio caret. Nam conspecti in vitulis, equis, suibus, canibus aliisque domesticis, item in feris, vt lupis, vulpibus, tygridibus, phocis, rel. quae studiose significauit cel. PALLAS *q*). Quod magnitudine colore aliisque leuioribus notis hi differant, a nidi diuer-

C 4

sitate

q) Diff. supra cit.

fitate dependere potest. Vix tamen crediderim, specie illos differre. Similes, etsi exiguos, affirmat cl. PALLAS, se in piscibus variis fluuiatilibus vidisse, cl. HIORTH *r*) nominatim in hepate Gadi Callariae, et cl. FAXE *s*) in Perca fluuiatili. Piscium tamen esui non eodem iure hic vermis imputari potest, quo Taenia, quum iste et vulgatissimus sit iis in locis, in quibus pisces rariorem escam constituunt. Quantum constat, extra corpus animale hicce vermis non occurrit. Nam Ascarides, quas in binis fontibus cl. BEIREIS *) se reperisse profitetur, vti et vermis, quem cl. MAYER **) in puteali aqua turbida inuenit, similem, vt putat, treti longo humano, specie ab hoc discrepare videntur.

Mortuos vermes contemplatus, extremum trinode rectum, alterum oppositum autem incuruatum, plerumque reperi; videtur itaque hoc consuetum esse. Sed pluris omnino refert, pernoscere experimenta nonnulla cum viuis hisce vermibus a me instituta. Puellae scilicet quinquenni, cui variolas inferere constitueram, ideoque per interualla aliquot dierum mixturam salinam cum tinctura Rhei propinaueram, secessit versus plenilunium Ascaris lumbricoides absque aliis signis vermium, quam frictione narium subinde contingente, quae vtrum
ex

r) Fortsättn. af Prov. Doct. berättels. l. c.

s) L. c. p. 282.

*) Diff. de febribus et variolis verminosis, resp. HINZE, Helmst. 1780.

**) Abhandl. e. Privatgesellschaft in Böhmen. Vol. 5. n. 4.

ex petulantia an coacte fieret, tum incertum erat. Post tres dies exhibito puluere anthelmintico duos minores vermes eiusdem generis mane excreuit, qui mihi mox post deiectionem allati. Vnus horum maior fuit, alter minor, ambo rigidi, ad aspectum mortui. Minor circularem intorsionem per binos fere gyros postico fine fecerat. Quoniam nouissime redditi erant, spes adhuc superfuit vitae restituendae. Quod vt fieret, aquae tepidae eos immerfi, ex quo tempore post exiguam moram mouere sese inceperunt, incuruari vario modo, mox serpentino mox spirali, vicissim quoque elongari, tum nodos haud ineleganter in semetipsis seorsim, partim et vtriusque amplexu,nectere, demum iterum simpliciores istos motus exercere. Retinueram vtrumque in patina figulina, quae licet non liberum satis spatium motui progressiuo concederet, cognosci tamen satis potuit, extremum ore trinodi instructum esse anterieus, etenim, quum illocum mutaret, porrectum est, et motus serpentine semper ab hoc initium suum ceperunt, et crebrius vermes hoc extra superficiem aquae emisierunt. Refrigerascente aqua eadem portione in maiori verme torpuit motus, quin conquieuit omnino. Rediit vero pristina eorum alacritas, iisdem de nouo tepidae immerfis. Aqua tepida mollescere eos sensi, frigida autem rigescere, instar vermium aëris accessu fruentium. Sub hisce variis motibus crassities tamen vermibus eadem semper ad oculum mansit, simulque longitudo absoluta, nec undulatoria vlla corrugatio superficiei locum habuit; quae omnia

contrario modo in Lumbricis veris se habent. Sensus subtilissimi horum testimonium dedit compressio, qua ipsa alicubi applicata mox sese inflexerunt, manifestius autem irritatio apice cultri vel calami scriptorii peracta.

§. 21.

Ad hunc vermem itaque referenda symptomatum ista cohors effectusque funesti, imo saepe lethales, de quibus practica scripta vberime exponunt. Haecce mala omnia et singula satis iam decantata me piget repetere. Agam tantum de iis, quae confectariorum instar ex descriptis observationibus facile deducuntur, pauca quaedam de auxiliis subministrandis, eadem occasione data, additurus.

Tanquam peculiaria signa, vel si placet pathognomica, hosce vermes prodentia, tormina, praecipue circa umbilicum, et subinde subsultus intra abdomen, considerata sunt *t*). Dolor intestinorum facile explicari potest fabrica tuberculorum istorum siue nodorum trium extremi antici et functione, qua instar forficis intestinorum intima apprehendunt et vellicant, item suctione, quam tubulus intra tubercula reperiendus exercet. Hisce instrumentis instar hirudinis affigere sese possunt vermes simulque intestina irritare. Non inficior tamen, agitationes istas varias vermibus et violentas reptantibus

t) A ROSENSTEIN *l. c.* p. 483.

reptatusque, quales, dum aqua tepida retinetur, conspicimus, dolorosas pariter affectiones posse ciere, et sensum subsultus memoratur. Quod vero molestiae praecipue circa umbilicum sentiantur, ex situ intestini ieiuni clarum fit. Dum similitudine ducti medici vermibus teretibus longis hominum fetas Lumbricorum tribuerent, multas molestias vel sola setarum vi oboriri arbitrati sunt, hasce nempe ad reptatum multum conferre, hisce affigere sese primis viis, stimulare illas, rodere, lacerare, vulnerare, et innumera incommoda creare. Quae omnia mala autem licet eheu vere contingant ab intestinalibus vermibus, aliam causam quam fetas agnoscere iam persuasi sumus, utpote quum setis destituantur vulgatissimi isti teretes. In os eorum trinode culpam cadere, quis iam non videt? Nec dubito, dum perterebrare intestina tentant, quin hocce organo eadem discendant, et vulnere facto, quoniam papillae istae durioris compagis, quam reliquum corpus, sunt, tensae, etiam si obtusae, vi rotantis corporis terebrae effectum praestare possint, tanto magis, quum vermis ea ratio sit, ut rigescendo indurescat, unde obstaculum intestinorum renitentium tandem superatur. Quid vero proxime illos ad iniuriam istam inferendam permoueat, difficile est ad coniiciendum. Spiribus istis perpenfis, quas vermis in aqua tepida format, et nodis istis artificiosis, quos inter se inuicem ibidem nexuerunt, mente facile concipitur, quomodo cauum intestini obturari ab hisce hospitibus possit. Probabile adeo, ita posse neci mutuo,

tuo, vt nodos explicare nequeant, sed adiumento copiosi muci, quem tam vermes ipsi emittunt, quam intestina, compingi arctissime, ita vt nec flatibus nec excrementis transitus vllus pateat, vnde pertinacissimae alui obstructions, vomitiones intensae, ipse ileus, inflammationes cum harum sequelis.

Fertilitatis stupendae ratio ouarii consideratione abunde elucet. Pleraque quidem ouorum vel intereunt, nec in verorum vermium formam transmutantur, vel immutata ex corpore humano eliminantur. Ingens tamen copia in hominibus, quorum debilitas vel naturalis vel acquisita opportunitatem praebet, remanet, atque in veros vermes transformatur, qui et auiditate, qua optimos nutritios succos homini abripiunt, et corruptela humorum, quam excrementitia sua materie et proprii corporis sui computrescentia generant, denique iniuriis, quas nuperrime de ore illorum trinodi, obturatione intestinorum, rel. memoravi, innumera mala creant, et aliorum morborum, quibus sese associant, tramitem mutant et difficiliorem reddunt.

§. 22.

In beneficium vero hominum sensilitas ista vermium horum cadit, adeo subtilis, vt et caloris frigorisque vicissitudini auscultet. Nempe aëris contactu, vel frigida aqua perfusi obriguerunt quasi mortui, cui, quum paullo post substitueretur tepida, emolliti et refocillati rursus vitam recupararunt.

rarunt. Similis euentus in Taeniis fuit, ROSENSTEINIO experimentum instituyente, ex quo anam cepit, ope medicinae purgantis et huic, quum ista vim suam exfereret, aquae frigidae copiose superbibitae, Taeniam ex corpore eliminandi, quod curationis genus felicissimum successum saepissime contra Taeniam habuit. Nec minus contra hosce vermes post fortiora purgantia copiam insignem aquae frigidae potae valuisse cl. VAN DEN BOSCH v) testimonio nouimus. Ita dum aqua frigida sensu priuat vermem rigefacitque et tubulo oris omnem sese fugendo affigendi vim adimit, purgans illum euerrit. Sensilitate adeo hosce vermes intestinis ipsis potiores esse ex remedio haud ita pridem detecto scilicet fetis Dolichi prurientis l. concludo, quam stirpem quoque tempestiue in suppellectilis medicae censu x) adoptaui. Legumen scilicet huius Indiae vtriusque plantae fetis densis e ferrugineo subfuscis et nitidis obducitur, quae vento separatae pruritum molestissimum et vrentem cuilibet animalium creant, cuius cutem vel pellem tangunt. Hae ipsae et vermes hosce rigiditate et acumine suo moleste afficiunt, et cogunt per aluum copiose secedere. Ne vero simul labem ventriculo et intestinis inducant, miscela earundem fit cum syrupo quodam ad spissitudinem electuarii liquidi, cuius cochleare pro Thea infanti bienni vel trienni et dupla quantitas adulto mane ieiuno ventriculo per aliquot dies exhibetur, subiuncta dosi Rhabbarbari.

Alia

v) *Hist. verm. p. 353.*

x) *Apparat. medic. Vol. 2. p. 358. sq.*

Alia haud pauca exstant medicamina ex stimulantium classe, quorum vis in vermes exferitur absque confortione similis iniuriae intestinis illatae. Sed neque de his neque de aliis anthelminticis, nec iusto ordine et tempore, quo vsurpanda sunt, diaetaeque simul obseruandae regulis (quae quidem omnia eiusdem necessitatis, ac ipsius remedii administratio, sunt) agere hic opportunum est: quum eam praeprimis mihi metam proposuerim, ut vermium teretium longorum humano corpori insidiantium, indoles vera et discrimen a Lumbricis terrestribus constaret, et vagis practicorum bene multorum de specie et characteribus istorum effatis poneretur obex.

TAB. I.

Ascaris lumbricoides ex homine.

- a. Extremum anticum trinode.
- b. Fissura abdominis, ex qua canalis alimentaris pars et vasa spermatica propendent.
- c. Extremum posticum.

XII.

DE

LIMITANDA LAVDE

LIBRORVM MEDICORVM

PRACTICORVM

VSVI POPVLARI

DESTINATORVM

ORATIO.

DE
 LIMITANDA LAVDE
 LIBRORVM MEDICORVM PRACTICORVM
 VSVI POPVLARI
 DESTINATORVM *).

Multa etiamfi exstent, quae praeteritis seculis
 haud immerito inuidemus: scientiarum
 tamen tantum non omnium nostra aetate ea obtinet
 ratio, siue ambitum earundem spectes, siue certi-
 tudinem rerum, quas pertractant, siue formae di-
 ctionisque qua proponuntur modum, vt de prin-
 cipatu in hisce iure quodam nostro gloriemur.
 Omisissis ceteris momentis, quibus nostrum aeuum
 haud mediocriter pristino antistat, id vel maxime
 me iam mouet, quod, quum olim scientiae ple-
 rumque ab hominibus, umbratilem vitam degen-
 tibus, seclusis a naturae inuestigatione hominum-
 que coetibus atque commerciis, colerentur, hi in
 terminis Graecis et Latinis artificiose excogitandis,
 distinctio-

*) Oratio dicta d. 17. Septembris a. 1779. quum in anni-
 uersariis academiae Georgiae Augustae sacris aliquot
 Doctores medicinae crearem. Allocutionem consue-
 tam hic omitto.

distinctionum minutiis et definitionum subtilitate,
 praecipue acquiescerent, stylo insuper obscuro et
 incondito vterentur; quibus ipsis id quidem asse-
 quuti sunt, vt a reliquis, in hoc studiorum genere
 rudibus, tanto doctiores haberentur, sed vix in
 alios, quam qui eandem segetem cum iis colerent,
 fructum sapientiae suae transferrent, nihil fere ad
 vitam, nihil ad vsum communem. Quam alia
 contra ea hodie obtinet mensura, ad quam disci-
 plinarum earumque cultorum pretium exigitur,
 cuius quidem haec summa est, quod tanto peritior
 quilibet scientia, quam ore vel scriptione profite-
 tur, censeatur, quo facilius a pluribus intelligi
 possit, et quo vberius inde commodum in mutuas
 hominum necessitates redundet. Exemplum gra-
 vissimum ista scientia praebet, quae omnium reli-
 quarum quasi basis et mater est, philosophia, quae
 mundata a scholarum fordibus et absterfo illi distin-
 ctionum minutarum et terminologiae fuce, eo iam
 habitu nitet, vt et placeat hominibus, nonnisi
 elegantiam in litteris vitaeque genere sectantibus.
 Ipsa iurisprudentia, cui diutius quam aliis disci-
 plinis exprobratum fuit, scatere vocibus, nonnisi
 a sui cultore intelligendis, et obuelatam esse di-
 ctionis genere a vulgari elegantiori paullum alieno,
 ferioribus annis a multis tam laete ab hoc oppro-
 brio purgata fuit, vt et sint, qui in litibus coram
 iudice agendis a mysteriosa ista dicendi ratione
 omnino abstineant, vernacula lingua aeque fausto
 successu, quam barbare latina, vitam, honores,
 libertatem, opes, clientum suorum vindicantes.

Haec

Haec dum de iurium disciplina memoro, cui non in mentem incidet, quantum nominatim iuncto elegantiorum litterarum cum iurisprudencia studio plurium meritissimorum virorum debeamus, qui in hac academia Themidis sacris vel olim praefecti fuerunt, vel etiamnum sunt.

Non vltimum fane locum in hac popularitatis ambitione tuetur ars, quam ipse profiteor, salutaris, siquidem iam vix vlla eius pars existit, de qua non ea methodo eoque stylo essent libri exarati, vt et ab hominibus, medicinae non addictis, legi cum voluptate et intelligi, saltim in plerisque, possint. Quin linguae Latinae, quae seculis praeterlapsis vnice tradendae isti apta videbatur, substituantur hodie apud Anglos Gallosque, etiam ab eruditissimis medicis pene omnibus, vernaculae, vnde necessitas praecipue medicis enata, si supra vulgus eminere velint, eorum idiomata discendi. Latino tamen apud Germanos magis, quam alias gentes, id quod honoris causa dictum esto, pristinum decus seruatum mansit.

Prae reliquis vero medicinae partibus illi, quae cognoscendis praecauendis et curandis morbis occupatur, siue practicae, hanc popularem dicendi rationem dicatam offendimus. Si ab iis, quae contingunt, concluderis, in tota scientiarum censura nullam aliam esse conuenientiore magisque idoneam, quae ab omnibus et singulis intel-

lectu et memoria teneatur, praxi medica, facile crederes. Etenim quum quilibet homo morbis vacet: aequum quoque videtur, vnumquemque praesidia eorundem vel auertendorum vel sanandorum nouisse. Haec sine dubio necessitatis eadem pernoscendi persuasio effecit, vt, si inter familiaria colloquia, vel comestationes adeo, morbi cuiusdam mentio incidit, vix eius nomine audito, vnus vel alter medicamen eiusdem auerruncandi suggerat; quo miserationis genere scimus elegantem sexum, aetate in primis paullo prouectiorem, nostro antecellere. Raro porro calendarium quoddam euolues, quin agglutinatam vel immixtam cernas consiliorum medicorum farraginem. Quin haud pauci exstant libri, coquinariae arti destinati, in quibus inter iusculorum, pultum botulorumque parandorum praecipua, quid ad verrucas, ephelides, vel pedum clauos delendos, partum accelerandum, odontalgiam curandam, rel. faciat, edocetur. Multa insuper exempla sunt virorum, humanitatis omni studio, vt exercitio, destitutorum, qui Graecas Latinasque voces vix sine offensione legere, ne dicam intelligere, valent, impetrato tamen Doctoris vtriusque medicinae titulo, eo quo haerent loco, cum nominis celebritate plausuque communi artem nostram exercent, diuitiis, curuum famulorumque strepitu, et aedium, suppellectilis, vestitus splendore distincti. — Quidni igitur populari ratione tractandam vel maxime esse a medico litterato dixeris eam scientiam, quam vel edentula mulier, vel coquus, vel iatralipta,

Docto-

Doctoris titulo et fimbria vestis aurea fulgens, cum illo communem habet?

Quae ipsa argumenta licet apud sanioris iudicii quemuis leuitatis nota suspecta et exosa sint, non parum tamen ponderis, pro dolor, apud multos, praecipue arte salutari initiandos, habere videntur, qui, prae vecordia quadam vel tarditate animi vel ignauia, pani lucrando vnice inhiantes, nonnisi de arctandis artis pomœriis et folius practici studii necessitate mullitant. Tanto grauior censetur veteranorum quorundam vereque eruditorum medicorum auctoritas, qui consilia varia medica ea sermonis perspicuitate in medium proferre sibi proposuerunt, vt praesentis medici officium abesse posset. Ita acidularum vulgatissimarum natura effectus vsusque dilucide fatis et ad captum vulgi explanati sunt, adeo vt pauci, e. g. fontes Pyrmontanos morbi causa, non temporis vnice fallendi vel ludis variis lucrandae pecuniae, petant, quin Seipianum librum antea perlegerint. Quam frequenter comparent praecepta collegiorum adeo medicorum, grassantibus epidemicis morbis, per scriptiunculas data, vt et rustici aliique illiterati homines vitae propriae et suorum prospiciant. Ex quo ROSENSTEINVS ephemeridibus praecipua de infantum morbis capita infereret, plures alii eodem vehiculo vel redarguere errores in valetudinis cura vulgo commissos, vel salutaria consilia suppeditare, annisi sunt. Sunt et quidam artis nostrae articuli, quos iure quodam translatitio aliis

in reliquo medicinae ambitu peregrinis administrandos tradiderunt, quorsum ars obstetricia, dentium cura, balneorum comparatio, pertinent. Ne vero credas, vel necessitate vnice vrgente vel in leuioribus modo momentis alios in communionem exercitii artis fuisse adscitos: memento existere medicos fama meritisque veris inclytos, qui de praecipuis affectibus morbosis eorumque medela aperte et absque omni eruditionis fucō egerunt, idque mox ad acutos vnice morbos, omīssis chronicis, mox ad vtrosque respicientes, mox ad morbos tantummodo, mox simul ad infortunia quaedam non praeuisa et celerrimam opem requirentia. Celebria inter hosce praeprimis sunt TISSOTI, SWIETENII, OFTERDINGERI, BVCHANI, STÖRCKII, VNZERI, et e gente Suecica, ROSENSTEINI, DARELI, HAARTMANI, nomina. Nam ad vetustiora tempora nolo regredi, quoniam vix vllum inter haec nomen est, cuius fama ad praesens tempus peruenit. Nec pauciores sunt auctores, qui secundum eandem intellectu faciliorem normam Diaeteticen, medendi artis alterum oculum, persequuti sunt, quorum inter Germanos KRÜGERI et ZÜCKERTI molimina notissima.

Dum igitur, Auditores, populare hocce praxin medicam tradendi studium, sui ipsa natura probabile et auctoritate tot medicorum, quorum quosdam antistites artis veneramur, commendabile, conuellere aggrediar, vereor, ne vix audacis et vituperandi pruritu excitati hominis notam effugiam.

giam. Imo erunt inter Vos, qui a quolibet alio impugnatos hosce amabiles conatus malint, quam a medico, cuius culpatio vel ab inuidia vel a lucri cupidine posset esse profecta. Verum graua me iudice in mentem mihi saepissime inciderunt argumenta, quae vtilitatem horum subsidiorum pro eo quidem fine, quem sibi praefixerunt celeberrimi eorundem auctores, limitant. Quae iamiam a me proponi, nec a feli huius diei grauitate alienum arbitror, quum, si sanitas nullo non tempore et loco omnium donorum diuinorum cuilibet pretiosissimum sit, praesidiorum quoque eiusdem conseruandae vel recuperandae ponderatio nullibi pretio suo destitui censenda. Ne vero, Auditores honoratissimi, protractiori, quam expectetis, dictione, inexercitati praecipue oratoris, defatigemini, strictim carptimque omnia persequi pro lege ducam.

Non vnum sed multiplex commodum est, quod hi ipsi, quos perstringo, libri pollicentur, licet omnes et singuli vix alios homines, quam in arte medica peregrinos, condocerendos sibi sumant. Hosque ita in morborum casuumque maxime ancipitium et medicaminum auxiliorumque notitia instructos cupiunt, vt vel sine medici praesentis adiumento suppetias sibi aliisque, quorum amore vel miseria ducuntur, ferre queant, vel absentem de natura morbi tanto certiore reddere, vel etiamsi medicus accesserit, tanto exactius corporis malique conditiones illi exponere. Quam
nobile

nobile hocce propositum, quam dignum bono ciue, probo et ingenuo medico, quaestui proprio lubenter partem derogante, modo aliorum commodis inferuiat! quantoque vtilius, si modo scopo assequendo par esset, quum ad plerosque homines spectet, eosque nostra miseratione, nostris beneficiis, dignissimos, paganos! Hi nempe, vtpote a medicis pharmacopoliisque remoti, prae reliquis, qui in vrbibus degunt, subsidaria medentium prouidentia indigent. Sed vtinam aequae fidum esset hocce praesidium, ac finis, quem spectat, pius. Cogitate principio curatius varium istud hominum genus, quorum ipsorum vel aliorum, istis quocunque nexu iunctorum, angustiis subuenire hocce constitutum fuit. Duplex horum in vniuersum mihi concipio. Vnum efficiant homines litterati aliique paullo liberalius educati, ita, vt libros legere non modo queant, sed et intelligere. Horum in numero praecipue ad verbi diuini ministros ruri degentes respectum, quibus, dum animi curam agunt, copia simul datur praeiudicia coetus sui, valetudini infesta, destruendi, salutaria aegris adminicula subministrandi, imo, si malum in multorum praecordia simul saeuit, e suggestu consilia ab artis peritis edocta commendandi; et verum est, plerumque sacerdotum persuasionibus plus ponderis apud plebem inesse, quam ipsorum regum mandatis. Porro fundorum dominis e re esse videtur, subiectorum sibi hominum sanitati prospicere, vtpote quum, quo integrior ista sit, tanto maior reddituum spes capi possit. Hisce proximi loco
sunt

sunt praefecti dominiorum principis, qui, nisi callofior sit conscientia, ad principis commoda eodem, quo sua, ardore promouenda tenentur. Ruri praeterea degunt hinc inde chirurgi; qui, rudimentis artis suae qualitercunque olim imbuti, ob cognationem arctiorem eius cum medicina, sperare finunt, fore, vt lectione libri, suo captui adaptati, corrigant errores pristinos et tutiorem opem iis, quorum interest, afferre discant. A ludi magistrorum paganorum opera pariter aliquid commodi hac in re expectari potuit, vt in quibus, etsi tyrocinio vnice docendo occupatis, germina tamen altioris indaginis quaeri posse vero simile habitum. Demum lectionem eiusmodi librorum cuilibet patrifamilias vel matrifamilias supra vulgus elatae iucundam futuram et fructuosam, coniugis, liberorum, cognatorum, famulantium causa, popularitati huic studentes medici sibi persuaferunt. — Ad alterum hominum genus, quorum bonis consultum hisce cupiuerunt, refero tam eos, qui typis expressa ne legere quidem sciunt, quam illos, qui initiis istis humanae cognitionis non quidem destituuntur, animum tamen non assueuerunt libris ita versandis, vt vel voluptatem ex lectione capiant, vel super lectis meditari eaque in vsum et applicationem trahere queant; ex quorum posteriori censu non solum multi ciuici ordinis homines sunt, sed adeo haud pauci ex generosa veterique prosapia oriundi, arte venatoria vel piscatoria magis quam litteris initiati. Vsum hosce proprio ausu ex istis libris petere posse nullum, vltro mihi largiemini.

Sed et in reliquos parciorem longe fructum inde redundare, quam eorum auctores exspectant promittuntque, sine probatione nefas esset sustinere.

Igitur id primum me moratur, quod non omnes hosce libros legant, qui legere possent, et eosdem in commoda haud spernenda conuertere. Deterret multos voluminis amplitudo; nam non omnes eam breuitatem amplexi sunt, quam ROSENSTEINVS in Pharmacopoea sua sic dicta domestica et itineraria, aliorum contra opera in alphabetum adeo vnum vel alterum succreuit. Haec, si quid vtilitatis habitura sit, non tum primum trutinari debet, quum periculum ceruicibus iam inhaeret, sed antea, quam morbus vel improuisum infortunium inciderit, siue istud proprium caput siue aliorum petat. Quotus quisque vero est, nisi officii ratio, vt in medico, id iubeat, qui sanitate vigente praesidia labefactatae quaerat! Fac vero a capite ad calcem fuisse librum huius generis perlectum: an, sub ista argumentorum copia, quam continet, memoria tibi tum praecise momenta praecipua subministrabit, quum applicationis necessitas sese repraesentat? Si sub ipso morbo haec auxiliorum medicorum promptuaria adis, iusto plerumque serius adis. Quodsi enim ipse aegrotas, cogitandi vis plerumque ita obtunditur, quin saepe omnino sufflaminatur, vt ab aliorum arbitrio omnino pendere te oporteat; an pendebis a cognatorum tuorum, qui plerumque prae amore tui, casu, quo prosterneris, tantopere percelluntur, vt suppetias tibi

tibi ferre nequeant, et ipsi peregrina ope egeant? Tantoque difficilius sine dubio est, praesente iam malo quodam ancipiti ex vberi hocce apparatu ea enucleare, quae profint. Ast dabo, legi breuiarium istud valetudinis, et iusto tempore legi, an ideo intelligetur? Caue omnem intelligendi monimenta medica difficultatem in eo colloces, quod multas Graecas Latinasue voces complectantur. Hasce etiam si in vernaculam verteris, difficultas manet, nam non tam vox, quam ipsa res potissimum, te moratur, prout non ideo librum iuridicum intelligo, quod Germanica lingua exaratus fuerit, nec ideo botanica expeditior intellectu redditur, quod technici termini Latini barbari in terminos Germanicos barbaros, ut mos nouissimorum temporum est, transferantur. De grauitate autem praxeos medicae sicuti nullus aequus censor dubium fouet: ita et nemo proletariam operam ad addiscendam eam sufficere asseuerabit, qui eandem cognitione exacta morborum affectuumque variorum, porro penitiori medicaminum et auxiliorum notitia, tum et sagacitate haud mediocri ex visis diiudicandi non visa, et medelas, non secundum morborum nomina, sed conditiones varias praesentes eligendi, contineri, apud animum reputet. Si praeterea ad manuarias artes feliciter perficiendas vsus et exercitatio requiratur, quanti magis in hac scientia, quae tota obseruationibus et experimentis nititur, interest, non cursoria vel fugitiua lectione breuiarii, sed circumspecta et repetita naturae inuestigatione, et sedula cum hacce monimentorum fidorum artis nostrae

nostrae comparatione, pectus ad tantum obeundum munus praemuniuisse.

An haec ipsae dotes cadere possint in hominem, studiis vel muneribus a medicina remotissimis deditum, vel a quavis animi intentione alienum, iam ipsi, Auditores, iudicate. Non mirum igitur, in dignoscendis morborum speciebus tot tantosque errores ab ignaris artis nostrae, imo eruditis alias, sed litterario dicto subsidio vsis, committi, ut vel ipse in consultationibus medicis per litteras factis experior; et quidni id fieret, quum ipsi medici iique idonei saepe quoad diagnosin morborum tantopere inter se discrepent. Sed ut ne putes, hoc ipsum sententiarum diuortium in rarioribus vnice morbis locum habere, ex vulgaribus crebroque obuiis exempla quaedam depromam. Apoplexiam serosam a sanguinea verbis distinguere cuilibet est facile, sed non item re, vel in ipso aegro. Quam difficile saepe colica inflammatoria ab aliis eius speciebus discernitur! Quam saepe hectica cum pulmonum phthisi confunditur, phthisis ex ulcere pulmonum cum pituitosa! quam multas varias scenas ludit malum hypochondriacum et hystericum! Quam saepe sub alterutrius horum larua imponit taenia, donec per articulos vel frustra secedat! Quam multa calculi vesicae lotii cum tumore cervicem eiusdem obsidente communia! Si eiusmodi specierum confusio in morbis adeo simplicibus non semper euitari queat, tanto magis obnoxios eidem esse hosce, quorum natura complicata, sponte patebit,

tebit, cuius generis est inflammatoria febris cum putrida iuncta, malum hystericum labe arthritica stipatum, inquinamentum venereum cum scorbutico copulatum, vel idem cum rachitico. Incautis facile imponit varietas ista symptomatum, qua ipsa vnus idemque morbus saepe a se ipso, pro naturae aegrorum et conditionum accedentium diuersitate, mirifice deflectit; vnde facile fit, vt lector non medicus idem malum sub capite breuiarii longe alio, quam deberet, quaerat, nescius prae tenuitate scientiae, quid in hoc ipso essentiam constituat, et quid modo accidentale sit. Subtilior longe magisque ardua illi res est, morborum stadia distinguere, pro quorum discrimine medela quoque variet, necesse est, crises symptomáticas a veris discernere, gradum denique et vehementiam morbi ex pulsu, respiratione, excretionibus variis aliisque signis non ambiguis diiudicare. Et quid dicam de tenebris istis, quae illi in causarum morbi exploratione obuersionentur. Quantum vermium in generandis diuersissimis morbis imperium! Quam difficile saepe ipsi medico, ophthalmiae, icteri, hydropis, epilepsiae, veram causam expiscari! Et iam homo, qui vix primoribus labris diuinam nostram scientiam attigit, expiscabitur?

Iam vero, si in morbi cuiusdam diagnosi, et stadiorum, symptomatum, causarumque notitia animus tantopere vacillet, quam infirmo fulcro ipsa illius curatio innitatur, cuilibet constat, qui pathologiam therapiae basin esse apud animum reuoluat. Qui rem inuertat, remedium primo quaerens,

rens, dein morbi historiam trutinans, coecae empiricorum et agyrtarum cohortis sequitur morem, cui formulam scribere vel antidotum commendare primum, in morbum vero inquirere secundum est. Sed huic hominum generi quantae dementiae capita credere, cui, vt poëtae verba mea faciam, ne calceandos quidem pedes committeres!

Ast si et id largiar, posse libris istis medicis populariter scriptis eo perueniri, saltem in quibusdam morbis, manifestioribus notis conspicuis, sicuti febribus intermittentibus, inflammationibus pectoris, variolis, morbillis, vt et species et reliqua de morbo scitu necessaria momenta in aprico posita reperiantur: quam difficile tamen est, per librum medendi methodum satis dilucide tradere, quum saepe ne verbis quidem ore prolatis intelligi satis, imo a melioris sortis hominibus, medici queant. Testor in primis medicos, qui plebis ruri vel in vrbe degentis valetudini inuigilant, quantum taedii saepissime pariat obtusior eiusdem intelligendi vis, indiuiduus istae neglectae animi culturae comes. Inde aliquando factum, vt, quum medicus chartam, cui formulam inscripserat, rustico traderet, quo ex pharmacopolio desideratum medicamen peteret, hic post aliquot dies gratias acturus cum pullis aliquot gallinaceis pro solstro rediret, integram chartam se maximo fructu deglutiuisse significans. Alius, quae eluendae aluo destinata erat medicina, hanc per os ingessit. Alius rursus pulueres, in plures doses diuisos seorsimque fumendos, in vnum commiscuit, et vna cepit.

Quodsi

Quodsi autem in eiusmodi consiliorum simplicitate, cuius sanæ mentis quilibet capax esse videtur, aqua hæreat, quanto procliuius est errare in illis, quæ non sine iudicii intentione sese in usum trahi salutarem patiuntur. Horum e numero omnino sunt ea, quæ ad delectum medicaminum spectant, pro morbi complicatione, pro ætate, sexu, temperie, causarum multiplici natura, stadiis morbi diuersis, varium, porro ad dosin horum formamque commodissimam, tum et ponderis secundum conditiones varias argumentum et diminutionem, et necessariam sæpe remediorum mutationem. Quid dicam de heroicis, quæ quidem nomine talia rarius in breuiariis istis medicis præcipiuntur, sed nonne sæpe alia, specie etsi blanda et fere adiaphora, vim heroici pro conditione peculiari incidente præstant? quorsum pertinet serior euacuantium crisi iam imminente vel præsentis usus; quam multa sæpe ad lectos aegrorum de venæ sectione, de emetico, de vesicatorio administrando vel negligendo; ipsorum adeo medicorum discidia! singulo sententiae suae patrocium pro virili agente. Quin ingenue fateor, sub manca ista morborum pariter ac præsidiorum valetudinis cognitione et variis istis erroribus sæpissime commissis, quorum tamen culpam non tam in libros quam lectores coniicio, sæpissime præstare, morbum solius naturæ beneficio relinquere, quam male intellectis vel applicatis consiliis in peius vertere. Harum quidem naturæ, pro vindicanda nostra salute, excubiarum exemplis, quum innumera in omni propemodo

pemodo morborum et affectuum genere existent, non opus est multis insistere.

Accedunt dictis hucusque incommodis, quae horum librorum lectionem comitantur, duo alia, pondere etsi prioribus leuiores, non tamen plane nulla. Vnum hoc est, quod multi lectorum, dum aegroti delineationem huius vel illius morbi ob communionem aliquam symptomatum ad se transferant, licet vere alia aegritudine laborent, praeter rem et necessitatem saepe angantur et contristantur, arripientes fortuito dirioris longe morbi descriptionem, quam quo ipsi afficiantur. Quodsi contra non errauerint in discernendo vero morbo, exinde saepe contrahunt morbi pabulum haud spernendum, quod funestissimos quoque euentus legendo comperiant, quos, pro ea hominis pessimum semper suspicandi consuetudine, non mirum est, si sibi metuant, etsi saepe perperam, quum vel naturae vel artis beneficio mitiori gradu morbus subsistat. Dum igitur medicinam morbi in breuiariis hisce quaeris, igniculos saepe illi simul subdis, quibus adeo subinde in apertam ille flammam erumpit. Neminem enim latet, quantum ad morbi sanationem conferant animi tranquillitas et spes probi successus; quantum contra vires tam animi quam corporis eneruent, quin suppriment, tristitia, metus, desperatio. Commune hoc timoris, intempestiue saepe excitandi, diaeteticorum librorum cum therapeuticis vitium est, vt et istos saepe extricari manibus lectorum medicae sententiae expertum,

tium, quam immitti, mallet. Multi enim homines, qui, nisi diaeteticas austeritate turbarentur, pacato gratoque animo et absque vlla valetudinis offensa creatoris benefici donis, solam vocem naturae secuti, vterentur, iam ad vini haustulum praeter consuetudinem captum, ad dena fraga vel cerasa supra vulgarem numerum comesta, ad somnū per horulam solito protractiorem, ad zephyri blandum afflatum, similesque alias leuiusculas res, scrupulos concipiunt, expauescunt, naturam fraudis, inclementiae, atrociae accusantes, quum potius male conscripti vel male intellecti breuiarii morositatem vel nequitiam castigarent.

Denique et eo popularitatis istud studium, quod reprehendo, molestum est, quod aegris vel amicis circumstantibus obloquendi medicis materiem suggerant. Hisce ipsis, si officio satisfaciant, naturam, non libros, in medendi arte sequi conuenit, deflectere a vulgari medendi tramite, si res ita iubeat, item demere illi vel addere, quod ars et experientia dictitat. Iam autem medico haud raro obtingit, vt, quaeuis licet naturae, arti et conscientiae, conuenienter adornet, aeger vel amico illi officio iuncti, tanquam melius rem noscerent, hunc vel illum auctorem, ex cuius libello sapiant, tanquam genium tutelarem, obuertant, qui alia diuersaque praecepta iniunxerit. Inde fit, vt, si suae artis conscius medicus decedere a pristino consilio detrectet, aeger diffidentiam in eius peritiam coniiciat, si autem iusto flexilior vel obsequior sit,

idem accidat, quod sub consultationibus medicis haud raro, quod nimii erga alium medicum obsequii aeger poenas funestas luat.

Verum absit, vt iniurius incelebrium virorum merita sim: limitandam modo eiusmodi opusculorum popularium laudem dixi, non omnino istis derogandam. Non carent ista suis commodis, etsi fore, vt in eos praecipue caderent, quibus destinata, diffusus sim. Disparebit dedecoris suspicio, quod illis allinere quibusdam forsitan visus fuerim, si ad medicos praecipue bene multos vltum eorundem pertinere edisseram. Iuniores exinde normam capient medendi intellectu facillimam et tutissimam, naturam morbosam fido penicillo absque ratiociniorum vlllo fuce depictam cernentes, et delectum remediorum exquisitissimum et probatissimum ordinemque eadem administrandi discantes. Et, si olim specifica sectari fastigium artis reputassent, iam vanum eorundem praeconium perspicient, multosque morbos, specie nomineque licet dissimiles, iisdem remediis auscultare cognoscent. Assuescentes vero tempestiue TISSOTI illique similium medicorum libris popularibus, qui nihil nisi humanitatem spirant, et ad infimae adeo plebis indigentiam miseratione descendunt, deponent sacram istam auri cupidinem, quod corradere prauis potius medicorum bene multorum exemplis seductus animus, quam religione et humanitatis sensu munitus, primum muneris scopum esse, facile sibi persuasit. Imo exercitatiores medici ob mutuum istud, nisi
animo-

animorum, saltim artis incrementorum, vinculum haud sine auiditate vel voluptate scrutabuntur eundem secum agellum arantium opera, et, quum dies diem docet, noua adeo lumina saepe acquirunt. Quod vero ad lectores, medicae scientiae expertes, attinet, etiam si eorum longe minor numerus existat, quam vulgo putatur, et multa ab hisce quoque vel non satis intelligantur, vel eo praecise temporis momento applicari nequeant, quum necessitas vrget: fatendum tamen, istis subsidia in multis momentis ab hisce opusculis ferri haud spernenda. Redarguunt haec errores varios vniuersaliores, quorum culpa clades funestissimae inciderunt, quos vero quilibet, modo admoneatur, vitare potest; quorsum refero noxam calefacientium in febribus acutis, alui obstructionis in exanthematicis, purgantium fortiorum in apoplexia, balsamicorum in phthisi, pinguium extrinsecus adhibitorum in arthritide, vel saturninorum in erysipelate, damnum subitae vlcerum vetustorum consolidationis, et quae alia sunt. Multorum quoque affectuum ea obtinet ratio, vt et ab obesae naris homine facile discernantur. Infortunia varia huius loci sunt, vt suffocatio apparens aqua submersorum vel carbonum halitibus prostratorum, truces venenorum ingestorum effectus, reliqua. Nec aliquis facile in cognitione haemorrhagiarum, epilepsiae exquisitae, exanthematum vulgatissimorum, febris tertiana similiumque morborum, fallitur, quorum character reliquis longe manifestior est. Sic et consiliis per hosce libros suppeditatis bene multis

ea simplicitas et ingenuitas inest, vt nulla ambiguitate imponere lectori possint. Quum porro hi ipsi quaestiones soleant in enumerato habere, quarum solutione carere medicus in curatione morborum neutiquam potest, discitur ad quaenam momenta, per litteras vel amicos, consulturum medicos respicere oporteat, et norma obtinetur, ad quam morbi historiam concinnare illi conueniat. Ipse medicus ingenuus absenti aegro, dum vacillet de morbi genio, indicare caput potest, quo descriptus in libro sit, vt exinde aeger diagnosin eruat, et eadem eruta eas simul valetudinis regulas hauriat, quas ob distantiam locorum non satis exacte auribus vel litteris capere potest. Nec negauero aegrum vel cognatos saepe tanto plus fiduciae in medicum, praecipue iuniorem, collocare, si consensum inter eiusdem conamina et veterani medici scripto tradita ausa animaduertat, vnde idem solamen emergit, quod peti solet a consultationibus medicis, iis nimirum, quas amica nec nisi ad aegri salutem respiciens mens alit, non vero litigiosa, inuida vel lucro vnice intenta irritas, imo ipsius aegroti ceruici deleterias, reddit. Et quum saepe pro dolor! non ruri modo sed etiam in vrbibus nonnisi medicus arte sua rudior suppetat: praestat omnino mutis ROSENSTEINIORVM, TISSOTORVM, consiliis, quam praesentis inepti medici loquacitati, quae vulgaris solet ignorantiae ministra esse, morem gerere.

Ast immorari diutius huic, quam hucusque persequutus sum, orationis materiae, eadem huius diei

diei sollennitas, quae me ad dicendum inuitauit, vetat. Praecipuum enim nostrum, quotquot Georgiae Augustae adscripti sumus, hodie officium est, laetari bonis nostris, et gratiarum actione, votis, comprecationibus, sollicitare diuinum numen, ut hanc, qua adhuc fruimur, felicitatem proroget et perennare sinat. Rediit hodierno diluculo faustus iste dies, a quo fastos suos numerat Georgia Augusta. Rediit quidem simpliciore habitu et bene multarum actionum et cerimoniarum, quae primo illo eius natali, oculos, aures, mentem praesentium praestrinxerunt, comitatu destitutus. Quemadmodum autem in principatibus capeffendis, comitiorum auspiciis, munerum exordiis, nuptiis aliisque maioris momenti ausis, cerimoniae, quae eorundem initiis splendorem vel decus conciliant, pars minima modo sunt eorum, quae sequantur, et emblemata modo et omen grauitatis et successus futurorum euentuum praeseferunt: ita et hodiernus inaugurationis isto Georgiae nostrae multis modis grauior et illustrior censendus est. Quibus enim grauissimis rebus tum modo praelusum est, et quas ipsas tum tantum augurio votisque complexi sunt, hasce ipsas, post tot fluxus, tot casus, qui detrimentum illi clademque minati sunt, vel ad stabilitatem roburque suum peruenisse, vel laetissima incrementa adeptas esse, vel nouis institutis auctas, iam experimur. Facile esset in hisce percensendis per partes procedere, sed vereor, ne diuturna exauditione delassatis extenuare potius earundem pretium quam ornare videar. Nec sunt eiusmodi,

vt sese subtrahere oculis ingenioque eorum possint, qui pristinum istum institutorum, praesidiorum, et ornamentorum rei academicae laborumque doctorum habitum et faciem cum praesenti horum omnium forma conferant.

Si praeterea a ciuium frequentia; studiorum causa in academias aduentantium, probabilis ad famam, qua istae apud exteros fruuntur, conclusio fiat: gratulandum nobis habemus, quod non obscura vel velata sint publica academiae bona et nostra conamina, sed in conspectum aequorum eorundem iudicum prolata, nec nomina nosmet dedisse nostra desidentis gloriae academiae, sed magis magisque sensim emergentis. Rata igitur habuit numen auguria votaque, quae ante hos quadraginta duos annos sacro hocce loco sancita sunt.

Eidem vero benefico numini, quod initiis et incrementis huius litterariae Vniuersitatis tanta indulgentiae vbertate praefuit, iam futuram eiusdem integritatem, vigorem, existimationem, committimus, illudque piis precibus supplicamus, vt eandem, inter pacis faustissimo fato in Germania recuperatae delicias, vtinam mox in reliquis terrarum orbis ditionibus, Regis scepro subiectis, sub potentissimi Regis, augustissimae Reginae, et serenissimae Regiae familiae integerrima incolumitate, placida animi tranquillitate iucundaque longaevitate, et sub illustrissimorum academiae Curatorum
atque

atque reliquorum potestatis Regiae administratorum vigente salute et fausto consiliorum successu, servare et protegere pergat, novisque in dies academiam nostram benefactorum laudibus efflorescere iubeat.

Iam Vos alloquendi estis, Candidati praenobilissimi, qui honoribus, ad quos adspiratis, haud mediocre decus exinde accessurum arbitrati estis, quod hac ipsa occasione Vobis conferantur. Et quidni illis accederet novum decus et omnium praemiorum, quae a voluntate, studio, officio nostro pendent, complementum, dum in hoc piaementis delubro, in tanta auditorum et spectatorum frequentia, in conspectu tot, vel eruditione meritisque, vel natalibus, vel amore et propensione in litteras, enitentium virorum, ex tam elato loco, die Gottingensibus praecipue musis sacratissimo, Doctores medicinae creabimini. Mihimet vero, quum hisce Vestris desideriis satisfacere iniunctum sit, id in primis voluptatem parit, quod cum bene merentibus res agatur, et publica haecce laudatio non ritus vnice causa, sed officii instar fiat. Ea enim assiduitate, animi intentione, intelligentia et morum suauitate interfuistis nostris recitationibus reliquisque Vobis dicatis studiis, vt inde iam coniectura assequeremur, quod speciminibus publicis comprobastis, dignissimis nempe olim honores medicos nos impertituros esse. Latere Vos nequit, Candidati aestumatissimi, grauitas muneris, ad quod iam initiandi estis, vt quod non repentino impetu,

sed lento, et circumspiciente omnes falebras, gradu, subitis. Legibus vero ut obtemperetur, reuocanda iam iterum officia boni medici in memoriam Vestram sunt, et iurisiurandi vinculum ad eadem follerter fideque seruanda Vobis imponendum. Accedas igitur rogo, consultissime Vir, qui Academiae ab actis es, et consuetam iurisiurandi formulam ex statutorum ordinis medici codice praelegas, Vos vero, Candidati praenobilissimi, tactis sceptris religiosam mentem eidem addicite.

(*Iusiurandum.*)

Quod igitur summum numen felix et faustum Vobis esse iubeat, et Georgiae Augustae atque reipublicae salutare, auctoritate Caesareae Maiestatis, auspiciis et indultu augustissimi et potentissimi Principis ac Domini, GEORGII TERTII, Regis magnae Britanniae, Franciae et Hiberniae, Defensoris fidei, Ducis Brunsvicensis et Luneburgensis, sacri Romani imperii Archithesaurarii, et Principis Electoris, Rectoris huius Academiae suae magnificentissimi, Domini nostri longe clementissimi, ex decreto ordinis mei

Ego

JOANNES ANDREAS MURRAY

Medicinae Doctor legitime promotus, huiusque Professor publicus ordinarius, Ordinis medici Decanus et hodie Brabeuta,

Vos primum publice ex hoc sollempni loco proclamo, qui per biennium praeterlapsum honores

res et immunitates Doctorum artis salutaris consequuti estis, scilicet TE &c.

(*Omittuntur hic eorum nomina.*)

Deinde et Vos praesentes, Candidatos adhuc Medicinae, quorum fidem hisce ipsis momentis iureiurando adstrinxi,

Te GEORG. PHILIPPVM LEHR, Moeno-Francofurt.

Te THEODORVM FRIDERICVM TRENDELENBURG, Lubecensem,

Te CAR. HENRICVM WERTMÜLLER, Stöckholmienf.

Te JO. FRIDERICVM ADOLPHVM BECKER, Lippenfem,

Vos omnes et singulos Medicinae Doctores creoo, renuncio, proclamo, Vosque omnibus dignitatibus, iuribus, immunitatibus, emolumentis, quibus vel lege vel consuetudine Doctores medici fruuntur, frui cupio iubeoque. Haecque fiunt in nomine Dei patris, filii et spiritus sancti.

Vtimini iam iuribus Vestris, quorum hoc primum est, quod ex inferiori *cathedra* in superiorem, quam hucusque solus pressi, ascendatis. —

Saluete igitur, experientissimi Doctores, quibus gratissimo animi affectu me cinctum iam conspicio. Non levis scitote honoris significationem hunc, quem occupastis, locum esse, sed ad docendi alios potestatem, vires aliorum in palaestra moderandi, et ius, consilia cum aliis medicis, aetate etiam si et munere Vobis eminentioribus, miscendi, respicere.

Mori iam gerendum exemplo venerandae antiquitatis est, et symbola quaedam Vobis vel eroganda, vel commonstranda, quibus ista in publicis inaugurationibus vsa fuit.

Pileus, quem capiti Vestro admoueo, nullo non tempore libertatis indicium, admoneat Vos, nihil esse seruile in arte nostra debere, neque sectarum iugo detestabili collum submittendum, nec, quod crebrius fit, adulatione demissa et indecora, sed erecta fronte hominum propensionem esse aucupandam.

Praebete iam dextram Vestram, vt *annulo* illam condecorem. Non ornamentum autem modo digiti eum habeatis, sed constantiae in scientia, cui vos sacraistis, incitamentum.

Librum Vobis exhibeo. LINNEI *Systema naturae* est, quod — exosculor. Imitamini immortalem virum naturae indefesso scrutinio, obseruationum acumine et pondere, sagaci nouorum inuentorum indagine. Et prout ille, non sibi soli sapiens, aliorum opera non superciliose contempsit, sed horum medullam infatiabili lectione in publica commoda protraxit: idem et Vos facite. Id quod *aperiendo* librum commendatum Vobis cupio. Dum *claudam* vero illum, mementote, quod meditationi super suis aliorumque detectis ille insumerit vigilias, quam felix haec illi fuerit in abditis eruendis veritatibus et mirandis naturae phaenomenis explicandis adiumentum.

Oscula

Oscula Vobis figo, vt memòres existatis non solum beneuolentiae ordinis nostri, sed mutuae amicitiae et concordiae, quae Vos cum aliis, laborum Vestrorum fociis, deuinciat.


Quo vero et absentibus innotescat, ad quod honorum fastigium perueneritis, *diplomata* Vobis decreta sunt, sigillo ordinis mei firmata, meoque nomine insignita.

Atque sic, quum ex hac cathedra mihi discedendum, nihil magis in votis mihi est, Auditores, quam vt patientia, qua me loquentem audiuiistis, laetum nec fallax sit perennis Vestri in me, et Doctores recens a me creatos doctissimos, fauoris et beneuolentiae augurium.

XIII.

DE

C A T E C H V.



DE CATECHV. *)

PROOEMIUM.

Ea iam viuimus aetate, quae cognitionum medicamentorum solidam non virtutum vnice eorundem scientia et praescriptione in formulis metitur, sed notis integritatis, speciei, cui quodlibet originem suam debeat, collectionis vel praeparationis modo, quem illud ante vsum subeat, patriae, vnde proueniat, itineri demum, per quod ad nos transferatur, inuestigando, intentissima est. Nec sane vnico horum momentorum carere medicus potest, ne dicam sine dedecore, sed sine aegri, cuius rationem potissimum habere eum oportet, detrimento. Multa insuper sunt medicamina, quae, apud nos licet indigena, sine historica eorum notitia ab exteris haud sine insignibus sumtibus peteremus, multa, quae haud exiguum lucrum regioni promittunt, si extra patriam suam colere eadem suppeteret. Vnde et haud paucis

*) Comparuit haec dissertatio a. 1779. Gottingae iuncto meo et Respondentis cl. CAROLI HENRICI WERTMÜLLER, Stockholmiensis, cui praecipue varia experimenta debentur, studio. Hinc iam et formam speciminis academici et dictionis idem genus seruo, addens modo hinc inde quaedam nuperioris indaginis.

paucis medicis intra hortos pharmaceuticos exoticas stirpes coercendi consilium placuit, quod nec ego, si iustis limitibus contineatur, improbo; hinc et multiplex istud nationum mercatura aemularum tentamen, clanculum vel fructus vel plantulas earum stirpium, propagationis amplioris scopo, sibi vindicandi, quae partem aliquam vberioris quaestus suggerunt. Notissima est Coffeae ex Arabia felice in Americam transplantatio, et recentissima Gallorum calliditas arbores, ex quibus nux myristica et caryophylli aromatici colliguntur, Belgis ex Moluccis insulis praeripiendi, plantationibus in insulis Franciae, Borboniae et Seichelles factis; alia exempla vt taceam. Acquiescere igitur in sola virtutum medicamentorum ponderatione, quae pharmacopolia continent, ignavi est et proprio potius lucro, quam rei publicae et aegrotorum saluti, prospicientis. Dolendum tamen contra ea, ambitum scientiae, quae de medicamentis agit, vt reliquarum disciplinarum generatim, tam saepe circumscribi arctis istis cancellis, quos indigentia huius vel illius singularis hominis, in angulo quodam orbis terrarum, etsi laute degentis, definit, cui quidem gratulemur, eo illum loco venisse, vbi aliquid esse videatur.

Fundamentum vero omnium, quae de medicina quadam scitu necessaria sunt, constituit speciei, ad quam pertineat, cognitio, et quidem ea, quae characteribus non ambiguis, sed comparatione plurium affinium erutis, nititur. Differt haecce

haecce quam maxime ab ista manca, quae notis modo inhaeret, quae sensibus non colliguntur, sed otiante quasi mente iisdem sese obtrudunt, prouti scimus, rudes ceteroquin inter nos homines vel barbaras gentes e. c. arborem aliquam vsu suo celebratiorem corticis superficie, ramorum distributione magis vel minus coarctata, frondis vel grato vel ingrato odore, florum magnitudine vel colore cet. dignoscere posse: sed hae notae vix nisi illi arbori a paucis quibusdam in vicinia crescentibus discernendae sufficiunt, et absenti nihil fere adiumenti afferunt; et sic in reliquis. In quibusdam exoticis fateor, nobis adhucdum non ultra hanc vagam et subsidiariam barbarorum de speciebus notitiam procedere licere, nosque cogi varia ex horum medicaminum censu nonnisi instar alius mercis recipere et in usum transferre, Gummi ammoniaci, Tacamahacae, Gi. Kino, Myrrhae, radicis Columbo, Tutiae, exemplo. Imo prostant remedia simplicia, non ignotae quidem omnino eruditae originis, sed nondum satis confirmatae, ut diuortium sententiarum merito doleamus, quorum e numero adhuc sunt vsitatissima adeo quaedam, ut Ipécacuanha, Rhabarbarum, Jalappa. Sed absit, ut eiusmodi exempla, quorum efficaciam in corpus humanum probe nouimus, licet de stirpium, quae eadem erogant, specie nondum satis constet, argumento sint superfluae specierum in vniuersum notitiae, quum ratione reliquorum medicaminum, de quibus nullum in hac re dubium superest, habita paucissima sint. Nec negari potest,

historiae naturalis peritorum adiumento multos vitae et valetudini infensissimos in dignoscendis medicamentis errores primum detectos, nec accessibus paucis eorum ex hisce studio, qui ad remotas regiones peregrinati sunt, suppellectilem medicam fuisse auctam; quorum, si opus, multa documenta tradi facillimo negotio hic possent, quaedam postea indicabuntur. Addo quoniam in plerisque auctoritas exemplumque aliorum plurimum ponderis habent, non deficere medicos practicos, per totam diem ad aegrotorum lectos occupatissimos, qui in hoc specierum definiendarum studio ampliando et ad iustam certitudinem prouehendo pro virili desudarunt, quorum ex vita adhuc superstitibus duos modo nomino celeberrimos viros, vnum Anglum, JOANNEM FOTHERGILLVM *), alterum Suecum, PETRVM JONAM BERGIVM.

Ad immortalia itaque merita LINNEI Equitis, quem me praeceptorem habuisse, quoad vixero, gloriabor, pertinet, quod inde ab. a. 1749, quo Eiusdem Materia medica vegetabilis omnium primum comparuit, quam dissertationum forma medicamina animalis et mineralis census paullo post exceperunt, remedia tantum non omnia ad suas species retulerit, hasque terminis breuibus, intellectu facilibus et adaequatis, optimorum synonymorum satellitio stipatas, proposuerit. Hinc et honorifico encomio, et post longam temporis intercape-

*) Dolendum, et hunc virum meritissimum anno post obiisse.

tercapedinem repetito, breuiarium eius condecoravit adeo is, qui subinde rigorosior iusto in censeendis meritis optimi viri fuit, ill. HALLERVS *a*). Ipse iste magnus vir postea nouis luminibus accedentibus in ferioribus scriptis, prout ingenuum virum decet, in haud paucis circa haec mutauit mentem suam. Et ad hanc postea, qui vel singularibus libris vel indicibus pharmaceuticis totum medicaminum complexum prosequuti sunt, auctores fere omnes illorum species determinarunt. Non Eius autem culpa, sed laetissimo, in quod sensim medicamentorum doctrina ascendit, incremento tribuendum, quod recentius de quorundam origine veriora innotuerint, de aliis, de quibus ipse hac in re subdubitauerat, iam sine erroris formidine pronunciari possit, alia rursus, de quibus ne coniectura quidem statui poterat, cuiusnam speciei soboles essent, iam in reliquorum numerum systematico ordini conuenienter inferi queant. Pretiosum Persarum Salep nihil praerogatiuae prae indigena radice Orchidum quarundam, nominatim Orchidis Morionis L. habere, nemo amplius dubitat, experimentis ab Anglis Suecisque in ipso corpore humano factis. Meccae balsamum FORSKÄLII indago ex Amyride quadam prouenire primum declarauit. VANDELLI et GLEDITSCHII opera post tot lites penitus cognoscimus vnam ex iis stirpibus, quae Draconis sanguinem fundunt, Dra-

F 2

caenam

a) *Method. stud. med. Tom. 2. p. 956. et Bibl. botan. Tom. 2. p. 249.*

caenam Draconem L. Exacte iam nouimus Spigeliam, quae radice vermes necat ab alia, quae herba iis infesta est, dignoscere, GARDENIO facem praeferente. Inter tot alia commoda, quae et in rem medicamentariam ex itineribus per Russiam a scrutatoribus naturae nouissime institutis redundarunt, pretium Glycyrrhizae echinatae L. radici decretum est, alteri iam dudum vsitatae non secundum; et ab iisdem cell. viris non vnā sed plures Accipenseris species Ichthyocollam suppeditare, et modum, quo praeparetur, didicimus. AVBLETHI meritum vel hoc haud exiguum est, quod Simarubae veram arborem ex tenebris produxerit, nec minus, quod Resinam elasticam verae suae speciei, quae illi est Heuea guianensis, nec Cecropia peltata L. adiudicauerit. Vix vero luculentius documentum aliud quidpiam, quam WINTERI cortex, praebet, quantum vacillet materia medica sine historiae naturalis fulcimento, quum auctores fere omnes, solo forsitan SLOANEO excepto, istum et Canellam albam pro vno eodemque cortice habuerint, licet discrepent hi cortices quam maxime, vt haud ita pridem cl. SOLANDER, et postea cl. FORSTERI, ex itinere ad regionem arboris natalem, Terram del Fuego, reduces edocuerunt, et genere et patria, item colore, odore et sapore, et consequenter virtutibus; quae in externo habitu corticum discrimina et ego, vtrosque comparans, certissima cognoui. Recentissime etiam de origine extracti siue succi Catechu veriora, quam quae adhuc nobis innotuerunt, comperimus, et eo quidem

dem tempore, quo ob vnanimem fere consensum auctorum nulla erroris suspicio subfuit.

Hoc proxime dictum inuentum, prout medicaminis ipsius naturam et vires, curatius specimine hocce inaugurali trutinare in animum induxi, exoptatissimi Praeceptoris JO. ANDREAE MURRAY, viri illustis, consilio primum permotus, dein rerum dignitate, quam vltcrius, operi manus admouens, cognoui, stimulatus. Etenim Catechu medicinam constituit, longa annorum serie celebratam, nec sub clariori hodiernae aetatis in re medica luce, merito plausu deltitutam, id quod libros practicos et pharmaceuticas formulas euoluenti vberrime constabit. In ista vero bene multorum, qui medicinae nomina sua professi sunt, ieiunitate et socordia quemlibet meliora edoctum fas est, qualibet data occasione id quod toti medicamentorum scientiae, alteri illi artis salutaris oculo, fulcimentum praebet, propugnare et contra iteratos insultus tueri.

§. I.

Taediofa res est, in *antiquitatem* medicamentorum inquirere et operam rarius veritatis melle rependens. Seniorum medicorum primus, quantum colligo, extracti, de quo sermo est, GARCIAS AB HORTO *b)* meminit, nomine Cate illud insigniens, secundum linguam genti Indicae, inter quam vixit, vernaculam, a. 1563, quo anno Lusitanico idiomate

F 3

b) Aromat. et simpl. Versf. Clusf. p. 43.

mate liber eius de aromatibus et simplicibus Indiae comparuit. Ex qua stirpe succus Lycii DIOSCORIDIS *e)* aliorumque veterum fuerit, licet cum Cate suo eundem GARCÍAS et post eum HERMANNVS *d)* agnoscat, dici nequit; certe discrepat descriptio arborum DIOSCORIDIS et GARCIAE, prout nec paucae istae ab hoc de Cate traditae notae in arbores ab aliis significatas quadrant. Lentos tamen progressus primis temporibus, postquam Catechu in Europa innotuit, usus eius medicus habuit. Et enim adhuc a. 1671. WOLFFGANGVS WEDELIVS *e)* de illo, tanquam de re noua, nec nisi paucos modo annos antea in Europam translata, loquebatur, licet ipse iam tum de variis felicibus experimentis in morbis ea captis exponeret.

§. 2.

Pauca vero tantummodo alia medicamina sunt, de quorum *origine et natura* tot diuersae opiniones inualuere, ac de hoc ipso. Ad quasdam harum nomina ista varia spectant, quibus *Catechu* insigniuerunt, quod alii *Cate-chu*, *Caetchu*, *Caschou*, *Caschu*, *Kaschu*, *Catsjoe*, *Cashew* (BATE), scribi malunt; cuius scriptionis discrepantia sine dubio praecipue a pronuntiatione vocis varia, apud Europaeos usitata, pendet. Gallis Cachou dicitur. *Terrae Iaponicae* nomen, quod adhuc apud multos seruat, duplicem, qui olim obtinuit, errorem in

memo-

c) Mat. med. Lib. I. p. 132.

d) Cynosur. Mat. med. T. I. p. 721.

e) Eph. N. C. Dec. I. Ann. 2. Obs. 128.

memoriam reuocat, alterum, quod terra esse existimaretur, qui condonari ideo potuit, quod friabilem naturam cum terris communem haberet, et insuper vel vitiosa praeparatione vel et fraude terrae vel largior vel parciior pars accederet; alterum, quod ex Iaponia prouenisse arbitrarentur. Id quod posterius autem non maiori iure factum est, quam quo hodie Terebinthina vel Borax a Venetia nomen habet, vel Opium Thebaicum vel Senna quaedam Alexandrina audit, vel variis medicamentis simplicibus epitheton a Turcia adscribitur. Per Mauros enim modo et Sinenfes ad Iaponenses copiose hic succus translatus fuit *f*), a quibus vero simillimum est, utpote natione mercaturae deditissima, bonam eius partem haud sine foenore aliis nationibus postea fuisse venditam, Retinuerunt tamen medici Edinburgenfes *g*) hoc nomen erroneum, ad quod etiam eorum Tinctura Iaponica *h*) respicit; et Suecis *i*) *Succi Iaponici* nomine venit: fas vero est sperare, ut similem olim hi ipsi medici rigorem in corrigendis nominibus simplicium, si id modo sine obscuritatis vel confusionis metu fieri possit, ac apud praeparata compositaque necesse duxerunt, adhibitori sint. — Facile fuit refellere quorundam opinionem, Catechu vitriolicae naturae esse,

F 4

quo-

f) CLEYER in *Eph. N. C. Dec. 2. Ann. 4. Obs. 3.*

g) *Pharm. Edinburg. nouiss. a. 1783. p. 62.*

h) *L. c. p. 78.*

i) *Ph. Svec. a. 1775. p. 47. item a. 1779. p. 9. tanquam synonymou.*

quorum in numero e. c. LVDOVICI *k*) fuit, quem errorem sine dubio genuit dulcedo, austerum saporem in Catechu excipiens.

Successit alia sententia, esse illud substantiam ex pluribus vegetabilibus mixtis conflata, quem ipsum errorem tam excitasse quam aluisse videntur medici quidam in India versati, quorum igitur testimonium maximi ponderis iudicari potuit, nisi illis acciderit, quod et nostro tempore multis peregrinatoribus, quod iis, quae propriis oculis lustrarunt, admiscuerint quae narratione aliorum perceperant. Ita GARCIAS succum Cate constare ex extracto arboris Hacchie, farina frumenti cuiusdam et scobe ligni cuiusdam nigri, innuit *l*). Miscelae etiam meminit HERBERTVS DE IAGER, cui Indicorum simplicium variorum notitiam debemus, licet non semper unam eandemque locum habere significet *m*). Similiter CLEYERVS *n*), inuentis variis sub commoratione in India orientali clarus, Catechu esse succum ex variis adstringentibus fructibus expressum, verum autem fructum et basin esse ex Acacia quadam, Tamarindo admodum simili, tradidit. HERMANNO *o*) iudice massa est ex fructibus immaturis Arecae et corticibus Acaciae cuiusdam, quam

k) *Pharm. moderno sec. applic. Ed. 3. p. 255.* Conf. argumenta, quae DALE ad retellendam hanc naturam in medium protulit.

l) *Loc. cit.*

m) *Eph. nat. cur. Dec. 2. Ann. 3. p. 10. sqq.*

n) *Loc. cit.*

o) *L. c.*

quam Catechu vocat, expressa et igne densata. Facile patet ambiguis hisce narrationibus veri cupido satisfieri non posse, quum, vel partes istas vegetabiles, ex quibus extractum paretur, vel plane non significant, vel nominibus tantummodo nobis ignotis. — Eorum vero medicorum haud pauci, quibus in Indiam orientalem proficisci non datum, mixtionem variam ex suo ingenio finxerunt, quum nimirum notas quasdam in Catechu iunctim offenderent, vel offendere sibi visi sint, quae in aliis corporibus sigillatim apparent. Ita e. c. LE FEBVRE *p*) ex succo Arecae extracto Liquiritiae et Calamo aromatico componi Catechu existimarunt; alii *q*) ex Glycyrrhiza, Mastiche et vitriolaceo corpore; ut de reliquis nihil dicam.

§. 3.

Plerique tamen auctorum non mixtum succum, sed simplicem, agnoscunt. De *planta* autem ipsa, et de *parte*, ex qua eliceretur, tantopere variant, ut difficile sit ad dirimendum, quisnam eorum fide altero dignior sit. Et hoc iudicium adeo de iis valet, qui ipsi praeparationi succi Catechu in loco stirpium natali sese adstitisse profitentur. Memorata a GARCIA arbor eiusdem speciei videtur esse, ac ista, quam BONTIUS *r*) simili, ut ille, oscitan-

F 5

tia

p) In BOHNII *Diff. de Pleuritide*, §. 37.

q) ETTMULL. *Colleg. in Schröderum in EIVSD. Opp. Ed. MANGETI T. 2. p. 76. Conf. Coll. in Ludov. l. c. p. 146.*

r) *Hist. nat. et med. Ind. orient. p. 92. ubi Arbor spinosa, unde Cate seu Lycium exprimitur, vocatur.*

tia adumbrat. Vterque spinosissimam vocat. Ille vero folia eius comparat cum istis Ericae vel Tamaricis, hic cum Sabinae vel Thuyae, quae etsi leuiusculae notae cum reliquis paucis ab illis traditis sufficiunt ad diuersitatem a mox dicendis speciebus intelligendam. GARCIAS ex suae arboris ramis decoctione cum aqua extractum parari, reliquis dictis dein additis, BONTIVS autem radicem, corticem et folia à se memoratae arboris eidem fini impendi, mentione nulla aliorum additamentorum facta, tradit. Rarior coniectura est, quod ex succo mucilaginoso Anacardii occidentalis L., emergente sponte forma gummi ex trunco, paretur^{s)}, cui forsitan nominis conuenientia ansam praebuit, dum nimirum dicta ista arbor vulgo Acajou vocatur.

Omnium vero arborum, quibus natales extracti Catechu adscripti, nulla magis vel hoc nomine celebrata fuit, quam Areca, notissima ista per Indiam orientalem arbor; vt et inde specificum suum nomen a LINNEO traxerit. Hanc, auctoritate Gymnosophistae cuiusdam nixus, inter alias arbores, quae Catechu erogant, HERBERTVS DE IAGER^{t)} in medium producit. Eius scilicet nucem ante perfectam maturitatem in duo vel tria frusta sectam in aqua, cui parum calcis additum, coqui et feculentam materiam in fundo vasis ex coctione relictam spissari; vt vero hocce extractum tanto melius euadat,

^{s)} Vid. GLEDITSCH *Einleit. in d. Wiss. d. rohen Arzeney-mittel*, T. 2. p. 513.

^{t)} *Eph. N. C. Dec. 2. Ann. 3. p. 10.*

euadat, infusum corticum Acaciae cuiusdam feci dictae superdari, demum iunctim ignis ope in iustam spissitudinem densari. Simul tamen refert pauperioribus in vsu fuisse ex fructibus aliarum palmefcentium vel phoenicoidum Catechu educere *u*). E nuce Arecae elici alius, quem simplicium Indiae orientalis peritissimum DALEVS vocat *x*), scil. HELBIGIVS, testatur. Qua arte ex Arecae vnice fructu id fiat, hic quidem memoriae non prodidit. Certiorem vero reddidit clarissimum JVSSIEV *y*) Chirurgus quidam ALBERTI, diu in Pondichery commoratus, nucem hancce solam in taleolos sectam aqua calida macerari, tincturamque hanc post praeviam colationem in duritiem extracti spissari. Et, hisce quidem narratis, tantum sese postea plerisque probavit succi Catechu ex Areca origo, praecipue quum subscriberet illi celebris iste botanicus et argumentis probabiliorem redderet, vt paucissimi dubitarent in hacce vna acquiescere. Horum e numero sunt DALEVS, NEVMANNVS, ipse LINNEVS et materiae medicae commentatores fere omnes. Ambiguum iterum animum reddit silentium, quod auctores *Horti Malabarici* et *Herbarii Amboinensis*, sub copiosa ista virtutum Arecae commemoratione, obseruarunt; vnde saltim apparet, non paratum exinde Catechu fuisse, vbi horum operum auctores vixerunt. Nec, quantum liquet, hodie in Bengalia et vicinis Indostaniae prouinciis inde paratur, vbi

u) *L. c. pag. 11.*

x) *Pharmacol. p. 296.*

y) *Mem. de l'acad. des sc. de Paris 1720. p. 342. 399.*

vbi tamen extracti huius magnus prouentus, a quo Arecae vsu vel pretium nimium ibidem dehortaretur, vtpote quum extractum inde elicited vigecuplo carius venali Catechu veniret z). Imo comparata horum auctoritate, qui in Arecam utilissimum hocce extractum ex autopfia transferunt cum ista, eorum, qui aliis quibusdam arboribus illud tribuunt, aequali fere marte dimicare vtrique mihi videntur. Nec aliud quidpiam in illorum fauorem arbitror cedere, quam quod de stirpe loquantur, et descriptionibus concinnis et iconibus eximiis botanicis fatis nota, quum contra ea reliquae indicatae defectu vtriusque intelligi non satis pro voto potuerint.

§. 4.

Sed opportune factum est, quod recentissimum scrutinium prisca temporis obscuritati subuenerit, et de *Acacia* nominatim, quam intrare extractum Catechu plures ad finem praecedentis seculi retulerunt, constitui possit. Ex *Acaciae* speciebus fere omnibus, cortice adstringente et rubescendo instructis, vti et aliis stirpibus succum excoqui in India, etsi bonitate et virtute disparem, nos condocescit DE JAGER a), praestantissimum autem erogari, secundum aliorum relationem, ab arbore Indostanice Kheir vel lingua Brachmanum Khadira dicta, ad *Acaciae* genus ab illo relata, quam mance describit, nec multo perfectius depingit. An haec *Acacia* eadem

z) KERR in *medical Observ. et Inq.* T. 5. p. 156.

a) *L. c.* p. 8.

eadem cum ista sit, quam CLEYERVS tanquam basin succi Catechu proposuit, vel ea, cuius corticem in infuso Gymnolophista apud IAGERVM (v. supra p. 16.) succo ex Areca admissum narrauit, vel alia spinis densis horrida, quam obiter IAGERVS memorat, vel Acacia, cuius mentionem HERMANNVS iniicit, ob defectum descriptionum, qui vndique comparet, discuti nequit. Nec magis de specie nobis satisfacit GARCINVS, in Indiam olim profectus, qui loco Arecae arborem quandam Caten tanquam veram producit *b*), quam ipsam vero non sine omni dubitatione pro Acaciae specie habet *c*).

Ast nodum soluit ante paucos annos Chirurgus quidam Anglus, KERR *d*), in Bengalia degens, cui alias quasdam dilucidationes in medicamentorum exoticorum cognitione debemus, scilicet modum hodiernum ibidem Opium praeparandi et descriptionem Dolichi prurientis L. anthelmintico usu serius innotescens. Hic enim sollertissimus vir tam ampla et concinna descriptione, quam elegantissima et partium praecipuarum ratione habente effigie, arborem istam cognitam nobis reddidit, ex qua extractum Catechu in Indostania paretur, et simul artem ipsam illud eruendi omnium amplissime et accuratissime explanauit. Eius igitur studio arborem hanc Mimosae generi accensendam esse, certissime iam nouimus.

§. 5.

b) In SAVARY *Dictionnaire de Commerce. Art. Cachou.*

c) *L. c. p. 644.*

d) *Med. Observ. and Inquir. Vol. 5. p. 151. sq.*

§. 5.

Mimosae genus, eo complexu acceptum, quo apud b. LINNEVM venit, et Acacias et Aeschynomenes siue Mimofas praecedentium botanicorum comprehendit. Quae vetustiora genera a se inuicem distinguere e. c. RAIVS, TOVRNEFORTIVS, BOERHAAVIUS, ideo duxerunt, quod Mimofarum folia attactu sese contrahunt, imo vna cum petiolis desidunt, post aliquod autem temporis interuallum situm priorem recuperant. Vetustissimo tempore Acaciae vox nonnisi aculeis praeditae stirpi (ab *ααζω*) tributa fuit. Duas memorat sub hoc nomine DIOSCORIDES *e*), alteram, quae Gummi arabicum fundat, et succum austerum fructu suppetit (Mimosa nilotica L.), alteram humiliorem et tenuiorem, quae tota planta succum adstringentem vehat, sed praecedentis vi inferiorem. Posteriori autem tempore Acaciae nomine et variae inermes species venere *f*), prout rursus multae plantae florum fructusque structura alias non parum diuersae, vt ex genere Poincianae, Guilandinae, Guaiaci, Spartii, Robiniae, Gleditsiae, hoc nomen ob spinas s. aculeos potissimum olim tulerunt; in quibus omnibus tamen in herba aliquid simile occurrit. Quod vero Prunus spinosa (Acacia nostras vulgo) et foecundationis partibus et foliis diuersissima in eandem tribum olim cooptata fuerit, in cunis tum iacuisse rem herbariam documento est. Novissime totum Mimosae LINN. genus in species filiquo-

e) Mat. med. Lib. I. cap. 133.

f) V. TOVRNEF. Instit. rei herb. T. I. p. 605.

filiquosas et pericarpas ill. SCOPOLI g) diuifit, quarum priores ad genus *Acacia* a fe dictum, pofteriores ad genus *Inga* refert. *Inga* eiusdem comprehendit *Mimofam polyftachiam* JACQ. *Mimofam Bourgoni* AVBLETH, vti et *Coublandiam* EIVSDEM. An hicce a fructu potiffimum defumtus character generibus condendis fufficiat, valdopere dubito, alteri enim filiquam multilocularem, alteri pericarpium filiquofum multiloculare adfcribit; quibus igitur notis vtrumque differat, non fatis perfpicio. In nota h) quidem idem cel. vir diuifionis in quatuor genera meminit, fed dictam modo fuis locis inferuit.

Aft nifi violenter feriem naturae difrumpere velimus, vtique conuenit, *Mimofae* et *Acaciae* genus, LINNEO praeunte, ob fimilitudinem floris fructusque in plerisque partibus, coniungere, nec in difcernendis iis exiguae leguminis vel carnofi vel membranacei diuerfitatis nec contractionis ab attactu foliorum rationem habere; tanto magis, quum haecce contractio, vt in *Mimofa pudica* horti botanici Gottingenfis expertus fum, declinante aestate torpeat et hieme adeo omnino defit. Magna vero diuerfitas obtinet in fpeciebus bene multis huius generis quoad numerum et figuram floris fructusque partium, ita vt haud parum difficultatis enalcatur, fi paucis verbis generis characterem condere aggredimur, nec vix tot difcrepantes

g) *Introductio ad hiftoriam natural.* p. 295. 298.

h) *L. c.* p. 295.

pantes inter se species in vnum genus coniungi queant, nisi tacite ad habitum simul respiciatur. Nec breuior iste character genericus, a summo LINNEO nobis relictus, alia lege ferri potest, quam quod in plerasque non vero omnes et singulas species quadret. Est vero hic *i*)

Floris hermaphroditi: Calyx quinquedentatus; Corolla quinquefida; Stamina quinque seu plura; Pistillum vnum; Legumen.

Floris masculini: Calyx quinquedentatus; Corolla quinquefida; Stamina quinque, decem, plura.

Pertinet igitur ad Systematis perill. LINNEI *Polygamiam Monoeciam* et, in ordinibus naturalibus, ad EIVSDEM plantas *Lomentaceas*, quas alii e. c. ZINNIVS *k*) commodè *Papilionaceis affines* vocant. ADANSONIVS *l*) hoc genus in familia Leguminosarum sectioni *Cassiarum* suarum annumerat. Recentissimus ordinum naturalium censor ill. scopoli *m*) lomentaceas et papilionaceas Tribu sua *Leguminosarum* complectitur, quarum essentialem characterem fructus constituit; lomentaceas autem Leguminosas *spurias* nuncupat, omittens tamen multa genera, quae summus LINNEVS istis at-
texuerat.

§. 6.

i) LINN. *Systema vegetabilium* Ed. 13. MURRAY. p. 767. Ed. 14. p. 913. CONT. LINN. *Genera plant.* Ed. 6. p. 548.

k) *Catal. plant. Goetting.* p. 371.

l) *Familles des plantes*, T. 2. p. 319.

m) *Introd. ad hist. nat.* p. 294.

§. 6.

Noua vero exsurgit difficultas in *speciebus Mimosae* discernendis, prout in generibus compositis ex numerosis speciebus esse solet. Numerat enim LINNEVS in *Systematis vegetabilium* Ed. 13. species 46 *); quibus et nonnullae aliae addi possunt, ADANSONIO n) et AVBLETIO o) auctoribus. Variarum harum valde inter sese similes, imo, ut in *Mimosis* pluribus, quas hortus R. Gottingensis bot. alit, obseruavi, haud paucae insigni inconstantia numeri pinnarum per paria insertarum laborant.

Differunt vero species ratione

Durationis, secundum quam vel annua (*Mimosa plena*), vel perennes (*M. viua*), vel fruticosae, vel arboreae (ut pleraeque) sunt;

Spinarum vel *aculeorum*, ita ut quaedam inermes (e. c. *M. simplicifolia*, *virgata*, *glauca*) sint, aliae spinosae, idque spinis vel solitariis (*M. cinerea*), vel geminis (*M. cornigera* L. et Cate MURR.), vel ternis (*M. Senegal*), quae ipsae vel sparsae vel determinato ordine, ut spinarum stipulares et petiolo vel pedunculo insidentes;

Folio-

*) Libri autem huius Editio 14. a. 1784. censet species 53.

n) *Memoires de l'ac. d. sc. de Paris* 1773. p. 4. sqq.

o) *Histoire des plantes de la Guiane Françoise*, Tom. 2. p. 938. sqq. n. 1. n. 2. n. 18. n. 19. n. 20. n. 21. et auctore SCOPOLI *Coublandia frutescens* apud AVBLETIVM l. c. p. 937.

Opusc. Vol. II.

G

Foliorum, quorum vno haecenus exemplo (M. simplicifoliae) *) simplicia, aliis pinnata simpliciter, aliis coniugata, aliis duplicato pinnata, numero parium vario ad 40 vsque, item contactu vel sese contrahentia vel non obsequiosa;

Petiolorum vel alatorum (e. c. M. Inga), vel linearium (vt in plerisque);

Glandularum, quarum vel nullae adsunt (MM. eglandulatae), vel quaedam inter pinnae foliorum, omnes (M. Cate), infimas (M. glauca), extimas (M. nilotica), pone pinnae (M. latifolia), ad petioli basin (M. peregrina), apicem (M. reticulata);

Inflorescentiae, quae ipsa vel globosa est (M. glauca, pudica) vel ouata (M. arborea) vel spicata (M. Cate), vel subpaniculata (M. pennata, tamarindifolia), vel fasciculata (M. Lebbeck);

Calycis, vel trifidi (M. pudica), vel quinquefidi (vt plerumque);

Corollae, quae vel nulla (M. pudica, sensitua), vel monopetala quinquefida (MM. pleraeque), vel pentapetala (M. punctata, Cate);

Staminum, vel antheriferarum omnium, quatuor, quinque, decem ad centum (MM. polyanthae), quae ipsa mox ad basin soluta, mox inter se coalita (MM. monadelphae, e. c. Vnguis Cati, Inga), vel quorundam simul castratorum (M. virgata, Flores anandri);

Legumi-

*) *Mimosa simplex* SPARRM. in *Att. Vpsal. nov. Vol. 3. p. 197.* Cf. LINN. jun. *Suppl. plant. p. 456.*

Leguminis, vel membranacei, quod ipsum vel articulatum (moniliforme), vel marginatum, vel solidum est, idque bialve (MM. pleraeque), vel quadriualve, vnico forsitan exemplo (M. Inga).

Differunt praeterea species *Caule* vel hispido vel nudo, *Spinarum* figura, *Cirrhi* terminalis petiolorum vel praesentia vel absentia, *Leguminum* item *Seminum* figura multiplici.

Hisce notis characteres specifici superstruuntur, harumque diuersarum respectu habito subdiuisiones, faciliori longi huius generis examini accommodatae, condi possunt.

Pleraeque huius generis species Asiam australem patriam habent, multae calidiorem Americam et adiacentes insulas, quaedam Africam australem.

§. 7.

Sed subsistam in ea *specie*, quae *extractum Catechu* erogat. Hanc quoniam cl. KERR differentia specifica, siue descriptione contractiori, qua prima fronte a reliquis speciebus haec arbor dignosci possit, non instruxit, (quam quidem praemittere cuiuslibet, plantam nouam vel minus cognitam in medium proferentis, officium est), et hic idem cl. vir eiusdem descriptionem Anglice paullo verbosius concinnauit: operae pretium duco, tam conferendo reliquarum Mimosarum characteres huius characterem specificum exarare, quam illam, iconis eiusdem

dem illustratione in subsidium adhibita, terminis botanico tenori magis congruis, adumbrare.

MIMOSA CATE *Murrayi*.

MIMOSA (Cate) *spinis stipularibus binis, foliis bipinnatis 15-30 iugis, foliolis 40 iugis, spicis elongatis axillaribus.* MURR. *Appar. medicam. Vol. 2. p. 415.*

MIMOSA (Catechu) *spinis stipularibus geminis distinctis, foliis bipinnatis utrinque multiugis, spicis geminis axillaribus cylindricis.* Pharm. Suec. Ed. 2. p. 9.

MIMOSA (Catechu) *spinis stipularibus, foliis bipinnatis multiugis: glandulis partialium singulis, spicis axillaribus geminis s. ternis pedunculatis.* LINN. jun. *Suppl. pl. p. 439.*

MIMOSA *from which the Terra Japonica is extracted.* Ampla eius descriptio a cl. KERR in *medical Observations and Inquiries Vol. 5. inde a pag. 151. praestita cum icona Tab. 4.*

COIRA vel CAIRA in Prouincia Bahar. KERR.

AN ACACIAE SPECIES, *ex qua Kaath vel Lycium indicum conficiunt* HERBERTI DE IAGER in *Eph. N. C. Dec. 2. ann. 3. p. 9. fig. 1.?*

Planta arborea, pubescens, crescens in India orientali, nominatim copiose in Indostaniae montibus Rotas et Pallamow et aliis locis Bengaliae vicinis, et quidem solo vario.

Radix ramosa.

Truncus plerumque tri- vel quinquepedalis, diametri circiter vnus pedis, vestitus cortice crasso, scabro, rimoso, bruno; *ramis* in coronam densam

sam raro vltra duodecim pedum altitudinem dispersis; ligno durissimo et ponderosissimo, intrinsecus pallide bruno vel profunde rubro, imo hinc inde nigro, extus ad crassitiem vni- vel bipollicarem albo.

Folia alterna, pollicem vnum vel duo distantia, a quatuor ad decem pollices longa, abrupte bipinnata, pinnis omnibus oppositis, vniuersalibus 15-30 iugis, fere bipollicaribus, sursum in petiolo glandula inter quodlibet par distinctis, pinnis partialibus circiter 40 iugis, linearibus, tres decimas pollicis aequantibus, sursum glabris, deorsum villosis *p*).

Petioli basis femi vel vnipollicaris.

Spinae ad exortum petioli binae recurvatae, in iuniori planta strictae, in vetustioribus saepe flexiles et vix visibiles.

Spica densa, axillaris, vel solitaria, vel subinde duplex, quadri- vel quinque-pollicaris, pedunculata.

Flor exiguus, albus, sessilis, bractea exigua suffultus.

Calyx monophyllus, tubulosus, pubescens, laciniis quinque ouato-oblongis, acutis, patentibus.

Corolla pentapetala, calyce duplo maior et albida.

Stamina numerosa; *filamentis* capillaribus, corolla duplo longioribus, reptaculo adnatis; *antheris* fere globosis, didymis.

Pistillum vnicum, *germine* ouato-oblongo, breuiter pedicellato, supero, *stylo* filiformi filamenta aequante, *stigmat*e exiguo, obtuso.

G 3

Legumen

p) KERR l. c. *Explanation of Figures*, p. 407.

Legumen membranaceum, compressum, glabrum (non articulatum); margine repando tenui cinctum, brunum, duos circiter pollices longum.

Semina in quolibet legumine sex vel octo, rotunda, dura, compressa, inter se remota, pedicello flexuoso inserta; nauseosi, si masticantur, odoris.

Animaduerfiones.

Poterit quibusdam nomen *Cate*, speciei huic additum, non satis commodum videri, quum narrantibus GARCIA AB HORTO et IAGERO ipse succus a nationibus Indicis variis *Cate* vocetur. Sed respexisse se cel. MURRAY, qui hoc epitheto primus usus est, mihi declarauit ad GARCINI *q*) testimonium, secundum quod ipsa arbor *Cate* dicatur, prout *Chu* succum, siue extractum ipsum, significat.

In proleteria ista IAGERI de Acaciae suae narratione occurrunt tamen quaedam momenta, quae probabile reddunt, intellexisse illum Mimofam novissime dictam. Indostanice et Decanice refert dici Kheir et lingua Brachmanum Khadira, quae nomina ab istis Coira et Caira, quibus secundum KERRIVM arborem insigniunt incolae Prouinciae Bahar, diuersitate vnice dialecti videntur differre. Ex descriptione manca IAGERI nihil huc trahi potest, praeterquam pinnatam foliorum figuram (folia, inquit, alatim producebant furculi) et spinas aduncas

q) SAVARY l. c. *Art. Cachou.*

cas ramulorum. Icon vero etsi ex mutilato exemplo, flore fructuque destituto, quod ex sylua remota illi allatum fuerat, adornata comparet, manifeste tamen sistit folia bipinnata et figuram pinularum fere similem, licet numerus pinnarum tam vniuersalium quam partialium longe parciore sit, quam in icona cl. KERR, cuius causa forsitan in exigua chartae magnitudine quaerenda. Vtriusque denique auctoris stirps eandem patriam, regionem Indostanici regni trans Bengaliā sitam, agnoscit, et vsui eidem, pro succo Catechu, inseruit.

§. 8.

Sed iam dispiciendum, *ex qua parte stirpis di-
ctae et quomodo hic ipse succus eliciatur.* EX IAGERI Mimosa, quantum sub ista dictionis breuitate intelligo, succus ex cortice arboris coctione extractus fuit. GARCINVS plurimum partium suae Cates meminit in hunc usum idonearum, nulla speciatim indicata; SAVARY r) autem, nescio an eiusdem auctoritate, ex cortice huius plantae obtineri. Verum KERRII narratione, qui et operi adstitit et ipse Catechu parauit, comperimus, in ista Indiae regione, quam inhabitat, ex interna ligni parte colorata (V. supra p. 110.), in ramenta discissa coctione cum aqua succum elici. Replent scilicet hisce vas terreum non vitreatum angusti orificii, affusa ad summa ramenta vsque aqua, quae, postquam ad dimidium coctione exhalauit, decoctum absque praeuia colatione intra vas terreum planum,

G 4

donec

r) L. c. Art. Cate.

donec tertia pars superstes sit, densant, tum frigido loco per diem, dein ope caloris solaris sub repetita aliquoties de die agitatione inspissant. Massa demum conspicuam spissitudinem nacta, supra storem vel pannum, vaccini stercore cineribus confersum, extenditur, et chorda in frusta quadrangula diuiditur, et perfecte sole radiante sub situ glebarum harum pluries mutato ficcatur. Pro faciliiori coctione furnum simplicis structurae adhibent, quam vero hic non opus est repetere.

§. 9.

Iam itaque constabit, quo iure praeter vulgarem morem cel. SPIELMANNVS s) iam antea, quam KERRIVS pondus rei daret, item cel. MURRAY t), Catechu ab Areca remouentes, illud ad Mimosae genus retulerint, *Pharmacopoea Brunsvicensis* u) ex arbore Cate, quam, etsi dubitanter, Mimosam declarat, deriuauerit, *Pharmacopoea Rossica* v) autem sine vlla dubitatione Mimosae cuidam adscripserit, quod et nuperrime edita *Pharmacopoea Suecica* x), item *Edinburgensis* y) fecerunt. Item elucebit, quo iure nouissime cl. HOFERVS z) Catechu succum condensatum, e variis Mimosarum fructibus extractum, vocauerit.

Sed

s) *Mat. med.* a. 1774. p. 217.

t) *Appar. med.* T. 2. l. c.

u) *A.* 1777. p. 48.

v) *A.* 1778. p. 14.

x) *A.* 1779. p. 9.

y) *A.* 1783. p. 62.

z) *Manuale pharmaceuticum*, Basil. 1779. p. 37.

Sed omnia momenta attento animo mihi illustranti *nondum sopita* quaelibet de eius origine *dubia* videntur; in qua dubitatione fas est fateri pie colendi praeceptoris MURRAY a) vestigia me premere. Primum memorabile est, in India orientali ad testimonium IAGERI non extractum solum, de quo sermo est, sed quemlibet succum adstringentem decoctione prouocatum et inspissatum Khaat vocari. Est igitur vox quasi generica, prout apud veteres subinde quodlibet forte purgans Elaterium venit b), et nomen Copal ab Americanis omnibus resinis odoratis, quorsum et Balsamus Copaiua, Peruvianus rel., tribuitur c). Haud pauca porro exempla medicaminum adsunt, quae notis multis, imo viribus, conueniunt, diuersa tamen specie imo genere sunt. Quam multiplex Sanguinis draconis origo, gummatum vel gummi resinarum, succorum adstringentium! Eiusmodi succos non vni sed multis speciebus Mimosae deberi, et per plures earundem partes circumfusus esse, (supra §. 4.) ex IAGERO et CLEYERO allata abunde docent, cum quibus conferri merentur quae de Mimosis Nebneb (M. nilotica L.) et Gonakè ADANSONIVS d) tradidit. Quid obstat igitur credere, quod Indiae orientalis populi, qui inprimis masticatorio fine, vel vna cum nucleo Arecae foliisque Betel vel trochiscorum et placentularum variae figurae et magnitudinis

G 5

forma,

a) *Loc. cit.*

b) Conf. de hac re BOD. A STAPEL in THEOPHR. p. 1128.

c) PISO *Ind. nat. med.* p. 118.

d) *Mem. de l'ac. d. sc. de Paris* 1773. p. 8. 15.

forma, Catechu delectantur, illud non vbiuis ex vna eademque planta, sed ex pluribus, prout cuiuslibet loci opportunitas siue vbertas stirpis fert, conficiant; quidni igitur vno loco ex Areca, alio ex Mimosa pararetur? quidni pro ista hominum, praeprimis dum palato indulgendum, sagacitate, assentiaris, mox ex vno vegetabili mox ex pluribus mixtis prouocari. Dabo tamen et hoc, selectum stirpium vel modum praeparationis extracti Catechu potuisse annorum progressu mutationem pati, ita vt, quae ad finem elapsi seculi vel sub initium praesentis vera fuerint, iamiam non amplius confirmentur. Absolui igitur poterunt auctores, etiam si sibi aduersentur, modo in reliquis fides non ambigua, commenti suspicione. Non tamen diffiteor, inter omnes plantas, ob Catechu celebratas, Mimosam supra definitam dignam esse, ad quam istius natales transferantur, quum non solum exactissima descriptione et icone instructa sit, sed idem, qui haec praestitit, autoptes sub praeparatione adfuerit. Saltem dubio caret, regione ista, qua degit, ex nulla alia stirpe illud parari.

Quicquid horum sit, ex Indostaniae variis regionibus, Bengalia nominatim et Surata, item ex Malabaria, Coromandel, Zeylona, nec non regno Pegu, Catechu copiose transfertur.

§. 10.

In dicta stirpium earundemque partium, ex quibus Catechu excoquitur, varietate plurimum latet

latet causae, cur *bonitate* illud tantopere *differat*. Alia continetur in ipso praeparationis modo, et quibusdam terreis, arenosis, vel vegetabilibus additamentis, quae vel fraude, ut pondus increfceret, vel sub ipsa praeparatione et ficcatione bona mente, accefferunt.

Idque vel in istis speciminibus huius extracti apparet, quae in officinis obuia sunt. Forma horum varia. Globosam, quam HAGENDORNIVS *e*), vel ouatam, magnitudinis oui gallinacei, quam BOMARE *f*) memorat, nunquam vidi. Sed ex utroque huius urbis pharmacopolio, lustrato toto eorundem apparatu, quem possident, petii specimina notabiliter a se inuicem discrepantia, quorum similitum et rationem habuit BOVLDOVC *g*).

Quaedam glebas vel placentas crassas, compressas, rotundas, vel et massas magis vel minus regulariter quadratas, repraesentarunt, rubro nigrescentes, impressiones varias quasi a digitis manuum, vel asperam superficiem, prae se ferentes, extrinsecus subinde tectas particulis filamentosis quasi astorea arundinacea adhaerente, vel seminibus, ut videtur, Panici cuiusdam, vel carbonibus, cineribus, terra, vel ligneis siue stramineis fragmentis.

e) *Traité de Catechu*, p. 30.

f) *Dictionnaire raisonné universel d'Histoire naturelle* T. I. in *Ed.* 4. p. 591.

g) *Mem. de l'acad. d. sc. de Paris* 1709. p. 228.

tis. Pondus summum rotundarum glebarum aequauit libram dimidiam cum vncia sesquialtera; quadratae autem a quinque circiter ad octo vsque semiuncias pendebant. Fractis hisce, facile fuit colore particulas heterogeneas distinguere, superficies harum inaequalis splendensque, interrupta cavernulis numerosissimis multiplicis figurae et magnitudinis, vt inde appareat materiam sub motu quodam intestino, vt in spumescentibus substantiis fit, exsiccatam fuisse. Haud aegre in puluerem reduci hae ipsae sese passae sunt, sed multae huic infuerunt festucae lignae nec contritione laborosiori subigendae. Colorque huius pulueris rufo brunus, pallidior tamen longe, quam gleba ipsa integra. Inter dentes stridorem excitauit, quasi arena immixta fuisset, et iam tum, quum salua in deliquium transiret, et quantum fieri potest, antea contereretur. Salua inde sanguine quasi tincta euasit, vt tamen haud exigua pulueris pars indissolubilis maneret. Saporem modice adstringentem lente subdulcis excepit. Et huius generis fuerunt glebae istae omnes, quas ex pharmacopolio praetorio afferendas vel commonstrandas mihi curaueram.

In officina autem Vniuersitatis reperiundae glebae fere omnes subrotundae quidem sed tenuiores fuerunt, varie instar orbiculi argillacei mollioris flexae, extrinsecus puriores nec tam scabrae, sed impressionibus modo quasi ex linteo rudiori notatae; paullo pallidiores. Interne substantia compa-

compactior absque cauernulis et in lamelloſa fruſta diſcerpenda, nonniſi in margine ſplendens, coloris pallide rubri, ſiue carnei, quem tamén intercurrunt ſubinde ſtriae ſaturatius brunae. Tritura in mortario obtinebatur pulvis ſubtiliſſimus ex albicante rubro colore. In hoc ipſo licet exiguae eiſmodi feſtucæ ligneæ ad viſum non comparent, hinc inde tamen in ipſa maſſa conſpecta ſunt ramenta maiora ligni duri pallide bruni, notabiliter adſtringentis. Sapor pulueris longe magis adſtringens ſpeciminibus ſuperioribus ſimulque impenſe et quidem ingrate amarus, quaſi Aloës tantillum adiſtum eſſet. Hic ſenſus poſtquam copioſo affluxu ſaliuæ ſenſim diſpareret, ſapor grate et inſigniter dulcis, vt a Glycyrrhiza, ſucceſſit. Nec obſtitit copia ſaliuæ, quin mucilaginis manifeſtam præſentiam guſtu ſentirem, imo et ſaliua in fila longa trahi potuit. Exigua modo pars indiſſolubilis manſit.

Quanta ſecundum hæcce mea experimenta vtriuſque Catechu generis diſcrepantia! Manifeſtum vero inde eſt, multiplici gradu ſpeciminibus primo loco deſcriptis hæc proxime dicta antiſtare. Nec dubito ex hiſce characteres integritatis huius extracti in vniuerſum repetere, ſuadeoque vt, qui Catechu emant, vel in medicum uſum recipere velint, maſſam primum malleo confringant, et in formulis pharmacopolæ de ſelectu admoneantur e.g. ſic: *Rj. Catechu pallidioris &c.* Prætulit quoque cl.

KERR *h*) extractum coloris albicantis, quam tribuit ligno pallide bruno, quum contra ea, quo saturatius lignum sit, tanto profundioris coloris et vilioris pretii extractum pronunciauerit. Ramenta lignea, quae offendi, oscitantiae in colando decocto sine dubio adscribenda.

§. II.

Quum Catechu saporem valde austerum prae se ferat, coniectura iam eo deuehimur, vt vi *putredinem auertendi et corrigendi* haud mediocri illud instrui nobis persuadeamus. Etenim adstringentia ex potissimorum antisepticorum esse numero cell. PRINGLE, MACBRIDE, PERCIVAL, item matrona cell. THIRV D'AXANVILLE, cuius et cl^{mi} POVLLETIER DE LA SALLE operae librum *Essay pour servir à l'histoire de la Putrefaction* debemus, et quicumque experimentis cum hisce extra corpus humanum indulserrunt, extra dubium ponunt. Cur Catechu hisce non eadem sollertia submissum fuerit, ac alia similis naturae, et genuinum eius pretium requirat, mirandum est. Paucis modo ill. PRINGLE *i*) inter aliorum recensum memorat, carnis frustum solutioni eius aquosae, in qua plurima eius pars fundum petiit, immissum, diu a putredine seruatum fuisse.

Vt proprio experimento, extra corpus humanum instituto, de hac ipsa vi certior euaderem, m. Augusto

h) Loc. cit. p. 155.

i) *Diseas. of the army Append. Exper. 10.*

gusto aestatis nuperrime elapsae pulueris Catechu optimae notae vnciam dimidiam frusto carnis bubuli ponderis vnciae vnus et dimidia iam non-nihil putrescentis, incisionibus aliquot factis infricui, huicque vncias sex aquae destillatae infudi, ita vt in hac omnino submergeretur. Vas per tres hebdomades in conclauis, quo thermometrum Fahrenheitianum ex spontaneo atmosphaerae calore inter gr. 71 et 78 supra 0 substitit, retinui, et carni liberum per hoc tempus aditum concessi. Nihilominus tamen ne minimum quidem putredinis vestigium neque odore nec colore nec mollitie sese tum exseruit, sed e contrario sese crispauit caro et tenacior rigidiorque euasit. Exemi tandem aliquot hebdomades post, more pertaesus, carnem, et, postquam auoluauerat aqua omnis, nihil nisi massa dura remansit, quae tamen in fibrillas discerpi, quin in pulvisculum conteri inter digitos, sese patiebatur.

Quo autem tanto melius virtus, in quam inquisiui, constaret, aliud carnis frustum eiusdem ponderis cum eadem quantitate aquae in aliud vas immisi, sed omittens additamentum extracti Catechu. Haec vero caro in eodem conclauis et sub eadem aëris temperie post biduum in putredinem manifestam transiit.

Quid ex hocce experimento consequatur, sponte quidem patet. Iuuat tamen monuisse, constare inde, quod Catechu non solum putredini obuiam eat, sed iam natam corrigat et subigat.

Nam

Nam, vt supra monui, initium putredinis iam antea in carne adfuit.

§. 12.

Perfuafus ad abditam corporum naturam expiscandam prudens eorum *chymicum exarven* haud parum facere, non piguit me experimenta huius generis instituire. Varia horum iam antea praestiterunt HAGENDORNIVS *k*), BOVL DVC *l*), NEVMANNVS *m*), LEWIS *n*). Et horum quidem priores duo etiam vehementiori igne, sine alia miscela, praeterquam arena, vt ne Catechu sese inflaret, destillando illud torferunt; vnde BOVL DVC pauxillum phlegmatis, spiritum acidum, multum olei cfsaffi et bruni, misti aliquot guttis spiritus vrinosi elicuit. Hisce ex Catechu vnciiis quatuor expulsis, caput mortuum vnciam vnā pendens remansit, quod ipsum forti calcinatione grana duodecim falis lixiviosi erogauit. Sic et quum aperto igne in crucibulo Catechu vnciam vnā calcinaret, cinerum drachma vna cum dimidia remansit, ex qua elixari aliquot grana falis alcalini fixi sese passa sunt. Sed quum fortiores eiusmodi ignis torturae parum utilitatis afferant ad naturam corporum cognoscendam: praestat aliis experimentis, mitiori igne peractis, quae non destruunt partes, ex quibus corpora constan-

k) *Traët. de Catechu*, p. 14. sq.

l) *Memoires de l'ac. d. sc. de Paris* 1709. p. 229. sq.

m) *Med. Chymie*, Ed. KUSSEL. Vol. 2. P. 4. p. 386. sq.

n) *Experimental History of the Mat. med.* p. 574.

constantur, sed blande modo easdem ex suo nexu diuellunt, acquiescere.

1.) Non multum discriminis apparuit inter vtrumque dictorum generum Catechu, quum eadem candelaе flammæ admouerem. Vtrumque enim mox bullulas agere cum strepitu coepit, dein candere, tandem in cineres albos verti; neutrum vero arsit. Pallidius tamen illud Catechu emisit succum fluidum resinolum, et quamdiu calidum permansit, tam molle animaduerti, vt in fila trahi et compressum in globulum mutari, instar Styracis, posset, inter dentes vero tenacitatem quasi Mastiches proderet; vtprius vero refrixerat, in puluerem conteri potuit. Minor longe tenacitas sub hisce experimentis in altero Catechu genere apparuit.

In experimentis sequentibus omnibus vsus sum Catechu melioris notae, hoc est, pallidiori.

2.) Huius in puluerem redacti drachmam vnā in vnciis tribus aquae destillatae solui, vnde colatione praegressa solutio grate ex rubro bruna et pellucida, modice amara et adstringens, emerfit. Residuo licet iterum aquae destillatae vnciam vnā infunderem, haec tamen parum vel nihil soluit. Solutionem tum vtramque commiscui et spissavi, vnde grana quadraginta quatuor extracti sicci pallide rubri obtinui. — Residuum post dictam solutionem aquosam siccum, quod gr. duodecim pendebat, spiritus vini rectificatissimi vncia vna et dimidia solui et colaui. Huic solutioni

quum aquam destillatam instillarem, pristina pelluciditas permanfit. Inspiffatione ad ficcitatem vsque facta, extracti grana octo eiusdem faporis ac Catechu obtinui. Superfititem massam insipidam fereprehendi, et ex meris lignosis particulis et fabulo constantem. Pondus huius fuit gr. quatuor. Tota vero drachma Catechu huic experimento impensa iacturam granorum quatuor subierat.

3.) Pulueris Catechu drachma vna, soluta in spiritus vini rectificatissimi vncia vna, erogauit solutionem elegantem claram rubicundo brunam, quam postquam colaueram, residuo iterum vnciam dimidiam istius spiritus superinfudi, sed sine notabili solutione. Vtramque solutionem commiscui, quae ex instillata aqua destillata ne minimam quidem mutationem siue praecipitationem subiit, idque nec tum, quum caloris ope spiritus partem auolare curarem. Solutio haec inspiffata grana triginta extracti sicci erogauit: residuum autem indissolubile grana viginti quatuor constituit.

4.) Alia vice Catechu partem vnā in aquae vulgaris partibus sex solui ope modici caloris. Color solutionis pallide ruber s. carneus fuit, fapor magis amarus, quam austerus. Postquam refrixerat massa, coagulum mucilaginofum, gelatinae instar tremulum, apparuit.

5.) Tinctura eadem proportionē ex Catechu et spiritu vini rectificatissimo sub modico calore facta,

facta, coloris rubro bruni instar decocti Coffeae fuit, saporis autem magis austeri quam amari et austerioris longe, quam solutio aquosa. Frigefacta a coagulo libera mansit, sed lente exhalans in extractum glutinosum profunde brunum transiit.

6.) Ex succi Catechu drachma vna, aceti vini concentrati vnciae duabus soluta, emerfit solutio saturatior minusque clara, quam praecedentes; quod supererat affusa vncia vna aceti vini concentrati elixauit. Mixtas solutiones in extractum siccum ponderis gr. triginta sex spissauit. In filtro remansit residuum gr. viginti.

7.) Vitrioli acidum concentratum quum pulveri succi Catechu instillarem, incaluit et ebulliuit massa sparsitque odorem sulphureum, et in molem solidam coit. — Acido vitrioli diluto, saturata et opaca, licet exigua, solutio contigit, quae sulphureos vapores sparsit, et super igne nigredinem induit.

8.) Per alcali fixum s. oleum tartari per del. et alcali volatile s. spiritum salis ammoniaci pariter Catechu soluebatur, sed parce et imperfecte.

9.) Oleum oliuarum nihil plane eius soluit, et ne caloris quidem intensioris ope, sed Catechu induruit, et fundo vasis adhaesit.

10.) Solutioni aquosae Catechu quum solutionem vitrioli martis instillarem: miscela haec notabilem nigredinem induit.

Non opus mihi visum est, pluribus experimentis ad indolem Catechu inuestigandam et menstrua idonea in vsum eiusdem medicum cognoscenda insistere. Nec attinet multis haecce mea cum aliorum experimentis comparare, quae in proportionem partium solubilium et indissolubilium non possunt non variare nonnihil, quum puritate ipsum Catechu tantopere variet. Ita multis fordibus non potuit non inquinatum fuisse Catechu illud, quod experimentis subiecit cl. LEWIS o) qui hasce $\frac{1}{8}$ constituisse refert: a me exploratum $\frac{1}{3}$ circiter heterogeneorum comprehendit.

Gummosas aequae ac resinosas partes inesse huic succo ex dictis n. 2-5 apparet. Vtrumque partium genus vero tam arcte connexum sine dubio mediante sale alcalino est, ut et aqua copiam resinae soluat, et spiritus vini rursus copiam gummi; nec, ut alias fieri solet, ex tinctura spirituosissima instillando aquam resinosae particulae in fundum mergantur. Aqua tamen plus extrahit, quam spiritus vini; unde gummosas partes pondere esse potiores resinosis colligitur. Quum tinctura spirituosissima austeriore solutione aquosa, haec contra magis amara patet, quale menstruum pro diuerso scopo medico sit eligendum. Nec sane nullius pretii est, scire gelatinosam vnice euadere solutionem futuratiorem aquosam, non spirituosam, quum iis in morbis, in quibus inuoluendi virtutis vna cum reliquis succi Catechu est ratio habenda, menstruum consequenter

o) L. c. p. 544.

ter eligendum, quod mucilaginosas eas partes eruat. Adstringendi eius potentiam quum sapor indicat, tum niger color, quo miscela cum solutione vitrioli martis tingitur.

§. 13.

Dum in analysi chemica verfor, commodissimus locus esse videtur, praecipua *praeparata* et *composita* recensendi, quae utpote in Dispensatoria pharmaceutica translata, publica auctoritate donata existunt. Non leue inde argumentum capietur, pretium, quo Catechu in re medica in vniuersum et nominatim inter certas gentes fruitur, diiudicandi; etsi ab altera parte iterum fatendum, in recentioribus quibusdam pharmacopoeis non ideo parciore eiusdem praeparata vel composita occurrere, quod despectum euaserit, sed quod nostro tempore magis simplicitati in re medica, quam olim, litetur. Recipiunt igitur succum Catechu

PHARMACOPOEAE LONDINENSIS (*Franc. ad Moen. 1761.*) *Tinctura Iaponica* pag. 70. *Puluis e succino compositus* p. 89. *Trochisci e Terra Iaponica* p. 93. *Mithridatum* p. 101. item *Theriaca Andromachi* p. 103.

PHARMAC. EDINBURGENSIS (*Bremae et Lipsiae 1758.*) *Decoctum Iaponicum* p. 53. (Omissum in *Ed. nouiss. 1783.*) *Confectio Iaponica* p. 76. *f. Electuarium Iaponicum* *Ed. nouiss. p. 206.* *Electuarium ad dysentericos l.c. Lohoch ex amylo* p. 78. *Trochisci de terra Iaponica* p. 90. (Haec tria omissa in *Ph. Edinb. nouiss.*) *Tinctura Iaponica* *Ed. nouiss. p. 112.*

PHARMAC. PAUPERVM EDINBURG. (*Franc. et Lips.* 1760. praeter recensita varia in PH. EDINB.) *Enema adstringens* p. 21. *Ulapium sistens* p. 30. *Pulvis fisticus* p. 37.

PHARMACOP. WURTENBERGENSIS (*Ed.* 1771.) *Electuarium gingivale* p. 46. *Essentia terrae Catechu* p. 86. *Essentia traumatica* p. 87. *Tinctura gingivalis balsamica* p. 226. *Trochisci Catechu* s. *Muscerdae* p. 235. *Trochisci de terra Catechu ad sputum cruentum* loc. cit.

PHARMAC. BRANDENBURGENSIS (*Ed.* 4. 1758.) *Tinctura Catechu* p. 208. *Trochisci Catechu* s. *Muscerdae* p. 215.

PHARMAC. PARISIENSIS (*Franc. ad Moen.* 1760.) *Catechu praeparatum* p. 5. *Pulvis pectoralis* pag. 59. *Pulvis adstringens* p. 64. *Tabellae de terra laponica* p. 94. *Tabellae absorbentes et roborantes* p. 94. *Pilulae adstringentes* p. 104. *Trochisci de Catechu* p. 110.

PHARMAC. DANICAE *Theriaca Andromachip* p. 262. *Tinctura Catechu* p. 267. *Tinctura gingivalis balsamica* p. 268.

PHARMAC. SVETICAE *Succus Iaponicus depuratus* *Ed.* 1775. p. 182. *Diascordium vulgo confectio Iaponica* l. c. p. 88. *Electuarium e Scordio* *Ed.* 1779. p. 68.

Quanti Catechu fecerit MEADIVS, declaratum legimus in *Pharmacopoea Meadiana*, et quanti FVLLERVS, in eiusdem *Pharmacopoea extemporanea*, ut in quibus multae formulae occurrunt, quas ipsas Catechu ingreditur. Hasce vero et praecedentes omnes et singulas speciatim enucleare amplum nimis foret,

foret, nec, quum multae farraginem non satis aptam contineant, valde fructuosum. Sunt tamen formulae quaedam vbiuis fere receptae simpliciores, in quas inquirere curatius omnino meum est.

In vniuersum tamen lubens subscribo iudicio cl. BOVLDCV *p*), Catechu probae notae omnibus praeparatis esse praeferendum, et si qua praeparatione opus est, sufficere simplicem solutionem aqua factam et praeuia colatione inspissationem in extractum, qua encheiresi partes aduentitiae et indissolubiles optime separarentur. Hac arte, vsui medico praeuia, praecipue vilius istud et impurum Catechu, quod supra descripsi, opus habet, sed nec eo omnino carere potest alterum purius ob festucas nominatim et fragmenta lignea admixta. Non immerito igitur

CATECHV PRAEPARATVM *Pharmacopoea Parisiensis p. 9.* praeparatis suis inseruit, methodo dicta factum. Hoc ipsum, *Succus Iaponicus depuratus in Ph. Suec. 1775.* vocatum, ex recentissima iterum *Pharm. Suec. a. 1779.* exulauit. Frustraque quaeritur in aliis Pharmacopoeis a me recensitis. Solutionem Parisienses aqua calente perficiunt: sufficere vero et potest frigida, iuncta trituratione. Vterque liber leni calore eam spissari iubet, quod quidem euitandi empyreumatis causa commodum; nihil vero periculi adest, ne quid virium maiori igne perdat, nam nihil volatile huic succo inesse ex superioribus patet. Ita obtinetur massa sicca, fragilis,

H 4

p) *L. c. p. 232.*

gilis, facile in puluerem conterenda, nec humiditatem aëris contrahens. Poterit et, si volupe, sola solutione et colatione acquiesci, tantoque iustius, quum plerumque Catechu liquida forma praescribatur.

TINCTVRA CATECHV *Ph. Brandenb. p. 208. Ph. Dan. p. 267.* Solutione in spiritu vini facta. Qualis sumendus, non memoratur priori loco, altero rectificatus requiritur. Ita quidem resinosae partes praeprimis euoluuntur; quibus vero exiguum modo virtutis tribuo, in gummosis praecipuam vim quaerens. *Pharmacopoea Wurtembergica p. 86.*, sub nomine ESSENTIAE TERRAE CATECHV elegit, nescio cur, pro menstruo spiritum Cydoniorum. — TINCTVRA IAPONICA *Ph. Lond. p. 70. et Ph. Edinb. noviss. p. 112.* autem magis composita est, utpote et Cinamomum complexa.

TINCTVRA GINGIVALIS BALSAMICA *Ph. Wurt. p. 226. Ph. Dan. p. 268.* Non parum quidem composita, nempe ex Catechu, Myrrha, Balsamo peruiano, spiritu Cochleariae et vini digestis, ob efficaciam tamen haud spernenda.

TROCHISCI DE CATECHV. Horum magna existat varietas. Simpliciores sunt TROCHISCI E TERRA IAPONICA *Ph. Lond. p. 91. et Pharm. Edinb. a. 1761. cit. p. 90.* quorum utrumque genus fere sibi simile; scil. ex Catechu, Gummi vel arabico vel Tragacantha et Saccharo rosaceo cum aqua vel Saccharo in aquae Rosarum portione constans. Magis compositi sunt TROCHISCI CATECHV SIVE MYSCERDAE *Ph. Wurt. p. 235. et Ph. Brand. p. 215.* omnino inter

inter se congruentes compositione, scil. ex Catechu, Saccharo, Ambra, Moscho, mucilagine Tragacanthae. Nomen muscerdarum respicere figuram vel me non monente constabit. *Pharmacopoea Parisiensis* p. 100. Catechu cum Saccharo et Caryophyllis ope Tragac. coniungit additque subinde olei cuiusdam essentialis vel tincturae Ambrae aliquot guttulas. In Gallia sine dubio frequentior trochiscorum horum vltus fit, quam in aliis regionibus. Nam cl. BEAUMÉ q) plures formulas suppeditat, iis forsitan notatu digniores, quibus metus, ne oris foetore aliis molesti sint; quorsum EIVS *Cachou à la Reglisse, à la Violette, Cachou sans odeur, à l'Ambre gris, à la fleur d'Orange, à la Cannelle.*

PLACENTVLAE insuper variae occurrunt ex Catechu paratae, non officinales quidem, si TABELLAS *Pharm. Parisiensis* p. 94. excipias, ad imitationem sine dubio eorum paratas, quae ex orientalibus regionibus transferuntur. Duplícis generis placentulae hae *exoticae* sunt, de quarum vero compositione nondum satis constat. Quaedam, GITTA GAMBIR vel CATAGAMBER dictae, referunt placentulas externe saturate flauas, crusta quasi obductas, interne pallidiores, saporis subadstringentis, leuiter amari et aromatici. Coniectura experimentisque cll. BUISSON r), DEGNERI et SEBAE s) ductus, suc-

H 5

cum

q) *Elemens de Pharmacie, T. 3. p. 41-43.*

r) Aoud DEGNERVM in *Historia de Dysenter. bilioso-contag.* p. 298. sq.

s) *Eph. N. Cur. Vol. 4. p. 227.*

cum Catechu hâcce ingredi sustineo. Aliae, quae SIRI GATA GAMBER vocantur, crassitiem et magnitudinem nucis vomicae habent, et a Belgis ex India aduehuntur. Constant hae, si fides narrationum, ex Catechu cum aromatibus variis, Cardamomo, ligno Aloës, Moscho, Ambra aliisque, in gratiam saporis et odoris additis.

§. 14.

Nobilitarunt Mimosae genus duae praeprimis notiores nobis species, Mimosa nilotica et M. Senegal; quarum priori Gummi arabicum et Acaciae verae succum debemus, posteriori gummi Senegal, licet omnino ex obseruationibus cl. ADANSON *t*) plures species, quam hae, Gummi vel rubicundum vel album fundant. Varia quoque suadent, Myrrham ex hoc genere peti *u*). Ex supra dictis (§.4.) patet, non vnâ modo speciem esse adstringente succo instructam, nec vnâ eandemque modo harum partem illum continere; nam Acaciae verae succus ex fructu, Catechu autem ex ligno eruitur. Imo haec eadem adstringens natura foliis pariter et cortici Mimosae niloticae competit, quae in cortice huius et Mimosae Gonakè ADANS., Gummi pariter fundentis, tanta est, ut et densandis coriis tenuioribus inferuiat.

Memorabile omnino est, quod in vna eademque stirpe succi duo natura sua tam diuersi colli-

t) *Mem. de l'ac. de sc. de Paris* 1773. p. 14. 16.

u) BRUCE in *Phil. Transf.* Vol. 65. p. 408. sq.

colligantur, vt *adstringens* et *gummosus*, quin memorabilius adhuc, quod in succo Catechu iidem iunctim comprehendantur. Sed cum adstringente sapore amarities insignis vnita est. Subsequens dulcis sapor sine dubio affluentius copiosius saluariae adscribendus, prout maxime a me colendus Praeceptor, cel. MURRAY x), de Vuae vrsi foliis insigniter amaris et adstringentibus notauit, haustu aquae illis superbibito saporem eorum in grate dulcem mutari. Non parum igitur falluntur, qui succo Catechu non alias quam adstringentes vires tribuunt. Hinc forsitan euenit, quod nostro tempore eius longe rarius quam meretur, vsus fiat, et multi, nescio quid mali, ab illo tanquam stiptica valde medicina reformident, ideoque, quodsi illud praescribant, parce modo. Tanto liberalior in eo administrando olim fuit HAGENDORNIVS y), qui adeo non veritus est virtutes, quibus sufficiat, secundum corporis humani partes recensere, iisdemque fulcimentum narrationibus breuibus additis dare. Sed fateor, extenuari apud mentem meam potius, quam ampliari pretium medicamenti cuiusdam, si nimis laudibus iisque in morbis diuersissimae naturae cumuletur, quam fortunam recentius Phellandrii semen, item Glandes quernae tostae expertae sunt. Nolim quidem in omnibus et singulis laudum harum promissis conditis meram iactantiam accusare: quidam contra eo peccarunt, quod ad aliorum medicaminum vel admistorum vel simul adhiberi

x) *Comm. de Arbuto Vuae vrsi*, p. 37. *Opusc. Vol. I. p. 56.*

y) *Traëatus physico med. de Catechu*, Ienae a. 1679. 8.

adhibitorum efficaciam non attenderint. Iam rationem perspicient paucitatis virtutum, a me recensendarum, qui mirabuntur, quod in varietate virtutum post seculum adeo, HAGENDORNII opella meam finam superari. Praestat pauca nosse de remediis eaque vera, quam multa ambigua, fallacia, vel adeo falsa.

§. 15.

Qua *forma* commodissime Catechu pro usu interno exhibeatur, ex dictis (§. 13.) facile intelligetur. Nempe vel crudum istud venale menstruo aquoso solvatur et colatura subministretur; vel, quod praestat, Catechu praeparatum aqua aromatica solutum aegris offeratur. Dari et potest Catechu saccharo mixtum in pulvere. Cel. IVSSIEV ²⁾ praefert solutionem ex Catechu drachma vna et aquae pinta vna h. e. vnciis triginta duabus, in alui profluviis et febribus variis; sed sine omni dubio saturatior longe esse poterit. In pulvere exhibere sapor non repugnat, praecipue sub additamento sacchari: nam superbibita aqua frigida amarities et austeritas mox in ore perit. Non vereor subscribere WEDELIO ^{a)} et HAGENDORNIO ^{b)}, qui a scrupulo dimidio ad integrum vel ad dimidiam drachmam illud pro dosi concedunt. Tinctura vel Essentia pro interno usu mihi ideo minus placet, quoniam inertior est solutione aquosa, et quod

²⁾ *Mém. de l'Acad. d. sc. de Paris* 1720. p. 346.

^{a)} *Eph. N. Cur. Dec. 1. Ann. 2. Obs.* 130.

^{b)} *L. c. p. 44.*

quod ob spirituosum menstruum calefaciendo saepe vltui interno non satis accommodata est. Placuit tamen haud parum viris mox significatis; et in Pharmacopoea Wurtenb. c) a guttis quadraginta ad quinquaginta commendatur. Quales miscelas Catechu in formulis extemporaneis ferat, mox indicabo; quales tulerit in officinalibus, euoluentibus pharmaceuticos apparatus patebit.

§. 16.

Multis omnino morbis sanandis *adstringendi* sua efficacia par est. Sed quoniam *amaras* et *mucilaginosas* partes admixtas habet, varia perpetrat, quae ab aliis adstringentibus frustra speres; nec horum multa tam tuto eadem praestant.

§. 17.

In *alui profluviiis* insignem efficaciam Catechu exserere, experientia conuincimur. Horum varia eius generis esse nouimus, vt singularem stimulum acrem pro causa habeant, vt diarrhoea et dysenteria, saltim sub initium. Alia relaxationem tantummodo ventriculi et intestinorum agnoscunt, qua ipsa fit, vt lymphaticae vel mucosae sanguinis partes iusto liberius exundent, et quum haec viscera in suis muneribus labefactata sint, cibi potulentaque non iustam mutationem subeant, sed materia ex hisce excrementitiis colore, indole, mole et compage a sueto naturae ordine deflectat: lenteriam, fluxum coelia-

coeliacum et hepaticum me proximo hocce loco intelligere, sponte apparet. Quamdiu acre aliquod in intestinis, vt in dysenteria nominatim, haeret, ad sistentia confugere, siue ex adstringentium tribu siue anodynorum petantur, quam maxime noxium est. Hisce enim stimulus intra corpus retinetur, qui ipse vellicando neruos dolores intensissimos excitat, spasmos gignit, inflammationem cum omnibus suis sequelis, exulceratione, gangraena vel et aliquando scirrhus, post se trahit, subinde et metastases materiae vitiosae in alias partes producit. Sub initium igitur morbi vomitoriis et purgantibus prudentior quilibet utitur, cum quibus diluentia, inuoluentia, et ea, quae diathesin inflammatoriam, biliosam, putridam, corrigendi vim habent, coniungit. Sed quicquid horum adhibeamus, spe tamen saepe excidimus, quin profluuium alui absque vlla fomitis acris suspicione pleno nonnunquam riuo continuat. Ita diarrhoea diu pergens haud raro habitualis euadit, et in lienteriam transit. Et dysenteriam, coercito etsi irritamento, saepe diarrhoea emacians excipit, nec raro, quum omnia in vado esse credimus, pristina grauis scena iterum redit. Praemissis igitur euacuantibus, quo stimulus, si qui adest, euerratur, in eiusmodi intestinorum debilitate et flacciditate ad adstringentia fortiora nos conuertimus; quorsum ex vulgari praxi nux moschata, cortex Cascarillae, cortex Simarubae, lignum Campechense, succus Catechu, praeprimis pertinent. Quum vero prudentis medici sit, in morbis scite ea coniungere, quae pluribus indicationibus

tionibus opportuna sunt: ita et in hoc morborum genere. Natura ipsa saepe in vno eodemque remedio simplici plures easdemque diuersas vires connectit, sicuti, ne ultra limites alui profluuiorum euager, Ipecacuanhae item Rhabarbaro non euacuandi vnice sed et adstringendi virtus infidet. Ita et in Catechu vi antidynterica non simplicem adstringendi efficaciam extollo, sed et mucilaginosam naturam, qua fit, vt roborando labefactatum intestinorum tonum, simul acre vellicans forsitan residuum inuoluat, obtundat. Vides igitur, quantam praestantiam prae aliis adstringentibus habeat. Magnus succi huius in dysenteria encomiastes existit DEGENERVS *d*), qui sub ea, quam dixi, relaxatione cortice Cascarillae nihil proficiente ad Catechu transgressus est, adstringentem eius virtutem non solum tutissimam pronuncians, sed et, vbi illud effectum caruit, nec reliqua adstringentia aliquid opis attulisse. Et hic quidem vel in tinctura vel in puluere illud exhibuit et cum rhabarbarinis copulauit. Solutionem vero Catechu aquosam pro tono stomacho et intestinis restituendo optimo successu in vsum vocauit cl. BERDOT *e*), quum contra ea cortex Peruvianus et cortex Simarubae exiguam vim praestarent. Equiti a ROSENSTEIN *) placuit in diarrhoea biliosa, quidni et in aliis alui profluuiis, post necessaria praemissa potionem ex Catechu drachma vna et aquae libra dimidia

d) *Dysent. bilioso-contag. p. 163. 165. 269.*

e) *Epist. ad HALLERVM, Vol. 5. p. 64.*

*) *Underrättelse om Barns Sjukdomar, p. 81.*

dimidia praecipere. Trochisci gitta gambir, de quibus supra dixi exstare, qui praeparatum ex Catechu esse arbitrantur, pariter olim in diarrhoea et dysenteria aliisque laxitatibus intestinorum celebrati fuerunt, nominatim a cl. BVISSON *f)*, ea lege, ut horum vni vel duabus drachmis aqua feruens infunderetur, et postquam aqua ad saturationem Theae boheae tincta esset, aegro huius vasculum omni hora vel bihorio exhiberetur per aliquot dies ad sanationem perfectam usque; sed in connubio tamen aliorum congruorum remediorum. Ipse DEGNERVS in dysenteriis sporadicis vel diarrhoeis bilioso mucosis hosce trochiscos adhibuit idque effectu probabili, fassus tamen haecenus succo Catechu non praeterendos fuisse, tanto minus, quum magno pretio venirent et horum maiori quantitate opus esset. Ferri omnino possunt variae eius miscellae cum aliis contra hosce morbos efficacibus, quorum exempla hinc inde obuia. Mitto HAGEDORNIANA *g)*, utpote non huius seculi gustui accommodata. In consilio, quod collegium medicum Borussicum *h)* ante aliquot annos contra dysenteriam publici iuris fecit, tanquam remedium versus finem morbi opportunum formula proposita fuit ex Catechu, Mixtura simplici, Essentia Gentianae rubrae et Aurantiorum viridium, quam et nouissime medici Hannouerani experientissimi, prospicientes dysente-

f) V. DEGNER *l. c.* p. 297.

g) *L. c.* p. 65. sq.

h) V. *Anweis. in d. Ruhr fürs Landvolk v. Preuss. Coll. med. recus. in Hann. Magaz. 1770. n. 46.*

dysenteriae epidemicae in hoc electoratu iam grassanti, adoptarunt *i*). Cl. KAEMPF Catechu cum decocto Quassiae additis aqua Cinamomi et syrupo Cydoniorum commiscuit. Haecce pro exemplis sufficiant.

§. 18.

Ab hisce intestinorum morbis ad alium transeo, *colicam pictonum*, de cuius causa proxima, item causis antecedentibus, nec non curatione, quot variae sententiae medicorum mentes agitauerint, latere nequit eos, quibus vel CITESII, TRONCHINI, GRASHVYSII, HVXAMI, STRACKII, HAENII monographias, ut de aliis auctoribus nihil dicam, consulere volupe est. Hisce discidiis memet immergere, ab hoc loco, hoc tempore, alienum est. Nec patronum agam sententiae GRASHVYSII, quod causa huius colicae proxima in abrasione muci intestinalis consistat, quam ipsam serius ill. DE HAEN *k*) redarguit. Id vero vel sola GRASHVYSII *l*), viri in praxi medica grauis, experientia satis constat, ambiguam saepe in hoc morbo emollientium, inuoluentium, blandiorum purgantium et anodynorum, esse fidem, nec pares nos esse tollendo morbo nisi ad adstringentia

i) Hann. Magaz. 1779. n. 84.

k) In Rat. med. contin. T. 3. edito post eius mortem a C. TOLL p. 464.

l) De colica pictonum, p. 45. sqq.

gentia efficaciora confugiamus. Plura huius generis enumerat, Radicem Tormentillae, corticem Peruvianum, Cinamomum, Alumen, Vitriolum martis &c., quae inter et succus Catechu, cui videtur speciatiim indulgere. Iunguntur haec vel aliis ex indicationibus commodis, et sine adstringentibus raro tuta fidaque fuit reliquorum efficacia, aliquando hisce solis curatio omnis absolvitur. Non autem ore solum exhibentur, sed, si suspicari licet vitium in intestinis crassis haerere, forma enematis vtiliter applicantur. Ex vomitionibus, quarum meminit HAGENDORNIVS *m*) in descriptione colicae, hariolor, eum praecise colicam pictonum intellexisse, in cuius curatione miscela ex Catechu cum Laudano opiato praecipua illi medela fuit.

§. 19.

Roborans siue adstringens Catechu vis dignum fecit, quod in *faucium affectionibus* variis adhibetur, speciatim vuulae prolapsu, rectius relaxatione, item in tonsillarum exulceratione; et quidem gargarismatis forma. Probo in hosce scopos HAGENDORNI *n*) consilium, vel tincturam eius vel Catechu praeparatum cum melle rosato aut roborum gargarismis addendi. In angina catarrhali scimus, adstringentia ad discutiendam stagnantem pituitam multum conferre: quidni hoc sine gargarismati

m) L. c. p. 64.

n) L. c. p. 52.

garismati ex resoluentibus constanti, tantillum succi Catechu addamus? In angina gangraenosa eximie conducere nemo, qui antisepticam eius vim nouit, in dubium vocabit; sed de hac vi infra (§. 25.).

§. 20.

Similem, quem in alui profluuiis praestare Catechu supra (§. 17.) significaui, efficaciam casu singulari in *stranguria* molestissima o) supra viginti annos durante, *coniuncta copiosa mucis tenacis excretionem*, praestitit tinctura succi Catechu cum tinctura corticis peruuiani remixta, vel eius loco alia, non multum diuersa miscela, dum e contrario emollientia et demulcentia exiguo tantummodo successu praemitterentur, diuretica autem pessimum effectum exfererent. Comitem hoc vitium habuit debilitatem et emaciationem corporis notabilem. Facile patet, relaxationi vesicae lotii vnice nimium istum mucis prouentum imputandum esse, nec alienum vllum corpus adfuisse, irritamento suo vesicam vellicans.

§. 21.

Hocce memorabile maxime curationis exemplum attentius pensitans, non vereor, ne coniectura decipiar fore, vt in *phthysi pituitosa* p), pereximium existat remedium et suppar, nisi praestantius,

I 2

o) GRASHVIS l. c. p. 69. sqq.

p) Vid. MURRAY Progr. de *phthysi pituitosa*, recus. in *Opusc. Vol. I. p. 275. sqq.*

tius, cortice Peruiano, quem tantis laudibus aestumatissimus mihi Praeceptor merito contra hoc malum extulit *q*). Vterque enim morbus eo convenit, quod copiosa pituitae euacuatio fiat, et haec quidem comite corporis macie, quae a tanto nutritii nec alias vitiosi humoris dispendio abesse non potest.

Futuris etiam experimentis confirmabitur, anne, ut spero, in *fluore albo*, pertinacissimo isto muliebri morbo, usitatis hactenus remediis Catechu efficacius sit, quum tinctura martialis aliaque tincturae Catechu ab HAGENDORNIO addita meritum succi Catechu aliquantisper minuant.

Spondet non minus insigne auxilium in *gonorrhoea benigna*, et excretionem ista molestissima mucosa, virulentam saepe excipiente, quae in solae partium relaxatione consistit (Anglis Gleet, Germanis Nachtripper). Experientia sine dubio ductus cl. KAEMPF *r*) Catechu inter commoda roborantia interna gonorrhoeae benignae recenset, et iniectionem commendat ex aqua Calcis, Myrrha, Catechu, iunctis rhabarbarinis.

§. 22.

Porro in *lotii profluuii nimio sistendo* Catechu celebrare conuenit, imo in eo, quod diuturnum dura-

q) Progr. cit. p. 9. et Appar. medicam. T. 1. p. 594.

r) Enchirid. med. p. 147. sqq.

duratione pertinacius euasit. Bina huius generis a WEDELIO s) exempla sistuntur, alterum puellae biennis, quae Catechu praeparato aqua, pro potu, soluto conualuit, alterum grauius adhuc, in quo locis intertriginosis vermes molestissimi comparuerunt. Testem huius virtutis etiam producerem HAGENDORNIUM t), nisi tincturae additis vel praemissis aliis iterum effectus Catechu dubius redderetur.

§. 23.

Hæmorrhagiarum internarum multiplicem causam qui perpendat, non potest non temeritatem empiricorum vituperare, qui ab adstringentibus primam et præcipuam opem in iisdem curandis expectant. Alia omnino sub plethora et orgasmo conducunt, alia, si spasmi subsunt, alia, si qua obstructio in alienas vias sanguinem determinat, alia si vasorum nimia relaxatio infestat, alia si resolutione sanguinis hic per vasa illi ferendo non destinata penetrat. Quae in vna specie iuuant, nocent manifeste in altera. Adstringentia, quae sub plethora et orgasmo feбри comiti calcar subditura essent, summae tamen efficaciae sunt relaxato nimis tono vasorum et sanguine putredine resoluto. Et in aliis quoque profluviorum sanguinis speciebus, roborandi scopo, sub finem haud parum conferunt. Horum e censu Catechu tanto iustius reputatur,

I 3

s) *Misc. nat. curios. Dec. I. Ann. 2. Obs. 129.*

t) *L. c. p. 70.*

putatur, vtpote mucilaginosi partibus foetum. - Eo, et eius quidem tinctura ad guttas 60 pro dosi propinata, haemoptysin absque tussi contingentem quidem compescuit WEDELIVS *u*), item HAGENDORNIVS, qui ipse, contra fluxum alui cruentum *x*), mictum cruentum *y*), nec non fluxum menstruorum nimium et haemorrhagiam in partu profusam *z*), Catechu varie vsus fuit. Sed quum vel anodyna vel martialia iunctim ab hisce cl. viris praecepta sint: oportet alia in priuam laudem Catechu experimenta practica accedant.

§. 24.

Cadit vero haec ambiguitas de virtute eius *stomachica*, quam VOLKAMERIVM, WILLIVM, WEDELIVM in tinctura nominatim magni fecisse auctor HAGENDORNIVS *a*) est, ipse huic praeconio ex sua experientia subscribens. Hinc et conualescentium prostrato in cibis capiendis appetitui eadem subuenit. Gallis haec succi Catechu ventriculum roborandi vis haud parum commendabilis videtur. Meminit eiusdem studiosius cel. IVSSIEV *b*). Et cel. CRANZ *c*) narrat Parisiis in substantia Catechu ore vultum et
folu-

u) *Misc. N. C. Dec. 1. Ann. 2. p. 84.*

x) *L. c. p. 64.*

y) *L. c. p. 68.*

z) *p. 72. sq.*

a) *L. c. p. 61. sq.*

b) *Mem. de l'acad. R. d. sc. de Paris 1720. p. 345.*

c) *Mat. med. et chir. Ed. 2. P. 2. p. 41.*

solutum deglutiri in beneficium digestionis ciborum. In hac vi non austeritatis vnice sed et amaritiei fucci huius rationem esse habendam, facile patet.

§. 25.

Experimentis supra relatis (§. 11.) quantum polleat in carnis putredine arcenda et corrigenda, constat. Sed et in viuo corpore vim *antisepticam* egregiam exferere, apud aegros exploratum est, etsi non diffiteor, vulgarem praxin magis in putridis morbis, in Camphoram, flores Chamomillae, Serpentariam, Contrayeruam, corticem Peruuianum, acida, praecipue Vitrioli spiritum, Alumen, ferri. Horum variis exemplis simul manifestum fit, quod et extra tribum adstringentium vis ista antiputredinosa dominetur, et extare remedia, quae fomitem putridum eneruando potissimum putredinem coërcent. Attamen, qui putredine gravante et fluidas corporis animalis partes attenuari et solidas relaxari, diuelli, perpendat, hisce nominatim insigne pretium tribuet, quae principia ista compagis animalis ad contactum arctiorem reducunt, qua laude adstringentia clarent. Catechu vero tanto dignius est inter antiseptica loco, quippe quum amaritiem cum austeritate coniunctam habeat, et satis superque constet ea quoque, quae sola amaritiae distinguuntur, vt herba Centaurii minoris, radix Gentianae, Absynthium, Aloe, putredini efficaciter resistere. Rarior, quam meretur, Catechu fucci vsus in ipsis febribus pu-

tridis fit. Bene tamen HUXHAMVS *d*), quando sanguis putrida resolutione adeo laborauit, vt per intolitas vias proflueret, roborantibus, acido et analepticiis, Catechu addidit.

Tanto crebrior autem in practicis libris efficaciae eius in *stomatace* siue putredine oris mentio fit, cuius praesentiam praesertim gingiuarum retractio et cruentatio a leui etiamli attacku, vacillatio item caries dentium, foetor oris, et vlcera eiusdem varia declarant. Mala ista etsi topicis folis rarissime vincuntur, siquidem plerumque radices suas in deprauatione humorum, saepe quoque in vitiis imi ventris habent, applicatio tamen scita antiputredinosorum externa haud exiguas curationi symbolas affert. Non attinet, huc referre, quae in itinerariis de vulgari ista fructus Arcae cum folio Betel et tantillo Calcis ostrearum apud Indos masticatione traduntur, quoniam ex fructu dicto vel plane non vel raro Catechu praeparari enictum est. Interim hisce Catechu subinde addi auctor est GARCIAS *e*). Placentulae vero supra dictae Gitta gambir et Siri Gata Gâmbar pariter masticantur ab Indis ad gratum oris halitum asciscendum et gingiuas roborandas. Harum autem etiamli vera compositio nos lateat: vix dubium superest, Catechu illas continere. Substituuntur hinc inde in Europa ob dicta vitia oris Trochisci de Catechu, ita

d) Opera physico-med. T. 2. p. 70. Ed. REICH,

e) Hist. aromat. et simpl. apud Ind. p. 42,

ita scilicet, ut horum aliquot ore retineantur, donec diffuant. Potior tamen vis tincturae Catechu inest, nec sane spernenda tinctura gingivalis balsamica Wurtemb., quae commode mixta melle rosarum linteo carpto gingivis relaxatis putrescentibus applicatur, praegressa, si tartarus dentes obuestit, eiusdem per instrumenta cauta separatione. HAGEDORNIO *f*) in usu fuit, tincturam Catechu cum tinctura Laccae vel cum melle rosato commiscere. Placuit et illi linimentum vel electuarii genus ex pulvere Catechu et melle rosato. Et quid opus est miscela, quum ipse pulvis Catechu dentibus affricatus fidem suam abstergendi mundandi et consolidandi efficacia testetur. Meretur igitur omnino pulveribus dentifriciis vel electuariis eiusdem scopi, loco solitae istius vel inertis vel noxiae farraginis, addi. Perplacet mihi simplicitas methodi, qua exulceratio linguae antea pertinax in scorbutica foemina sanata, miscela nimirum ex Melle, Saccharo candi, Catechu et Tragacantha *g*), linguae illita.

§. 26.

Iam et elucet, quo iure inter *vulneraria* locum obtinuerit. Nec negari potest, Catechu esse ex praecipuis, quae linimentum quoddam in Bengaliam usitatissimum intrant *h*), quod ipsum componitur ex Vitrioli coerulei uncia dimidia, succi Catechu unciis quatuor, Aluminis drachmis no-

I 5

vem,

f) L. c. p. 54.*g*) L. c. p. 53.*h*) KERR in *medical Observat. and Inqu.* Vol. 5. p. 158.

ven, Resinae albae vnciiis quatuor; quibus in pulverem subtilem redactis et commistis olei Oliuarum vnciae decem adduntur, et aquae q. f. pro consistentia linimenti. Hoc ipsum a recenti vulnere ad venereum vlcus vsque ibidem adhibetur, tantoque plus laudis meretur, quum expertissimi ibidem Chirurgi Angli, ROBERTI HVNTER, spem in multis casibus grauibus non exaequauerit modo, sed superaauerit.

XIV.

DE

D V L C I V M

N A T V R A

ET

V I R I B V S.

DE

D V L C I V M

NATVRA ET VIRIBVS. *)

SECTIO PRIMA.

Dulcium indoles et varietas.

§. 1.

Dulcedinis sensus blande gustus organon afficit et plerisque gratissimus est; vnde et loquendi vsus hanc vocem in eiusmodi adeo res transtulit, quae vel alia organa sensoria recreant, vel solam mentem impensius oblectant. Ad fidem b. HALLERI a) nonnisi lingua illam sentit, in me quidem et palato sensus eius inprimitur. Sunt quaedam aetates, quae hoc sapore magis delectantur, quam aliae, nimirum infantilis, ita vt infantes ad medicamenta capienda vel alia sibi ingrata agenda sacchari praemio promisso alliciantur; et senilis quoque plerumque. Sexum sequiorem pariter dulcia magis appetere in cibus, potulentis, cupediis, quam alterum, nouimus. Reliquis hominibus vix nisi copia displicent,

*) Dissertatio acad. ad finem a. 1779. me praeside defensa.

a) Elem. Physiol. T. 5. p. 99.

plicant, vel sub nimia consuetudine vel aliorum linguam fortius afficientium familiaritate, prouti fumo Tabaci sugendo indulgentes et potatores dulcibus plerumque aduerfantur.

§. 2.

Ad *simplices* sapores quidem pertinet dulcis, vt amarus, acidus, nec nisi vnicum sensum imprimit Saccharum, Mel. Nonnunquam tamen hic sapor *copulatur* cum amaro, vt in Dulcamara, Polypodio, Glycyrrhiza; vel austero, vt in Alumine, succo Catechu, foliis Vuæ vrsi, certe in hisce duobus proxime dictis exemplis austerum saporem dulcis sub finem gustationis insequitur; vel acido, in fructibus horæis bene multis vinisque; vel viscoso, in Caricis, Passulis; vel oleoso, in Amygdalis feminibusque cucurbitacearum; vel aquoso, in oleribus et radicibus variis; vel acri, vt in Cynamomi cortice.

§. 3.

Dulcium simpliciter ea ratio est, vt gustata *mox sensum* suum organo impertiant, nec modò post aliquam moram, vt acria varia licet fortiora. *Non vero diu* in ore remanet, sed affluente saliva paullo post dissipatur.

Distinguitur dulcedo, sicut amarities, vix nisi sensu *specifico*, nec, vt alia varia sapida, tactu simul vel visu, vel reagentibus, vt vocantur, discernitur. Acidis enim e. c. ebullire cum alcali, colore

colorem coeruleum vegetabilium in rubrum vertere rel. datum est, austeris cum Vitriolo martis atramentum efficere, viscosis in mucilaginem resolui, et sic porro.

Si WILLISIO *b)* credere fas esset, dulcium discrimen, praeterquam sapore, *crystallorum* ex iisdem eruendarum figura facile esset cognitu, hasce enim per particulas in molles aculeos ita figuratas describit, vt leni affricu sensorium titillent, non aliter, ac plumarum striae hypochondriis ac pedum volis admotae. Sed perperam diuersitatem saporum, qui mixtis corporibus insunt, quaeri in salium discrimine, dubio vacat, postquam obseruationibus constiterit, sapida existere, quae sapore licet diuersissima, idem tamen sal erogant, item alia, quae similem quidem sensationem in lingua vel vicinis partibus producant, sed figura salis contenti valde dissimilia. Nihil igitur superest, quam vt sapor a partium miscela ipsa varia, proportionem, nexu, pondere, magnitudine, motuum gradibus, attractione rel. dependeat. Et quod ad particulas mollior aculeatas dulcibus adscriptas nominatim attinet, errorem manifeste demonstrat cl. LVCHTMANS *c)*, vt qui sub microscopio in Sacchari solutione, postquam refrixerit, crystallòs cubicas, item pyramidales variae baseos vidit, in Manna autem crystallòs oblongas, tenuissimas, radiatim sparsas, quae ipsae cum crystallis sacchari Saturni maxime congrue-

b) De anima brutor. cap. 12. in Op. omn. Tom. 2. p. 99.

c) In Diff. egregia de saporibus et gustu, p. 37. sqq.

congruerunt, in Cassia et Melle autem nihil nisi particulas sphaeroideas obseruauit. Patet igitur vel hisce exemplis figurae crystallorum diuersitas, licet saporis ratio vna eademque sit.

§. 4.

Dulcedini quidem in communi vita *acor* opponitur: non tamen haec vere contraria sunt, nec hic ab ista separari potest. Ipsa natura vnum ex altero producit: fructuum enim immaturorum, Mali, Pyri, Vitis, Ribis rel. acidus vel acerbus sapor solis calore in mitem dulcem mutatur. Dulcia praeterea, iusta humiditate suoque calore et aëris accessu constituta, sponte fermentationem acidam subeunt, et acetum fortissimum erogant, imo addita aliis fermentationi opportunis instar fermenti operantur, et haecce in consensum trahunt. Experiuntur mulieres hancce in acorem mutationem quotidie in fructibus saccharo conditis. Mitissimus ex arundine saccharifera expressus succus vix vltra diem acoris expers persistit. Dulcissima vina et blandissimam cereuisiam triticeam aëre calidiori aclescere nouimus. Quin constat, easdem substantias dulces, ex fructuum, succorum et frumentorum tribu, quae spiritus ardentibus nobis largiuntur, vel continuata vel renouata fermentatione acetum nobis suppeditare. Nolo hic iam multis commemorare acorem istum, quem dulcibus nimium indulgentes sensu ingrato ventriculi et eructatione acida, dentes obtundente, experiuntur. Tanto vero minus dubitandum est

de

de acidi in dulcibus praesentia, quum et absque fermentatione, vel vi ignis vel additamenti cuiusdam, quod reliquas partes cum illo vnitas consumit, a compedibus suis liberari queat.

§. 5.

Saccharum nimirum per se in vase retorto vitreo leni initio igne, dein paulatim aucto, *destillatum*, primo phlegma pallide flavescentes imbecillis odoris et saporis acidulo balsamici dimittit, cui succedit spiritus flauus, dein flauo rubicundus phlogistico acidulus, mobilissimus, qui olfactus instar Armoraciae nares pungit et illacrymationem excitat, quem excipit pauxillum olei bruno nigricantis, remanente in vase retorto nonnisi massa terrea nigra inerte d). Sed hac encheiresi acidum, de quo hic fermo est, integrum et a reliquorum consortione disiunctum obtineri nequit.

§. 6.

Acidum igitur *saccharo inesse*, cui et substituere sine errore possumus alia dulcia, manifestum est. Aceto quoque illud esse potentius et cuti instillatum flauam maculam relinquere, quae aqua elui non possit, sed desquamatione modo cuticulae arrosae dispareat, iam dudum comperimus e). Verum,
quale

d) NEVMANN'S *Chymie Ed.* KESSEL. Vol. 2. P. 4. p. 143. sq. CARTHEVS. *Mat. med.* T. 1. p. 413. Conf. SCHRIKELII *Diff. de salibus saccharinis* a §. 19-25.

e) CARTHEVS. *de genericis quibusdam plant. princ.* p. 64. *Opusc.* Vol. II. K

quale ceteroquin sit et quibusnam notis ab aliis acidis differat, recentius modo cognouimus experimentis, duobus diuersis locis vno eodemque fere tempore in medium prolatis.

Primo loco paucis commemoranda ista sunt, ab Equite BERGMAN f), Professore Chemiae Upsaliensi sagacissimo, instituta, qui ipse acidum sacchari purum ab omni alia miscela elicit, quatenus scilicet id arte fieri possit, et numerosis et operosis experimentis peculiarem eius genium et nifus varios in alia corpora excussit. Cel. hicce vir ope spiritus nitri fortis, in quo saccharum repetitis vicibus coxit, noua per vices spiritus nitrosi portione adfusa, acidum sacchari forma crystallorum prismaticarum quadrilaterarum eruit, quae ipsae iterata solutione et crystallifatione depurari se sinunt. Exigua autem modo quantitate eliciuntur, ita vt, ad comparandam vnam partem salis huius, sacchari tribus et acidi nitri fortis triginta partibus opus sit. Quoniam acidum nitri phlogistiauidissimum est, illius ope oleosum commodissime destruitur, vaporibus inter haec rubris exfurgentibus, et acidum sacchari solum relinquitur, sub refrigeratione crystallorum formam induens. Hisce crystallis sapor acerrimus inest, et tam acidus, vt grana earum viginti integrum aquae congiuntabili acore impertiant, grato tamen linguae, modo diluatur.

f) V. *Diff. de acido sacchari d. 13. Iunii a. 1776. recus. in RIVSD. Opusc. phys. et chem. Vol. 1. p. 251. sqq. Cfr. et Aft. Upsal. nov. Vol. 2. p. 210.*

diluatur. Soluuntur in aquae destillatae feruidae pondere aequali. Purum haece esse acidum, criteria acidis communia indicant, imo aetheris speciem cum spiritu vini constituunt, qui aether tamen nonnisi calefactus accendi potest, nec alba sed coerulea flamma ardet. Neque destillatione, nec alia tentata via, hucusque ill. vir hoc acidum ab oleosis admixtis partibus diuellere potuit. Crystallorum tamen forma, qua prodit, inflammabilis tantillum residuum in illo esse innuit, siquidem alia acida, eo priuata, fluida forma comparent; sed exiguum hoc valde esse, acidissima, quam prodit, natura manifestat. Calcem prae omnibus aliis corporibus appetit, vnde nihil efficacius est ad detegendam calcem aquis quomocunque solutam; nam soluti eius minima gutta mox in calcem praesentem fertur, et haec puluerem album indissolubilem cum eo efficiens fundum petit g). Non attinet hic vltius prosequi, quid cum aliis acidis commune habeat, quid peculiare. Sufficit modo hic indicasse, cel. BERGMANVM eadem arte ex Gummi arabico, Spiritu vini rectificatissimo, Melle et aliis corporibus, saccharum vehementibus, idem euocasse.

Alterum genus experimentorum nuperiorum, ad quod respicio, istud est, quod cl^{mo} SCHRICKEL h)

K 2

debe-

g) Conf. BERGMAN *Diff. de analysi aquarum in Opusc. chem. et phys. T. 1. p. 98.*

h) *Diff. de salibus saccharinis vegetabilibus generatim et sacchari vulgaris albi analysi acidoque huius spiritui speciatim, Giesae m. Aug. a. 1776.*

debemus. Hic ipse, sicca destillatione vsus, ex sacchari refinati vnciis sedecim spiritus acidi phlegmate oleoque permixti vncias octo cum scrupulis quatuor obtinuit. Ab hisce vnciam circiter olei separauit et phlegmatis drachmas circiter sex. Spiritum acidum bis rectificationi cum argilla submisit, sub quo negotio olei drachmae duae cum aliquot granis adhuc separatae, vnde spiritus aquae instar limpidus euasit et acidior longe et purior. Ipse tamen agnoscit cl. vir, aliquam olei partem spiritui pertinaciter adhuc inhaerere. Vltcrius vero adhuc spiritum concentrauit frigus, vt quo, reliqua tenuiori parte in glaciem versa, in centro acidum perstitit fluidum.

BERGMANI igitur acidum sacchari crystallorum forma instructum, SCHRICKELII fluidum fuit. Vtriusque acidum qui inter se comparet, in multis eadem similia inueniet, sed in non paucis tamen momentis etiam diuersa. Negat e. c. SCHRICKELIVS Violarum syrupum inde rubrum induere colorem, crystallos produci ex eiusdem cum alcali volatilis combinatione, ipsum aurum eo soluere illi successit, vt alia taceam, quibus a BERGMANO differat *).

§. 7.

Praeter acidum *oleosae partes* alterum primum sacchari principium constituunt. Qua proportionem insint, ex destillatione mox recensita elucet.

*) Conf. de discrimine vtriusque huius acidi cl. HERBSTÄDT in CRELL'S *Chem. Entdeck.* P. 9. p. 12. sqq.

cet. Lectu dignissima sunt, quae de huius natura nobis reliquit omnium auctorum plenissime clar. SCHRICHEL *i*). Sed eius praesentia et aliis notis sese manifestat. Nam saccharum carboni candenti immissum, non vero candelae admotum, flamma coerulea ardet. Igne funditur et spumescit sub strepitu, multis emissis halitibus empyreumaticis et relicto carbone. Porro viuidam detonationem cum nitro super igne liquefacto subit. Addi potest pro oleosarum partium in saccharo praesentia demonstranda, quod facile cum oleosis liquidis sese commisceat.

Hisce oleosis partibus vna cum *mucilaginosi*, quae combustae terram inspidam relinquunt, *acidum* ita *obuoluitur*, vt sentiri gustatu nequeat, sed in hac miscela dulcedinis sensum linguae imprimat, prout acidissimum vitrioli oleum spiritu vini iunctum dulcescit.

§. 8.

Respectu ad *originem sacchari*, scilicet ex succis vegetabilibus, habito, sal essentielle merito illud habetur. In siccam formam condensatum, nominatim illud ex arundine saccharifera, soluitur facile aqua, tarde vero, nec nisi caloris ope, spiritu vini rectificatissimo, et frigesactum in crystallos iterum concrescit. Oleis subactum, praecipue aethereis, haec aqua miscibilia reddit. Et haec quidem substantia latissime per regnum vegetabile diffunditur.

K 3

§. 9.

i) Diff. cit. §. 24.

§. 9.

Sed nec ab *animalium* complexu excluditur.

Mel huius census est, licet rectius et hoc productum vegetabile pronuncies, siquidem illud, ut plerumque, vel enascitur ex succo aquoso dulci in nectariis et fundo florum stagnante, ab apibus hausto et partim pro earum nutritione consumto, partim earum ventriculo ulterius spissato, deinceps in cellulas fauorum, ubi porro densatur, per os deposito; vel verno tempore non suppetentibus floribus ex gemmis arborum, item succo dulci per rimas et aperturas quarundam arborum erumpente, colligitur; vel, licet rarius, ex dulcedine, siue sic dicto rore melleo, qui feruidiori aestate ex foliis ramulis aliisque partibus quarundam stirpium exsudat *k*). Variæ mellis species manifeste genium plantarum, ex quibus collectum, seruant, unde aliud mel aromaticum, aliud amarum, imo nocivum, prout mel ex *Rhododendro pontico* LINN. collectum, cephalalgiam, vertiginem &c. veterum iam observatione, sed recentius confirmata *l*), creat; unde et color et odor mellis multipliciter variat. Partes eadem ex melle ac saccharo elici sese patiuntur *m*). Imo verum saccharum, forma crystal-
lorum

k) Vid. instar omnium de rariori hac origine testis fide dignus ill. GLEDITSCH in *Betracht. über den Bienenstand*, p. 52.

l) V. MODEL'S *kleine Schriften*, Vorrede p. XI.

m) LEMERY in *Mem. de l'acad. R. des sc. de Paris* 1706. p. 279.

lorum imbutum, ex melle parari potest, ea proportionem, ut ex libris duabus mellis Narbonensis circiter uncia dimidia sacchari crystallisati obtineatur *n*). Optandum maxime, ut chemici hanc artem ulterius persequerentur, quo parceretur impensis pro saccharo exotico et apiculturae noua incitamenta fierent. Digna igitur responsione quaestio de hoc argumento fuit, ab academia scientiarum Gedanensi ante aliquot annos proposita.

Lac pariter saccharina materie scatet, ita ut haud difficulter saccharum solidum inde confletur, cuius origo non obscura est, mente modo pabulum animalium si concipias. Mutat quidem lactis naturam nutrimentorum diuersitas; nec negari potest etiam ex iis brutis, quae solis vegetabilibus pascuntur, lac emulgeri, in quo praeter vegetabilem naturam animalis vestigia quaedam sese produnt. Caseosa enim lactis pars, diremta a reliquis eius partibus, alcali volatile manifeste recondit, putredinem facile intrat, foetet et deliquescit. Nec possunt non, quum in primis viis tum in secundis, tam ante secretionem lactis, quam sub eadem, partes vere animalis naturae reliquis adsociari. Si quae vero huius consociationis documenta adhuc in cremore lactis occurrant: serum tamen manifeste herbarum ingestarum naturam retinet, et euaporatum ad nouam siue decimam sui voluminis partem et loco temperato sepositum, in crystallos coit, quae repetita solutione et crystallisatione omni

K 4

flauedi-

n) BEAUME *Elemens de Pharmacie*, T. 2. p. 165. sqq.

flauedine exuuntur. Est igitur lactis saccharum sal essentialiale, saccharo vero vegetabili aemulum, a quo autem istud, copia maiori inflammabilis partis, differt; unde a candelae flamma facile accenditur, nec ita dulce est. Analyfi chemica insuper eadem partes eruuntur, quae salibus plantarum essentialibus insunt *), Addo, spiritum vini ex lacte, non solum equino apud Calmuccos et Tartaros o), praeuia fermentatione destillari, sed etiam ex lacte bubulo p), posse; unde nouum argumentum enascitur cognationis inter succos vegetabiles et lac obuientis.

Paucissima alia vestigia de praesentia sacchari in corpore animali occurrunt. Non dubito hoc loco commemorare *sputa ista dulcia*, quae instante pulmonum suppuratione ab aegris sentiuntur. Hinc istud HIPPOCRATIS q) “qui pus intro collecturi sunt, iis primum quidem saluginosum sputum expuitur deinde dulcius.”

Huius

*) Destillatione ex saccharo lactis elici easdem partes, quae saccharo ex arundine saccharifera insunt, et nominatim viriusque acidum esse eiusdem naturae cel. SCHEELE (in *Vet. Acad. Handl.* 1780. p. 269. sqq.) demonstrauit. Comparari cum hisce merentur, quae proposuit cl. WESTRUMB in cel. CRELL *Entdeck. in d. Chem.* P. 10. p. 84. sqq.

o) GMELIN'S *Reise durch Sibirien* P. 1. p. 273. PALLAS *Reisen d. versch. Provinzen d. Russ. Reichs*, T. 1. p. 314. sqq. T. 3. p. 404.

p) OSKRETSKOWSKY *Diff. de spiritu ardente ex lacte bubulo*, Argent. 1778.

q) *Praenot. coac.* p. 183. FORS.

Huius quoque loci est dulcedo lotii in *diabete*, quae male a quibusdam negatur. Memorabilis est historia *r)* de homine, qui intra nycthemerum lotii pintas 28 emisit. Omissis reliquis symptomatibus apud eum obuiis, hic modo noto, sub initium morbi sensum perpetuum famis eum moleste habuisse, dein saporem ingratum acidum, lotium eius dulce fuisse et saepe turbidum instar aquae mellitae. Lotium stagnando in vase fermentationem subiit, et odorem vinosum sparsit, dein in acorem transit, tandem computruit. Serum sanguinis vena emissi opacum fuit, et retulit serum casei commune, item dulce, etsi non adeo dulce, vt lotium. Residuum lotii super carbonibus exhalantis grumofum fuit, haud absimile saccharo bruno eiusdemque saporis.

In *calculis renum et vesicae* idem acidum sacchari ill. BERGMAN *s)* detexit, putatque hoc cum glutinoso iunctum renum et vesicae calculos constituere, cuius rei explanationem prolixiorem, quam promiserat, mors praematura interceptit.

Quoniam vero materies saccharina apud animalia mammis instructa sponte nunquam extra lac praesentiam suam declarat: patet, si alibi obuiam venit, eam nonnisi morbosa de causa congeri, quae ipsa in *defectu debitae assimilationis* humorum quaerenda videtur, siue debilitas quaedam primas vias vel secundas corripiat, siue vitium quoddam reliquis corporis humoribus insit, quo ipso conso- ciationem cum saccharina materie repudiant.

K 5

S. 10.

r) DORSON in *med. Observ. and Inquir.* Vol. 5. p. 298.

s) *Opusc. phys. chem.* T. 1. p. 254.

§. 10.

Sunt et inter *mineralia* dulcis saporis exempla. *Saturninis acida* mitiora dulcescere et sal metallicum adeo inde redundare, sacchari Saturni nomine, notum est. Sed an verum hic acidum sacchari subsit, experimentis saltem nondum euictum. Credidi olim demonstrari id posse ingenioso chemici apud Suecos versatissimi, cl. SCHEELÉ, experimento, qui, quum lithargyrium cum oleo Oliuarum et aqua coqueret, post huius miscelae s. emplastri refrigerium sensit aquam in superficie subsistentem dulcedine impraegnata, et ex hac aqua in syrapi spissitudinem densata acidi nitri ope crystallos referentes acidum sacchari obtinuit. Hanc dulcedinem existimaui ex acido quodam in oleo latente et calcem plumbeam imbibente originem traxisse. Sed cl. vir postea hocce aliaque sua experimenta similia cum oleo Amygdalarum, Napi, Lini, oleo a sapone seiuncto, butyro, axungia porcina, ipse amplioribus recensens *), refutare tentavit hancce explicationem ideo quod additis alcalinis vel acido vitrioli calx plumbi non praecipitetur, nisi oleum vetustum et rancidum fuerit.

Alumen sensum ex adstringente et dulci mixtum linguae imprimit, imo dulcedinem eiusdem repetita solutione et phlegmatis separatione seorsim haberi posse lego t).

Vitrio-

*) *Kongl. Vet. Acad. nya Handl. 1783. p. 384. sqq.*

t) BORRICHIUS *de natura dulcedinis*, p. 69. citante b. HAL-
LERO in *Elem. Physiol. Vol. 5. p. 119.*

Vitriolum martis gustans post stipticum saporem haud aegre subdulcem percipiet.

Admiscendo *acidis mineralibus spiritum vini* liquida dulcia emergunt.

§. II.

Vberrimum vero sacchari prouentum et consuetissimum *vegetabilium* amplae cohorti debemus. Et in hisce vel sapore sese prodit, vel sponte exsudat per varias partes, vel expressione succi et coctione, uti et ope spiritus vini rectificatissimi, eruitur. Consistentia quidem, sub qua ex hisce elicit comparet, variat, pro maiori vel minori copia aquosarum, oleosarum vel mucilaginosarum partium admista. Omnium *vegetabilium* hac in re eminet gramen istud nobile, quod primo loco proponam, cui dein subiungam reliqua.

- I. SACCHARVM OFFICINARVM; floribus paniculatis, foliis planis LINN. *Syst. veg. Ed. mea* 14. p. 103. Arundo saccharifera C. B. *Pin.* p. 18. Conf. SLOANE *nat. Hist. of Jam. Tom. I. p. 108. Tab. 66.* quae vero paniculam modo exhibet. Integram autem stirpem delineat RUMPH. *Herb. amb. Tom. 5. Tab. 74. fig. 1.* et describit eam p. 186. — HUGHES *nat. Hist. of Barbados* p. 244. *Tab. 23. fig. 1.* Saccharum geniculatum et succulentum panicula spatiosa BROWNE *nat. Hist. of Jam. p. 129.* Crescit perenne hocce gramen sponte in Africa et vtraque India locis plerum-

plerumque inundatis. Sed naturae ars sub-
venit plantationibus, praecipue inter tropicos
Americae lucrosis, vbi in noua Hispania, Bra-
silia, Guadeloupe, Martinique, St. Domingo,
et omnibus fere coloniis Hispanicis Gallicis
Anglicis, colitur.

Quale *cultus* genus, et quaenam *sacchari con-*
ficiendi prima initia sint, multi tradiderunt intelli-
gentes viri, in Indiis commorati, quae tamen ex
fontibus in compendium, vltra cuius limites euagari
hic non datur, redigere plus faceffit negotii, quam
absque tentamine aliquis existimet. Optimis hac
de re auctoribus accensendi PISO *u*), LABAT *x*),
BROWNE *y*), HUGHES *z*) qui studiosius in stirpis mor-
bum, a vermiculis prouenientem (yellow Blast),
inquisiuit, et AVBLET *a*). Pro cultura eius eligitur
plerumque solum aquosum et fertile et calida satis
statio, sed interdum quoque in siccis imo arena
laete crescit (AVBLET). Propagatio fit ope gemmae
culmorum in partes dissectorum et terrae immisso-
rum. Requiruntur plerumque quatuordecim ad
sedecim menses, antequam culmi ad illud robur
sive maturitatem peruenerint, vt saccharum erogent,
nisi

u) *Indiae utriusque res nat. et med. p. 108. sqq.*

x) *Nouv. Voyage aux Isles de l'Amerique, Tome I. p. 224. sqq.*

y) *Loc. cit.*

z) *L. c.*

a) *Hist. des plantes de la Guiane Françoise, T. 2. App. p. 57.*

nisi terrae genius maiorem moram iniungat. Sed pluries ex vna eademque radice culmi auferri possunt.

Culmis ope falcis prope radicem praecisis et panicula cuiusuis vna cum foliis ablata, plures in fasces vinciuntur, qui ipsi in molendinum transferuntur, vt circumactis per equos, ventum, vel vi irruentis aquae, tribus cylindris perpendicularibus ferreis conquassentur, et succum effundant, qui cisterna colligitur, vel, quod frequentius, mox per canalem in ahenum deriuatur. Coquitur hic addita calce vel lixiuio saponariorum vel cineribus puris et alumine. Deriuatur postea in alia athena vnum post alterum et nouo additamento dictorum et despumatione depuratur et coquitur, donec syrupus inter digitos receptus illos quasi conglutinet, tumque in modulos pyramidales apice terram spectante et perforato inniuitur, quo siccetur vel crystallifetur. Foramen hoc primo clauditur, dein aperitur, vt syrupus effluere possit. Hac ratione *Saccharum, crudum, thoraeum, s. rubrum* Pharm. Lond. et Edinb., vulgo Moscouade dictum, paratur, quod adhuc multis cruditatibus scatet, et brunum ideo colorem habet, consistentiae fere arenae. Sub hac forma magnis doliis in Europam transfertur, vt ibidem vario gradu depuretur et panibus pyramidalibus vendi possit. *Saccharum crudum* pro diuersa depuratione, quam sustinuit in Indiis, vel plus vel minus sacchari albi largitur. Impuritates ad superiora tendentes auferuntur in modulis superficie

perficie operculo ex limo griseo tecta. Optimum crudum $\frac{2}{5}$ adeo sacchari albi probi erogat. Quoclarior hoc crudum est, quo albidius siccior duriusque, eo purius censendum; carere et debet sapore empyreumatico vel acido. Quomodo in officinis Europaeis ulterius depuretur s. vt vocant, refinetur, non attinet hic prolixius commemorare, optime hac re perfuncto illustri DV HAMEL DE MONCEAV *b*). Assentior tamen lubenter ill. BERGMANO *c*) sacchari refinationem multum adhuc perfectionis admittere, chemia facem praeferente. Noua solutione, coctione, additione calcis, sanguinis vel albuminis ouorum, et despumatione haec depuratio fit, multique gradus sacchari sic depurati existunt, vnde nomina eius, quod conicis formis induruit, deinceps ulterius exsiccatum fuit, varia, *Cassonade*, *Melis*, *Refnade*, *Canariense* s. *finissimum*, alique gradus et nomina. Species proximo loco dicta albissima, durissima, sonora, copiam scintillarum ad chalybem excitat. Distingui et potest saccharum in *pyramidale*, de quo nouissime serino, *farinaceum*, instar farinae contrectandum, et *tabulatum*, quod crustae instar aheni latera obducit. Sub omnibus hisce diuersis processibus defluit copia *syrupi* per apertos modulos, qui ipse non minus gradu puritatis multipliciter differt, vnde et nomina varia. Impurus iste brunus *Molasse* dici solet. Ex isto, qui in Indiis defluit, aqua cocta praeuia fermentatione

b) *Art. du rafiner le Sucre 1764.*

c) *Anledning til Föreläsningar öfver Chemien, §. 83.*

tatione spiritus ardens, *Rum* f. *Taffia* dictus, destillatur. Vilior est sapore iste spiritus, qui ex spuma ablata paratur. Purissimus syrupus Germanis *Syrupus candi* dicitur. Si syrupus vel saccharum aqua solutum coquitur, donec spissescat, deinceps in vas terreum defusum per vnam vel plures hebdomades loco calido retinetur, vel crusta vas obducit ex crystallis maioribus conflata, vel, si bacilli siue fila suspenduntur, haecce iisdem circumvestit; haec origo *Sacchari candi*, quod pro diuerso depurationis sacchari gradu, et *brunum* et *album*, habemus, et bellariorum varia forma.

Non locus hic est, multis rationem reddere encheireseos multiplicis, quam saccharum subit, antequam album obtineatur. Coctio prima accelerari debet, ob succi expressi nimium in acorem nisum, quem tantum dixi esse, vt vix moram nychthemeri perferri possit (§.4.). Sine calce vel alcali addito, cum quo superfluum acidum iungitur, nunquam in solidam compagem redigi posset.

Vtrum huic stirpi, an potius ARVNDINI BAM-
BOS L. d) veterum Σακχαρ f. Σακχαρον, Μελι το
καλαμινον, *Mel cannae* f. *arundinaceum*, vel, vt et
dictum, *Sal Indum*, adscribendum, dictu difficile
est. Describitur ab istis vel instar mellis fluidum,
vel magis siccae consistentiae, ad internodia ex
medullari substantia per fissuras erumpens, tandem
concre-

d) Conf. Tabaxir GARCIAE AB HORTO in *aromat. et simpl.*
Ind. Historia, p. 46.

concrefcens. Certe concretum noſtrum ſaccharum eos latuit *). Huius in locum creberrime melle vfi ſunt.

Sequantur iam duae *arbores*, ſaccharinae materiæ matres, *calidiſſimis regionibus* pariter propriæ:

2. BORASSVS FLABELLIFORMIS; frondibus palmatis cucullatis, ſtipitibus ferratis LINN. *Syſt. veg. p. 984.* Palma coccifera folio plicatili flabelliformi, mas; foemina RAII *Hiſt. plant. T. 2. p. 1366.* Lontarus domeſtica, Palma vinaria prima ſive Iagarifera, Lontar. RVMPH. *Hiſt. Amb. T. I. p. 45. Tab. 10.* Palma Indiae.

Ex hac incidendo racemum elicitur ſuccus, qui ſi ſaccharo deſtinetur, excipitur olla intus calce oblita, dein coquitur in ſaccharum rubrum, quod vel in panes vel baculos exſiccatur. Iauanis frequenti in vſu.

3. COCVS NVCIFERA; inermis, frondibus pinnatis, foliolis replicatis, enſiformibus LINN. *Syſt. veg. p. 985.* Palma indica nucifera BAVH. *Hiſt. T. I. p. 375.* Calappa RVMPH. *Herb. amb. T. I. p. 1. Tab. 1. 2.* Palma Indica.

Ob nucem clariffima, nec non ob ſpiritum vini *Arrac*, qui ex ſucco per racemum incifum exundante

*) Idem iudicium haud ita pridem tulit cel. JO. BECKMANN in *Hiſtoria ſacchari*, inſerta *Comment. Societ. ſcient. Gotting. a. 1782. p. 56. ſqq.*

vndante paratur. Ex eodem succo, olla pauxilio calcis oblita excepto, syrupus crassior vel mel excoquitur, quod apud tales gentes Indostaniae vsurpatur, apud quas arundo saccharifera non obuia est.

Ea vero numinis benignitas est, vt, cuiuslibet regionis felicitati prospiciens, quod boni alicubi deficiat, id alio simili beneficio resarciat. Sic et, vbi climatis vel soli defectu arundo saccharifera deest, substituit alias stirpes dulci succo foetas. Harum e genere variae sunt *arbores Americae septentrionalis*, etiam *aliae apud nos* obuiae, quae verno tempore, antequam folia emiserint, perforatae, copiam grate dulcis lymphae fundunt. Maxime inter hasce claruit

4. ACER SACCHARINVM; foliis quinquepartito-palmatis acuminato-dentatis, subtus pubescentibus LINN. *Syst. veg. p. 911.* EIVSD. *Spec. pl. p. 1496.* Conf. DV ROI *Harbkesche wilde Baumzucht. Vol. I. p. 14. sq.* KALM's *kårta Berättelse om Norr-amer. Växter p. 3.* Anglis Sugar-Maple, Sugar-tree; Gallis Erable à Sucre. Florum huius vera ratio adhucdum botanicos latet. Arbor crescens in Canada et Pensylvania abundanter.

Verno tempore scatet succo et tanto copiosius, quo plus niuis per hiemem ceciderit, et quo diutius frigus praecesserit. Hinc tunc temporis caesim vel terebrando in lignum vsque arbor vulneratur, *Opusc. Vol. II.* L plagae

plagae canalis submittitur, per quem in vicinum vas defluit, aliquando per tres hebdomades. Coquitur dein succus in amplo ahenò sub continua agitatione et despumatione eousque, donec cochleari, quo circumagitur, obstaculum sistatur et ille grumescere incipiat, refrigerio factò saccharum concrescit. Succus huius canthari quatuor ad octo subinde per diem promanant, et sedecim nonnunquam etiam quinque eius canthari libram vnà sacchari praestantis erogant.

Bruni hoc coloris est, referens saccharum Moscuae supra descriptum, funditur et nonnunquam in placentas crassitie duarum manuum transuersarum, vel in maiores massas aliasque formas pro diuersa magnitudine et figura vasorum, in quibus concrescit, redigitur. Atque hoc saccharum non solum ab Americanis barbaris, sed et a vulgo in coloniis Anglicanis pro cibo potuque et ad fructus varios condiendos adhibetur. Syrupi quoque eius vsus fit e). Sed saccharinum succum vehere, non huic vni Aceris speciei datum est, sed et plerisque aliis. Sequantur igitur

5. *Acer rubrum*; foliis quinquelobis subtus glaucis, pedunculis simplicissimis aggregatis LINN. *Syst.*

e) Conf. ill. KALM in *Kgl. Vetensk. Acad. Handl.* 1751. p. 147. Arbitror hanc ipsam speciem sub nomine *Erable blanc* ou *Erable mâle* intellexisse cum GAVTIER in *Mem. pres. à l'ac. des sc. de Paris T. 2. p. 376.* vbi ample artem ex hoc et sequenti *Acere* saccharum parandi descripsit.

Syst. veg. p. 911. DV ROI Harbk. Baumz. T. 1. p. 16. sqq. KALM'S Berätt. om N. Americ. Växt. p. 4. et EIVS Resa til N. America T. 2. p. 288. Icon: MILLER'S Figures of Plants Tab. 8. fig. 2. CATESBY nat. Hist. of Carolina Tab. 62. Arbor crescens per totam Americam septentrionalem abunde, vbi multiplex eius in oeconomia commodum.

Succus promanans aquosior longe praecedente est, vnde maior eius pro saccharo conficiendo iactura. Saccharum quoque obscurius et nigricans, attamen copiose apud Americanos praeparatur. Cf. nota subiecta *e*.

6. ACER PSEUDO-PLATANVS; foliis quinquelobis inaequaliter ferratis, floribus racemosis LINN. *Syst. veg. p. 911. Acer montanum candidum C. B. Cfr. DV ROI Harbk. Baumz. Vol. 1. p. 4. Icon: CRAMER'S Anleit. zum Forstwesen Tab. 6. Arbor, in Heluëtia et Germania hinc inde reperiunda.*

Verno tempore post terebrationem succus dulcis effluit, qui inspissatus dictos aemulatur. Vide quae de hoc LISTERVS *f*) et GRÜNERVS *g*) memoriae prodidere.

7. ACER PLATANOIDES; foliis quinquelobis acuminatis acute dentatis glabris, floribus corymbosis

f) In *Phil. Transf. abridg. T. 2. p. 686.*

g) In *Fränk. Samml. T. 4. p. 36.*

bosis LINN. *Syst. veg.* p. 912. Acer montanum tenuissimis et acutissimis foliis c. B. Conf. DU ROI *Harbk. Baumz.* p. 12. Icon: MILLER'S *Figures of Plants Tab.* 8. *fig.* 1. Arbor Europae borealis. In nostra vicinia montem Pleis occupat.

Ad hanc praecise refero quae cl. DALMAN h) de saccharo in Suecia ex Aceribus parato tradidit, nam Acer Pseudoplatanus ibidem non crescit. Ex Platanoidis autem arboribus octo, quarum quaelibet triginta annis non inferior fuit, intra quatri-duum vno experimento viginti cantharos succi elicit, qui inspissatus libras duas cum dimidia sacchari bruni exhibuit saporis non ingrati.

ACER CAMPESTRE L. f. Acer camp. et minus c. B. succum fere saccharinum dulciorem largiri lego i).

8. IVGLANS ALBA; foliolis septenis lanceolatis ferratis, impari sessili LINN. *Syst. veg.* p. 859. Conf. KALM in *K. Vet. Acad. Handl.* 1769. p. 119. *sqq.* Ad hanc speciem etiam retulit b. A LINNÉ illam, quae Hickery-nut Anglis in America dicitur. Sed KALMIVS nouissime in *K Vet. Acad. Handl.* 1778. p. 263. *sq.* demonstravit, pro specie diuersa habendam, cui quidem

h) *Kongl. Vet. Acad. Handl.* 1754. p. 232.

i) GRÜNER in *Fränk. Samml. aus d. Naturl. Arzn.* T. 4. p. 40.

quidem varietates tres tribuit, forsitan ideo vnice, quod in America Hickery nomen singulis hisce tribus arboribus conferatur. Arbor in America septentrionali oeconomico vario vsu celebrata.

Hic autem memoranda vnice ob succum album, spissiusculum, vere ex plagis caesis promanante. In Canada et Albania coquitur inde saccharum, quod dulcius fertur isto ex Acere saccharino. Ob parciolem eius prouentum tamen illi pro hoc fine cedit *k*).

9. BETVLA NIGRA; foliis rhombeo-ouatis acuminatis duplicato ferratis LINN. *Syst. veg.* p. 849. DU ROI *Herbk. Baumz. T. 1. p. 9*. Sugar-Birch, Black-Birch Anglis. Arbor Virginiae, Canadae.

Ex hac etiam in America septentrionali saccharum paratur, quod tamen amaricantis saporis est *l*).

Item ex BETVLAE ALBAE L. succo euaporatio ad spissitudinem syrupi sal dulce obtinetur, ad Mannam accedens *m*).

L 3

10.

k) KALM in *Vet. Acad. Handl.* 1778. p. 272.

l) KALM *l. c.* 1751. p. 145.

m) MARCGRAF in *Mem. de l'ac. d. sc. de Berlin* 1747. p. 89. Conf. MODEL *chym. Nebenst.* p. 230.

10. GLEDITSIA TRIACANTHOS; caule spinis triplicibus axillaribus LINN. *Syst. veget. p. 218.* Gleditsia spinosa DV HAMEL *Arbr. Tom. I. p. 265. Tab. 105. Hort. Angl. Tab. 21.* Honey-Locust Anglis. Arbor Virginica.

Legumina longa, ensiformia, plana, pulpam vehunt melleam, quae a quibusdam hydromellis inde parandi causa coquuntur *n*).

Transeo ab arboribus, quae largiorem copiam saccharinae materiae variis gentibus suppeditant, ad *stirpes herbaceas* eo fine clariores:

11. ALOES cuiusdam americanae, Brasiliensibus Caraguata, Mexicanis Magues seu Metl dictae meminit MARCGRAFIUS *o*) peregrinator, ex cuius furculis ad latera prodeuntibus Nouae Hispaniae incolae succum exprimunt et coquendo saccharum parant. Vinum quoque et acetum hic succus ibidem suppeditat. Est sine dubio AGAVE AMERICANA LINN.

12. ASCLEPIAS SYRIACA; foliis ovalibus subtus tomentosis, caule simplicissimo, umbellis nutantibus LINN. *Syst. veget. p. 259. β exaltata.* Perennis Virginiae, vulgare hodie hortorum ornamentum et florum odore placens, sed luxuriando molestum.

Mitto

n) KALM in *K. Vct. Acad. Handl. 1751. p. 146.* LAWSON'S *nat. Hist. of Carolina, p. 97.*

o) *Hist. nat. Brasil. Lib. I. cap. 18. p. 38.*

Mitto hic serici speciem, feminum apicibus adhaerentem, quae mixta alia materie textis comoda est, vnde la Soyeuse Gallis; nec non filamentosam caulium compagem, filis textisque inde parandis pariter idoneam. Nam huius praecipue loci flores sunt, ex quibus rore madidis mane succus exprimitur, etiamsi ex venenata familia stirps sit, qui succus praeuia coctione saccharum brunum grati saporis et salutare erogat *p*).

13. ZEA MAYS; LINN. *Syst. veg.* p. 841. Frumentum indicum Mays dictum c. B. Annum Americae gramen.

Non grana vnice huius farinacea magni in alimentum hominum et brutorum momenti sunt, sed et succus culmis inditus sacchari materiem continet, quod quidem Americani septentrionales subinde in vsum trahunt *q*). Probo quoque successu in Hungaria experimenta in hunc finem repetita sunt ***).

Verum nec *maxime boreales gentes* suas cupedias deficere, duo subsequencia exempla docent:

14. HERACLEVM SPHONDYLIVM; foliis pinnatifidis laeuib, floribus vniformibus LINN. *Syst. veg.* p. 282. Sphondylium vulgare hirsutum c. B. Icon: RIVIN. *Pent. T.* 4. Pl. perennis vulgaris in pratis praecipue.

L 4

A

p) KALMS *Resa til Norra America*, p. 260.

q) KALM *Vet. Ac. Handl.* 1751. p. 146.

***) V. cel. CRELL *chem. Annalen* 1. Stück, p. 96.

A Kamschadalensibus petioli foliorum radicalium, postquam cortex eorum derasus fuerit, in fasciculos colliguntur, qui flaccidi facti per tecta distribuuntur, vt saccharum farinaceum exsudet, conquassatione et allisione ad corpus durum facile separandum. Quadraginta librae petiolorum quar-
tam circiter librae partem sacchari subministrant. Spiritum gratum eadem materies huic genti impertit r).

15. FUCUS SACCHARINUS; fronde subsimplici en-
siformi, stirpe tereti breuissima LINN. *Syst. veg.*
p. 270. Fucus longissimo latissimo crassoque
folio c. B. *Prodr.* p. 154. Alga saccharifera
BORRICHII in THOM. BARTHOL. *Art. med.* Vol.
I. p. 119. Vol. 4. p. 165. Icon: *Fl. Dan.* Tab.
416. GMELIN. *Hist. fuc.* p. 194. Tab. 27. 28.
Alga in oceano septentrionali lapidibus ple-
rumque adhaerens.

In Islandia praecipue in pretio est, vbi ma-
ris fluctibus in terram proiicitur, vel dedita opera
antea colligitur. Pabulum constituit pecoris, et
acetarii instar in mensas quoque transfertur. Sac-
charum tamen nominatim eam memorabilem facit,
quod sponte granulosa forma exsudet, dum folia
solis calori exponuntur. Macerantur ista etiam
aqua, iterumque ficcata in tonnulas ligneas collo-
cantur,

r) V. GMELIN *Flor. Sibir. Tom. I. p. 214. sqq.* CHAPPE
Voyage en Sibirie par KRASCHENINIKOW Tom. 2.
p. 364.

cantur, nec prius in vsum culinarem trahuntur, donec per totam superficiem saccharum eruperit s).

Hae hucusque enumeratae *plantae* praecipuae sunt, quae materiem sacchari conficiendi serio suggererunt. Sed multae *aliae* sunt, quae illam comprehendunt. Ex radicibus BETAE RUBRAE item BETAE CICLAE vel SII SISARI tam ope spiritus vini rectificatissimi, quam sola succi expressione, depuratione, coctione, saccharum verum euocari se patitur, et tam larga quantitate, ut secundum primam encheiresin libra dimidia exsiccatarum radicum Betae Cicla vnciam dimidiam, Sisari drachmas tres, et Betae rubrae drachmas duas et dimidiam sacchari eroget t). Syrupi quidem speciem multipliciter utilem, elicere datur ex DAVCI radicibus u), sed in sacchari duritiem hucusque coadunari non potuit. Pauxillum modo veri sacchari inest PASTINACAE radicibus. — Fructus sunt varii, quorum siccatorum superficiem sponte farina dulcis obducit, quorsum CARICAE, PASSVLAE, PRVNA DAMASCENA, IUIUBAE, SILIQVA DVLGIS, DACTYLI. In fructibus MYSAE PARADISIACAE maturis succosis saepe granula dulcia pellucida cortici adhaerere vidi, seminis coriandri nonnunquam magnitudine, quae

L 5

hinc

s) BORRICH. l. c. Cfr. et BJORNE PAVLI *Obss. circa plantas quasdam maris Island. et speciatim algam sacchariferam, Hafn. 1749.*

t) MARCGRAF in *Mem. de l'ac. R. des sc. de Berlin 1747. p. 79. sqq.*

u) V. compendii causa MURRAY *Appar. medicam. T. I. p. 209.*

hinc inde in tam duras crystallos concreuerant, vt inter dentes stridorem excitarent. Alios rursus fructus nouimus, in quorum medulla vel pulpa materia saccharina residet. Pertinet huc fructus castaneae, cuius extractum mucilaginosum digestum spiritu vini syrupum euaporatione subministrat, qui calido loco seruatus copiam crystallorum generat, quas verum saccharum esse depuratio subsequa omnino demonstrauit *). Rob BACCARVM IVNIPERI etiam si absque saccharo paratum in sacchari moleculas grumescit — MANNA ex Orni aliarumque Fraxinorum cortice trunci sponte sub coelo calido praecipue in Calabria et Sicilia exsudat, vberius vero incisionibus elicitur. Suppetunt et multae aliae arbores, quae similem succum vel ex cortice vel foliis transmittunt, de quibus alio loco fusius exposui **). — Dulcedo praeterea inest notabilis radicibus APII DVLCIS f. Celleri, LIQVIRITIAE, DVLCAMARAE, POLYPODII, TRITICI REPENTIS, RAPIS item PVLPAE CASSIAE, BRASSICAE, GUMMI ARABICO, CERASORVM rel. — Flores pariter exstant, in quibus tanta copia liquidi nectarei secernitur, vt guttatim destillet, exemplo FRITILLARIAE CORONAE IMPERIALIS, MELIANTHORVM. In PROTEA MELLIFERA florum capita saepe ad dimidium, tempore quo vigent, succo melleo replentur, qui ab insectis filtratione depuratus et leui igne inspissatus syrupum eximium praebet. Eadem
copia

*) PARMENTIER *Traité de la Chataigne*, p. 41.

**) *Appar. medic. Vol. 3. p. 542. sq.*

copia et bonitate eundem erogat PROTEA SPECIOSA *v*). Glandulas istas tres, quae in labio inferiori calycis ERYTHRINAE CORALLODENDRI occurrunt, vidi fecerere viscum dulcem, qui primum guttarum instar limpidarum adhaeret, dein sensim opacus euadit et in saccharum concrevit. Liquor nominatim ex floribus AGAVES AMERICANAE collectus verum saccharum continere observatum *x*). Imo in nectariis florum BALSAMINAE IMPATIENTIS tam simplicium quam compositorum in durum perlucidum saccharum, granulum referens, iste indurescit *y*).

Non vero existimandum, ex omnibus dulcibus una eademque encheiresi, saccharum verum parari posse. Pro natura enim et proportionē admixtarum partium processus variet, necesse est. Non successit res, ut dixi, in Daucis, nec duplici specie radice Graminis *z*). Memorabile etiam est, Glycyrrhizae radicem difficile fermentationem subire *a*), ad quam alias dulcia prona sunt.

v) THUNBERGII *Diff. de Protea*, p. 61. sq.

x) MARCGRAF in *Mem. de l'acad. d. sc. de Berlin*, Tom. cit. p. 89.

y) ODHELIVS in *K. Vet. Ac. Handl.* 1774. p. 359.

z) MARCGRAF *l. c.*

a) V. MURR. *Appar. med.* T. 2. p. 375.

SECTIO SECVNDA.

Dulcium virtutes medicae.

§. 12.

Inde iam *disparitas* elucet *dulcium*, nisi alia criteria, sapor, consistentia, chemica analysis, eam significarent. Dulcedini subinde mucilago, vel oleum crassius, gummi, resina, item multum aquae vel terrae admixtum est. Vnde aliquando effectus redundant, quorum ratio non a solo principio saccharino petenda. Non omnino igitur idem est, utrum saccharo lactis, melle, caricis, an saccharo ex arundine saccharifera, utaris. Quoniam tamen sapor dulcis in hisce per omnem reliquam miscelam dominatur, et acidum sacchari oleumque, quae in dulcibus primaria sunt, exceptis forsitan corporibus quibusdam mineralibus, ubiuis adsunt: non possunt non horum omnium vires quaedam communes esse, quas iam perpendere meum est. Plerasque ideo vires generales assequutus est PAVLLVS AEGINETA *b)*, dum dulce, ait, laxat, soluit, digerit, mollit, ac denique rarefacit. Quid peculiare hoc vel illud dulce habeat, ex natura admixtae partis, siue sit mucilaginosum, siue oleosum crassius, aquosum &c. eiusdemque proportionem, facile constabit.

§. 13.

b) De arte medendi, Lib. 7. cap. 1.

§. 13.

Iam vero *Saccharum commune* praefertim tanquam exemplum in medium producam, ad quod reliquorum dulcium vires exigantur. Id quod tantò iustius eligere me posse arbitror, quum vulgare constituat ciborum et potulentorum condimentum, et basin quasi tot bellariorum, confectio-
num, rel., et tot medicamentis conseruationis, virtutis, item gratiae, causa addatur.

§. 14.

In frequentissimo autem isto sacchàri vsu, qui post detectam Americam inualuit, non defuerunt tamen viri docti et inclyti, qui tam argumentis speciosis, quam experientia *nociuam* eius *naturam* demonstrare annisi sunt. Horum ex numero commemoro HELMONTIVM *c*), RAIVM *d*), DOLAEVM *e*), LEONARDVM DE CAPVA *f*), auctorem quendam anonymum *g*). Plurima *argumenta* eo redeunt, calcis, qua praeparetur saccharum, particulam illi adhaerere eaque illi vitium quoddam adspergi, et saccharum ipsum in sua miscela acidum acre comprehendere. Magis a sana ratione alienum est, nocere spirituosa materie, quae praeuia fermentatione euoluitur. Quod ad calcis additae ignominiam

c) *Ortus med.* p. 463.

d) *Hist. pl.* T. 2. p. 1279.

e) *Encyclop. med. theor. pract.* p. 271.

f) *Ragionamenti sopra incertezza delle medicina*, p. 500.

g) *In Raccolta d'Opuscoli scientifici et filologici*, T. 6. p. 441. sqq.

niam attinet, non licet a nociuis vaporibus istis, quos parietes recens constructi vel dealbati spargunt, vel ab iniuria calcis viuae sine vlllo velamento ingestae, concludere ad simile detrimentum calcis extinctae vel debite obuelatae et dilutae. Senior calcis contra calculum vrinarium et aquae calcis contra idem et alia mala frequentissimus vsus satis superque docet, timorem, olim de calce in corpus nostrum, quomocunque intrante, conceptum, fuisse vanum. Tanto minus autem a terra calcarea aliquid mali metuendum est, quum illa in sacchari praeparatione, postquam acidum iusto abundantius abripuerit, fere omnino cum hoc fundum petat vel spumae inhaereat, consequenter etiam si calx non omni noxa careret, in tam exigua copia, qua terra calcarea saccharo inest, vim valetudini inferre nequeat. Nam licet sint, qui negant vlla omnino eius vestigia in saccharo rite praeparato superesse, ingeniosissimis tamen cl^{mi} HJELM *) nuperrime institutis experimentis de errore conuincimur, siquidem, vt alia eius documenta omittam, vitrioli acido addito verum gypsum enascitur. Difficile autem dictu est, an calcis huius vestigia ab ipsa arundine repetenda sint, an a praeparatione, qua constat calcem vel sub primam succi coctionem et antequam in saccharum crudum s. rubrum concreseat, admisceri. Quod si autem frustra adeo calcarea in saccharo offendantur, haec modo casu fortuito accesserunt, vel arte male docta. Id et verum est, quo rudius saccharum est,

*) *K. Vet Acad. Handl. 1783. p. 227. sqq.*

est, tanto plus terrae illud recondere, et in hac calcaream maxima proportionem inesse. Acidum vero sacchari, quod accusant tanquam vehemens acre et erodens, non nisi quando purum et suis compedibus solutum habetur, huius indolis est. Quam difficile vero sit illud a reliqua miscela segregare, supra fatis indicatum est. Vnde apparet illi euoluendo non sufficere primarum viarum vires. Afferere autem velle, quod vsu sacchari sanguis nimium commoueatur et incalescat, ideoque officiat in febribus, quod generentur inflammationes ventriculi &c., ideo quod fermentatione spiritum erogat, vt sustinuit auctor anonymus *h*), ridiculum fere est, vtpote quum neque ad eum gradum intra corpus nostrum fieri possit fermentatio, nec ea vasa illi competant, quae pro spiritu vini destillando requiruntur.

Nec magis pro sacchari effectu, ob eius acidum noxio, militant *experimenta* quaedam cum animalibus instituta. Respicitur hic ad illa cl. REDI *i*), quibus constitit, Lumbricos, Scolopendras marinas, Sanguisugas, saccharo vel conspersas vel in aquam saccharatam immerfas, intra breue temporis spatium necari. Imo maiora animalia, Ranae aliquot per saccharum inspersum, et Columba et duae Anates per intrusum eius frustum ab anonymo dicto occisa feruntur *k*). Sed quam diuersa ver-

mium

h) Racolta d' Opuscoli scientifici l. c. p. 459.

i) De animalc. viv. in corpor. animal. viv. p. 166. sqq.

k) Racolta l. c. p. 467.

mium primo loco dictorum natura à nostra ; et quod ad reliqua significata animalia spectat: experimenta tam parca cum hisce capta sunt, vt hætenus sacchari laudi nec detrahant aliquid nec addant.

§. 15.

Nolo tamen hæcce ita intelligi, ac si nullum omnino *abusui* sacchari locum admitterem. Prout enim omne nimium, vel salutaris quævis res intempestive capta, in vitium vertitur: ita et sacchari et dulcium quorumvis largior iusto copia, vel sub mala corporis diathesi vsus, officit. Nimia quantitate ingesta, fermentatione in primis viis orta, quæ efficax flatuum mater est, et acore suo omnino molestias afferunt. Hic etiam si non in acido puro sacchari, sed inuoluto ad partem reliquis partibus constitutiuis, consistat, sensu tamen ingrato, ructibus acidis, dentium adeo stuporem inducentibus, eneruando bilis in chylo præparando vim et sanguinem ipsum per acorem deprauando, grauât. Caueant igitur a saccharinis infantes, virgines chloroticae, foeminae hystericae et quicumque rachitide vel malo hypochondriaco laborent, in quibus ipsis malis acidum iam antea dominatur, et saccharinis nouum pabulum adsciscit. Nec negauerim, nigrorem istum dentium, quem, qui saccharum nimis in deliciis habent, experiuntur, acido huic ad partem imputandum esse, quod tanto magis deprauare dentes potest, si substantia eorum vitrea, comminuendo inter dentes durum saccharum, vel calidis ingestis, rimas agit vel confringitur. Sol-
vendi

vendi sua efficacia, qua tot in morbis prodest, nocet quoque auidius captum. In gelatinosam partem sanguinis hanc ipsam sese praecipue exserere videtur, saltem si experimentis cum carne varia, cui saccharum inspersum, fidendum, sub quibus scilicet diffuxit serum in notabilem ponderis carnis residuae iacturam, adeo ut sicca inde et dura euaderet *l*). Eousque haec resolutio humorum ex abusu sacchari aliquando processit, ut ipsa nutritio turbaretur et emaciatio corporis succederet. Poterit tamen tabis huius culpa ad partem in sacchari relaxandi insigni vi quaeri, quae nimietate et tonum ventriculi et pulmonum et reliqui corporis vitiose labefactat. Hinc et apparet, debilitatem istam, quam potus calidi vsitati Theae et Coffeae pariunt, haud parum a relaxante vi sacchari dependere.

§. 16.

Nocendi vero potestatem sacchari, etiamsi largius consumti, a corporum praeprimis habitu et natura deriuandam, exempla docent hominum quorundam, qui, licet *indulgentes liberiori vsui sacchari*, ad grandaeuam tamen eamque vegetam senectutem peruenerunt. COSTERVS *m*) iurisperitus Batauus bene olim meritis, tantum sacchari absque ullo incommodo consumpsit, ut quinque vel sex aliis hominibus sufficeret, nihilominus tamen ultra nonagesi-

l) Raccolta l. c. p. 471. sqq.

m) VAN SWIETEN Comment. Tom. 5. p. 586.

nonagesimum annum vixit, senio demum confectus. DVX BEAUFORTII libram fere sacchari quouis die per quadraginta circiter annos ingessit, mortuus denique septuagenarius, sine vlla vel viscerum vel dentium labe *n*). FRIDERICVS HOFFMANNVS, lumen istud Germaniae medicorum sui temporis, prout multis scriptorum suorum locis, quantum faueret saccharo, declaravit, ita per vitam suam longae-
vam fertur saccharum mirifice in deliciis habuisse, ita vt omnes fere cibos saccharo conspergeret omniaque vina caeterosque potus eodem edulcaret. Addendi sunt hisce ex TRILLERI *o*), qui huius rei meminit, auctoritate BERGERVS, Professor medicinae Wittebergensis, et LEYSERVS iurisconsultus. Notum quoque satis heic loci est, quantum etiam post fata venerabilis senex, GEORGIVS GOTTLOB RICHTER, primum istud ordinis medici in hac academia decus, dulcibus indulserit, sub quorum vsu tamen copioso aetatem 79 annorum attigit, molesta quidem stranguria per plures annos sed ex alia causa detentus.

§. 17.

Experimentis extra corpus humanum institutis constat, saccharum oleosa cum aquosis coadunare. Idem beneficium praestat cibus pinguioribus ingestis; hinc optimo consilio placentis pinguioribus iusto
insper-

n) SLARE'S *Vindication of Sugar*.

o) *Thesaur. medicam. Tom. I. p. 204.*

inspergitur liberalius, sine quo additamento ventriculus longe magis labefactarent malaque varia gignerent. Nutriendi facultas, quae saccharo à quibusdam tribuitur *p*), dubito an ad illud depuratum, quo utimur, transferri possit. In India quidem mancipiis reliquias, quae a secunda sacchari succi ebullitione remansere, in victum cedere noui, et porcos quoque a crassioribus sacchari foecibus pinguescere, sed hisce reiectaneis multum adhuc nutritiae materiae insidet, quod vltiori depuratione consumitur. Prout vero in mensis quorundam condimentorum acrimoniam mitigat, quod constat e. g. in Armoracia vel Sinapi fieri: ita et acres humorum stimulos inuoluit, et vel *diaetetico usu* morbis variis hoc vitio enascentibus, obuiam it. Si hisce additur, quantum lenocinium palato afferat, cibus potulentisque adiectum, vel arte pistorum dulciariorum subactum et mixtum, quantumque valeat ad integritatem tot fructuum, succorum rel. seruandam: quilibet fatebitur, etiamsi nullius in morbis virtutis ratione habita, saccharum pretiosissimis naturae donis esse annumerandum.

§. 18.

Sed iam et agite, quid in multiplici *morborum* genere praestet, consideremus. Multos egregios dulcium effectus vel vnice *saponaceae* eorum siue resoluendi insigni *efficaciae* debemus. Hac ipsa saccharum, si lacti admiscetur, eius coagulum im-

M 2

pedit.

p) FR. HOFFMANN *Diff. sacchari historia*, p. 20. 21.

pedit. Paulo ante eius in fero dissoluendo vim descripsi (§. 15.). In *acutis* igitur et nominatim *inflammatoriis* febribus tenacem vel stagnantem in minimis vasis sanguinem attenuat et liquat; quo sine saccharum in substantia, vel robis, syrapi, trochiscorum, variaque alia forma, pulueribus, mixturis, ptisanis, admiscemus. Frequentior solet mellis in febribus dictis vsus esse, nisi vel sapor eius displiceat, vel illud, vt in quibusdam fit, flatibus siue colico dolore molestum sit. Dulcia autem tanto magis febribus ob acorem, quem secum vehunt, accommodata sunt, quo ipso temperant.

Eadem vi dulcia pituitam, in *tussi* et *asthmate* vias aëreas grauantem, attenuant et ad secreta disponunt.

Oleosas partes soluendo haud parum ad obesitatem minuendam saccharum prodest *q*). Hac vi nominatim maciem ciere, sibi persuasit summus BOERHAAVIUS *r*).

§. 19.

Sed et concrementa duriora a dulcibus subigi sese patiuntur. Ad causas diminuendas et removendas, ex quibus *calculus* et *podagra* proueniunt, saccharum nominatim LOBBIVS *s*) commendauit. Calcu-

q) LOBB *de dissolv. calc.* p. 273.

r) *Chem. T. 2. Proc.* 38.

s) *Loc. cit.*

Calculus aquae mellitae immiffus bullas ei aculatur, mollefcit et ponderis iacturam patitur *t*), vt iam inde concludi poffit, non fpernendam effe in calculo foluendo medicinam. Aft et haud ita pridem innotuit ill. PRINGLE *u*) felix in ipsis hominibus, calculo vel fabulo afflictis, cum melle experientia, cuius quidem libram vnam cum quadrante quauis hebdomade fumi fub longa continuatione iuffit. An acefcente fua natura, an fermentefcibili, quae aërem fixum euoluit, faccharum vel mel calculum fubigit? Pofterius fuadet fuccelfus experimentorum PRIESTLEYI, PERCIVALII, HVLMI, aliorum, cum aqua aëre fixo impraegnata, eidem malo oppofita.

§. 20.

In dictis pectoris morbis (§. 18.) non tamen negandum, *relaxando* fimul dulcia prodeffe, quae vis tanta eft, vt fub exceffu valetudini iniuria inferatur. Hinc eorum abufus iam dudum inter caufas phthifeos collocatus. Hinc et male profpiciunt aegris, qui tuffi conuulfua vel alia pertinaci dulcibus praecipue indulgent, quae protractiori vfu eadem debilitandi noxa, qua oleofa, mucilaginofa, infefla funt.

§. 21.

Abftergendi facchari potentia in *ulceribus internis* fe fe declarat eximia, nominatim in pulmonum ulceribus

M 3

ceribus

t) LOBB *l. c.* p. 41. fq.

u) PERCIVAL'S *philof. med. et experim. Effays.* p. 232.

ceribus. Placuit in primis connubium eiusdem cum Rosis in conferua, iam antiquitus ab AVICENA et MESVE vsurpatum, et serius commendatione FORESTI, RIVERII, CRÜGERI nobilitatum, et nouissime BVCHANI x), cui accedit propria mea *) experientia. Vel sola capitur ad aliquot vncias quotidie, vel et vtiliter decoctis siue infusis pectoralibus loco sacchari albi additur, vel vna cum ptisana hordeacea ingeritur. Lacti quoque admiscetur eximio successu, si aluum laxat. Si rationibus insistimus, vix potest remedium aliud vllum phthisi vlcerosae esse accommodatius hoc ipso, quippe quod non solum egregie abstergit, sed, vt mox amplius tradetur, ad vulnorum consolidationem facit. Febrem praeterea temperat, nisum humorum ad putredinem ex absorpto pure refraenat, si labes vero pulmones speciatim occupat, scretum leuando iuuat. Ne vero nimium relaxet, praecauet Rosarum additamentum, quod insuper debilitati pulmonum subuenit. Gloriamur argumentis tam egregie experientiam respondere. CRÜGERVS supra nominatus ipse se, ex mesenterii apostemate hecticum, conferuae huius ope in viuis seruauit y).

§. 22.

x) *Domestic Medicine*, p. 198.

*) Vid. *Appar. medic.* Vol. 3. p. 167.

y) V. *Act. nat. curios.* Dec. 2. Ann. 4. Obs. 9.

§. 22.

Verbo vnice nouissime libandum dedi, faccharum esse *antisepticum*: sed praestantissimae huic et reliquorum dulcium virtuti fas est diutius immorari.

Fauent huic bene multa experimenta extra corpus humanum capta 2). Memorât iam JO. JOACH. BECHERVS horum aliquot, nempe integras refrendes (vt eius voce vtar) faccharo sub coctione eius intinctas et quasi in momento extractas, ita penetrari faccharo, vt nunquam amplius putrescerent, et carnem ceruinam faccharo ita condiri, vt summa aestate putredini resistat. — Ita caro vitulina et alia vice cor veruecinum, puluere facchari conspersum, cum insigni ponderis decremento immune a putredine mansit et exsiccatum a). — Eadem immunitas contigit vitello oui, solutioni facchari immisso, in qua miscela fermentationis plura signa sese manifestarunt b). Sanguis recens, in eandem solutionem translatus, ne exacto quidem septimo die notas putredinis exhibuit c). — Quod vero ill. PRINGLE d) obseruat, exiguam quantitatem facchari carni bubulae admixtam non sufficere arcendae

M 4

cendae

2) *Phys. subterr. Lib. 1. Sect. 4. cap. 1. p. 143.*

a) ANON. in *Racolta d' Opuscoli scient. T. 6. p. 471. sqq.*

b) MESNY in cl. TARGIONI *Racolta di Opuscoli medico-pratici, Vol. 3. p. 32.*

c) *Loc. cit. p. 36.*

d) *Diseases of the army, App. p. XL.*

cendae putredini, fermentatione autem orta illam iterum vinci, confirmat auctor anonymus libri gallici eximii de putredine *e*). Ratio hisce redditur, cur Babylonii, teste HERODOTO, cadauera sua humana melle sepeliuerint.

Indos, quibus copia sacchari suppetit, nunquam scorbuto laborare, scite iam notauit BECHERVS *f*). Similem causam agnoscit PRINGLE, quod lepra e. g. ista Arabum, scorbutus putridus, dysenteria, febres putridae hodie rarius incidant, quam olim, vbi cibus carneis, praecipue salitis, vescebantur. Hinc et suadet sagacissimus MACBRIDE *g*), vt pro itineribus maritimis ad scorbutum arcendum nautis quotidie tantillum sacchari exhibeatur. Qui perpendit, quantum valeant vegetabilia recentia, decoctum malti, brassica sponte acescens, ad arcendum et superandum scorbutum, et qui recentissimas curationes eximias in morbis putridis ope aëris fixi factas, et a cll. WARREN, DOBSON, HEY, PERCIVAL, ROTHERAM, PRIESTLEY, aliis, memoriae proditas apud animum reputat, subtilissimo isti liquido acidulo, quod sub fermentatione sacchari euoluitur, vim eius antiputredinosam magna ex parte adscribet.

§. 23.

e) *Essay pour servir à l'histoire de la Putrefaction*, p. 98.

f) *L. c. App. item p. 334.*

g) *Experimental Essays*, p. 181.

§. 23.

Vulgo creditur, ex vsu facchari diathesin generandis et fouendis *vermibus* aptam apud infantes fieri, vnde a parentibus admoneri solent, vt ab eo abstineant. Sed alia docet experientia. Iterum duplicem istum tutissimum omnis veritatis in scientia medica fontem cito, experientiam extra corpus humanum factam, dein alteram in homine ipso. Prioris census sunt experimenta *h*) cum Lumbricis capta, qui ipsi saccharo in puluerem redacto conpersi paucis momentis periere, aquae autem saccharatae immersi intra vnā vel duas horas viuere desierunt; item in melle Hispanico aqua diluto intra tertiam horae partem interierunt: quum contra ea in decocto Absynthii 20, 24 ad 30 horas, in solutione autem Aloës 24 horas vitam protraherent. Egregie respondet huic experimento obseruatio *i*) de puero, qui confectione saccharata abundanter ingesta copiam vermium per aluum deiecit. Saccharum rosatum eandem efficacitatem in multis, qui Lumbricis laborarunt, praestitit *k*). Commoda igitur maxime est miscela mellis vel sacchari cum reliquis vermium hostili cohorti vel necandae vel expellendae dicatis remediis, tanto magis apud infantes probanda, quum dulcia in deliciis habeant.

M 5

§. 24.

h) REDI in *Obss. circa animalia viuētia in animal. viv.* p. 156. 159. 165. 166.

i) ANDRY *generation des vers*, p. 164.

k) ZAPATA in *secret. med. chir. a SPLEISSIO edit.* p. 155. Non crederem, miscelam ex argento viuo, saccharo rosato etc. quam paullo post auctor tantopere contra vermes commendat, in vniuersum fuisse intellectam.

§. 24.

Trutinandae iam sunt vires, quas in *vitiis* variis *externis* saccharo debemus et quae respiciunt vel ad eius abstergendi, et consolidandi, vel ad discutiendi, item leuiter stimulandi, potentiam.

In *fissuris papillarum mammarum*, molesto isto lactantium vitio, res vulgaris est, saccharum candi inspergere. Eidem fini inseruit, saccharum ad flammam candelae fusum, et in cella ad deliquium redactum, applicare *l*). — In *aphthis* dulcia quaevis penicillo affricta, vel linctus siue collutionis instar adhibita, eximie conducunt, ad easdem separandas, mundandas, consolidandas. — Vtile abstergens est, in *aurium foetido profluvio* mucoso subpurulento aquam saccharatam syringa iniicere. Fistulosis quoque vlceribus saccharum thomaeum (rubeum vocat SPIGELIVS) subuenit *m*). — Hic iterum virium cognatio egregia inter saccharum et mel animaduertitur; quod proxime dictum digerendi et abstergendi *ulcera* scopo multis modis in cataplasmate, vnguentis, et contra aphthas et fistulas praecipue in melle Rosarum, applicatur.

§. 25.

Haud spernenda sacchari candi laus in delendis cicatriculis vel *maculis corneae*; quo fine per calamum scriptorium parvis portiunculis oculo inflatur. Eo maculam in sinistro oculo post variolas super-

l) LANGE *miscell. verit. med.* p. 24.

m) CVMANVS IN WELSCH. *Obss. med.* p. 185.

superstitem sublatam testatur vir fide dignus, FR. HOFFMANNVS *n*). Non arbitror, commode saccharum referri inter ea remedia posse, quae mechanica vnice vi, hoc est per aspredinem partium, prout CrySTALLI montanae siue ossis Sepiae puluis, maculam absumerent, quae vis irritando sana oculi vicina saepe nocet, et plerumque, obstaculum lucis non tollit, quum opacitati corneae subiectae discutiendae non par sit. Stimulus a duris et asperis sacchari candi particulis non nimius esse potest, quum a confluyente lymphâ oculorum paullo post illud deliquescat. Aliquem tamen assumo eumque salutarem, cui soluens sacchari efficacia ad opacitatem corneae dissipandam egregie obsecundat. Eatenus non improbo eorum morem, qui puluerem quendam terreum cum saccharo in hunc finem commiscent. — Discutiendi hacce efficacia coryzae infantum sacchari puluis naribus inflatus medetur. — Aufert et aliquando carnem vlcerum fungosam illi inspersus.

Saccharum rarius *sollicitandi alium* scopo clysmatibus, quam mel, additur, quod si vero sit, thomaeam ad vnam vel alteram vnciam eligitur. Non carere stimulo in hunc finem, globuli saccharini pro suppositorio demonstrant.

Carbonibus autem candentibus *inspersum* saccharum aërem depurat, et in coryza discutienda vaporibus receptum subinde sufficit.

§. 26.

n) *Diff. sacchari historia*, p. 39.

§. 26.

Amplae igitur dignitatis saccharum esse in morbis tam praecauendis quam curandis, quis negabit! Ast et ideo medico haud parum adiumenti affert, quod multa medicamina, quorum sapor displicet, *gratiora* reddat, alia *subigat*, ut miscelam cum humoribus nostris tanto certius ineant, nec in intestinis alicubi stagnando incommoda pariant, aliis, quae valde exigua dosi magnam vim exferunt, commodum *excipiens* praebeant; quae diuersa commoda adhuc superest, ut exemplis demonstrem.

Iucunde curare, si id quidem fieri possit, ad medici officia omnino refero: sed caueat, ne palato dulcibus seruiendo medicinam sua efficacia defraudet, vel fibrarum iustum robur relaxante eorum vi pessundet, id quod sacchari vel syruporum iusto liberiori additamento facile fit. Caueat, ne iure ignominiam contrahat, Galenicis medicis a Chemicis olim illatam, qui posteriores priori loco dictos Syrupiastros vocarunt.

Jalappae pulvis tritura sollerti cum saccharo opus habet, ut resinosae partes iuste subigantur, quod nisi fiat, molesta saepe tormina subsequuntur. Item Camphora, quae sola in puluerem redigi nequit, tritura adiuuante saccharo obsequitur. Vtlius mellis vis soluendi corpora quaedam, non facile alias subigenda, experimentis explorata est. Constitit tamen hoc, in soluendis resinosis, haud
parum

parum mucilaginosi cedere o). Mercurii vero viui connubium cum melle crudo successit, licet paullo aegrius, dum et fyrupi sacchari et mellis despumati vnionem inire detrectaret p).

Indigemus quoque saepe in medicamentis heroicis additamento quodam, ea vnice de causa, vt in exiguum valde dosin redigi possint, pro qua definienda nec vulgaria pondera nec vulgaris partitionis modus sufficit. In siccis ideo vel absorbens quoddam vel saccharum eligimus. Ita ad $\frac{1}{8}$ vel $\frac{1}{16}$ vel minorem quantitatem granum vnicum opii, tartari emetici rel. partiri valemus, sic vt vna dosi alteri omnino pondere aequalis sit. Quodsi vero et paullo maior quantitas, grani integri, duorum, trium, rel. pro dosi subministranda: ea tamen de causa eiusmodi additamento opus est, vt ne ob exiguum pondus iactura fiat medicamento, cuius efficaciam desideramus: exemplo florum Zinci, Vitrioli martis, Ipecacuanhae parua dosi exhibendae.

§. 27.

Quod reliquum est, nemo spero, a me expectabit, vt numerosissimam *praeparatorum* ex saccharo cohortem et *composita* quaeuis, quae saccharum vel gratiae vel virtutis vel conseruationis causa

o) V. cel. BVCHHOLZ experimenta in *Nov. Act. nat. cur.* T. 5. p. 46. sqq. narrata.

p) PLENCK's *Art das Quecksilber in d. Lustsenche zu geben*, p. 31. sq.


causa ingrediatur, Conseruas scilicet, Rotulas, Trochiscos, Bacillos, Confectiones, Condita, Morfulos, Species, Rob, Syrupos, &c. designem, quippe quum hac in re Dispensatoria pharmaceutica cuiusuis desiderio facile respondeant. Vtilius longe negotium obirem, si quaedam horum specialius necessariis *stricturis* persequerem. Sed hasce addere tam angustia temporis, qua praestringor, vetat, quam nimia prolixitas, in quam inciderem, si huic rei pro dignitate satisfacere conarer.

XV.

SPINAE BIFIDAE

EX MALA OSSIVM CONFORMATIONE

INITIA.



SPINAE BIFIDAE

EX MALA OSSIVM CONFORMATIONE

INITIA. *)

§. 1.

Spina bifida licet, computo ad aliorum morborum numerum exacto, rarum omnino numinis benignitate malum sit: haud exigua tamen historiarum singularium hinc inde dispersarum copia exstat, quae vel curatius vel oscitantius eiusdem naturam persequuntur. Dubio quoque vacat, crebrius longe illam obuiam venisse et multo praecocius, quam scite et pro dignitate consideratam ab hisce, quibus ad id occasio patuit, quum vel viuo adhuc infante pro alius generis tumore illam habuerint, vel subita mors indaginis vltioris desiderium vna cum vita infantis sufflaminauerit. Multa tamen dissuadent, ad hoc vitium locum speciosum HIPPOCRATIS *a)*, vti quidam volunt, transferre, modo sua serie legatur, in quo haec verba: „Alius morbus oritur ex defluxione capitis per „venas in spinalem medullam. Inde autem in „sacrum

*) Progr. conscriptum a. 1779.

a) De glandulis in Opp. omn. Vol. 1. p. 420. Ed. LIND.
Opusc. Vol. II. **N**

„sacrum os impetum facit, quo medulla ipsa fluxio-
 „nem perducit, et in coxendicum acetabula siue
 „iuncturas deponit.” Qui vero TVLPPIO honorem
 primae huius vitii obseruationis et descriptionis tri-
 buunt, meminerint, iustius ad FORESTVM *b)* per-
 tinere, qui illud quidem, circa nucham occurrens,
 paullo obscurius descripsit, vt ambiguum, vtrum
 cum cranio potius an cum ceruice communionem
 haberet, et post eum ad summum sui temporis
 botanicum CASPARVM BAVHINVM *c)*, qui illud supra
 vertebrae lumborum vidit. TVLPPIO *d)* nihilominus
 tamen pluries illud obuinit, vt vel inde vitae pe-
 riculum ex eiusdem incisione cognosceret, et pri-
 mus, cultro anatomico ad interiorum ossium labem
 perquirendam vsus, icone illud adumbravit, a quo
 et illud spinae bifidae nomen obtinuit, quod in
 hydrorachitidem nuperius SAUVAGESIVS *e)* mutauit.
 Rarissimo exemplo simile quoddam malum in adultis
 emeruisse visum est, vt in virgine hectica viginti
 annorum inter scapulas, et in foemina quinquaginta
 annorum in fine ossis sacri ex pondere maiori
 nixu eleuato *f)*. Quoniam vero vertebrae ipsas
 scrutari neglectum, quod quidem absque cultri
 adiumento vix fieri potest, dubium haud exiguum
 superest,

b) *Observ. chir. L. 3. Obs. 7.*

c) Vid. casus in SCHENCKII *Observ. medic. L. 5. p. 662.*

d) *Obs. med. L. 3. c. 29. 30. c. Tab. p. 231.*

e) *Nosol. T. 2. p. 497. Ed. 4.*

f) HÖCHSTETTERI *Diff. de spina bifida in coll. HALL. Diff. pract. T. 7. P. 1. p. 491.*

superest, an verus hisce, quibus sacculus adhaesit hydropicus, spinæ hiatus contigerit. Rectius ad infantilis ætatis morbos restringitur, et eos quidem, quorum prima initia intra matris vterum concepta fuerunt, quamvis partu absoluto, modo superstes vita sit, incrementa plerumque noua patiatur miseriarumque multiplex augmentum.

§. 2.

Scilicet cognoscitur malum tumore spinæ vertebrarum alicubi adhaerescente, molli, renitente, initio profundius rubro vel liuido, dein cuti concolore, sæpe pellucido, subrotundo, ex paruis principiis ad magnitudinem iuglandis, oui, vel pugni, vel insigniorem increscente, basi subinde angusta, vt pedunculum referat, plerumque autem lata. Pingitur tumor aliquando venis turgidis in superficie, quæ ipsa in aliis excoriata cernitur vel exulcerata, imo aliquando gangraena correpta. Nulla quidem totius columnæ vertebralis pars est, in qua non postice prouenerit. Valde raro tamen collum occupat et supremum dorsum, frequentius dorsum inferiorem plagam, vtplurimum lumborum vertebrae et sacrum os, omnium autem rarissime in infimo sacro emergit. Ob hoc sedis mali discrimen non incongruum est, spinam bifidam in ceruicalem, dorsalem, lumbarem et sacralem distinguere. Quoniam vero subinde non vnum modo sed plura vertebrarum genera simul vitiata sunt, interdum opus est aliqua horum nominum connectere, e. c. nomen dorsali lumbaris, lumbari

facralis, rel. Non minor subest in interioribus tumoris diuersitas. Incisis enim integumentis communibus et ligamento vaginali, quod specum vertebralem intus obuestit, erumpit vel maiori vel minori quantitate aqua limpida, vel stagnatione viscosa, ichorosa, rarius simul purulenta vel sanguinea. Dura mater distenta pariter prominet, sed a tubo mox dicto soluta; item pia meninx seiuncta a medulla spinali. Fatendum tamen plerosque auctores non satis distincte quantitatem aquae memorasse inter singulas hasce membranas collectae, eandemque multiplici modo variare posse. Medulla subiecta vel sana est, aliquando angustata cum tenacitate g), plerumque tamen praeter naturam flaccida, imo et hydatidibus obsita, vel in liquamen versa, vt defecisse visa fuerit, nisi infra limitem medullae huius consuetum, siue vertebra primam vel secundam lumborum, aqua collecta exstiterit. Verum defectum medullae spinalis superius subfuisse, dubito, nisi in monstris, quibus ipsum cranium cerebro orbem fuit h). In quibusdam vel ipsa medulla vel nerui inde propullulantes sua sede dimoti et distorti intra tumorem offenduntur.

Et haec pauca quidem de mollium partium alienata natura praemittere opus fuit, vt, totius morbi

g) Ill. AB ACREL in *Vet. Ac. Handl.* 1748. p. 290.

h) Vt in observationibus cll. LITRE in *Mem. de l'ac. d. sc. de Paris* 1701. p. 42. et MORGAGNI de *sed. et caus. morb.* Lib. 3. *Epist.* 48, art. 50.

morbi obtutu, iudicium, quod de spinae bifidae ortu feram, tanto aequiori lance librari queat.

§. 3.

Praeprimis autem in hac commentatione labi isti immorandum est, quam ipsae vertebrae subeunt. Haecce hiatu consistit, eo loco obuiio, vbi in aetate prouectioribus apophyses spinosae obtinent. Hic hiatus cum iactura vel maiori vel minori vicinae substantiae osseae plerumque iungitur. Fuit puella tumore lumbari pugni magnitudinis foedata, qui ipse tandem in gangraenam transiit, in quo tamen nonnisi apertura tam exigua vertebrae apparuit, vt vix ciceris granum admitteret *i*). Recentiori casu similiter vertebra tantum vnica eaque lumbaris infima hiauit *k*). Sed raro tam angusto limite ossis vitium terminatur. Legitur exemplum trium vertebrarum lumbarium, postice dehiscentium *l*); aliud duarum dorsalium et totidem lumbarium *m*). In alio tres vltimae lumbarae et omnes ossis sacri hiarunt *n*). Imo bifurcata exstitit spina in omnibus vertebrais dorso, vsque ad sextam vertebra collis *o*); alio casu per colli vertebra tres et totum dorso et

N 3 lumbo-

i) RVYSCH *Obs.* 36. in *Opp. omn.* T. 1. p. 35. *sqq.*

k) PORTAL in *Mem. de l'acad. des scienc. de Paris* 1770. p. 239.

l) RVYSCH *l. c.* *Obs.* 34. *Fig.* 37.

m) HEVERMANN in *verm. Bemerk. und Untersuch.* T. 1. p. 307. RICHARD in *Journ. de Medec.* 1768. p. 141.

n) TREW in *Comm. Noric.* 1741. p. 156.

o) KERKRING *Spicil. anat.* p. 57.

lumborum tractum *p*); alio a sexta vertebra dorsi vsque ad os coccygis *q*); iterum alio ab vltima vertebra dorsi ad ossa innominata *r*); vel ab hoc initio vsque ad coccygem *s*). In sceleto, quod coram habeo, infra amplius describendo, hiatus iste inde a tertia vertebra lumbari per totum os sacrum animaduertitur.

Amplitudo vero huius hiatus varia: subinde latitudine corporum vertebrarum angustior est, aliquando eam superat, et tota specus hoc loco amplior apparet. Superfunt nonnunquam cristae quaedam rotundatae ramorum istorum ossorum, qui ad apophyses spinosas formandas conferunt et tangi commode etiam viuo adhuc infante subinde possunt, non ita vero vtrinque conuergunt, ac si defectus vnice cartilaginis intermediae subesset, sed vel situ obliquo vel perpendiculari prostant, in aliis et hae ipsae deficiunt. Quin existit, in quo tres proëssus spinosi cum affinibus obliquis et transversalibus vertebrarum trium inferiorum lumbarium omnino defuerunt, superstitie solo corpore vertebrarum *t*). Memorabilis quoque casus infantis est, in quo fissura ipsius corporis vertebrae tertiae lumbaris conspecta, per quam vas quoddam lymphaticum

p) BIDLOO *Opp. anat. chir. Dec. 2. p. 193. Tab. 4.*

q) GILD in *Diff. de spina bifida* in HALL. *coll. pract. T. 7. P. 1. p. 517.*

r) TVLP. *Observ. p. 232.*

s) *Eph. N. cur. Dec. 2. Ann. 2. p. 364.*

t) HOCHSTETTER *l. c. p. 488.*

ticum transiit, liquidum tumori subministrans *u*). Ita et hiatus per ipsa corpora vertebrarum supponit exemplum, in quo pollex in ipsum cauum abdominis intrudi potuit, per quam fissuram vena haemorrhoidalis interna in tumorem transiit *x*). Tumoris vero ea etiam si semper fere ratio sit, ut foras promineat: sunt tamen, in quibus vitiose distarunt vertebrae, ut digitus adeo immitti per interstitium posset, et tumor cum abdominis cauo communionem haberet *y*).

§. 4.

Ex tanta tam mollium quam durarum partium degeneratione non possunt non effectus multi molesti imo deleterii enasci, qui pro sede ipsa mali et destructione partium variant. In uniuersum infantes situm supinum ferre ob pressionem dolorosam non possunt, sed eiulatu, agitationibus imo conuulsionibus, eum permutare nutricem cogunt. Plerumque pedibus insistere nequeunt eo aetatis stadio, quo id alias permittitur, quod caue ne ubi vis paralyti ex compressione medullae spinalis vel neruorum exinde ad artus inferiores tendentium per aquam tribuas, quum ex dictis manifestum sit, defectus saepe in vertebrae notabiles incidere, quas ipsas fulcrum corpori necessarium subministrare inter omnes constat. Accedit, deformitatem in pedum

N 4

ossibus

u) SALZMANNI *Diff. de tumoribus quibusdam serosis externis*, p. 10.

x) *Loc. cit.* p. 11.

y) *L. c.* p. 26.

offibus aliquando subesse, et vitiose istos introrsum verti. Vera crurum resolutio vel atrophia combinari solet. Sunt qui pedum quidem officio satis libere vtuntur, sed neque lotium, neque deiectiones aluinas continere possunt. Finitur vero vita vi in dies magis redundantis et medullam spinalem comprimentis et resoluentis aquae, vel suppuratione exorta, quae subinde vertebrae ipsas arrodit, vel gangraena. Alias mortis causas in affectibus quibusdam simul grauantibus quaeras, saepe fatis manifestis, vt hydrocephalo, saepe autem visui sese subtrahentibus, quamdiu abdita corporis loca peruestigare vel non datur, vel a medico anatomiae ignaro non concupiscitur.

§. 5.

Rara igitur exempla superstitis sub hoc malo ultra hebdomades vel menses aliquot vitae. Tanto memoratu digniores sunt casus ab ill. Equite AB ACREL 2) recensiti bini, quorum vnus ad puerum octauo anno mortuum, alter ad puellam anno decimo septimo adhuc viuum et libero artuum inferiorum exercitio gaudentem, spectat. Non minus notabilis narratio de puella quatuordecim annis maiori est, quae, licet hydrocephalo laboraret, mentis tamen sanae fuit, menstruum fluxum duodecimo aetatis anno experta, sed sexto anno pedum vsu cum eorundem tabe priuata, praegressis foedis inferiorum artuum vlceribus, tandem periit a).

Alius

2) *K. Vet. Acad. Handl.* 1748. p. 291. 292.

a) TREW in *nov. act. nat. cur.* T. 2. p. 394. fq.

Alius infans post quintum adhuc annum malo superuixit *b*).

§. 6.

Quum vero iam ad indaginem causae, quae primam huic miserando malo originem dedit, devoluor, expendendum primum breuiter pondus variarum sententiarum, quas de hac re fouerunt.

Sunt, qui peruersae matris imaginationi spinam bifidam tribuunt, dum ista visu obiecti horridi perterrita fuerit, vel ira vehementiori succensuerit, vel, ut casum singularem afferam, ceruolionis arte ad spinam diuulso obstupuerit. Hancce vero causam si refutare vellem, in vniuersum leuitas argumentorum de vi imaginationis matris in foetum demonstranda esset. Sufficit repetere, tantum non semper nonnisi post labem infantis iamiam obseruatam inter multas de ea coniecturas matrem substituisse ad causam suo iudicio probabilem, multasque perperam de forma foetus metuisse, utpote, quum in lucem ille ederetur, integerrima. Dabo commotiones animi fortiores vim inferre valetudini grauidae et foetum simul labefactare, quid vero potestatis commotio ista in monstrosa fabrica condenda habeat, non video. Haec vero praecise labes tanto minus imaginatione matris in foetum transferri potest, quum eiusdem ideam formare sibi ob abditam naturam et raritatem mater non possit.

N 5

Alii

b) TITSING in SWIET. *Comment. T. 4. p. 127.*

Alii accusant iniuriam quandam externam, cui mater vtero gerens obnoxia fuit, ex lapsu in dorsum, cui plurimae matres inhiant, quin tum, quando ne vlla quidem cutis laesio apparuit, percussione lumborum manu ipsius matris repulsam quandam aegre ferentis peracta, vel ictu improuiso abdomini applicato, allisione eiusdem ad corpus quoddam durum, item nixu intenso sub ponderis eleuatione, rel. Quicquid harum aliarumque iniuriarum sit, naturae prouidentiam non satis mirari possumus, quae tenello foetus corpori eiusmodi munimenta praefixit, quae nisi vehementior accedat vis, vel abortum ciens vel ipsam infantis mortem intra vterum concitans, leuiiores impetus eludant et obtundant. Etenim, praeter musculosa membranacea et adiposa strata, suapte natura mollia et continuo mucilaginoso et pingui halitu oblita, quae vterum antrorsum et ad latera ambiunt, ipse vterus nouum tutamen praebet, tum et amnii liquidum foetui circumfusus, tanto vberius, quo exilior foetus sit, et consequenter obtundendis iniuriis tanto aptius. Postice et ipsa ossea vertebralis columna et crassior caro tanto firmiter incidenti violentiae obstaculum praetendunt. Fac vero haecce omnia claustra non frangendae iniuriae illatae sufficere et ita spinam foetus esse collocatam, vt in hanc praecipue sese exferat; ratio non satis idonea concipi mente potest, cur spinae cartilagine media iunctae violenter potius diuellantur, quam apophysium transversalium a corporibus vertebrarum dimotio fiat, quibus cartilago pariter in foetu interferi-

terferitur. An muscoli et tendines lateralibus hisce partibus affixi plus obstaculi ponunt? Nec vnquam labes, quae violenter solidis inducitur, speciem tanti ordinis prae se fert.

Regeri eadem iis possunt, qui violentiam quandam infanti partu difficiliore illatam pro causa statuunt. Quae assertio, si quid fulcri habeat, primum demonstrari oportet, non ante enixum iam malum exstitisse. Augeri vi vrgentis lymphae sub partum difficilem, lubenter dabo.

Magis speciem veri argumentum habet, quod spina ista bifida a situ foetus minus opportuno in vtero proueniat. Decantatae heic de thoracum et vestimentorum grauidarum stricturis querelae redeunt, quibus praecipue spina vertebralis vltra solitum limitem incuruata per lentam musculorum spinosis et transuersalibus apophysibus affixorum contractionem diuellatur. Inter recentiores in hac causa defendenda HEVERMANNVS *e)* in primis multus est. Sed iterum non patet ratio, cur diuulsio ossium postice, nec ad latera prope corpora vertebrarum, contingat; nec iactura substantiae osseae, quae saepe manifesta est, vt supra significauimus, inde declarari potest.

§. 7.

Ast quoniam tota natura mali considerandi duplici momento continetur, accumulatione scilicet lymphae

c) L. c. p. 308.

lymphae in loco affecto et vitio ipsorum ossium: praecipue dispiciendum, vtrum illa hoc ipsum produxerit, an obuersa ratione hiatu ossium iam enato hic modo affluenti a tergo lymphae et expansioni membranarum, quae illam continent, locum concesserit. Fontem huius lymphae non vnum esse experientia docuit, nempe vel intra ipsum canalem vertebralem ista exsudat, vel ex capite hydrocephalo vitiato defluit, vel rarissimo exemplo per vas lymphaticum ipsum corpus vertebrae perforans illuc derivatur *d*).

Fauet hisce, qui plurimum virium aquae morbose collectae adscribunt, connubium istud hydrocephali cum spina bifida haud infrequens, sub quo pressio capitis aliquando tumorem ad spinam auxit, et aperto illo decreuit mole caput, quin collapsum est. Imo PLATNERVS *e*) “haec tenerior, inquit, cartilago, (scil. spinae vertebralis in foetu media) in pueris et vt videtur etiam in nondum maturis ac in vtero haerentibus partibus ab increcente humore ita premitur, vt illa teneriora ac cerea ossicula inter se diducantur, cutis vero ab humore, qui subest, attollatur.” Nec discrepare MORGAGNI *f*) ab ea sententia videtur, quae descensum aquae ex hydrocephalo primam mali causam assignat. Perpetuum vero non esse illum descensum, sed in quibusdam e contrario ascendisse lympham ad caput et

d) Vid. historia §. 3. p. 198. ad finem cit.

e) *Chirurg.* p. 471.

f) *De sed. et caus. morb. Lib. 1. Epist. 12. Art. 9.*

et in amplam molem illud commutasse legitur g). Sed etiam si, praesente utroque malo simul, de alterutrius origine lux aliqua peti omnino possit: non satis tuto asseritur ideo, quoniam duo mala simul incidunt, vnum esse causam alterius. Et noua omnino difficultas enascitur, si spinæ bifidæ absque dicto comitatu exorientis initiis insistendum est. De quo tamen casu pariter pronunciatum, lympham specum vertebrarum occupantem distentis fibræ circumpositis vel ex toto ruptis cauum dilatasse cum apophysium spinosarum solutione h). Similiter sensit b. HALLERVS "in hoc malo, inquiens, dura meninx ab humore distenta molles spinas lumborum et sacri ossis aut non finit coire, aut male glutinatas diuidit et obliterat" i). Si vero aqua morbose congesta tantum ossa diducendi nisum habeat, mirum eo præcise loco columnæ vertebralis tumorem hydropicum rarissimum esse, quo expansionis summa libertas, scilicet inferiori ossis sacri sede. Haec scilicet per naturam in foetu etiam absque cartilagine hiat et saccus duræ matris minus ibi firmamenti habet, utpote quum ligamentum istud robustum denticulatum dictum, quo pia meninx cum dura in canali vertebrali nequitur, ad duodecimam dorso vertebram iam desinat, nec pinguedo postice cauum claudens obstaculum redundanti aquæ struere possit. Non descendere duram membranam

g) *Loc. cit.*

h) Sunt propria verba cl. GILD in elegante *Diff. loc. cit.* p. 509. obuia.

i) *Elem. Physiol. T. 4. p. 87.*

branam vsque ad finem ossis sacri innuit quidem MORGAGNI *k*): contrarius vero est HALLERVS *l*). Et quodsi etiam eo non pertingeret, notum tamen est, in quam molem vsque expansioni membranae auscultent, prout et vere ibidem aliquando haud mediocres tumores enascuntur. Et quoniam liberae viae sunt inter cerebri caua et fistulam spinalem et in foetu cranii ossa futuris nondum iunguntur: longe minus resistentiae cranium accumulationi lymphae ponit, quam theca vertebralis, cui insuper foetus ad ima vergens capitis situs fauet. Vnde consequeretur, hydrocephalum indiuiduum spinae bifidae comitem esse debere, quod tamen connubium non raras exceptiones admitttere, obseruationibus constat.

§. 8.

Sub hisce angustiiis vero propius longe accedere mihi videor, si vitium in prima ossium, quae spinam bifidam fingunt, conformatione, pro causa tumoris accipiam, potiusque causam naturam suo in opere turbantem et impediētem, quam soluentem in vnita, reprehendam. Quam ideam me non temere et festinanter arripuisse, sed grauius argumentis ductum esse amplexum, ex sequentibus patebit. Nec crediderim, in vlla aliarum recensitarum a me sententiarum approbanda tam faciles futuros fuisse auctores autoptes, nisi plerique in scrutanda ipsa labe loci affecti acquieuisent, vel parum de

k) *De sed. et caus. morb. Epist. 12. art. 9.*

l) *Elem. Phys. T. 4. p. 88.*

de reliquis corporis aegri partibus solliciti, vel ab harum inuestigatione superstitione parentum prohibiti, et nisi de valetudine parentum, matris praecipue, negligentius longe sciscitati fuissent hosce, qui de ea respondere possent, quam de infantis extincti. Ad hancce disquisitionem primum compulsus sum conspecto sceleto infantis hiantē spina vitiati, quod subtilissimus, vt multis speciminibus egregiis comprobavit, anatomicus, WRISBERGIVS, collega honoratissimus, mecum, sub initium anni inter reliquos infantum morbos super spina bifida coram auditoribus commentante, illustrationis causa communicavit. Huius sceleti praecipua, quae hoc argumentum feriunt, capita primum describam, dein alia quaedam similia exempla subministrabo, nec non argumenta, quantum iudico ad sententiam, quam sustineo, confirmandam idonea.

§. 9.

Ore mihi exposuit cel. vir, infantem hunc, puellam, a matre natum fuisse, venerea lue adeo contaminata, vt et eo morbo exstingueretur, at tamen partu facili, et hunc misellum absque hydrocephalo somnolentum, stupidum, pedum usu omni destitutum vixisse post partum menses septendecim.

§. 10.

In sceleto sicco, in quod mihi inquirere vnice datum fuit (infans enim iam ante aliquot annos in lucem prodierat), id mox attentionem mouit, quod

quod longe exilius esset, quam pro ea aetate solet. Dein facile apparuit, naturam, in osteogeniae negotio turbatam, non parum a solita sua lege deflexisse. Etenim quaedam ossa, quae distincta esse et in adultis solent, vitioso concremento coaluerant, alia, consueto ordine solida, vel membranacea exstiterunt, vel aperturis praeter naturam perforata.

A capite initium vt faciam, moneo, hydrocephali nulla vestigia me deprehendere. Fons pulsatilis anterior non, vt solet, angulo acuto in futuram sagittalem ossium frontis antice terminatur, sed inaequali margine sensim ampliatus in median frontem vsque sine obliquo et ad latera varie exsecto descendit. Versus nasi radicem frontis ossa, ea aetate alias adhuc disiuncta, tam inter se perfecte coalita sunt, vt nonnisi linea eleuatio limitem faciat, quam cum ossibus nasi et processibus nasalibus maxillae superioris et ossibus vnguis. Simile concrementum vtrunque regione temporum os frontis cum angulo anteriori et inferiori ossis bregmatis et alis maioribus sphenoidei superficie aspera nectit. Ne a coalitu isto ossium capitis praeternaturali discedam, mox addo, simile tam antice quam postice inter os squamosum vtrunque et os bregmatis obtingere, item inter os petrosum et angulum lateralem ossis occipitis, et inter hunc et vicinam ossis bregmatis partem. Concrementum vero hocce eius naturae est, quasi materies quaedam ceracea vel gypsea solidescens statu fluido interstitiis

terstitiis fuisset infusa, nam eiusdem superficies aspera et inaequalis est, nec cum ista vicinorum ossium continua, mox profundior ista, mox ultra eam quasi exorbitans, coloris flavescentis, non, ut reliqua, albi, imo hinc inde loca quaedam exigua in hisce interstitiis membrana modo clausa conspiciuntur. Defectus vero eiusmodi ossei longe plures sunt in ipsis ossibus. Scilicet praeter fontis pulsatis supra descriptam propaginem os frontis tredecim locis eiusmodi membrana translucet. Facies saltem membranacea est; an vero cartilago potius vacuum repleuerit, non dixerim. Harum lacunarum sex antice et inferius in fronte super nasi ossibus prope suturae sagittalis limitem colliguntur ad pisi magnitudinem usque, una maior cum duabus capitulum acus magnis sinistrorsum supra orbitam haud procul a futura coronali, duae oblongae eo loco marginis orbitae, quo foramen orbitale superius alias occurrit, duaeque aliae maximae oblongae in superiori orbitae pariete pone arcus superciliares. In utroque osse bregmatis prope futuram sagittalem, quae nondum coaluerat, postice iterum duae lacunae pellucidae et in sinistro osse ad latus haud procul a futura lambdoidea iterum alia ossescentiae proxima. In squamosa parte ossium temporum pariter eiusmodi loca conspicua sunt, sinistro tamen latere magis quam dextro. Sinistro in uniuersum latere labes osteogeniae maior videtur quam altero; imo ubi infra angulum ossis occipitis sinistrum hoc ipsum os et petrosum sese contingunt, lamina ossea subtriangularis ad notabilem profunditatem vi quasi

intropressa cernitur, et paullo posterius irregulare foramen, cui interius membrana praetenditur. Sed et multa alia insuper in osse occipitis, quod quidem, vt in infantibus tenerioribus solet, quatuor partibus constat, aliena sunt. Nam supremus eius angulus non acutus, sed acuminatus est, futura lambdoidea insigniter hiat per totam longitudinem figura sigmoidea et margine obuersorum ossium pectiniformi, apophysis ossis occipitis basilaris cum osse sphoenoido conferruminata. Quicquid praeterea substantiae osseae inter foramen magnum occipitis et processus pterygoideos continetur, vndiquaque glutine osseo ita oblitum cernitur, vt et superficies aspera inde euaserit, et foueae pterygoideae omnino nullae adsint, nec alia foramina ibidem quam carotica et iugalia appareant. Adiicio modo de capite mentionem interstitiorum membranosorum in media futurae squamosae parte, quae reliquiae fontis pulsabilis huius loci in foetu sunt.

Progredior ad pectus, quod praeter naturam insigniter prominet, ita vt sterni situs haud multum a linea horizontali deflectat, nisi suspicio, sub ista cartilaginum flexilitate situm naturalem aliquantisper fuisse turbatum. Sternum, plurimam partem cartilagineum, insulas sex osseas format, quarum illa ad basin maxima, lenticularis, nonnihil compressa, cerasi nuce maior, diremta notabiliter a subsequente, oblonga; quam excipiunt duae aliae inter se contiguae, altera scil. diametri et figurae lentis

lentis ex eruo, altera paullum anterior oblonga et minor; tum denique paullo remotius conspicua sunt officula duo alia oblonga minora eadem vicinitate, fere inter cartilagine costae verae quartae vtriusque lateris. Reliquum omne sterni cartilagineum est. Officula omnia dicta conuexa insigniter supra planitiem cartilaginosa partis prominent, quod ipsum sine dubio nonnihil aliter in succoso sceletio quam sicco se habet, cuius cartilagine disperso liquido extenuentur necesse est. Nec absque metu hancce structuram sterni ad eandem causam, quae capitis ossa corrumpit, refero, quippe quum naturam in primordiis ossibus sterni mirifice ludere notum sit *m*).

Columna autem vertebralis flexura laterali manifeste deformis. Curvaturam praecipuam vertebrae colli passae sunt, quae arcum notabilem, ubi vertebrae dorsi iunguntur, constituunt; alter arcus in nexu harum cum lumborum vertebra paullo planior. Maximam vero attentionem meretur postica vertebrarum lumbarium et ossis sacri pars, utpote lato hiatu praeter naturam diremta. Vertebra prima lumbaris vtrinque per cartilagine prominentem, ut in superioribus reliquis, iuncta est; in secunda, ossa, quae ad spinam formandam faciunt, dimota sede sua, attamen cartilagine latiori connexa; in tertia cartilago haec sursum modo super-

O 2

est

est itidem iusto latior, et latior quam modo dicta, et arcu terminata deorsum deficit. In reliquis vertebrae lumbaribus et duabus supremis ossis sacri deest omnino cartilago, et ossa spinæ destinata ad duas tertias pollicis, media parte latissime, distant. Reliquae ossis sacri parti a dimidio tertiae vertebrae sacralis membrana densa praetenditur. Ossium vero lateralium, hiatum dictum formantium, breuitas maior obtinet, quam si in medio inter sese coiuisissent, ita ut non sufficiant tubo vertebrali formando, scilicet decremento eorum versus inferiora aucto, sic tamen, ut et obliqui processus et transuersi superfint. Prominent utrinque haec ossa cristarum instar, in vertebrae lumbaribus oblique et cartilagine vestita, in sacro autem perpendiculariter et nuda.

§. II.

En igitur plura vitatae osteogeniae in hoc sceleto vestigia, non in columna vertebrali modo, sed in capite quoque, insignia forsitan et in sterno; ut inde pronum fiat colligere, eandem causam, quae vertebrae vitauit, et capitis ossibus hostilem vim intulisse.

Similes aliae labes ossium diuersarum partium, in quibusdam cum haud exigua degeneratione mollium partium coniunctae, et aliis exemplis spinæ bifidae comites sese adiunxerunt. De hydrocephali cum eadem sodalitio, quod haud raro obuenit,
iam

iam mentio facta est. Aliis casibus vtrique malo *), vel et spinae bifidae foli **), vel hydrocephalo foli, sese associauit hernia cerebri, siue tumor ex cerebro vel lymphæ vel vtrisque per foramen præternaturale capitis protrusis, qui ipse licet, plerumque in occipite, rarius in vertice vel lateribus, proueniat, rarissime in fronte, eius tamen proximo loco dicti exemplum et quidem insignis molis haud ita pridem notabili historia constitit n). Subinde structura capitis valde monstrosa in eodem homine una cum spina bifida obuiani venit, cuius generis casus, etiam icone illustratus a KERKRINGIO o) memoratur, et alius a MORGAGNI p), in quo nihil aderat substantiae cerebri, deficiebant ossa sincipitis et frontis occipitisque fere integre, ossa temporum de suo loco dimota existebant, tres deerant colli vertebrae, reliquis inter sese constipatis et ad partem concretis, quod idem accidit in corporibus supremarum dorso vertebrarum, cum incuruatione spinae, cui adhaerebant dextro latere vndecim modo costae, alia ut taceam. Stupendam istam spinam bifidam, quam BIDLOO q) describit, quot in capite deuiantis in

O 3

ossium

*) Eph. N. cur. Dec. 2. Ann. 2. p. 363. sqq.

**) SALZMANNI Diff. de tumoribus quibusdam serosis externis, p. 11.

n) FAXE in K. Vet. Acad. Handl. 1778. p. 182.

o) Spicil. anat. Obs. 23.

p) De sed. et caus. morb. Epist. 48. Art. 50.

q) Loc. cit. et Tab. 3. 4.

offium formatione naturae vestigia comitabantur, vitiosae offium complicationes, dehiscentiae, impressiones, deformitates, defectus! quot in trunco, distortionem columnae vertebralis, complicationem, coalitu, dislocatione, deformitate costarum et sterni! In alio homine, spina bifida detento, septima costa vera cum quatuor spuriiis coalita cernebatur *r*). Si a magnis et portentosis vitiis ad exigua transire operae pretium: notari meretur, aliena varia alicubi in fonte pulsatili observata, et una clunes contractiores, anumque prominentem *s*); et alio casu tarsi ossa ita a consueta figura deflexisse, ut pedes deformiter introuerterentur *t*). Plura eiusmodi una cum spina bifida tam in mollibus quam duris incidentia vitia in medium proferri possent, si opus censeretur.

§. 12.

Ad sententiam, quam tueri aggressus sum, suffulciendam et hoc facere arbitror, quod exstiterint foeminae, quae pluries infantes hoc affectu vertebrali deturpatos enixae sunt. Fuit vxor mercatoris, quae primo partu edidit filiam sanissimam, nulloque modo deformem, secundo peperit filium in dorso spina bifida correptum, biennio post iterum enixa

r) GILD *Diff. et loc. cit.* p. 517.

s) *Comm. Noric.* 1741. p. 155.

t) AB ACREL in *K. Vet. Ac. Handl.* l. c. p. 291.

enixa est puellam omnibus notis integram, quam autem absoluto biennio pusio dicto vitio deformis subsequutus est *u*). Minus fini destinato commoda forsitan videbitur cuidam haecce narratio, quum duo infantes integri omnino manserint, totidemque rursus hiatum huncce spinae experti fuerint, nec hi quidem duo sese immediate exceperint. Quidni vero accipias, in matre causam, quae semel ossa vitiauit, per tempus effoetam iacuisse, dein vero rediuiuum? Alia autem foemina bis puellam spatio quindecim mensium interiecto peperit, quarum vtraque hoc vitio laborauit *x*).

§. 13.

Si praeterea per gradus a vitio spinae vertebralis minimo ad maximum, quod tumorem descriptum comitatur, ascendimus: affinitatem cum monstrosis fabricis summam inueniemus, quarum origines a foetus tenerrimis primordiis deriuare maxime proclive est. Incipiendo ab exemplo *y*), quo nonnisi exiguum valde foramen postice in vertebra apparuit, deuehimur ad hiatum vnicae modo vertebrae; tum ad fissuram quatuor, plurium, in collo, dorso, lumbis vel osse sacro, vertebrarum; succedit

O 4.

dit

u) BVRG in *Eph. nat. cur. Dec. 2. Ann. 6. p. 141.*

x) SALZMANNI *Diff. cit. p. 9. sq.*

y) Conf. §. 3. quae obseruationes, quibus haec scala nititur, comprehendit.

dit hiatus per totum dorſi tractum et partem colli obſeruatus; et in hiſce aliquando iactura proceſſuum obliquorum et tranſuerſalium ſimul adfuit, vt nihil praeter corpora vertebrarum ſuperellet; vel fiſſura ipſorum horum corporum. Cur eiſmodi diſtancia vitioſa partium ſiue iactura oſſium notabilis minori iure monſtroſae compagis nomen mereatur, quam diſpendium oſſium quorundam caluariae nuperrime ex KERKRINGIO et MORGAGNI deſcriptum? Quidni ſi ſpina hiat in ſodalitio deformitatis capitis, vtriſque cauſam eandem aſſignabimus tempuſque idem ortuſ fui? Nouum ponduſ eo accedit, quod et in mollibuſ horum aegrorum partibuſ varia naturae conſuetu ordinuſ aduerſa ſint, et in iis nominatim ſubinde, quae cum ipſo ſpinae tumore commercium habent (§. 3.).

§. 14.

Omnibuſ igitur hucuſque diſtiſ inter ſe collatiſ, me iudice, diuulſionem proceſſuum ſpinoſorum eo tempore contingentem, quo cartilago media oſſeae eorum parti intercedit, a lymphā intra cauum vertebralem congeſta accuſare non licet: ſed e contrario manifeſtuſ fit, oſſium vitium praeciſſiſſe, nec, ſine hoc praegreſſo, accumulationi aquae locum ulluſ exſtiſſe. Quae vero ſi ſenſim, vel ante partuſ, vel poſtea increſcat, membranaſque, quibuſ includitur, in ampliorem molem expandat: nihil fit, quam quod in hydropica intumeſcentia conſuetuſ eſt.

At exstant duo argumenta, quae hisce videntur contraria. Alterum hoc est, quod in infimo sacro postice spina per se in foetu pateat; nam non totum os hiare, sed duas vel tres superiores eius vertebrae, instar vertebrarum verarum, cartilagine postice ad spinae locum in foetu claudi, ex anatomico constat 2). Significaui vero iam, rarissime in ima sede sacri tumorem hydropicum gigni, nec simplicem in spina bifida reprehendendum esse hiatus ossium, sed varios defectus in magnitudine et directione ossium lateralium simul obtinere; in quos velim observatores circa hanc sedem curatius in posterum inquirant. Si et hi desint, tanto inconcinnius nomen spinae bifidae usurpatur, quando nihil praeter naturam dehiscere dici potest. Altera obiectio est, quod aliquando post partum modo tumor iste hydropicus prouenerit. Meminit eiusmodi casus, aliquot modo dies post supra vertebrae lumbarem secundam exorti, JO. MAVR. HOFFMANNVS a), et alius, ad quartam et quintam vertebrae lumb. paullo serius emergentis, MAVCHARDVS b). Sed fac verum fuisse seriore istum proventum, quem narratione aliorum modo compererunt, quid vetat credere, malam istam ossium conformationem praecessisse quidem, sed post partum eam modo quantitatem lymphae fuisse congestam, quae cutem in notabile volumen expanderet.

O 5

Magis

2) ALBINI *Icon. off. foetus fig. 54.*a) *Misc. nat. cur. Dec. 2. ann. 5. p. 431.*b) *Eph. nat. cur. Cent. 9. p. 92.*

Magis aduersari videtur casus a LANCISIO *c*) descriptus pueri quadrimuli ex contusione capitis hydrocephalum passi, quem ipsum post mensem tumor ad coccýgem excepit. Si quis exemplo eiusmodi rarissimo naturam a vera spina bifida diuersam adiudicari cupiat, non repudiabo.

Atque sic ambiguitas tollitur, ill. A ROSENSTEIN *d*) subnata, vtrum aqua congesta sola tumorem huncce gignere queat, an vitium in ossium conformatione vna adfuerit, qua ipsa aqua tanto facilius ossium complemento obesse potuerit. SALZMANNVS *e*) plerumque subesse vitium fabricae in vtero contractum agnoscit. TREWIVS *) hoc quidem culpa reum facit, interim tanquam causas remotas imaginationem vel percussione grauem matris grauidae accusat. Nemo vero apertius morbum hunc conformationis effectum et particulare monstrosae fabricae exemplum, nisi prima conceptione certe paullo post exortum, declarauit, quam MAVCHARDVS *f*). Desuit tamen haecenus omnium argumentorum, quae huic sententiae robur suppeditant, iusta et exacta pro dignitate ponderatio.

§. 15.

c) MORGAGNI *l. c. Lib. 1. Ep. 12. art. 9.*

d) *Barnsjukd. p. 420.*

e) *Diff. cit. p. 25.*

*) *Comm. Nor. l. c. p. 163.*

f) *Eph. nat. cur. Cent. 9. 10. p. 95.*

§. 15.

Etiamfi vero concedas ex mala ossium conformatione primam suam originem duxisse tumorem istum spinae hydropicum et ad monstrosas fabricas vel naeuos esse referendum: multa tamen supersunt circa eius natalia obscura et ambigua, prout prima hominis primordia, et tanto magis monstrorum, spissis adhuc tenebris obuoluuntur. Causas monstrosarum fabricarum non vbiuis easdem esse aegre negari poterit, multaue repugnant, quicquid figura, magnitudine, numero, superficie vel colore in foetu alienum est, vbiuis a primae conceptionis initiis repetere. Quaedam vitia omnino in tenello embryone serius subnata videntur, vel aucta superstite eadem causa, quae primum foetui infesta fuit.

Vt in labe ista, de qua hic agitur, subsistam, vel penuriam localem vel coagmentationem labefactatam materiae glutinosae, ex qua ossa constantur, accuso, quae ipsa in culpa sunt, vt ne ossa iuste perficiantur. Subest omnino aliquando in matre vitium quoddam, in infantem transiens, et ossium formationem completam impediens. Ita obseruatum, eandem matrem aliquando plures foetus edidisse, labio leporino in maxillari osse superiori deturpatos g). Et supra quoque exempla attuli foeminarum bis foetus enixarum, spina bifida correptos.

Circum-

Circumspicienti mihi vero, quantam vim corruptela humorum, nominatim venerea, scorbutica, arthritica, rachitica, in emolliendis et deformandis ossibus infantum imo adultorum hominum habeat, iusta suspicio enascitur, horum fomitem tanto nocentiorē esse potentiam in primo osteogeniae negotio turbando. Lucem de venereo miasmate accendunt, quae supra de sceleto infantis a venerea matre prognati eiusque praeprimis multiplici capitis ossium degeneratione exposui. In hoc manifestum est, et serius formatis iam plerisque ossibus liquantem potentiam acris venerei perrexisse. Quod enim inter ossa cranii, futuris apud adultos iungi solita, effusum concretumque gelu osseum descripsi, ex margine vicinorum ossium multis locis pectiniformi liquato originem traxisse videtur, nisi existimes, vberius iusto ad haecce interstitia succum osseum ex sanguine redundasse. Si ex eodem fonte derives faciem istam scabram, quasi ex glutine ruditer illito, variis locis obuiam, per me licet: iactura vicinarum aliquot partium ossium prius potius suadet. Eadem de fenestratīs istis aperturis cranii ossium descriptis sentio.

§. 16.

Haec ipsa de curationis moliminibus in spina bifida aliqua addendi ansam praebent. Quicquid hucusque artis adhibitum, vix unquam tollendo malo suffecit, sed vitae modo prolongandae et miseris minuendis. Strictura per filum, tumoris extirpandi

stirpandi causa iniectum, fatum praecipitari nouimus; nec minus infaultus euentus incisionem lanceolae ope factam fere semper excepit. Mira igitur a MORGAGNI *h)* recensita historia de eiusmodi tumore supra coccygem lanceola feliciter aperto. Verum magis mira alia JO. MAVRITII HOFFMANNI *i)*, ob maiorem medullae spinalis vicinitatem, de felici tumoris similis lymphatici, ad vertebrae secundam lumbarem enati, per lanceolam decliuiori loco intrusam punctura, qua facta lympham sensim per immixtam turundam euacuata, et emplastrum siccans impositum. Noxia esse quacuis emollientia et pingua extus applicata, item fortio rem compressionem ob suppurationem, imo gangraenam, facile subsequaturam, insciorum chirurgorum temeritas crebro edocuit. Nihil igitur superest auxiliorum, quam quae aquam congestam deriuare in remotiora loca, eliminare vel dissipare, possunt, cuius generis diuretica et purgantia mitiora sunt, et extus apposita discutientia, cum molli spleniorum et fasciarum constrictione, quae tumorem suffulciunt et nimiae aquae accumulationi resistunt. Obturare fontem lymphae roborantibus vix datur. Ita per annos adeo protrahere aerumnosam vitam aliquando contigit (§. 5.). Sed hisce ossa in spina distantia non vniri, nec membranas expansas, quae, vt solet in membranis distentis, crassitudine quoque crescunt, contrahi, vtne de labe varia ipsius medullae dicam, quis

h) De sed. et caus. morb. l. c.

i) Misc. n. cur. Dec. 5. A. 5. p. 431.

quis non videt? Quod ad ossa attinet, tentari meretur, an, quando corruptela venerea matris culpa fuisse videtur, mercurialibus scite per lac infantis exhibitis incrementi ossium vertebrarum labi praeverti possit, eaque, quibus ossa remotiora saepe afficiuntur, vitia, quae miseriarum augmentum haud exiguum creant, vitamque ipsam impetunt, minui vel vinci omnino possint.

XVI.

DE

M E D E N D I

TINEAE CAPITIS

RATIONE PARALIPOMENA.

THE

NEW YORK

LIBRARY OF THE

NEW YORK PUBLIC LIBRARY

DE
MEDENDI
TINEAE CAPITIS
RATIONE PARALIPOMENA.

§. I.

Exanthema istud chronicum, quod infantum praecipue caput capillata parte sub varia forma haud raro occupat, non ob foeditatem vnice suam et cruciatus, quos excitat, sed et ob obstinam suam et medicamenta pleraque alias efficacissima eludentem indolem, boni cuiuslibet medici sollertia et auxilio indigentissimum est. Quem non misereat infantis, venustate, obsequio, innocentia animi, cuius dotes in dies laetius euoluuntur, amabilis, et quoad aspectum ceteroquin sani, qui ob tetrum rancidum putridum foetorem capitis, squalidum profluuium ichorosi subpurulenti cruenti liquidi, pruritum intolerabilem, quem acrimonia et animalculorum crebra pullities vel excitat vel auget, nec scalpendo leniendum, ob horridam corii capitis faciem, vlcusculis, foveis, materia grumosa lutea scatentibus, furfuribus, colliculis, decoloratione vel iactura capillorum, lendibus, foedati, et lorica

quasi

Opusc. Vol. II. P

quasi subinde incrustati, et sibi et aliis taedio est, indeque plerumque ab hominum mundorum et moratorum commercio semotus per plures saepe annos ambiguae famulitii curae et consortioni traditur; sub qua cultioni corporis pariter ac animi quam male prospiciatur, facile quilibet intelligit. Apparet itaque morbo huic non infantes modo hominum infimae fortis, sed et lautioris conditionis esse opportunos. Et hic ipse morbus ob contumaciam et curationis inconstantiam omni fere tempore in medendo plurimum difficultatis peperit, adeo ut GVIDO DE CAVLIACO et PARAEVS, paullo a religione alienius, chirurgis iniunxerint, ad quos curationem vitii huius praesertim pertinere crediderunt, abstinerent ab eadem in sese suscipienda, et adhuc hodie, locis bene multis mulierculis suas in eodem auerruncando vires experiri a medicis committatur, non alio consilio, quam quo medicus subinde in pertinaciori morbo, a cuius exitu existimationi suae timet, ad acidulas thermasue proficisci aegrum vel peregrinationi indulgere, vel in patriam redire, iubet. Sed eheu! effectus anilis huius exanthematum dictorum medicationis creberrime deplorati sunt, quippe quae plerumque vel externis repellentibus et siccantibus fortioribus, ut gallis, alumine, vitriolo, imo saturninis, vel cathaereticis, quorsum mercurialia corrosiua, cobaltum, arsenicum ipsum, plerumque constitit, unde vel vi in nobilia viscera teter fomes conuersus tussim ferinam, asthma, catarrhum suffocatiuum, tabem, epilepsiam, oculorum varia vitia, indurationem glandularum.

item

item acutos morbos contraxit, vel resorptione veneni applicati post dirissimos cruciatus et convulsiones ipsa mors consequuta est. Minus quidem vitae insidiosa est sueta mulierculis mitrarum pice oblitarum applicatio, quas post biduum vel triduum firmiter adglutinatas forti manu auellunt, vnaque ipsorum capillorum bulbillos extirpant. Sed quis non horreat carnificinam istam, et non miretur, nostra aetate, qua principes dolorosum quodlibet verum in delicti suspectis eruendi auxilium abrogare coeperunt, non lege eiusmodi atrox tentamen coerceri! Quod ipsum medendi genus tanto atrocius, quum vix ac ne vix quidem fini destinato obtinendo par existat.

§. 2.

Sed fateor, etiamsi obstinatum valde et immorigerum malum capitis hocce vitium per se sit, in medicos ipsos non parum culpa cadere, quod successus curationis haecenus tam imbecillis lentusque fuerit. Non parum scilicet reprehendo subtilitatem istam, cui in distinguendis variis eiusdem speciebus indulserunt, quarum cuilibet suum nomen assignantes, peculiare quoque medendi genus adiudicarunt. De causa pariter multa sententiarum diuortia enata, pro cuius diuersitate, quam sibi mente conceperunt, varia, medelam quoque in varias vias diduxerunt. Et quum tantum non omnes inquilinum quoddam humorum vitium accusarint, huic per interna vincendo operam praecipue impenderunt, quum contra ea ex externis

praecipue opem quaerere consultius longe fuisset. Denique et hoc reprehendo, quod multi, specie curationis delusi, id pro efficaci medela venditarint, quod ad tempus tantum malo tollendo suffecit, quod ipsum autem vires sensim colligens paullo post pristina violentia effloruit.

§. 3.

Vix aliud quoddam morbi genus noui, tot diuersis nominibus a medicis insignitum, ac exanthema illud, quod capitis corium sub variis formis foedat, quorum quaedam originis Graecae, aliae recentioris. Inter haec nomina vulgatissima sunt Fauis s. *κηρια* item *μελικηρις* apud Galenum, Achoris, Porrigo s. *πιτυριασις*, Furfures, Lactumen, Crusta lactea, Tinea, Lepra in capite, Ficus s. *συκοσις*, Serpigo, manantia capitis vlcera. Characteres horum omnium et limites constituere tanto difficilius, quum ne auctores quidem ipsi inter sese in significato conueniant, et alii synonyma agnoscant, dum alii diuersas species. Quod vitium de ipsis antiquis valet, de serioribus vero et recentioribus medicis multo adhuc magis. SENNERTVS a) e. c. follicite a crusta lactea, fauis et achoribus, tineam distinguit, per ista exanthemata intelligens vlcera humida, per hanc vlcera crustacea. Alii vocem tineae, qua STEPHANVS, interpretes HALY ABBATIS, primus vsus est, recepta dein a subsequente omni aevo, tanquam genericam adhibuerunt, variaque

a) *Oper. T. 4. p. 768.*

que sub ea complexi sunt mala, quorum nomina seorsum indicaui, tanquam species; quod compendium cognitionis horum vitiorum, ipsa antiquitate ponderosum, vtinam seruaissent serioris aetatis scholae. Ita apud HALY ABBATEM *b)* vno nomine quinque species comprehenduntur, furfuribus separatim indicatis, et cuilibet singularis et ingeniosa denominatio tribuitur, quae nomina seruat GVIDO DE CAVLIACO *c)*, addens modo tineam furfurosam tanquam peculiarem speciem. Vestigiis horum insistentes SAUVAGESIVS *d)* ad nouem vsque species eam extendit; achores contra, crustam lacteam, fauum, tineam vt totidem genera proponit VOGELIVS *e)*. Miror, quod cl. CVLLEN *f)* in contrahendis morbis alias studiosior, achores tamen a tineâ separet, sub qua sine dubio et fauum subintellexit. Et si, posthabita quauis systematica diuisione, definitionibus vnice, quae ad diagnosin in praxi faciunt, insistimus, nouas discrepantias offendimus. Crustae lacteae e. c. quum faciem assignent sedem VOGELIVS, STRACKIVS *g)* alii: SENNERTVS contrario vniuersam fere cutem ea inquinari posse indicat, et LORRYVS *h)* e contrario eam vnice in cute capillata quaerit. Vero quoque propius me iudice accedunt, qui

P 3

pleros-

b) Lib. 8. Theoricae Vers. STEPHANI fol. 98. pag. alt.

c) Chirurg. Traët. 6. Doctr. 2. c. I. p. 339.

d) Nosol. T. 3. P. 2. p. 466. sqq.

e) Diff. definit. gen. morb.

f) Synopsis nosol. method. p. 161. 250.

g) Diff. coron. de Crusta lact. infant.

h) Traët. de morbis cutan. p. 445.

plerosque horum affectuum non specie sed gradu morbi differre sustinent. Etenim ipse vidi in variis infantibus sensim ex porriginē, seu dissolutione cutis in squamas vel furfura, in achores siue vlcuscula plurima per exigua foramina saniem fundentia, ex hisce in crustam densam siccam griseum transitum fieri. Quin si ampliori campo caput vitiatum fuerit, plagas conspexi, quarum vna hocce, alia alio vitio correpta vno eodemque tempore constitit.

Historiam horum vitiorum ab initio ad finem usque concinnare, quoniam chronici genii sunt et lentum valde augmentum lentamque mutationem subeunt, rem taediosam et difficilem esse, quisque fatebitur. Hinc facile fit, ut accedens hoc vel illo morbi gradu infestante descriptionem morbi adornet, quae potius ad stadium vnum vel alterum morbi pertinet, quam ad totum eiusdem decursum, eique peculiare nomen imponat. Commodissime igitur et certissime in orphanotrophiis vel in familiis prole numerosa instructis observationes in vitia ista instituuntur. Placet mihi quidem, quod in curatione horum SENNERTVS compendium offert, dum crustam lacteam, achores et fauos, quoad causam non multum discrepare et curationis rationem quoque eandem esse innuit, prout restringenda esse nomina in pathologia censeo, quoties eorum diuersitas nihil neque in diagnosi nec curatione adiumenti affert. Sed pari sollicitudine cauendum, ne compendiarie hacce notitia nimis delectantes morborum species,
tam

tam decursu quam medendi methodo diuerfas, vna comprehendamus. Non possum igitur subscribere BÜCHNERO *i*) cum variis, quos citat, auctoribus, CAPIVACCIO, INGRASSIA, CARDILVCIO, fauū a reliquis exanthematibus capillatae capitis partis, quae iunctim tineam vocat, nonnisi secundum maius et minus differre, et pro aetate modo formam vtriusque mutari. Fauo enim *ἡ τὴν κεφαλὴν*, siue, vt cum HALY ABBATE loquar, Tineae fauofae, id quoad faciem peculiare est, quod pustulas gignat initio lenticulares, dein varia forma ampliatas, materia albo flauescente instar mellis grumosi vel pultis repletas, quae si eximitur, vt facile potest, relinquit foueas fauis apum non absimiles. Hae pustulae etsi plerumque capillatam partem vnice occupant, aliquando, quod vidi, in vicinam cutem ad tempora, supercilia, solitariae descendunt. Et hocce exanthema reliquis omnibus curatu longe difficilius est, vt ex historia apparebit, quam postea subnectam, nec iis remediis cedit, quae in aliis tineae speciebus saepe vsum praestant.

§. 4.

Quam spissae praeterea tenebrae causam huius polymorphi vitii, tineae, circumfundunt! Causa vero morbi cuiusque ignota vacillare curationem eiusdem et difficilem et ambiguam euadere, in patulo est. Id quidem quilibet agnoscit in tineā, vt vitio quouis alio externo, partem affectam praecipue labefactari; vtrum vero in solo corio capillato labes

P 4

resideat,

i) *Diff. de fauo capitis*, §. 7.

resideat, an potius inquilinum quoddam humorum inquinamentum in hunc locum, qualicumque de causa debilem, vim suam conuertat, et quasi per fonticulum sui partem eructet, alia maximi ponderis quaestio est. Non rara alias sunt moliminis naturae, per corporis superficiem in chronicis affectibus morbi feminium expellendi, exempla. Sic sponte erumpunt saepe ex corruptis humoribus in cruribus vlcera, in aliis aures manantes funestiores morbum anticipant, in scorbuto quoque, lue venerea, scrophulosa labe exanthemata crebro emergunt. Qualis autem sit acrimonia ista, vel quale aliud feminium, quod quidam in tineae humores contaminare sustinent, haecenus non liquet. Cui enim satisfaciet recrementum biliosum, pituitosum, melancholicum, quod pro causa achorum accusat ALEXANDER TRALLIANVS *k*); vel nitrosa falsa que pituita, cui originem tineae tribuit AEGINETA *l*); vel origo eius secundum SYLVII *m*) mentem ab humore acri acido ex sanguine ad superficiem capitis delato et a pituita glutinosa; vel FR. HOFFMANNI *n*) de sero falso viscido corrupto, in glandulis et tubulis cutaneis stagnante, querela? Nec magis mihi quidem satisfacit cl^{mi} LORRY *o*) explicatio natalium achorum et fauorum ex muco infantilis aetatis vberiori, tenaciori, acido. Acidam degenerationem humo-

k) *Oper. Lib. I. cap. 8. p. 13.*

l) *Ars med. p. 106.*

m) *Prax. med. p. 614. sq.*

n) *Supplem. med. rat. syst. p. 95.*

o) *De morb. cut. p. 436.*

humorum iam accusauerat ETTMULLERVS *p*) et, ut mox innui, SYLVIVS; cui degenerationi quantum in morbis infantilibus generatim tribuerit HARRISIVS *q*), inter omnes constat.

Quum vero animaduerneretur, tineam saepe ex fomite venereo oriri; suspicio a quibusdam concepta est, huncce plerumque delitescere, et ad mercurialia potissimum confugerunt. Etenim Neapoli inter 400 infantes, in nosocomio tinea laborantes, 283 numerantur, quorum vel pater vel mater ob luem veneream inunctionem mercurialem subiit *r*). Nutrices pariter subinde reas esse habendas, sponte apparet. Facilis quoque est mali ex hacce causa subnati per velamina capitis vel pectinem propagatio. Haec si fiat, intelligitur, difficilius longe dignosci originem, quam si per alias vias venenum conceptum fuerit, quum sic per alia symptomata iuncta non possit non sese declarare. Profundius vero tinea ex hac causa genita depascitur capillatum corium, magis dolet et noctu pruritus molestissimum ciet, quin in ossa ipsa vim suam deferit. Frequentius tamen marginem capillitii, quam ipsum capillitium, occupat. Nolim vero cum cl. ODHELIO *s*) in quolibet infante tinea correpto fomitis

P 5

p) Coll. praest. in Oper. T. 3. p. 1098.

q) De morbis infant.

r) Cl. KAEHLER in libro ROSENSTEINII om Barns Sjukd. p. 485.

s) Underrättelse, huru man kan bota sig sjelf för veneriska sjukdomen, p. 8.

mitis huius latentis fuspicionem fouere; prouti ill. Eques AB ACREL *t*) raram adeo tineae verae cum aliis symptomatibus venereis confociationem declarat.

§. 5.

Hi igitur de causis tineae conceptus quum labe sua non destituantur, et vel nihil in medendo adiumenti afferant, vel ad peruersam medelam ducere facile possint, in plerisque praeterea tineae affectis reliquum capite excepto corpus sanum appareat: in aliam sententiam deuehimur, topicum illam esse malum, et medicamenta, ipsi loco vitiatu applicata, internis longe antistare. Qui longinquitatem viae perpendit, per quam medicamenta ore sumta tendere saepe debent, antequam ad locum destinatum perueniant; iacturam virium, quam per alluentem laticem primarum viarum et alia ibidem contenta admixta, et sub ipso humorum circulo patiuntur, nisi vis praecipua in nervos exferatur: haud aegre dabit, in externis malis medicaminum extus applicatorum praecipuam efficaciam esse. Hinc scabies tetra sola inunctione vnguenti rosati cum mercurio praecipitato albo saepissime feliciter tollitur, hinc herpes saepe vesicatorio imposito, cancer vel illi simile vitium Cicutae, aliquando et Phytolacca, Sedo acri, Arsenico applicato, hinc vlcera rebellia, quae efficacissimis alias mundificantibus vel roborantibus resistunt, saepe ex voto fasciis membro iniectis curantur, hinc iniectio aquae calcis in

t) Litt. eius in Bibl. mea praest. T. 3. p. 485.

in ipsam vesicam per vrethram tam laetum effectum in calculo promittere visa est. Nec sane fefellit spes tineae medendi in externa praesidia collocata.

§. 6.

Ante omnia autem ipsa structura capillati corii est scrutanda, quod ipsum ex pluribus partibus componitur. Sub epidermide nimirum tenella, poris innumeris instructa, qui sudorem et smegma pingue capillosque transmittunt, cutis siue tela cellulosa compactior et duriôr, quam solet vllô alio corporis loco, deprehenditur, quae deorsum in laxiorem compagem resoluitur. Hanc telam multa vasa sanguifera, item liquidum aquosum vehentia, percurrunt, et praeter adipem, qui cellulas farcit, folliculi numerosi membranacei pinguedinem mollem complectentes et per ductum suum excernentes et bulbilli capillorum illi immerguntur. Horum bulbillorum, quae oblongi et colore coeruleo albi sunt, ea ratio est, quod ipse nucleus ampulla quasi membranacea extensili circumdetur, quae suis instructa nervis et vasis sanguiferis in cauum, quod format, liquorem quendam tenuem in filamenta tenuia ductilem flauo album exsudet. Ampullam dictam reticulum Malpighianum extus cingit, vt cuticulae detractioe apparet, quae si apta manu perficitur, bulbilli adhaerescunt, relictis foveolis in substrata cute. Vltius prosequi hocce capitis tegumentum heic non opus est.

§. 7.

Non vna igitur in eodem pars est, quae vitari in tinea possit. Qualis vero speciatim corripiatur, dici ne tum quidem fortassis ob subtilitatem partium poterit, quum cultri ope in tineae peculiarem sedem post mortem inquiritur, quod haecenus neque a summo MORGAGNI, nec ab ill. LIEVTAUD, factum est. Pro simplici vitio bulbilli capillorum non possum illam cum cl^{mo}. DVNCAN u) agnoscere. Nam licet et ipse illos in tinea laborantibus, quum crines euellerem, solito turgidiores liquido dicto repererim: manserat tamen et locis maxime ceteroquin tinea infestatis pristina bulbillorum quoad figuram et colorem integritas, nec aliquid in hisce arrosus vel destructus vidi. Si euulsio capillorum, qualicunque arte, per volsellam vel picem, rel. perficiatur, fidem expleret, haud exiguum dictae hypothese fulcrum subderetur: sed non tollit malum absque metu reuersionis, etiamsi immane hocce tentamen pluries repetatur. Obseruavi hoc ipse in quibusdam aegris, quorum curam gessi iis in locis, quibus studio deditaque opera extirpandos capillos curavi. Nequeo igitur in partes SAUVAGESII x) qui "necessariam in tinea humida pilorum eradicationem" pronunciat, transgredi, licet adfentian-

u) Cuius propria verba sunt „There is little doubt, that „tinea is one of those cutaneous affections, which „is to be considered as a disease of the roots of the hair” in *EIVSD. medical Cases and Observations*, p. 159.

x) *Nosol. meth. T. 3. P. 2. p. 471.*

sentiantur cl. IOSEPHVS DIMSDALE *y*), “nulla alia arte”, inquit, “praeterquam extirpandis capillorum bulbis capitis tineam tolli”, cl. DVNCAN *z*), multique alii. Cautius ill. CVLLEN *a*) tineam definit per vlcuscula in cute capillata ad radices capillorum humorem in crustam albam friabilem abeuntem fundentia. Nam ea inter singulas dictas partes communio et vicinitas obtinet, vt contractum in vna vitium aliam pariter afficiat. Potiorem tamen sedem mali in folliculis dictis pinguedinosis vel ipso textu celluloso quaerendam arbitror. An et in tineosis muci Malpighiani vberior prouentus? Iisdem enim locis, quo bulbilli capillorum immutati fere omnino et illaesi comparent, copia materiae mucosae purulentae circa hosce stagnat vel effunditur, quae pro varia natura et vario acrimoniae gradu vel cutem in cauernulis depascitur, vel in squamas resoluit, vel exundans in crustas ficas condensatur.

§. 8.

Quamuis vero valde probabile sit, in tineae peculiare inquinamentum humorum totius corporis locum non habere, sed, quicquid mali succi adsit, coaceruari intra ipsum capitis corium: aliquando tamen extra locum consuetum vestigia occurrunt varia fomitis affinis vel eiusdem. Idem poterit esse femi-

y) *Diff. rec. in WEBSTERI med. prax. syst. T. 3. p. 143.*

z) *Loc. cit. p. 159.*

a) *App. ad nosol. meth. p. 250.*

feminium, licet diuerſas ſcenas ludat pro diuerſitate partis, quam occupat. Erumpunt ſubinde ſimul exanthemata cruſtoſa, eleuata, humorem ſpiſſum limpidum fundentia circa os, narium pinnas, in genis, auribus. Veros fauos non vidi tam proſunde deſcendere, ſed viciniam modo marginis capillitii tueri. Cuticula praeterea faciei valde aſpera ſubinde in tineoſis ſentitur, verrucae generantur multiformes, tam in facie, praecipue in palpebris, quam manibus, palpebrae ipſae aliquando rubent. Obuenit quoque mihi puella inſigni deformitate et decoloratione vnguis digiti minimi manus ſiniſtrae correpta, quem, quum cultro corrigere aliquando tentarem, emittere eundem glutinoſum ſuccum vidi, quem caput ſtillabat, nec liberata aegra hocce vitio, antequam ipſum caput ſanaretur. Haecenus vitia dixi, quae cutem vtramque modo vel productionem epidermidis, vngues, vna afficiunt, ſiue haec ibidem a communione humorum retrogradorum ſiue contrectatione per digitos improuiſo facta contingat. Aliquando vero in vetuſtiori malo profundius faeuit labes, colli glandulas tumefacit, emaciat corpus, vt alios tranſitus taceam diriores, hinc inde memoratos, quorum ſpectator equidem non fui. Noxa vero multiplex, quae in retropulſa tinea exoritur, non magis pro origine eiſdem ex vitiato in vniuerſum ſanguine militat, quam quaelibet alia metaſtaſis, quae nouum morbi genus in loco, in quem materia deſertur, generat.

§. 9.

Multiplex est remediorum internorum varietas, quam tineae curandae idoneam iudicarunt, ex classe mundificantium, incidentium, purgantium, diaphoreticorum, potissimum, petita, quorum vero quaedam iusto debiliora sunt, alia iusto fortiora, et, quum non contra mali causam directa, saepe aliam labem inducendo noxia. Saponaceae stirpes, ut istae ex semisfosculosarum censu, antiscorbuticae. Fumaria, Bardana, Lapathum, Sarsaparilla, in succo vel decocto sumta, tanto nodo non sufficiunt. Magis omnino penetrant et in subigendis tenacibus humoribus et corrigenda eorum cacochymia valent antimonialia et mercurialia, quorum haec praecipue in tinea venerea aptissime eliguntur. Inter diaphoretica in subsidium vocata sunt Guaiacum, aromaticae variae stirpes, sulphur, varia ex cornu cerui vehementiori igne elicita similiaque alia, in quorum sane pluribus non vnice ratio virtutis sudorem pellendi habenda. Ex toto vero horum internorum remediorum complexu plurimum purgantibus tribuo, quae ipsa tam reuellendo quam colluuiem primarum viarum, quae in morbos tantum non omnes imperium exercet, subtrahendo haud mediocrem efficaciam praestant. Sed de inertia omnium horum auxiliorum, nisi efficax externa medicina accedat, quilibet, cui sanatio eiusmodi aegrorum committitur, facile iudicabit. Et qui curationem per haecce sola admittunt, hisce, vereor, ne imposuerit vel spontanea in hominibus egenis, quae aliquando per aetatem et labores contingit

tingit sanatio, vel anni tempus; nam ipse expertus sum decrementum cepisse malum, quin disparuisse omnino per vernum vel aestivum tempus, recru-
duisse appropinquante autumno et hieme.

§. 10.

Externa vero selecta ea, quae quilibet pro conceptu, quem sibi de mali natura formauerat, existimavit idonea: abstergentia, exsiccantia, cathaeretica, imo fortiora ista, quae venenorum merito nomine veniunt, de quibus et malignis sequelis, quae saepe contraxerunt, supra p. 226. iam dixi. Horum vero omnium administratione scopus fuit, malum devincere absque capillorum iactura. Haecce autem siue non efficacia satis siue noxia agnoscerentur, in euulsione pilorum cum ipsis bulbis, vtpote in quibus vitii causam latere crediderunt, alii auxilium quaesivere, quae curatio quam iucunda, quam fida, iam exposui.

§. 11.

Nec desunt eximii viri, qui interna remedia cum externis scite copularunt; quod connubium praecipue in mundificantibus siue abstergentibus probo, quippe sub quo hostilis fomes, duplici via, inuaditur et tanto certius subigitur. Ita ill. Eques
AB ACREL *b*) de sequenti methodo, quam sua experientia comprobavit, certioreni me reddidit. Euulsis capillis, decocto herbae Centaurii minoris,
in

b) In litt. rec. in *Bibl. mea pract.* T. 3. p. 486.

in quo mercurius sublimatus corros. solutus, caput lauari curat; simul vero aethiopem antimoniam, vel solutionem dicti praeparati mercurialis syrupo edulcatam, per os fumendam praecipit.

§. 12.

Verum absque violenta ista et dolorosa crinium extirpatione externis potissimum curari posse etiam annosas et rebelles contra plurima remedia celebrata tineas, successu, quem ipsemet in pluribus infantibus explorauit, persuadeor.

§. 13.

Duplici eaque simplicissima medela vtor.

Altera inunctione mercurii praecipitati albi, Vnguento rosato excepti, absoluitur, quae duo ea proportionem miscentur, quae WERLHOFIO contra scabiem placuit, scilicet ut mercurialis praeparati vna pars pro octo partibus pinguedinis sumantur. Hocce vnguento obliniri iubeo loca tinea vberius infestata ad quantitatem circiter pisi maioris quauis vice, initio per hebdomadem vnā vel alteram vesperi modo, dein in tenaciori malo etiam mane, inunctionis locum mutando, prout exanthematis residui necessitas ferit. Nec desisto ab inunctione, etiamsi vestigia quaeuis mali disparuerint, sed continuari eam iubeo adhuc per binas pluresue hebdomades et redintegrari, ut primum noua indicia sese manifestent. Miratus aliquando fui celeritatem curationis mali, etiamsi per plures menses durantis,

redeuntibus infantibus breui fanatis, qui antea vix ferri in confortione aliorum potuerant, et nunquam aliquid mali ex inunctione hacce percepi, ratio siue habeatur mercurii ipsius siue pinguedinis illum excipientis. Sed sensim delabuntur crustae, exanthema disparet, cutis fit pura, vt nonnisi squamulae supersint et tandem ad iustum robur et laetitiam peruenit. Sub vsu simul vidi exanthemata faciei crustosa euanescere et glandulas colli tumidas detumescere.

Quanti faciendum hoc vnguentum in scabié a contactu oriunda, et vix alia medela opus saepissime esse, satis notum, vnde et, licet proportionem diuersam mercurii dicti praecipitati et pinguedinis, nomine vnguenti ad scabiem ZELLERI, in officinis Germanicis obuim est. Miror vero, quod WERLHOFIVS *c*) de tuta efficacia eiusdem in scabié tam ipse persuasus, quam aliis innumeris persuadens, ne verbulo quidem vsus eiusdem in tineá meminerit, nec, etsi in commentatiuncula sua mercurii meritum in vniuersum in variis chronicis cutis exanthematibus agnouerit, in quorum numero et tineá venit, de vnguento tamen hocce in tineá applicando nihil memoriae prodiderit. Attamen BOERHAAVIUS *d*), qui probe nouerat, conuenire in cutaneis morbis (ea proportionem, vt mercurii praecip. albi $\frac{1}{2}$ vnguenti efficiat), illud non solum in scabié

c) *Comm. Nor. 1735. p. 100. sqq.*

d) *Chem. T. 2. Process. 196.*

bie sed et vlcerosa facie et vlceribus cacoëthicis tanquam optimum remedium proposuit. Magis rem ipsam tetigit LENTILIVS e), iuueni cuidam, tinea afflicto, vnguentum contra scabiem offic. etsi nonnihil mixtum capiti illinendum suadens. JO. HENR. LANGE f), sane non contemnendus scientia, dum viueret, medicus, solitus est huic vnguento oleum tartari per deliquium admiscere, sub qua forma non ad scabiem modo sed et ad tineam et vlcera fordida efficax deprehendit. Contra vlcuscula cutis scabiosa, et madorem pone aures apud infantes probauit vnguentum dictum, etsi pariori quantitate mercurii praecipitati albi instructum, cl. CHALMERS g), contra tineam autem mercurium viuum addidit, vna fonticulos in brachio parans, aluum purgante repetito eluens et aquae calcis potum iniungens (hunc quidem sine dubio ad infringendum acidum, quod fauere malo existimat). Mihi quidem pluries simplex dictum vnguentum satisfecit.

Iunxi vero purgantia, dosi largiori bis per hebdomadem data ex radice Jalappae, cum sale medio contrita, vel et sale mirabili solo aqua soluto. Caput bene obtegendum curavi, quo diaphoresis aleretur, et munditiem in velamine capitis mutando et crinibus pectendis sedulam inculcaui.

Q 2

Disuasi

e) *Miscell. med. pract.* p. 107.

f) *Miscellae veritates med. Fasc. I.* p. 6.

g) *Account on the weather and diseases of South-Carolina, Vol. 1.* p. 96. sq.

Diffuasi porro seuerè esum carnis et pinguedinis suillae, quem victum mirifice in cutaneis morbis nocere persuadeor, et quamcunque ventriculi nimiam repletionem.

§. 14.

Pro debellanda autem tinea fauosa siue fauo nimis imbecilles sunt hae suppetiae, cuius rei fidem faciet historia, quam iam proponam. Continet exemplum obstinatissimi contra alia multa efficacia remedia interna pariter ac externa, nec parum molesti mali, sed per simplicem tandem medicinam breui et cum constantia sublati.

Correpta hocce puella fuit per plures annos, primaque in illa sese exseruerunt vestigia iam ipso lactationis tempore, efflorescentibus partim squamosis partim crustosis exanthematibus in capite, et hinc inde in facie. Ex parentibus nulla in illam cacochymia transmanare poterat, quum hi sanissimi essent, nutricum vero illud vitium fuit, quod vna nimis parcum lactis prouentum experiretur, hinc dimissa, altera subsequens pallidam semper faciem prae se ferret, cuius proprius infans, lac iam ex alius foeminae mammis sugens, tinea dirissima, crusta alba totum caput obuestiente, laborabat. Quod postea de ea constitit veneris multiuagae exercitium suspicionem mihi initio iniecit, fomitem venereum subesse, hancque auxit incrementum vitii insigne, vt quod in totam capillatam partem capitis foedissimo aspectu et foetore sese sparsit, licet,

licet, quicquid ad munditiem conducere posset, sedulo obseruaretur. Principio veri faui non adfuerunt. Hinc cum mitioribus initium factum, quae praeterea tenella aetas suasit. Et praeter rhabarbarina et magnesiā aliaque antacida, iuncta cum victu animali, substiti in applicatione foliorum Betae rubrae vel Brassicae malleo nonnihil conquassatorum, quae folia semper eam efficaciam praestitere, ut sub insigni capitis madore crustae emollitae vel sponte sese separarent, vel ope pectinis auferri possent, ut adeo ad speciem sanatum esse vitium videretur. Ast foliis istis per aliquot dies neglectis eadem foeditate recruduit, quod postea pluries expertus sum, et nouas sensim vires colligens in verum fauum transiit. Non inficior, me nondum discedere ab opinione fomitis venerei latentis potuisse, unde puellae iam bienni per plures hebdomades post varia interualla relicta commodam dosin pulueris alterantis PLUMMERI ingessi, in quem tanto confidentius incidi, quum et in porrigne capitis aliisque cutaneis vitiis item in reliquiis venereis a PLUMMERO *h*) depraedicetur, imo in tinea chronica achoribusque et scrophulis ab HVGONE *i*), suffragante, ut videtur, ipso WERLHOFIO. Vini huius remedii antiuenerream autem seriora quaedam experimenta in dubium vocant *k*). Quicquid sit, nec

Q 3

hoc,

h) PLUMMER in *medical Essays et Observ.* Vol. I. p. 46. sq.

i) WERLH. *Oper.* Ed. WICHM. p. 665.

k) TODE *med. chir. Bibl.* T. I. p. 204.

hoc, quod subinde puella euomuit, aliquid ad levandum malum efficere potui, nec vberiori potu ptisanæ ex radice Chinae et Bardanae loco potus consueti. Spem tum in usum vini antimonii Huxhami conieci, iuncta inunctione vnguenti dicti ex mercurio praecipitato albo, in quo connubio per multos menses accurate perrectum est. Sed tenacissime malum continuavit sub summa spurcitie, animalculis aucta, et foetore intolerabili. Substiti igitur inter crebras alui subductiones in commutatione dictorum remediorum, quae, dum nouaretur, aliquid plerumque leuaminis attulit, quod praecipue de impositis foliis Betae vel Brassicae valet. Sed quale solatium sub tanta inconstantia! et durante iam per annos malo et autumno hiemeque ingrauescente. Quum iam fere quinquennis esset puella, legens de curatione felici tineae, quam cl. DVNCAN 1) mercurii sublimati et dein aeruginis cauta applicatione, interpolatis purgantibus se perfecisse narrauerat et multis speciosis argumentis in libro paullo ante edito commendauerat, ista medicamina arripui, tanquam sacram anchoram. Nimirum solutione ex mercurii sublimati corros. grano vno et aquae fontanae vnciis duabus micam panis humectat, et hoc cataplasmate partes tinea affectas obtegendas curat, repetens illud ter per hebdomadem. Hoc consilium d. 13. Apr. a. 1779. primum sequutus iam tertio die eam efficaciam percepi, ut loca varia capitis, crusta antea sicca densa obtecta

made-

1) *Medical Cases and Observations*, Ed. 3. p. 197. sqq.

maderent, et, quum pultem auferre ministrans conaretur, simul crusta tineosa tolleretur. Hic ipse maior subsequente tempore pluribus in locis applicationem excepit, sed in separatione induratae pastae multum difficultatis subfuit, quum puls tam firmiter pilis adhaeresceret, vt illi auferendo pultem euellerentur. Laxior quidem sensim horum infectio euasit, ita vt bulbilli pilorum hinc inde coacervatim vna cum sicca pulte haud aegre postea auferrentur, sed semper dolor intensus hancce separationem comitabatur. Idque et contigit praecisis licet antea capillis forcipe. Praeter hocce incommodum illud haud exiguum adfuit, pruritus vesperi praecipue molestissimus, ad quem mitigandum scalpendo ipsum sanguinem aegrota euocavit, succedente doloris tormento grauissimo. Patienter tamen insistere huic medelae generi auctor fui, quum plura capillitii loca ad speciem iam integra essent, animalculorum crebra pullities necaretur, et hilaritas mentis cum cibi appetitu rediret. Spem inprimis incusserunt ea loca, in quibus bulbilli pilorum exciderant; credidi enim effectum eundum futurum, qui emplastris piceis adscribitur. Verum vidi loca, quae antea apparebant sanata, vel squamas iterum et furfures concipere, vel et valde maderere; et licet haecenus ab hac redeunte labe liberae essent aliae plagae, in quibus bulbilli pilorum eradicati: eiulatus tamen miserandi, quos puella sub quauis noua separatione pultis edebat, me post integrum mensem permouerunt, vt vnguentum ex aeruginis drachma dimidia et axungiae porcinae vnciis duabus,

quod cl. DVNCAN *m*) pariter vesperi et mane ad drachmam dimidiam inungendum, casu singulari ductus, suavit, inde a d. 13. Maii substituerem. Quum agendum mihi cum infirma puella esset, semel modo per diem inunctionem administrandam iniunxi per quatuordecim dies, eo effectu, vt crustae emollitae vel sponte vel pectinis ope sine bullis capillorum soluerentur, et tandem nonnisi cutis rubra tenella sed non madida cerneretur. Experiri iam volui, an haec sanatio constans esset; vnde alternis diebus modo, nonnunquam longioribus intervallis inuncta aerugo: sed reuertit paullo post malum, primo squamis distinctis dein crustis albis, vt iterum ad quotidianas inunctiones recurrere opus esset. Continuatae igitur hae per m. Iunium, Iulium, paullo inconstantius per Augustum et Septembrem, dein iterum curatius m. Octobri, quibus rursus coërcita tineae, adiuuante forsitan aestatis beneficio et usu aëris liberiori. Verum autumno adolescente omnia in peius abierunt. Nempe rediit pruritus, materies grumoso melli similis totum fere capillitium obtexit, plorans sub attritu copiam ichoris, sanguinis vel purulenti liquoris, et ablata hac materie cutis substrata profunde rubra nitensque comparuit, sub minimo attactu sanguinem fundens, accedente squalido animalculorum satellitio. Exanthemata simul sub habitu cachectico in facie et praecipue ad pinnas nasi eruperant, crustas crassas brunas formantia, quibus delapsis maculae

culae rubrae successerunt, vel hodierno die ad pinnas nasi superstites. De nouo igitur medio m. Nouembri, inter vsum vini antimonialis, pulte, solutione dicta mercurialis madida, obtegi caput iussi, eodem initio successu, quem supra exposui, itidem eodem doloroso sensu, quoties sicca puls auelli deberet. Quum sensim tota cutis eradicatis bulbillis capillorum grâte rosea et munda conspiceretur, me tandem voto potitum fuisse sperans abstinui ab externis quibusuis et in vini antimonialis continuatione et alternis purgantibus, quibus per omnes hasce curationes vsus sum, vnice acquieui. Verum me iterum deludi hac spe iam hebdomade post cognoui, quippe maculis flauescentibus descriptis, in locis antea sanissimis, comparentibus, quae ipsae initio magnitudinem aciculae prae se tulerunt, dein sensim latiores, quarum contenta grumosa materies vngue facile eximi poterat, relicta fouea humida non cruenta. Idque contigit locis, vbi ne minimum quidem vestigium superfuit pilorum vetustorum, licet hinc inde noua pubes prorumperet.

Non nouitas rei, sed insignis fiducia, quam in narratione sua declarat cl. DVNCAN, me ad tentandum mercurium sublimatum corros. allicuit. Nam vt ne de variis cutis vitiis, tineae quodammodo affinibus et absque causa venerea grauantibus, dicam, in quibus praeparati huius mercurialis vel ingesti vel applicati efficacia explorata, quor-

sum scabies tam sicca quam humida, herpes, lepra Arabum, purpura chronica, vlcera varii generis *n*), cancer sanabilis *o*), vim, quam illi in tineae ipsa varii adscripserunt, iam satis cognoueram *p*). Et abstergens et cathaeretica virtus aeruginis notissima facile spem poterat excitare cuiusdam in tineae praestantiae, vel ei, cui ignotum esset, variis vnguentis olim contra tineam tritissimis admixtam fuisse *q*). Sed quum hi omnes vocem tineae absque descriptione mali adhibuerint, dubio adhuc locus est, an fauosam intellexerint, de qua ambigo, an vnquam hisce cesserit. Certe nunquam in posterum adducar, vt solutionem istam mercurialem pultis forma a cl. DVNCAN commendatam applicari curem, quae ipsa vel applicanti summam molestiam creat, adeo vt dum eandem auferat, ipsis suis vnguibus haud sine dolore vim inferat. Inconstantiam effectus mercurii sublimati in lotione reprehendendi cl^{mo}.

MOHREN-

n) V. de hisce casus varii medicis Argentoratensibus ob-
vii in J. MICH. HOFFMANNI *Diff. de mercurii sublimati
virtute in affectibus cutaneis*, Argent. 1776. BELL'S
Treatise on the Theory and Management of ulcers, p.
298. WHYTT. in *med. Obs. and Inquir.* Vol. 2. p. 213.
sqq. GARDANE in *Gaz. de santé* 1773. 1774. p. 37.

o) STÖLLER'S *Beob.* p. 157.

p) HOFFM. *Diff. cit.* p. 31. BELL *l. c.* p. 310. Ill. A RO-
SENSTEIN (*om Barnsjukd.* p. 485.) in tineae venerea
lotioni ex spiritu mercuriali SWIETENII vna cum vsu
interno mercurialium plurimum tribuit.

q) TURNER'S *treatise of diseases incident to the skin* Verf.
Germ. p. 363. sqq.

MOHRENHEIM *) quoque casus singularis ansam dedit.

Hisce dictis igitur repudiatis ad Cicutam accessi, cuius quidem praestantia in cutaneis multis morbis latere me non poterat, qui, quotquot de ea constiterint vires, iam in *Apparatu meo medicaminum* r) excusseram. Et bene noueram in ipsa tinea iam a perill. L. B. A STÖRCK fuisse optimo successu praeceptam et in puero quidem tredecim annorum sic, vt decoctum radice Lapathi acuti et extractum Cicutae ingererentur s) et totum caput bis quotidie decocto Cicutae lacte parato lauaretur, quae medela inter sex hebdomades vitium sanatum; in binis aliis ex eadem matre natis, iam fere a natiuitate turpissima tinea et scabie foetente laborantibus, sub connubio interni vsus extracti cum lotione saturati decocti Cicutae t), iam quinta hebdomade spes curationis absolutae affulsit. Haec exempla quum me ad Cicutam tentandam compellerent, tum vel maxime id effecit casus singularis a cl. STÖLLER u) memoriae proditus de puella octodecim annorum egena, inde a prima infantia exanthematibus purulentis capitis afflicta, quae periodica incrementa sub-

*) *Wienersche Beyträge zur pract. Arzneykunde, Vol. 2. p. 168.*

r) *Tom. I. Art. 100.*

s) *Libell. 2. de Cicuta p. 173.*

t) *STÖRCKII Libell. quo continuantur experimenta, p. 61.*

u) *Beobacht. u. Erfahr. p. 139 sqq.*

subierunt, sed post praeuium purgans, Cicutae extracto ingesto et cucupha imposita ex eadem herba aqua cocta et lotionem eiusdem decocti intra aliquot hebdomades disparuerunt. Qua ipsa methodo et plures alios a tinea se liberasse cl. vir testatur. Nec auocari me passus sum minus fauente cl. JO. HENR. LANGE *) testimonio, quod efficaciam Cicutae modo ad vim pediculos necandi restringit; iste vero nonnisi folia eius conquassata tepide imponenda curaverat. — Die igitur 20. Ianuarii a. 1780. initium fecit aegra mea extracti granis duobus bis per diem forma pilularum captis, et sensim ascendit ad scrupulum vnum vsque pro quauis dosi ter per diem ingestum. Cucupham quoque herba sicca Cicutae repletam et aqua coctam die noctuque gestari in capite iussi, et sub quauis renouatione caput decocto lauari. Primis iam diebus crustae soluebantur et ad basin pilorum hinc inde occurrebant abscessuli pure repleti, qui ipsi et tum et serius crepuerunt digito compressi. Inter haec colli glandulae molliter intumuerunt. Verno tempore appropinquante pilulas omitti passus sum, et concessi, ut per noctem modo praeuia lotionem cum decocto Cicutae sacculus imponeretur, quum per diem foetor herbae praesentibus molestus esset. Hac de causa et quoniam in tam longa curatione negligentius nonnihil praecepta data obseruari solent, sine dubio et ob vetustatem et propriam malo perniciam, lentior sanatio contigit. Verum hisce auxiliis,

*) *Diff. Dubia cicutae vexata, Helmst. 1764. §. 16.*

liis, alternis purgantibus, summaque munditie eo peruenit, vt media aestate omnia fere exanthemata dissipata essent et sine capitis velamine in publica loca prodire posset. Autumno desquamatio cutis facta, crines quoque emerferunt copiosi, densi, initio quidem apice rufescentes versus basin autem pallido bruni, iam vbiuis probum colorem prae se ferentes et egregios cincinnos agentes. Aestate in manibus, facie, praecipue autem palpebris copia verrucarum sese exhibuit, quae ipsae in palpebris in lacinias quasi scissae comparuerunt. Praecisae, etiam si notabili a basi distantia, sanguinem fuderunt. Quum quaedam in palpebris nimium grandescerent, hasce setae equinae ligatura separavi, reliquae sponte pedetentim exaruerunt, ita vt iam ne vlla quidem in manibus, vbi creberrimae antea fuerant, conspiciatur. Deformitas quoque vnguis sine vlllo externo remedio euanuit.

Ita tandem simplicissima medicina liberata fuit puella vitio vetusto et foedissimo, parentibus et viuido ingenio chara, et iam omnibus numeris sanissima. Cur haec Cicutae in curanda pessima tineae specie virtus a paucis in vsum conuersa fuerit, eius non aliam causam reperio, quam quod meritis Cicutae laudibus aliae admixtae fuerint ambiguae fidei, quibus adnumeratam et hanc in tinea non mirum, donec experimenta plura errorem conceptum dispellerent.

Confectaria ex hacce historia deducere non opus est plura, quam quae ipsi narrationi inspersi. Id modo addo, haud exiguum curationis partem me iudice suppurationi enatae deberi, in qua excitanda quantam vim habeat Cicutā, fatis iam constat.

XVII.

DE

TEMPORE

EXHIBENDI EMETICA

IN FEBRIBVS INTERMITTENTIBVS

MAXIME OPPORTVNO.

DE
T E M P O R E
E X H I B E N D I E M E T I C A
IN FEBRIBVS INTERMITTENTIBVS
MAXIME OPPORTVNO. *)

Prooemium.

In felici medicamentorum pro tollendis morbis administratione non exacta vnice morbi, quoad speciem, indolem, causam, complicationem, gradum, cognitione opus est, et selectu remediorum commodo, sed dispiciat simul medicus de eorum aptissima dosi, forma, vehiculo, subinde et de idonea miscela et corporis praeparatione. Plurimum insuper refert, tempus ordinemque probe perspectum habere, quo remedium exhibendum sit, non ratione tantum diei habita, sed et decursus habitusque morbi, quum horum neglectu saepe vel iners euadat efficacissima alias medicina, vel loco sperati inde leuaminis morbum exasperet et aegri vitam in periculum coniiciat. Id quum de plerisque valeat medicamentis, tum vel maxime de emeticis,
in

*) Dissertatio a. 1782. Gottingae propugnata.

in intermittentibus febribus porrigendis. Mira circa tempus hæcce capiendi apud medicos, eosque haud mediocris auctoritatis, obtinet discrepantia. Quam exponere hoc ipso specimine et diiudicare tanto minus dubitavi, quum emeticis in intermittentium curatione rarius carere possimus, et persuasum mihi habeam, aegros bene multos poenas ignorati vel neglecti iusti in emesi cienda temporis luere, ita ut, quae facile alias auerruncari possit febris, pertinaci suo tramite decurrat, vel contra efficacissima alias febrifuga rebellis euadat, imo, irritata male ingesto emetico, in febrem continuam grauem et ancipitem transmigret. Sic non facile vereor, ne quis peritior mihi obiiciat, in tenui me laborasse, quod de vsitatissimo remediorum genere differam. Nam in artis medicae exercitio minus longe interest, medicamina quoad nomen et historiam nosse, quam iustum eorundem usum et applicationem scire; et idem saepissime in praxi nostra, quod in historia naturali, quin vita communi, contingit, quod in remotiora a nobis studiose inquiramus, quum in iis, quae nobis ante pedes sita sunt, longe amplioris usus et praestantiae, coecutiamus.

§. I.

Prouit ars morbos sanatura in aliis morbis sapienter ciendis praecipue occupatur: ita et natura, quicquid vitii vel stimuli contractum in corpore fuerit, alium

aliud morbum suscitando, agit, subigit, concoquit, mutat, in minus periculosa loca transfert, vel ex corpore eliminat. Hoc beneficium febribus in primis deberi compertum est, quarum e numero et intermittentes sunt. Unde multa exempla existant obstructionum viscerum, icteri, epilepsiae, leprae, cephalaeae, palpitacionis cordis, doloris diuturni fixi, aliorumque malorum, febre intermittente, praecipue efficaciori ista, quartana, sub-latorum. Quis vero hanc naturae prouidentiam tantopere extolleret, quin confiteretur, magis nobis consuli deficientibus conditionibus, quae eiusdem necessitatem faciunt, et praestare, si alia nobis suppetant subsidia, istis a natura suppeditatis tutiora, mitiora, efficaciora, et citius iuuantia. Podagrae, haemorrhoidum, ulcerum in cruribus erumpentium, exanthematum chronicorum, in auertendis dirioribus malis praestantiam facile concedam, modo simul concedas, plena molestiarum, quin cruciatuum esse haec naturae therapeutica molimina, et saepe haec ipsa eo usque cancellos, quibus ea circumscribi optabile esset, transilire, ut remedium ipso morbo atrocius et periculosius fiat. Idem saepe ex intermittentibus febribus redundat incommodum, quae ipsae, dum vitio inquilino, cui superueniunt, tollendo non sufficiunt, hoc ipsum potius vel fouent vel augent; subinde fomitem quiete sua innocuum expergefaciendo, eundem nocendi potestate impertiunt; nec raro frena soluentes, vel causa accedente epidemica vel ex vitio proprio corporis, hoc ipsum per alternas frigoris et caloris vicissitudines

debilitant, humores eius attenuant, et liquidissimos per sudores profusos diffillant, ita vt ad alios concipiendos morbos procliuue fiat, quorum indurationes viscerum, hepatis, nominatim et lienis, hydrops, vulgatissimi sunt, imo nouo paroxysmo ferociente omnino corpus subinde conterunt, et nexu cum anima soluunt. Nec haec mala modo ex diuturna febris per plures menses duratione consequuntur, verum pauci saepe paroxysmi emaciando corpori, prostrandis sub habitu cachectico viribus vel neci inferendae, sufficiunt, tanto magis, si autumnno febris grauat, vel soporosi, syncopalis, sudatorii aliusue generis maligni sit, vel paroxysmos duplicet.

§. 2.

Non fidendum igitur apparentibus febrium intermittantium blandimentis est, sed, etiamsi suffocare eosdem primo suo initio imprudentis sit, sapientior tamen quilibet tempestiue causas impugnet et remouebit, quae illis natales dedere, vel alere easdem queunt, coercebit earundem impetum et durationem, et roborando rite corpori ad rediuias insidias febris auertendas intentus erit. Quomodo quidam tenui diaeta, alii sudoriferis versus tempus paroxysmi exhibitis, alii stimulantibus efficacioribus vel per os datis vel extrinsecus applicatis, alii venae sectione, alii euacuantibus, alii antispasmodicis, opio adeo, alii specificis sic dictis, quorum pleraque adstringentis saporis sunt, item saepe amaritiae iuncti, vt cortex peruuianus, qui primum inter haec locum sibi vindicat, ad hosce scopos

scopos peruenire annisi sint, meum non est hoc loco exponere. Sufficit indicare, male agere medicum, qui in morbo curando vni modo tramiti insistit, nec medelam pro conditionum, quae in speciali casu incidunt, natura et varietate eligit, mutat. Hinc saepe necesse est, vt plura dictorum subsidiorum in intermittente febre iungantur, quorum quodlibet alias illi tollendae par est, imo, vt, febris ipsius quasi nulla ratione habita, de tenaciori eiusdem causa subigenda cogitetur, quorsum spectat ipse mercurius, si obstructiones firmiores viscerum vel glandularum febris causa existunt. Ita et frequenter temerario ausu mox ad vsum febrifugorum proprie sic nuncupatorum acceditur, sed praemittenda ea, quae auferunt quidquid eorundem effectum retardet vel loco auxilii sperati nociua eadem reddere possit. Multiplicis generis sunt haecce febrifugorum efficaciae desideratae impedimenta. Saepe peccat vasorum sanguine bono turgentium plenitudo, saepe orgasmus eiusdem nimius, in aliis subest tenax glandularum vel viscerum obstructio, alios vlcus quoddam internum ab usu horum remediorum arcet, aliis nocent eo, quod febris intermittens in continuam tendat, aliis complicatione febris cum fomite quodam inquilino, vel affectionibus conuulsivis siue profluviis sanguineis vehementioribus. Omnium frequentissime autem fordium in primis viis collectarum colluies grauat, quibus praesentibus, si ad specifica febrifuga confugas, ferocienti feбри pabulum addes, haud minus ac si sub ipso paroxysmo ista praebeas. Diluentia

R 3

igitur,

igitur, digestiua, resoluentia, temperantia, depurantia, deplentia, euacuantia, multis casibus praemitti necessario debent.

§. 3.

Ob dictam vero causam nullo praeparantium remediorum genere crebrius opus est, quam quae vel per os vel per aluum euacuant. Vnde tantum hisce tribuit medicorum vulgus, vt omnibus fere et singulis aegris, siue adsint siue desint vera sordium signa, horum alterutrum exhibeant. Quae consuetudo quam noxia, quam parum fini assequendo opportuna, primum trutinabimus. Etenim verissimum est, innumeris vicibus sanatas fuisse febres intermittentes neque ante nec post specifica data euacuantibus ingestis. Fac vero haec ipsa subministrari absentibus causis, quae ad usum eorundem inuitant, quin continuari vel tum, quum priora pericula irrita fuerunt, non possunt non labefactare et primas vias et reliquum corpus, praesidia concoctionis subuertere, liquidioribus partibus corpus priuare, remanentibus spissioribus et si obstructiones subsunt, hacce iactura easdem tanto magis rebelles reddere et vires ad vincendam febrem necessarias sufflaminare. Quamobrem SYDENHAMVS variis locis intempestiuum euacuantium usum pro causa protractae ultra solitum terminum et resuscitatae febris declarauit, adeo, vt vernaes tertianae sua natura alias salutiferae et faciles sanatu inde in autumnum vsque perseuerauerint et longioribus et duplicatis paroxysmis aegros debilitauerint, imo secundum
eius

eius obseruationem mania, hydrops, diabetes, mors ipsa eorum abusum exceperint; subscribente de noxa summo BOERHAAVIO. Maxime vero haec ipsa crebro repetita nocent, quando neglectis in principio febribus tumores ex obstructionibus gignuntur, et materia tenax et solutioni immorigera vel in scirrhus cancrusue transit vel icterus niger vel hydrops subsequitur. Nimirum vita, alias tolerabilis et diuturnior calamitosa fit et abbreviatur *a*). Aliud, quod ex euacuantibus exhibitis subinde emergit, hoc est, quod hisce absque fructu tentatis tempus perditur, alia magis febre vincendae idonea subministrandi; vnde haec ingenium suum sequens altas radices agit, nec postea efficacissimis superabilis, sed in secundarios morbos celeri passu transgressura. In ambiguo igitur casu, quando praecipue euacuandi tempus ob apyrexiae breuitatem arctis cancellis circumscribitur, praestat specifico purgans admiscere vel subiungere, quo utriusque scopo simul satisfiat.

§. 4.

Quoniam autem sordium canalis alimentaris primum mentio facta tanquam indicis et monitoris euacuantium adhibendorum: signa earum praesentium significare mihi incumbit. Nonnulla eiusmodi sunt, ut superiora versus easdem magis inclinare pateat, alia, ut altius easdem descendisse cognoscatur. In vniuersum vitae genus, quod ante morbum

R 4

aeger

a) Vid. DE HAEN *Rat. med. P. II. p. 9. sq.*

aeger gessit, lautius, vel ex cibis glutinosis, pinguibus, difficulter concoquendis, consistens, prout ad febres intermittentes disponit, prauos putridosque succos relinquens, ita signi instar praesentis colluiei haberi potest. Sed euidentior euadit sapore ingrato, vappido, amaro lingua faucibusque muco albido flauo obductis, ructibus nidorosis, halitu oris ingrato, appetitu prostrato, nausea vel vomitione spontanea, vertigine tenebricosa, cephalalgia, anxietate et tensionis circa praecordia sensu. Hisce animaduersis in superiori praecipue primarum viarum sede stabulari saburram cognoscimus. Alius contra obstructa, tumidus venter, flatus, borborygmi, obtusus sed vehemens lumborum dolor, inferiora loca occupare istam docent. Non semper vero vnice ante febrem haecce congeritur, sed saepe eiusdem signis initio vix manifestis sub ipso febris decursu colligitur bilis, degeneratione, stagnatione circa praecordia, vel comneatu ad intestina vberiori, molesta. Incidunt subinde febres intermittentes epidemicae, quae comitem habent eiusmodi bilis vitium, sub quibus copia bilis viridis, crassae, tenacis, redundat, nonnisi euacuantibus expedienda. Et haecce quidem quam citissime arripienda sunt, siquidem fomes ille non solum multa ista, quae dixi, incommoda parit, sed febris ipsa, stimulo, quem suburra parit, et resorptione eiusdem in sanguinem, alitur et intenditur. Aliquando natura spontaneo vomitu vel alui solutione eiusdem partem excutit, quod vero molimen rarius ad eliminandum fomitem efficax satis est, ita, vt febris
nihilo-

nihilominus valide vrgeat et statò tempore redeat, sed viam modo, in quam tendit natura, nobis commonstret.

§. 5.

Non vero perinde est, vtrum sursum an deorsum collecta colluies extundatur. Verum quidem est, emetica simul aluum semel vel iterum soluere, et rursus materia turgente purgantia subinde loco alui solutionis emefin ciere. Ast' ante omnia ad signa nuperius memorata attendendum est, ex quibus eruitur, quonam loco colluies stabuletur, vt exinde tanto felicius euerri possit. Quo breuiori enim via e corpore eliminetur, tanto melius sine pòtimur. Vnde quidem generatim elucescit, vtrum emetica an purgantia eligere conducat. Emetica nimirum conueniunt, si ventriculum et superiorem intestinorum partem onerari sordibus signa docent, purgantia, si id inferius in intestinis contingere constat. Sequimur in hisce sapientissimum GALENI *b)* consilium, qui, materiam turgidam, inquit, quum ad ventriculum repit, per vomitum educere oportet, quum vero vergit ad inferiora, per inferiorem excretionem.

Subest et subinde necessitas vtrumque euacuantium genus, vnum post alterum, ingerendi (nempe connubium vtriusque non satis ob effectum incertum probo) dum nimirum emetico iam dato reliquiae sordium adhuc supersunt, quas prae metu,

R 5

ne

b) De arte curandi ad Glauconem Lib. I. cap. 9.

ne debilitetur corpus emesi continuata, nonnisi purgantibus expellere audemus. Sunt omnino conditiones praeter dictas, quae emeticorum vsum dissuadent, et purgantibus praerogatiuam assignant. Exstant scilicet homines, quorum ventriculus tam sensibilis est, ut ab emetici vel minima dosi oblata mox in spasmos horrendos coniiciantur. Aliis ob vitium pulmonum emesis non tuta est. Obstat quoque inflammatio interna feбри, ut nonnunquam fit, adsociata. Nec concedi potest, manifesta viscerum obstructione cum obduratione et tumore horum praesente. Omnium, quantum scio, accuratissime ex sua experientia cl. GRAINGER c) momenta ista significauit, quae catharsin emesi in febre intermittente praefereendam iubent, quae ipsa fere sequentia sunt: quando aluus constipatur, flatus cum borborygmis virgent, lumbi dolore vexantur, aeger emesin auersatur vel ferre nequit, hypochondrium tensio dura et hepar vel lienem obstructio obsidet, paroxysmi nimis frequentes sunt morbusque inueterauit, intestina denique vermibus scatent, qui ipsi hospites subinde febres hasce generant vel sodalitio suo grauiiores reddunt et anômalas, vnde iisdem excretis febris ipsa vel filet vel mitescit. d)

§. 6.

Dabo hisce casibus praeferenda esse purgantia, sed vbiuis praestare emeticis et horum vices agere,

CLEGHOR-

c) *Hist. febr. anom. bat. p. 91. sqq.*

d) V. hac de re VAN DEN BOSCH *Hist. const. epid. vermin. p. 71. sqq.*

CLEGHORNIO *e*) concedere non possum, contra cuius argumenta postea insurgam. Vniuersalior longe est virtus emeticorum, quam purgantium, vt quorum posteriorum efficacia, nisi de fortioribus sermo, quae tamen in intermittentibus merito excludimus, vel de iis, quae in ipsa febre subigenda aliquam vim habent, vnice fere in primis viis subsistit, et sordes praegresso morbo vel sub eodem congestas vna cum hospitibus animatis expellunt. Et si vim in saburra ista eliminanda vltius consideremus, fatendum multo promptius illam efferri emetico quam purgante, modo mobilis ista sit; quodsi autem tenacius adhaeret, emetico refracta dosi erogato finem assequi iam nouimus. Haec ipsa effectus promptitudo non parum aegrum solatur et febris vim frangit, ita vt molestissimas nauseas, vertigines, cephalalgias, deliria, excitato sub febre vomitu, momento quasi fugatas obseruauerim, et paroxysmum tam breuiorem quam mitiorem euasisse. Efficaciorum quoque longe effectum debemus emeticis concussione, quam in neruos, vasa, viscera, liquida, exserunt. Motum peristalticum intestinorum non sursum vnice sed et postea deorsum emesi validius vrgeri ex solutione subsequa alui intelligitur. Quicquid in ventriculo et duodeno et forsitan altius in intestinis continetur, extunditur. Bilem praecipue, cuius potentiam in cienda febre intermittente supra commemorauimus, emeticum longe melius expedit, quum sub eius actione hepar quasi in prelo sit et bilis ipsa repetitis

et

e) *Observations on the Diseases in Minorca*, p. 184.

et alternis agitationibus attenuetur et expellatur; excretorios simul ductus bilis et pancreaticum efficacius emulget. Agitatis vero visceribus abdominis et thoracis in hisce circuitus humorum liberior succedit, partium elater intenditur, et secretiones omnes leuantur. Ad stagnationes igitur et obstructions vel ante febre menatas vel praesente ista contractas dissipandas non parum emetica conferunt. Maxime autem ratio habenda stimuli et concussionis, quam ipsum neruorum systema experitur, quibus vellicatis, quantum sit in vasa et liquida eorum contenta imperium, multis aliis documentis comperimus. Elucet iam, cur non aequè feliciter euacuatione per aluum, quantumuis larga, scopum attingamus. Imo experientia edocemur tam in febribus quibusdam intermittētibz epidemicis f), quam in singularibus casibus, vsum purgantium retardasse potius sanationem quam adiuuasse, quum contra ea emeticum paullo post captum abbreviauerit paroxysmum subsequētem et vehementiam eius minuerit, vt maturius longe ad febrifuga transire licuerit. Exstant aegri, in quibus solo emetico vno veluti ictu sublata fuit febris. Non ea porro debilitas subsequitur vsum vomitoriorum ac purgantium, cuius forsitan causa haec est, quod haec multo plus liquidorum prouocent, cum quibus simul dispendium fit partium nutritioni et robori corporis inseruiētiū. Notum quoque est, purgante dato resuscitari posse febres iam consopitas et redire.

f) SENAC *de recondita febr. intermitt. et remitt. natura*, pag. 153.

redire contumaciores, dum per breuius modo tempus cessauerant g).

§. 7.

Si haec, quae de praestantia emeticorum ex experientia et argumentis protuli, auctoritate medicorum magni nominis corroborare opus esset, haud pauci produci possent. GALENVS in curatione februm intermittantium emetica impense variis locis commendat, adeo vt in febre notha multos memoret solis vomitibus statim fuisse sanatos h). Eodem sermone vtitur AETIVS i), item PAVLVS k). CELSVS l) in eo ASCLEPIADEM reprehendens, quod in curatione tertianae febris aluum primum duxerit, postea vomitum mouerit, obuersa ratione procedi iubet. Illuuiem in ventriculo, mesenterio, cauo hepatis contentam aliquando purgantibus per inferiora deturbari non posse, etiam si pluries exhibitis fatetur RIVERIVS m), argumentum inde vomitorii sumendi capiens. Et si ad nouissimos auctores prouocandum, instar omnium esse cll. SENAC et CVLLEN poterunt. Vanus itaque cl. CLEGHORN metus est, ne stimulus commotioque ex emetico subnata nocumentum pariat, inflammationemque viscerum augeat, quam, abludens a vulgaris obferua-

g) SYDENHAMI *Oper. Sect. 1. cap. 5. pag. 118.*

h) *Ars curandi ad Glauc. Lib. 1. cap. 10. item cap. 9. 11.*

i) *Lib. 5. cap. 73. 80.*

k) *Lib. 2. cap. 20. 21.*

l) *Lib. 3. cap. 14. p. 143. Ed. KRAVS.*

m) *Prax. med. Lib. 17. cap. 3.*

feruationis tenore, dicit crebro sese associare tertianis, etsi illi facile largieris, tum quando lien vel hepar in putredinem inclinet, emeticis locum non esse. Refellitur simul multorum tam medicorum quam aliorum sinistrum de emeticis in hisce febribus iudicium, quod etiamnum saepe resonat.

§. 8.

Haftenus praecipue de vi emeticorum sordes eliminandi egi, nec, nisi eminus serie sermonis ita ferente, ad alias quasdam eorum vires respexi. Considerandae igitur hae et reliquae vires curatius. Monuit iam BOERHAAVIUS *n)* de vtroque euacuantium genere, prodesse illud, dum stimuli instar *moueat*, quod sine dubio ita intelligendum, quod causam istam proximam, a qua febris exsurgat, euacuans turbet, commutet et quoad partem vel integre deleat, tollat. Qualis ista causa sit, haftenus quidem nos latet, nec huius loci est, varias de ista conceptas hypotheses, quarum multae leuioris momenti sunt, enumerare. Duplex vero plurimum assensum obtinuit, quarum vna haec est, quod ex nervis qualicunque modo affectis spasmi generentur, altera, quod fomes quidam peculiaris, quem materiam febrilem vocant, febrem suscitet. Multa sunt argumenta, quae pro alterutra sententia militant, quin quaedam exstant, quae vtrique locum concedunt. Nervos primario pati in febribus intermittentibus ex symptomatibus multis, sub paroxysmo conspicuis, elucet, quorsum lassitudo, debili-

n) *Aphor. de cogn. et cur. morb.* §. 760.

debilitas, sensus frigoris, anxietas, vertigo, cephalalgia, pulsus debilis paruus, sitis molesta. Nec nerui modo musculorum motui inferuientes afficiuntur, sed idem aliquando contingit in iis, quibus sentire modo datum est, in quibus subinde dolores molestissimi periodici enascuntur. Huis rei exempla hemicrania, item et dolor in neruo supra orbitam per os frontale produnte, praebent o); nec non casus foeminae, cui alternis diebus dolor oculorum intensus cum rubedine accessit, et alius viri, quem periodice dolor quasi a calculo corripuit p). Porro morbi systematis neruosi, vt paralyseis et epilepsia, pluries per febres intermittentes fugati. Et saepe animi commotionibus fortioribus, quarum vis in neruos constat, nouimus febres hasce esse suscitatas. Sensibilitas igitur neruorum iusto maior et morbosissima accusanda videtur. Cum hac vero spasmodorum consuetum solet esse connubium, quos et subesse in intermittentibus febribus, indiciis haud obscuris cognoscitur. Quid enim pandiculatio, oscitatio, horror, tremor maxillarum et reliqui corporis, cutis sub algore anserinae similis, pallor, vomitus, icteritius saepe habitus, cet. aliud sunt, nisi spasmodorum effectus; vt nihil dicam de horrendis istis spasmis, qui speciem malignae febris intermittentis constituunt q). Iam vero vis corticis peruuiiani in morbis

o) V. SWIETEN *Comment. T. 2. p. 534.*

p) A ROSENSTEIN *om Barns Sjukdomar*, p. 306.

q) MEDICVS *Sammlung v. Beob. a. d. Arzneywiss. I. B. p. 24. sqq.*

morbis neruosis et spasticis sopiendis abunde explorata est, quem non amaritie vnice et adstringendi efficacia vim suam exserere in hisce febribus, ex vsus externi in puluere, vel cataplasmate, vel clysmate, vel balneo, simili efficacia, ac corticis ore ingesti, patet. Nec opium tantum in curandis hisce valeret, cuius quidem tanquam febrifugi laus nostro tempore reuixit, nisi plurimam partem virtute antispasmodica excelleret.

E contraria parte materiae febrili, quam vocant, siue fomiti peculiari subtili, non in primis vnice viis, sed et in secundis commoranti, qua praesente febris durat reditque, subacta et subducta autem tollitur, varia quoque sunt, quae fauent. Mihi potissima haec videntur, quod aliquando febris intermittens contagiosa sit *r*), quod sudor erumpens odorem singularem acidum habeat, quod sudor ad finem paroxysmi tam salubris sit, vt si refrigerio vel alia de causa intempestiue cessat vel repellitur, subsequens inuasio tanto vehementius vrgeat, quo sudore haud exiguum partem huius fomitis dispelli probabile est.

Quidni vero ad vtramque causam, et neruosam et materialem, in febre intermittente natales eiusdem referri possent, ita vt a stimulo, quem materia quaedam febrilis neruis impertiat, spasmus demum

r) MARX *Obss. med. P. I. p. 56.* quod simile exemplum a me obseruatum narraui in *med. pract. Bibl. Tom. I. p. 669.*

demum in variis corporis partibus producantur. Hi spasmi superficiem potissimum corporis occupare videntur, docente aspredine cutis, pallore earum praecipue partium, quas rubedine alias natura pingit et frigore, quae ipsa ad interiora repulso esse humores arguunt, et languere in cutaneis arteriis istorum motum.

§. 9.

Iamiam igitur rectius intelligitur, quomodo emetica secundum BOERHAAVII mentem *mouendo* tantum, in febre intermittente leuanda, valeant. Multus est ill. CVLLEN *s*) in demonstrando commercio inter ventriculum et corporis superficiem et adstruenda potestate emeticorum actionem extremarum arteriarum superficiei corporis excitandi, sanguinem ad haecce vasa determinandi, et spasmos ibidem contractos tollendi. Quibus viribus hic consensus fiat, mihi perinde est, modo certis et indubiis observationibus sciam, vere obtingere. Memorabile ideo est, aquam frigidam in ventriculum susceptam caloris augmentum in cute efficere et saepe sudorem vere pelleré, item frigus superficiei cutis admissum potens esse remedium in excitando cibi appetitu. Id itaque volo, praeter motum, quem agitando corpus et nominatim nervos emeticum exercet (Vid. supra §. 6. p. 267.) eximia illud pollere virtute, spasmos a stimulo nervis inducto

s) *First Lines of the Practice of Physic, Ed. 4. Vol. 1. p. 40. sqq.*

inducto resoluendi, eos praecipue, quibus cutis infestatur. Haec vis promte sese declarat, nam emetico horroris stadio capto, hoc ipsum abbreviatur vel cessat, eiusque in locum mox calor succedere solet, sub molliori cutis habitu. Emeticorum, saltem eorum, quibus vulgatissime utimur, vis antispasmodica ulterius confirmatur methodo, quae recentius inualuit ea tam parvis dosibus in veris et exploratis affectionibus spasticis dandi, ut ne nausea quidem suboriatur.

§. 10.

Verum mouendi haecce emeticorum potestas adhuc latius sese spargit, dum nimirum sudorem pellunt. Haecce mutatio sine dubio ab altera mox dicta sequitur: laxato scilicet cutis spasmo sudor erumpit, licet non diffitear, adiumentum hac in re ferri accelerato per vomitum humorum motu; nam resoluendi spissos et impactos humores efficacia, qua quaedam horum, antimonialia nominatim, polent, dubito, an intra tam breue temporis spatium, quo in corpore vomentium remanent, in censum trahi possit. Sudor in summum aegri beneficium cedit, siue peculiaris materiae febrilis partem expellat, siue criseos speciem non alia lege, quam in quacunque alia febre, constituat. Et hic modus sudorem pellendi tutior longe est isto, quo vel per multum calidum potum, vel spirituosam, vel aromaticam, appropinquante febre oblata, sufflaminare febrem ante solutos prius spasmos ausi sunt, quibus conatibus apud multos febris intermittens in continuam,

nuam, ardentem, irregularem intermittentem, malignam, est conuerfa.

§. 11.

Hoc demum haud exigui momenti virtus emeticorum est, quod corpus ad vsum corticis peruviani vel aliorum specificorum praeparent. Quamvis enim multi vel solis emeticis ingestis per multiplicem eorum effectum iamiam a me recensitum, accedente beneficio anni temporis, aetatis, corporis vigoris, a febre liberentur: in aliis tamen tenacius longe malum est, et iis indiget, quae feбри speciatim accommodata sunt. Ad quae vero non tuto prius acceditur, quam ventriculus et intestina a colluie collecta et officina bilis ab abundante et corrupta bile probe expurgata fuerint. Hae enim fordes non tantum specificorum virtuti obstaculum praebent, et temporis, a quo omnia in curatione morborum pendent, dispendium faciunt, sed ipsa saepe febrifuga, praecipue si ex adstringentium censu sunt, figunt fordes, et prohibent in damnum, quin interitum corporis, quo minus expellantur. Et prout in aliorum remediorum praestantiorum adhibitione alterum alterius adiumento indiget, ita extra dubium est, non obstaculo modo sordium, quod accusavi, remoto, sed et praeuia spasmodorum imminutione et expulsionem materiae febrilis saltim ad partem, exoptatiorem longe curationis per specifica succellum contingere.

§. 12.

Quodsi igitur tanti momenti tantaeque prae purgantibus per aluum praerogatiuae emetica sint: plurimum refert, ut iusto tempore, ordine, adminiculo, selectu, capiantur. Quorum omnium praecepta dare mearum iam partium est.

§. 13.

De selectu incipiam, in quo hodie ad summam simplicitatem descendimus, ita ut vel in Ipecacuanha vel Tartaro emetico, vel utriusque conubio, acquiescere soleamus.

Antequam Ipecacuanhae usus inualeret, Afari radix ea dosi a multis dabatur, quae ad vomitum ciendum requiritur. Hoc emeticum assensum obtinuit RIVERII *t*). Constat quoque febrifugam adeo a quibusdam hanc radicem reputatam, KLAUVNIGIO, SCHVLZIO, BEROLINENSIBVS *u*) quibusdam practicis; licet valde mihi probabile sit, euacuando praecipue opem praestitisse. Sed plus fiduciae sibi merito vindicauit Ipecacuanhae radix, huiusque praecipue cortex, utpote minori dosi efficax. GRAINGERVS *v*) hanc radicem omnibus reliquis emeticis anteponit, ita tamen, ut si efficaciori emetico opus, tartarum emeticum addat, vel hunc in oxymelle scillitico solutum exhibeat. Id^a habet incommodi Ipecacuanha,

t) *Prax. med. Lib. 17. cap. 3.*

u) *Act. med. Berol. Dec. 1. P. 9. p. 37.*

v) *Hist. febr. anom. p. 83.*

cuanha, quin in quibusdam epidemiis, vt, si vomitum non excitet, aluum tantummodo moueat, quod non aequè proficuum esse iam dixi; vnde et quocertius subuerteretur ventriculus in eiusmodi casu, tartarum emeticum praetulit SENACVS *w*). Haec conueniunt egregie cum PRINGLEI *x*) obseruatis, qui subinde contrarium effectum ex Ipecuanha contigisse queritur, scilicet quod subsequentes paroxysmi longiores et vehementiores inde euaserint, de cuius causa ambigit, vtrum inde quod iusto debilius fuerit, et plus corruptorum humorum in sanguinem transtulerit, quam deorsum excusserit, an aliud quid subfuerit; vnde tartarum emeticum adiunxit. Equidem addo, non aequè potentem esse Ipecacuanham, ac antimonialia, in effectum suo per reliquas corporis partes dispergendo.

Antimonialia igitur certioris efficaciae sunt, nec minus tuta, modo rite diluantur. Infusum croci metallorum SYDENHAMO placuit, cum quo aqua benedicta Rulandi aliis vsitata conuenit. Saepissime et chermes minerale felici successu SENACVS exhibuit. Praeter tartarum emeticum, in Scotia calx antimonii nitrata Ph. Edinb. *y*) hodie in vsu est, quae lentius operatur et certius, ideoque sudorem aluumque mouet: verum in manu timidi voto non satisfacit, in manu audacis damnum af-

S 3

fert

w) *De recond. febr. nat.* p. 153.

x) *Observat. on the dis. of the army*, Ed. 7. p. 209.

y) *Ed. nouiss. a.* 1783. p. 188.

fert 2). Subsistere igitur iuuat in vsu tartari emetici, modo rite praeparatus fuerit, quam artem, quae hodie chemicos tantopere exercet, dolendum, nondum vnanimi consensu expeditam esse. Cuiuslibet ideo prudentioris medici est, ante vsum eiusdem a pharmacopola prius explorare, an acidum tartaricum vitro antimonii, an croco metallorum, an, vt recentioribus quibusdam placuit, puluere Algerotti, debita encheiresi copulatum fuerit, et vtrum crySTALLINAM formam illi impertiuerit pharmacopola, an sola inspissatione lixiui acquieuerit. Differt enim pro hac diuersa praeparatione vis vnus eiusdemque doseos haud parum, quam omnium aptissime explorabis cauto in aegris aliquot capto experimento, donec dosis vera tartari emetici, qui in definito pharmacopolio paratur, constiterit.

§. 14.

Et haec quidem primaria emetica ea quantitate vel serie capienda intelligo, qua vere ventriculus subuertatur, etiamsi praeter emesin aliarum simul virtutum ratio habenda sit. Sed pro vomitu ciendo vel vnā ampliorem dosin exhibemus, qua capta intra quadrantem circiter horae vulgo effectus exurgit; vel hanc ipsam diuidimus in plures exiguas, quarum singula post quadrantis horae interuallum porrigitur, donec vomat aeger, nisi prima dosis iam sufficiat. Galli tartarum emeticum larga copia aquae solutum et per exiguas portiunculas hoc est cochleatim datum, *Emetique*

en

en lavage vocant, licet manifestum sit, istos imitatores fuisse Anglos, forsitan et Suecos, in Ipecacuanha refracta dosi administranda tempore priores. Ita iam dudum in eximio de infantum morbis libro Eques a ROSENSTEIN exiguas et repetitas doses Ipecacuanhae, imo contra intermittentes febres, commendavit. Quod ad methodum priorem, qua integra dosis emetici ingeritur; attinet, negari nequit, sic valide colluviem locis significatis collectam excuti, agitari corpus, alium succedere liquidam, et cutis spasms relaxatis sudorem erumpere. Quin, vrgente nausea, vomituritione, item symptomatibus capitis variis excruciantibus, et quando taedet aegrum repetitas doses ingerere, plenam dosin praefero; prout saepe paroxysmo praevenitum est emetico paullo ante capto. Tutius tamen vtimur emeticis partita dosi, quum hominis natura variet, nec semper praevideri possit, vtrum stimulo vomitorii grauius an mitius afficiatur; sic et minor omnino corporis concussio contingit; si tenaciores sordes sunt, hasce primis praebeis digerunt, et mobiles fluxilesque reddunt; et relaxando spasmos tanto plus efficiunt, quoniam diuturniorem in corpore moram trahunt.

§. 15.

Maximum autem discidium de tempore emeticum capiendi obtinet. Si medicorum artem exercentium et auctorum discrepantias inter sese compares, perinde esse crederes, praesente febre an apyrexia vomitum moueas, modo moueatur. Qui

vero tam empirice arte nostra occupantur, hi non solum plerumque scopo excidunt, sed et saepe in anceps praecipitant ipsam vitam humanam.

Plerique die vel tempore a febre vacuo aegros emesi subiiciunt, quod tempus ea quidem de causa aptius apparet, quod deferuescente paroxysmo vires collegisse et hinc novis concussionibus ferendis pares videntur. Et hi quidem plurimam partem id vnice pro scopo habent, vt corpus ad febrifuga capienda praeparetur. Quum vero tum omnia in corpore plerumque pacata existant, nec natura qua ducendum significet, nec ipsa suo molimine vim et effectum expediat, longe maior impetus requiritur pro vomitu ciendo, nec is excitatus salutare omnes istas et multiplices virtutes praestare potest, quas supra laudaui. Metuendum insuper merito est, ne stimulo euacuantis febris sopita intempestiue expergesiat. Pro norma esse poterunt egregii quidam aphorismi Hippocratici: *Concocta purgare et mouere oportet, non cruda, neque in principio, nisi turgeant a*); item, *quae ducere oportet, quo maxime vergant eo ducenda per loca conuenientia b*); et alii plures.

SYDENHAMI c) mos erat emeticum praebendi, appropinquante paroxysmo, tam tempestiue, vt
officium

a) *Señt. 1. Aph. 22.*

b) *L. c. Aph. 21.*

c) *Oper. Ed. L. B. 1741. p. 86. 310.*

officium suum praestiterit, antequam noua inuasio fieret. Tantoque felicius hic vsus, eo monente, successit, si post absolutam emetici functionem, immediate ante nouum insultum, syrampus de meconio, vel aliud anodynum, ad turbas excitatas pacandas, propinaretur. Anodynum subiunxit prae metu, ne febriles motus iam per tempus sopiti reuiuiscerent, prout et aliis in morbis post purgantia data ad pacandas turbas enatas simili subsidio vsus fuit, vel tum, quum alias meticulosior in opio praebendo esset. Idem consilium arripuit BOERHAAVIUS, ita vt quantum ex silentio eius colligitur, non aliud tempus pro exhibendo emetico admiserit. Hoc sine dubio tempus iis de causis, quas allegat COMMENTATOR, illi arrisit, nempe videri abundantem in primis viis saburram tutius expelli euacuantibus ante paroxysmum, quam vt aeger molestia operantis pharmaci et febre simul affligatur; porro versus paroxysmi tempus tantum materiae febrilis accumulari, vt spes affulgeat fore, vt tum eiusdem bona pars expellatur. Quum vero quicquid argumentorum sit, longe imbecilliori fulcro nitatur, quam quod experientiae superstructum sit: praeter istam, quam a SYDENHAMO et BOERHAAVIO exspectare licet, iuuat istam cl^{mi} CVLLEN d) nominare, qui, emetico plena dosi eo tempore subministrato, paroxysmo praecautum fuisse testis est, prout, concepto contagio et hoc ipso effectum suum exserere incipiente, aliquando feбри obuiam emetico itur. Sed quum alios fines haec medela simul respiciat, mouendi

S 5

scilicet

d) L. c. p. 165.

scilicet et subigendi impacta, spasmodicas constrictiones soluendi, sudorem pellendi, vereor, ne non tantae tum temporis sint efficaciae, ac quando mutationes morbosae inciderunt, cum quibus lucta ipsa iniri possit. Porro molestiam in applicatione facit, quod tempus ingruentis paroxysmi multipliciter variet, mox praeuertat, ut plerumque fit, mox retrogrado quasi passu, vel quod raro contingit, statuto typo, nisi in pertinaci malo, ingruat; unde periodus sumendi emeticum iusta difficiliter eruitur. Eximie huncce metum confirmat CELSVS ^{e)}); quare eum iam loquentem proferam: *Vbi, inquit, incerta tempora sunt, neque alui ductio — neque medicamentum aliud recte datur. Incertum est enim, quando febris ventura est: ita fieri potest, ut si subito venerit, summa in eo perniciēs sit, quod auxilii causa fuit inventum. — At ubi certus circuitus est, facilius omnia illa tentantur, quia facilius proponere nobis et accessionum et decessionum vices possumus.* Emetica itidem mox citius mox lentius operantur tam pro natura diuersa corporis, quam ipsa emetici indole. Ipecacuanha quidem post dimidium horae vomitum excitari innuit SWIETENIVS ^{f)}), antimonialibus autem post duas modo horas: sed equidem celeriozem effectum semper ex antimonialibus, nominatim tartaro emetico, modo rite antea solutus fuerit, percepi, ita ut ex hoc intra horae quadrantem vulgo effectus desideratus subsequutus fuerit.

Sed

^{e)} Lib. 3. cap. 12. p. 141. Ed. KRAVS.

^{f)} Comment. T. 2. p. 547.

Sed de alio iam disquirendum tempore, ad vomitum prouocandum opportuno, scilicet sub invasionem ipsius paroxysmi. Trahi huc aptissime posse mihi videtur coi g) consilium: *Incipientibus morbis, si quid mouendum videatur, moue.* Si quis vero nimis generaliter haec dicta arbitretur, en CELSI h) verba, qui rem acu quasi tangens, igitur, ait, *quum primum aliquis inhorruit et ex horrore incaluit, dare ei oportet potui tepidam aquam subsalsam et vomere eum cogere: nam fere talis horror ab his oritur, quae biliosa in stomacho resederunt. Idem faciendum est, si proximo quoque circuitu aequae accessit, saepe enim sic discutitur.* Huc et refero magni HIPPOCRATIS i) effatum: *Si autem quartana prehenderit, siquidem impurus fuerit, primum quidem caput purgandum et tribus aut quatuor interiectis diebus φαρμακον διδοναι αὐτῷ καὶ αὐτὴν τὴν ληψιν, (medicamentum sursum euacuans exhibendum est sub ipsam febris accessionem).* Quam egregie haec aliaque similia pristinae aetatis obseruata congruunt cum recentiorum summae auctoritatis practicoꝝ experientia. Horum numerum omnino auget THOMSONVS k), qui studiosius praerogatiuam huius periodi considerauit. Accedunt cll. GRAINGER, CVLLEN aliique bene multi. Per viginti annos optimo successu sub primum accessionis initium emeticum obtulit THOMSONVS ea tantum mutatione, vt, si horror mox sponte concussio-

g) *Aph. Sect. 2. §. 29.*

h) *L. c.*

i) *De affectionibus L. Sect. 5. p. 520. Ed. FOES.*

k) *Med. Essays and Observ. Vol. 4. p. 406. sqq.*

cussionem validiorem excitaret absque nausea, tum differret emeticum, donec caloris stadio nausea oriretur. Hocce enim tempore materiae morbosae plurimum ad ventriculum conuertitur et maxime haec est fluxilis et mobilis, vt tanto facilius excuti queat. Ita esse inde apparet, quod tum temporis dimidia vel duae tertiae doseos plus efficiant, quam plena dosis eo tempore ingesta, quo natura quiescit. Ita saepe vel vnico vomitu morbum iugulat, vel, si succedat alius paroxysmus, secunda dosi tantopere infringitur, vt vix eiusdem praesentia compareat. Quin THOMSONO obseruante aeger sic tractatus longe minori quantitate corticis peruiniani quam alias ad consummandam curationem opus habet. Tanto certius vero scimus, vomitum excitandum initio paroxysmi, si aeger ipse tum nausea et vomituritione corripitur, id quod quidem plerumque fit sub colluue biliosa. Miror igitur maxime, CLEGHORNIVM 1), qui de intermittentibus febribus egregias alias obseruationes memoriae prodidit, in emeticis erogandis contra hasce in vniuersum iusto timidiorem fuisse, nominatim dissuasisse eorum vsum intra paroxysmum; rationem addit iudicii sui, scilicet, ne concussio emetico excitata, iuncta cum ista ipsius febris, subitaneum malum cieat. Quantopere hoc differt a sana ratione et a millesies repetita experientia! ita vt excusationi huius vituperii hoc modo inferuiat, quod illi tertianae inflammatione viscerum stipatae obuenerint. Qui casus si incidat, merito ad blandiora pro euacuandis for-

dibus

1) *Dis. of Minorca*, p. 186.

dibus eaque aptiori tempore suppeditata et ad aliud curandi genus confugimus. — Vtinam cl. TILLAEVS *m*) in argumento tanti ponderis fusius recensuisset exempla funestissimi euentus emeticorum sub ipso paroxysmo sumtorum, quae refert Stockholmiae obtigisse, mortis nempe ex subita ventriculi inflammatione violentissimae.

Quam maxime autem a dictis temporibus ablu- dit illud, quo mox post accessionem emeticum exhibetur. Cui tamen pariter quidam, tanquam aptissimo, fauerunt, prout non raro in praxi medica fit, in extrema adeo et contraria medicos ferri. Duos modo noui auctores, qui publicis scriptis hoc ipsum non commendarunt modo, sed et reliquis periodis morbi praetulerunt, quorum Eques A ROSENSTEIN *n*) sine dubio potiori auctori- tate fruitur. Hic ipse sententiae de materia qua- dam febrem producente vel alente subscribens, sudoribus eius magnam partem dispelli arguit, quos, prout sub finem cuiusuis accessionis extrinsecus in cute magna copia erumpunt, ita et intus emergere copiosius arbitratur. Ne igitur ea vaporum pars, quam exhalant ventriculus et intestina vel hepar cum bile, moram trahens vasis inhalantibus et lacteis reorbeatur, et in sanguinem regurgitet, tempestiuo emetico excutiendam illam iubet, quo ipso igitur materiae febrilis bonam partem subtrahi ar- bitratur.

m) Auctor Diss. de varia febrium intermitt. curatione recus. in LINNAEI *Amoenitat. acad. Vol. 10. p. 157.*

n) *Om Barns Sjukdomar p. 311.*

bitratur. Hinc iam post primum vel secundum paroxysmum, ferentibus id adhuc aegri viribus, vomitionem praecipit, qua ipsa vel vnica aliquando febris vincitur; nisi haec ipsa sufficiat, subsequente inuasionem iteranda est. Iisdem fere, quae dixi, argumentis vtitur, etsi paucioribus mentem suam explicat, ad vomitum tempore, inuasionem proxime excipiente, commendandum cl. COLOMBIER o); nec apparet, illum Rosensteiniani consilii cognitionem habuisse, et sola imitatione eius eo delatum fuisse. Si theoriae vnice inhians, fateor plura huic tempori aduersari, quam fauere. Vt ne dicam pluribus adhuc dubiis circa materiem febrilem in febribus intermittentibus locum esse: videtur, concussione corporis ab emetico, eo tempore, quo omnis febris impetus deferbuit, et quo a praecedente horrore et calore virium insignis iactura facta, naturae ordinem turbari. Nec hoc tempore molimina ista vomendi amplius adsunt, quae nutum naturae alias indicant, et ipsi vomendi actui subueniunt. Facilius tollitur scrupulus, ne exhalatio in cauis ab aëre frigidiori seclusis contingeret, inde concipiendus, quod ex phisicis nouimus, vapores aquosos sponte non transferri nisi in aërem, frigidiorum illo liquido, ex quo profisciscuntur. Nam subtilis iste liquor, qui ex extremis arteriarum exhalat, impulsui a tergo vrgentis liquidi obsecundare debet, quod tanto facilius fiet, quum vasorum capillarium, quibus continentur, attractio hoc negotium adiuet. Hinc omne cauum humore,

perspi-

o) *Code de medecine militaire, P. 3. p. 88.*

perspirabili per cutem simili, in corpore animali humectatur, ut ne coalitus partium fiat et molestia in necessario motu, vel contenta dolorosos sensus excitent; hinc iste liquor vitiose nonnunquam colligitur, quin sanguis per eiusdem vias nonnunquam penetrat. Sudores vero pelli tanto abundantius emetico sub finem paroxysmi exhibito, et consequenter crisin salutarem promoueri, facile est ad credendum, siquidem impedimenta constrictionis spasticae sponte antea fuerunt sublata, et in laxam mollem cutem operatur vis emetici sudorifera.

§. 16.

En igitur insignia sententiarum diuortia in diiudicanda aptissima ad praeibendum emeticum opportunitate. Ne igitur in tanto discidio, quo quilibet partes suas strenuus tuetur et successum propria praxi exploratum pro pignore offert, parum vel nihil referre existimet, quo tempore ventriculus subuertatur, utrum hoc contingat sub apyrexiam, an sub paroxysmum ipsum, utrum prope initium, an sub finem eius, adiciam regulas quasdam, quae ad dirigendum iudicium medici faciant, in quibus tamen, quoniam consuetudinae fere ex praecedentibus sunt, breuius me expediam. In qualibet quidem febre constat, sordibus in praecordiis collectis eius impetum grauiorem fieri, et aduentitia hacce labe decursum eius alterari, mitescere autem colluie subducta. Sed quiuis dabit, non quolibet eiusdem tempore absque aegri incom-

incommodo euacuantibus indulgeri posse, et effectum ex hisce speratum pro temporis varietate mirifice differre. Huc spectat aureum HIPPOCRATIS consilium, in curandis morbis, regionis, tempestatis, temperiei, aetatis sexusque rationem haberi iubens. Addo ad peculiarem conditionem cuiuslibet aegri in morbo obuiam esse respiciendum, nisi vel hoc ad temperiem covs retulerit. Pro filo temporis eligendi emeticum esse debet tum ipsum naturae molimen, quod natura in febribus saepe declarat, tum et scopus varius, quem emesin excitando nobis praefixum esse supra innui. Quocunque tempore, vi morbi non vitio corporis, ea signa sese efferant, quae materiem turgere in primis viis idque fursum indicant, non differendum emeticum est, vt quod tum et blandius et efficacius operatur, natura scilicet indice et adiutrice. Si hoc contingit sub initium paroxysmi, tanto inconsultius esset, fato aegrum per duodecim, octodecim pluresque horas relinquere et exeunte tantum paroxysmo vel interuallo emesin ciere, quum huius ope dirae cephalalgiae, deliria, nausea, vomitiones, confestim saepe cessent, caloris subsequenter ferociae praeuertatur, et pabulum ipsi feбри subducatur. Si vero saburra ista non turget, tum temporis festinare non opus est, sed potius emeticum ad apyrexiam et quidem ad definitum a SYDENHAMO tempus differendum, quo aegro concedatur vires colligendi copia. In febribus intermittentibus, quarum colluies manifestior in primis viis collecta, biliosa praecipue, haec

haec quantocyus excutienda, siue paroxysmus ad-
sit siue desit, quarum e censu sunt multae epide-
micae febres, item endemicae variae, nec non
febres primo autumno incidentes; quo diutius
exspectes, eo magis debilitatur aeger tam a morbo,
quam ab emetico serius exhibito, et eo magis fe-
bris alitur. Si potior vero finis is est, vt sudo-
ribus expellatur fomes febrilis, patet Rosensteinia-
num consilium dandi emeticum sub finem paro-
xysmi esse optimum. Ad spasmos dissipandos,
quas subesse constat, confert praecipue emeticum
parua et repetita dosi sub ipsam inuasionem febris
ingerere.

§. 17.

Haec antispasmodica virtus, vix alia, videtur
sefe exserere Tartaro emetico vel Ipecacuanha tam
minuta dosi praecepta, vt vomitum mouere ne-
queat; quod vtrumque medicamen alias in morbis
omnium suffragio spasticis vtiliter datur, Ipeca-
cuanha nominatim in asthma conuulsivo, malo
hysterico, tussi conuulsiva, Tartarus emeticus pa-
riter in morbo nouissime dicto; et vtrumque pa-
riter dicta dosi vteri haemorrhagiam sistere valet,
malum saepissime a spastica causa oriundum. HEV-
ERMANNVS *p*) dicta exhibuit ea dosi, vt aeger
nausearet, scilicet Tartarum emeticum ad $\frac{1}{4}$ grani par-
tem

p) *Bemerk. und Untersuch. d. ausüb. Arzneiweiss. Vol. I. p. 36.*

tem in febre tertiana, vel Ipecacuanham ad granum vnum quotidie, sicque febrem sopiuit. Recentius cl. WICHMANNVS q) febrifugam Ipecacuanhae virtutem stabiliiuit, eo ordine eam administrans, quo cortex peruuanus alias solet, scilicet vt omni trihorio granum vnum eius cum sacchari vel magnesiae albae scrupulo vno caperetur. Sic scrupulis eius duobus captis plerumque febris conticuit; recidivae praeuertit scrupulus tertius, inde a die octava (in tertiana) captus. Roborandi scopo aliquando cortex peruuanus subiunctus.

§. 18.

Quam varios multoque diuersos effectus vni eidemque medicinae debeamus pro dosi et exhibitionis ratione diuersa, vel hocce exemplo palam fit. Sed quum de dictorum remediorum tali dosi hic agatur, qua emesin vere cient, addi adhuc oportet, quomodo subinde praeparari corpus ad emetica debeat, vt tanto facilius, certius et tutius, vim suam exferant. HIPPOCRATIS illud praeceptum „*corpora ubi quis purgare voluerit, facile fluentia red-
dere oportet,*” sequenti r) diluentia varia, qualia sunt decoctum hordei, auenae, radicum farinacearum, vel serum lactis, in quibus omnibus parum mellis solui potest, saepe praemittimus, eo fine, vt saburra

q) MEYERI *Diff. de eximio Ipecacuanhae nec non aliorum quorundam emeticorum refracta dosi exhibitorum usu*, Gottingae. §. 23.

r) *Aphor. Sect. 2. p. 9.*

burra solvatur mobilisque fiat et fibrae relaxentur, quibus sufficiens expulsio eius tanto minori violentia et concussione succedit. Et hac quidem providentia praecipue opus est in hominibus biliosis, plethoricis, exercitatis, temperie ficcis. Quibus tenaciores sordes sunt, digestivis siue salinis praeiis prospici debet. Aluo vero obstructa siue torpida, e re est, clysmate illam prius subducere.

Non parum porro ad blandum et aerumnae expertem operationem emetici facit iustum potus moderamen, illud scilicet, vt, dum emeticum capitur, non plus bibatur, quam ad deglutendum illud opus est, instante et praesente autem operatione tanto copiosius potetur, et quidem aqua tepida, vel infusum Theae dilutum, vel infusum florum Chamomillae, quorum florum vis febrifuga insuper longe lateque ante familiarem corticis peruiani usum increbuit.

§. 19.

Et horum praesidiorum adiumento vomitio in intermittentibus febribus infantibus aequae ac adultis, foeminis aequae ac maribus, tutissima est. Vulgaris quidem error est, quod plus periculi dato emetico apud infantes subsit; verum hi maiori liquorum copia instruuntur, et fibris longe flexilibioribus, quam adulti, vnde vel hisce facilius detrimento emesis, quam illis, esse poterit.

Nec negligenda, si opus, ut saepe fit, iusta emetici repetitio est, qua omissa non mirum, nos voti non compotes semper fieri. Necessitatem indicabunt signa supra exposita. Crebrius hoc obvenit in intermittentibus autumnalibus, in quibus et largior bilis corruptae copia stabulari et tenacior esse colluies solet. Tempus iterandi hocce medicamen commodissimum et ratio ex dictis intelligitur.

XVIII.


VINDICIAE

NOMINVM TRIVIALIVM

STIRPIBVS A LINNEO

EQV.

IMPERTITORVM.



VINDICIAE
 NOMINVM TRIVIALIVM
 STIRPIBVS A LINNEO EQV.
 IMPERTITORVM. *)

SECTIO PRIOR.

§. I.

Stupet vulgus, stupent multi ex docto coetu cum eo, copia nominum in re herbaria obviorum, hisque memoriae firmiter infixis totam scientiam contineri arbitrantes botanicum saepe eum salutant, qui vix siccandis herbis et dextre agglutinandis aptus est, aliumque, cui inter strepentes iocos nomen plantae non illico in mentem recurrit, ad tyronum subsellia relegant. Hi igitur ei praecise rei in botanice plurimum meriti tribuunt, cui inest minimum, quum e contrario stirpes, post acquisitam terminorum partium notitiam (ad quam, nisi ludere velimus, breui perueniri potest), per singulas partes scrutari et ex systemate commodo plantam ignotam eruere primum in re herbaria sit. Inuentor vero et veteranus in terminis commodis

T 4. partium

*) Programmata duo a. 1782. edita.

partium plantarum cudendis, nouo systemate condendo vel iam praestito expoliendo, stirpibus ex systematis fundamento rite nuncupandis, regulis bonae methodi et denominationis stabiliendis, nouis stirpibus apte describendis, depingendis et collocandis, synonymis et iconibus diiudicandis, cognationibus inuestigandis, abditis vegetationis et propagationis legibus eruendis et phaenomenis singularibus indagandis, item hortis botanicis colendis, studiose occupatur. Carere praeterea exacta cognitione eorum non potest, quae ab antecessoribus et coaeuis in sua scientia praestita fuerunt. Quantum ingenii, iudicii, laboris, industriae, patientiae, ad haecce omnia pernoscentia et procuranda requiratur, et quam perperam sibi multi, Florae sacrario appropinquantes, metuant, ne ob memoriae imbecillitatem in limine excludantur, ex dictis facile intelligitur. Non ideo sperno memoriae alacritatem, sed ut quamlibet aliam diuinitus menti humanae tributam vim magni facio, et in retinendis iis faciliiori opera, quae ingenium botanici excogitauit, insigne adiumentum praebere, lubens agnosco. Id modo volo, scientissimum aliquem esse posse botanicum, mediocri tamen memoria (qualem e. c. LINNEVM etiam si flore aetatis constitutum in vulgaribus subinde stirpibus cognoui) instructum, nec sufficere vel felicissimam non numerosis terminis modo technicis, quae partes plantarum et distributionem systematicam spectant, sed tot stirpium nominibus, secundum systematum multiplicem varietatem excogitatis, seruandis. Systematum igitur
admini-

adminiculo, quae nomina contrahunt, carere nos nullo modo posse, in patulo est.

§. 2.

Abbreuiavit Eques A LINNÉ mira sagacitate stirpium nomina, non solum eo, quod varietates ad suas species reduxit, sed et eo, quod loco definitionis stirpium, saepe sesquipedalis, quam antecessores vbiuis fere nomini generico attexerant, nomen specificum perperam illam appellantes, duobus modo vocabulis, generico et triuiali, singulam speciem insigniuit. Triuiali nomine vero ille primus ea significatione vsus est, vt eodem breue epitheton generis intelligeret. Quod ad reductionem istam varietatum ad species attinet, negari nequit, illustrem virum aliquando iusto rigosorem fuisse, et varietates idem ius habere nomina peculiaria sibi vindicandi, ac verae species, quod multis quidem exemplis ipse agnouit. Tanto maiorem assensum plausumque videbatur expectare posse nominibus triuialibus inuentis, quum iis tam memoriae mirifice subuenerit, quam compendium scriptionis et enunciationis nominum stirpium supeditauerit maxime egregium. Quis non horreat, vt mox in limine rem exemplis declarem, eiusmodi MICHELI nomen, quale: *TRIFOLIASTRVM pratense, corymbiferum, non repens, humi stratum, alte radicum foliis subrotundis, alba, falcata macula, vix notatis, floribus minoribus, suauerubentibus, siliquis tetraspermis, superna parte tantum marginatis, semine subobsuro, maculato. Gener. p. 27. — vel sequens*

PLVKENETII: ACROCHORDODENDROS *sive arbor indica praegrandis foliis integris, platani fructu verrucoso minore sive fragiformi duro, cuius singuli bati sive tubercula sunt capsulae seminales; (melius forsan) Arbor indica praegrandis foliis integris fructu rotundo parvo fragiformi e tuberculis capsularibus composito. Mant. p. 4.; — vel illud BREYNII: ACACIAE quodammodo accedens, Myrobalano chebulo Veslingii similis arbor Americana spinosa, foliis Ceratoniae in pediculo geminatis, siliqua bivalui, compressa, corniculata, seu cochlearum, vel arietinorum cornuum in modum incuruata; sive Unguis cati. Prodr. fasc. rar. plant. p. 38?* et quis non aequae tranquille ad triremes damnari se pateretur, quam ad aliquot millena tantae longitudinis nomina memoriter pro lubitu interrogantis recitanda? Verum quidem est, paucorum botanicorum nomina sic dicta specifica ad giganteam istam magnitudinem succreuisse. Fac vero ea restringi ad sex, imo duas, voces: quanto volubilior est lingua in enunciandis nominibus Linneanis: Munchausia speciosa, Halleria lucida, Zinnia pauciflora, Büttneria scabra, Murraya exotica!

§. 3.

Laudis vero loco, quam historiae naturalis restaurator coarctatione nominum promereri videbatur, eadem opprobria tulit, quibus ab HEISTERIS et SIEGESBECKIIS cumulabatur, dum systema novum botanicum condendo a nominibus antecessorum deflecteret, non vago quidem et versatili arbitrio ductus, sed ipsis legibus, quas distributio nova vegeta-

vegetabilium imposuerat, et quarum rationem in *Critica botanica* dederat. Repudiare se vero nomina triuialia tam in vniuersum, quam ista a LINNEO inventa, declararunt auctores vel apertis verbis, in conuicia et cauillationes humiles subinde degenerantibus, vel obstinatio eorum in scriptis neglectu, eo tempore, quo ab aliis iam vndique in vsum vertebantur, nec LINNEI definitiones specificae, auctoritatis et intelligentiae causa, omitti poterant. Vtraque ratione aemulus Linneanae laudis, ill. AB HALLER, aduersarium eius se declarauit, qui quavis occasione, nominatim in recensu Gottingensi librorum nouorum (*Gött. gel. Anzeigen*), hocce inventum vituperauit, et in *Historia stirpium indigenarum Helvetiae* fere vbiuis nomina triuialia omisit, quod studio deditaque opera esse factum nec sine omni probabili ratione, ex sequentibus Praefationis a) verbis cognoscitur: *Triuialia*, inquit, quae olim vir clar. (LINNEVS) proscripserat et RIVINVS satis bona dederat, noua creare nolui, quum nescio quid leuiusculi in plurimis mihi videatur, et difficillimum sit, caracteristicum aliquid in unam vocem stipare. Quod ADANSONIVS, qui pauca in LINNEO aliisque praeter suum TOVRNEFORTIVM laudanda inuenit, improba- verit hasce voculas, non mirum, qui quidem redarguens in iis, quod definitionem specierum non inuoluant, tandem erumpit, hasce neque nouum inuentum, nec rem Botanicae proficuum constituere b). Adiutor mihi ignotus in edenda *Flora Aegyptia-*

a) Pag. 23.

b) *Familles des plantes*, Vol. I. Praef. 129.

Aegyptiaco arabica b. FORSKÄLII c) fluxa appellat haecce nomina et, dum characterem plantae designarint, saepe animum denominatoris et satyram expressisse putat, hinc praetulisse se innuit arabicum nomen, dum planta non obtulerit signa satis manifesta. Cel. olim Helmstadiensium Professor FABRICIVS, qui, HEISTERI etsi successor, LINNEO alias tamen plurimum tribuit, eiusque *Species* vbi-vis allegavit, omisit haecce nomina in *Enumeratione plantarum Horti Helmstadiensis*. Potiorem locum definitionibus specificis adscribens cl. GERARDVS d) exclusit nomina ista, in *Flora* sua, licet vsum eorum eximium non diffiteatur. Omisit quoque ea cl. SAM. GOTTL. GMELIN in continuatione *Florae Sibiricae* patruui sui, sine dubio prae contemptu, quum ipsas adeo definitiones curtas specificas se non amare significet e). Mutasse iudicium suum de horum nominum pretio videtur intra biennium cl. REYGER, quippe qui in *Florae Gedanensis Tomo primo* ea expunxit, in *secundo* autem eadem adposuit. Nulla pariter ratione adiecta reticuit ista cl. WVLEFF in *Flora Borussica*, LINNEI ceteroquin in genericis nominibus et definitionibus specierum assecla.

§. 4.

Sed non opus est ampliori recensu eorum, quibus hocce LINNEI ausum displicuit. Agendum
potius

c) *Praef. p. 19.*d) *Flora Gallo-provinc. Praef. p. 17.*e) *Loc. cit. Praef. T. 3. pag. 6.*

potius de aetate huius denominandi stirpes artis, discutienda argumenta, quae eius dignitatem stabiliunt, et inquirendum, quibus contra rationibus ducti alii eandem reprobauerint, tum et tentandum, an regulae quaedam statui possint, quae ad nomina triuialia expolienda eaque vsui aptiora reddenda faciunt.

§. 5.

Mirari subit, quod, qui deprimere pretium horum vocabulorum annisi sunt, eadem tamen, antecessorum quorundam LINNEI ore enuntiata, non mala inuenerint. Lubens dabo, eum non primum hocce denominationis genere vsum fuisse, quin ipse confitetur. *f*) DIOSCORIDEM peruoluens plura documenta duorum modo vocabulorum pro designanda stirpe inueniet. Exempla sunt: Aristolochia rotunda, longa, Strychnon erythronium, Strychnon (Solanum) Halicacabum, Ampelos (Vitis) alba, Lychnis syluestris, Hieracium magnum, Chamaeleon album. Post eum, plures ante LINNEVM auctores idem consilium sequuti, exemplis stirpium haud raris, quorum quaedam heic designare, vt ex corollariis postea subiiciendis patefcet, suo vsu non carebit. Litteram L. adiungam, si iisdem praecise nominibus Praeceptor subscripserit. Huc itaque pertinent:

LOBELII Cotyledon aquatica, Petroselinum (Bubon L.) macedonicum, Crocus satiuus L. Phalangium

langium Matthioli, Thlaspi syriacum, Vitis vinifera L. Coris monspeliaca L. Gnaphalium montanum, Nymphaea alba L. lutea L. Cicutaria fatua, Nasturtium indicum, Tribulus terrestris L. Phaeolus vulgaris L. Vrtica romana, Circaea lutetiana L. multaque alia similia huius botanici nomina.

RAVWOLFFII Plantago Catananche, Ribes Arabum.

CAMERARII Scabiosa minor, Plantago maior L. Symphytum petraeum, Amaranthus cristatus, Perfoliata montana, Althaea thuringiaca (Lavater thuringica L.), Polygonum maritimum L. Saponaria vulgaris, Scrophularia peregrina L. Hesperis pannonica.

CLVSII Verbena supina L. Leontopodium creticum, Spartium austriacum, Cynoglossum creticum, Solanum lethale (Atropa Belladonna L.), Apocynum syriacum (Asclepias syriaca L.), Narcissus ferotinus L. Fritillaria pyrenaica L. Colchicum montanum L. Ornithogalum neapolitanum, Anisum vulgare, Caucalis maior; Thymbra legitima, Polygala valentina (Coronilla valentina L.), Tripolium Dioscoridis, Chrysanthemum valentinum (Anacyclus valentinus L.), Tanacetum inodorum, Carduus eriocephalus.

DODONAEI Dipsacus sylvestris, Asperula coerulea, Clematis daphnoides, Angelica sylvestris L. Seseli creticum, Bupthalmum angustifolium, Rhus coriaria L. Lilium candidum L. Capparis Fabago (Zygo-

(*Zygophyllum Fabago* L.), *Ranunculus aquatilis* L. *Moluccella laevis* L. *spinosa* L. *Trifolium bituminosum* (*Pforalaea bituminosa* L.) *Lapathum rubens*, *Genista spinosa*, *Chamaemelum odoratum*.

10. BAVHINI *Nardus celtica*, *Rapunculus montanus*, *Foeniculum tortuosum*, *Alfina tenuifolia* (*Arenaria tenuifolia* L.), *Reseda lutea* L. *Millefolium creticum* (*Achillea cretica* L.), *Gnaphalium germanicum* (*Filago germanica* L.)

CASP. BAVHINI numerosissima, e. c. *Verbena nodiflora* L. *Valeriana rubra* L. *Valerianella echinata*, *Chamaelea tricoccus* (*Cneorum tricoccum* L.), *Gladiolus foetidus*, *Triticum aestivum* L. *Rubia cynanchica*, *Galium rubrum* L. *Valeriana coerulea* (*Polemonium coeruleum* L.), *Alchemilla vulgaris* L. *Cuscuta maior*, *Cerinthe minor* L. *Rhamnus catharticus* L. *Glaux maritima* L. *Linaria scoparia* (*Chenopodium scoparium* L.), *Ammi maius* L. *Sium latifolium* L. *Alfina media* L. *Allium sativum* L. *Dictamnus albus* L. *Satureia hortensis* L. *Origanum creticum* L. *Orobanche ramosa* L. *Alcea cannabina* (*Althaea cannabina* L.) *Coris lutea* (*Hypericum Coris* L.), *Aristolochia maurorum* L. *Populus nigra* L. *tremula* L. *Eupatorium cannabinum* L.

RIVINI *Periclymenum virginianum*, *Angelica tenuifolia*, *Laserpitium minus*, *Myrrhis canadensis*, *Pyrola minor* L. *Spartium africanum*, *Hormipum pratense*, *Stachys sylvatica* L. *Satureia perennis*, *Stoechas serratifolia*,

ratifolia, Lathyrus pratensis L. Vicia sepium L.
Hedysarum trifoliatum (canadense L.).

TOURNEFORTII Globularia vulgaris L. spinosa L.
Xylosteum pyrenaicum, Pseudoacacia vulgaris,
Coronilla minima, Marrubiastrum vulgare.

RVMPHII Piper longum, Sirum decumanum,
Manga domestica, Gallinaria acutifolia, Blinbin-
gum teres, Sesamum indicum L. Arisarum amboi-
num, Clypearia alba.

Omitto similis tenoris nomina in COLUMNAE,
TRAGI, PLUCKENETI, RAII, MORISONI, CORDI, AL-
PINI, BOCCONIS, BONTII, CORNUTI, PISONIS, DIL-
LENII aliorumque operibus, quae ante hanc LINNEI
reformationem prodierant, passim obuia. Prae
ceteris magnae auctoritatis botanicis, CLUSIVS, DODO-
NAEVS, CAMERARIVS, BAVHINI, RIVINVS, RVMPHIVS
huic compendiariae stirpium denominationi indul-
ferunt; nec plus sagacitatis in Rivinianis huius ge-
neris nominibus reperio, quam in aliis. Rarissime
vero eadem adhibuit TOURNEFORTIVS. Alio subinde
artificio ad distinguendas species usus fuit CLVSIVS g),
longe minus concinno, scilicet per solos numeros
generico nomini adnexos, e. c. Cytisus prima,
2 - 7. Conferantur et eius genera Ledon, Allium,
Gentiana, Sedum, Sideritis, alia.

§. 6.

g) *Rarior. plant. Hist.*

§. 6.

Vtut vero auctores hi de vtilitate breuioris nomenclaturae plantarum persuasi fuerint, vt exemplis numerosis istis constat, nemo tamen ante LINNEVM hocce compendium ad omnes et singulas plantas applicauit. Ast serius ad hanc rem accessit ill. vir, siue aliorum obtrectiones metueret, siue difficultatem in auso perficiendo perspiceret. Nec ante annum 1749, quo *Dissertatio, Pan Suecus* inscripta et ad stirpes vnice Suecicas pecori placentes respiciens, comparuit, haecce nomina adhibuit, quae quidem nec in *Materia medica regni vegetabilis*, quae eodem anno prodiit, occurrunt.

Non tamen ipse satis de eorum dignitate ne anno quidem 1751. *h)* conuictus fuisse videtur, quum forte admitti posse haecce declararet, nec illa iisdem legibus, ac reliqua nomina, de quibus in *Philosophia botanica* agit, submitteret; donec in *Specierum plantarum editione prima*, quae prelo exiit a. 1753. omnes species, praeter definitiones, quae characteres summos continent, eiusmodi nominibus instrueret. Dein et animalia, quin a. 1768. ipsa mineralia, eadem compendiaria ratione designauit. Nemo autem illo maiorem modestiam in re tanti laboris et tantae vtilitatis testari potuit. Quum enim hisce nominibus in *Pane Sueco* *i)* vteretur, praemit-

h) *V. Phil. bot.* §. 257. qui liber anno dicto euulgabatur.

i) *Amoen. acad.* Vol. 2. p. 42.

praemittit, *ut breuitati fluderet, necessum fuisse, adhibere nomen genericum et breue atque minus sufficiens epitheton, quod tamen ex ipsa Flora (Svecica) illustraretur.* Et in *Specierum plantarum* editione prima k) subiungit verba: *Caueant autem quam sanctissime omnes sani botanici unquam proponere nomen triviale sine sufficiente differentia specifica, ne ruat in pristinam barbariem scientia.* In altera eiusdem libri editione a. 1762. addit, *mutationem horum licet in melius magis nocere quam prodesse.* Itaque ipse mox initio abusui huius nomenclaturae apud hosce praevertit, qui eadem acquiescendum in determinandis plantis putarent. Et ipse non negavit, posse eorum quaedam reddi magis nitida et exquisita, quae tamen scopo, cur prolata in medium essent, sufficerent. Quis ideo fuit scopus, quem LINNEVS iisdem praefixerat? Is si recte perpenditur, plurimum controuersiae sopitur, quam iisdem enatam vidimus; nam alium finem LINNEVS sibi hisce proposuerat, alium alii. Voluit iste constare illa ex vnico vocabulo, et hoc quidem vndequaque desumpto l). Nomina igitur praestare vnice voluit, similia quoad scopum istis, quibus ad designandas res in vita communi obuias utimur, vel si malis, titulos differentiae specificae, non vt multi alii voluerunt, differentiam praecise ipsam. Nullum aptius vnquam potuit excogitari compendium in designandis stirpium speciebus, quam hoc, vt, prout nomen generis vnico vocabulo consisteret, eadem breuitate et species designaretur.

§. 7.

k) Praef. pag. 4.

l) Phil. bot. §. 257.

§. 7.

Desiderat hanc nominum breuitatem insignis stirpium copia, quam per tot secula humana sagacitas detexit. COMMERSONIVS *m*) asseuerabat, se in collectione sua herbaria 25000 species diuersas plantarum seruasse, et spem fouebat, fore vt ad minimum quadruplum vel quintuplum huius numeri insuper in telluris superficie detegatur. Superat haecce computatio adeo istam ADANSONII *n*), in calculis suis alias non parum prodigi, qui 18000 stirpibus iam detectis addi posse 25000 nouas olim inuestigandas sibi persuaerat. Pone vero certiolem calculum LINNEI esse, qui omnes plantas vix numerum 10000 attingere innuit, vel OEDERI *), harum circiter 3000 esse Europaeas: quilibet fatebitur, vel hasce non posse sine dispendio magno temporis significari, siue viua voce siue litteris scriptis id fiat, et memoriam haud parum grauari, si nominibus definitiones vtut breues, vel, vt alii easdem vocant, differentias specificas substituas. Vetuit quidem LINNEVS hasce ipsas vltra duodecim verba extendere, o) nec ille ne tot quidem nisi rarius opus habuit. In brevioribus generibus subinde adeo binis rem expediuit, exemplo Tamaricis (Gallicae) floribus pentandris, Tam. (Germanicae) floribus decandris; Gloriosae (superbae) foliis cirrhiferis, Glor. (simplicis) foliis acuminatis; Moraeae, Exaci, Alstroemeriae, Fuch-

V 2

siae,

m) *Observations physiques, par ROZIER Vol. 5. p. 107.*

n) *Familles des plantes, Preface pag. 322.*

*) *Eleni. botan. p. 338.*

o) *Critica bot. pag. 212.*

fiae, Chrysofplenii, Geropogi rel. Merito quoque laudandae definitiones TOVRNEFORTII, HALLERI aliorumque nonnullorum, qui characteres enumerando commodos breuitati tamen litarunt. Sed reuiuiscunt nostro tempore hinc inde largiores istae specierum definitiones, quales istae, quas cel. DV ROY Rosis *p*) tribuit, e.g. Rosae (eglanteriae) calycibus semipinnatis, germinibus globosis glabris, pedunculis petiolisque hispidis glandulosis, caule aculeis sparsis curuis, foliolis subrotundis ferraturis glandulosis; vel quales adiutor in edendo *Supplemento Linneani Systematis q*) *vegetabilium* Mespilo suo Xanthocarpo, Mespilo Phaenopyro, Pyro Amelanchier, impertit, quas, utpote ab ill. Praeceptoris tenore alienissimas, repetere piget. Ast etiamsi hae definitiones specierum ad bina vocabula ubiuis restringi possent, quod in vniuersum quidem fieri nequit: per plura millia exempla vni voci parcere posse, non parum lucri est. Quanto facilius est in praelectionibus academicis et inter familiares sermones indicare, quas intelligimus stirpes hisce vocabulis; quanto commodius est, hacce arte stirpes citare, dum eorum in libris mentio facienda breuius; quantum inde redundat leuamen in commercio literarum botanico, dum catalogis centenae aliquot plantae a nobis vel quaerendae vel offerendae sunt! Et licet in tanto plantarum numero vix vnquam sperari possit, ut quilibet oblatam quamuis stirpem mox in qualibet aetatis linea et quouis animi siue

corpo-

p) Harbkefche wilde Baumzucht Vol. 2. p. 336. sq.

q) Pag. 254. 256.

corporis habitu vel breuibus hisce nominibus nuncupare possit: extra dubium tamen est, subsidium vere magnum ex hisce memoriae in plantis familiaribus sibi que magis obuiis suppeditari.

§. 8.

Verum obiicis, spernenda esse nomina haecce ideo, quod characterem stirpis rarius exprimant, vel exprimere possint. Nonne vero tempore, quo lingua quaecumque excogitaretur, perinde fuit, an nomen e. c. capitis cordi, ensis baculo, mensae scamno, tribueretur; et sic de adiectiuis et vocibus plerisque reliquis sentiendum, usu et consuetudine modo valorem obtinuisse ad id significandum, quod iam significant. Idem obtinet in nominibus, quae vocant, propriis, quae vtrum exprimant notas aliquas in viro, cui eiusmodi competit, singulares, nec ne, parum curamus: ita Fortis nomine subinde insignitur pusillanimis, Magni, qui statura paruus est, Sancti vel Probi, qui latro vel parricida potius effet dicendus, Nigri, xylinis capillis et pallida facie instructus. Si nomen speciei semper characterem plantae prae se ferat, cur non idem desideras semper et vbiuis a genere. Sed quidnam characteristici latet e. g. in nomine Veronicae, Verbenae, Alchemillae, Lini, Allii, Fumariae, Violae? Quid characteristici in Vnifolio DODONAEI, quod nomen et assumsit HALLERVS, licet stirps haec semper duobus foliis instruatur? Vt taceam tot alia genera, quorum formas tamen quilibet exercitior nomine pronunciato vel scripto sibi repraesentat.

Cur igitur in nomine speciei characterem seu definitionem vel notas discriminis a speciebus congeneribus, absolute desideras, quum nomen et definitio speciei duo sint maxime inter se diuersa. Adsentientem habeo inter alios GERARDVM, r) qui *peccant*, inquit, *qui nomina eo usque producunt, ut confundatur cum definitione nomen et huic tribuatur, quod sui iuris non est*. Neutrum suo pretio destituitur, sed alterum absque altero subsistere sine defectu potest. Non negandum tamen, et multos prioris aetatis botanicos, et LINNEVM praecipue, vtrumque saepe numero pereximie copulasse, eodem successu, quo in plerisque classibus vel ordinibus systematis vegetabilium, quasi se inscio, naturales cognationes assequutus est.

§. 9.

Praerogatiua praeterea nomini cuius vulgo competit haec, quod promptius longe ideam rei iam perceptae resuscitet, quam optima definitio vel descriptio, figuram, proportionem, magnitudinem, vsum rel. spectans. Facilius longe hominis etiamsi centies visi imaginem in mentem reuocabis solo eius audito nomine, quam si tibi per nasum suum aduncum, supercilia lata, labia tumida, protuberans mentum, capillos nigros, vocem, gressum, gestus, rel. describeretur. Ita sine cunctatione me intelliges, si Vaccinii Myrtilli nomine vtor, quum e contrario rei herbariae etiamsi gnarus

r) *Flora Gallo-Prov. Praef. p. 16. Conf. simile effatum OEDERI in Element. botan. P. I. §. 144.*

gnarus haesitaturus paullisper sis, si eandem vulgarissimam plantam per *Vaccinium pedunculis unifloris*, foliis ferratis ouatis deciduis, caule angulato, designem, vel, loco *Phaseoli vulgaris* nominis, eandem stirpem hortensem per *Phaseolum caule volubili*, floribus racemosis geminis, bracteis calyce minoribus, leguminibus pendulis, tibi significem.

§. 10.

Aliud insuper momentum commendationis nominum triuialium protulit ill. LINNEVS 5), quod nimirum differentia specifica, quae olim vicarium usum tulit nominis triuialis nouis detectis speciebus, addo, vel aciori indagine succedente, mutationi obnoxia sit. — Nonne vero, si characteristica euadant haec nomina, eidem inconstantiae submittuntur, nec fini saepe nisi per tempus satisfacient? Comparantur tantum diuersae editiones vnius eiusdemque enumerationis stirpium, si modo ab auctoribus laboriosis et veri cupidis profisciscantur: quantum discriminis apparet in definitionibus istis specierum, etiamsi nouae species non accesserint! Quin optimus HALLERVS *Nomenclatorem ex Historia plantarum indigenarum Helvetiae &c. excerptum* etsi eodem anno edens, quo opus primarium, non potuit a variis mutationibus characterum sibi temperare. Nec eiusmodi mutationes vituperandae, quum in scientia tanti ambitus et tantae difficultatis vulgarissimum istud, "dies diem docet", verissi-

mun sit, et humana mens nonnisi post varios errores verum attingat. Sed, praeter hancce nostram imbecillitatem, aliam saepe necessitatem mutandi definitiones istas imponit nouarum stirpium eiusdem generis detectio saltem ad LINNEI mentem, qui quidem ita t): *Qui nouam detegit speciem, addat et non modo eiusdem differentiam, sed et in congeneri vel congeneribus differentias augeat* (adiicio ex alio fonte), *u) et corrigat, ut distinguantur in posterum species sufficienti differentia.*" Fateor postulari hic rem grauissimam, taedii plenissimam, quam praestare saepe vltra vires vel exercitatissimi botanici est. Eiusmodi enim emendatio characterum non collatis vnice descriptionibus sed saepe ipsis plantis viuissimè sedulo inter sese comparatis superstrui debet, quas quidem conquirendi copia saepe nos deficit. Verendum quoque valde est, ne crabrones tentatis hisce emendationibus irriteremus. Nec vnquam spes est fore, vt, qui definitionibus quibusdam annorum longa serie receptis assueuerint, hasce dimittant nostrasque emaculatiores praeferant. Hae rationes sine dubio in causa sunt, cur recentiores quidam botanici scientia et felici occasione in detegendis nouis stirpibus inclyti, vt JACQVINVS in *Horto Vindobonensi*, *Flora austriaca* et passim in *Miscellaneis austriacis*, item PALLASIUS in *Itinerario*, praeter nomina triuialia, nonnisi descriptiones ampliores siue, vt cum LINNEO loquar, characteres naturales specierum admittant, omissis definitionibus istis brevibus

t) *Loc. cit.* §. 294.

u) *Critica bot.* pag. 217.

vibus alias consuetis. Non caret sua molestia haecce omissio, dum ab istis recens obseruatas plantas catalogis inferere volupe est; cogimur enim ipsi ex ampla descriptione characteres primarios eruere, eosque adicere triuiali nomini, quippe quo solo acquiescere non possumus, id quod vero longe accuratius et faciliori opera ab inuentore plantae praestari potest *).

§. II.

Varii quidem alii modi excogitari possunt significandi stirpium species, praeterquam triuialibus nominibus. Huc pertinet ille per numeros descriptionibus vel tabulis, quibus depingantur, inscriptos, qua arte nihil noui magis exsuccum, nihil sterilius. Nec sane CLVSIVS, botanicorum sui temporis princeps, ea multis exemplis adhibita reliquum botanicum suum meritum exaequauit. Ductus vel figurae ex chemia vel aliunde petita aeque parum intelliguntur, nisi praesente libro, qui instar clauis est. Sic et de plantarum per litteras designatione sentiendum, quam quidem se ipsum in codicibus suis manuscriptis in vsum traxisse refert ADANSONIVS x) hicque ita, vt in ampliori genere praefixo nomine generico quinque priores species per quinque vocales distinguat, et reliquas consonante cum vocali copulata denotet. Secun-

V 5

dum

*) Subuenit serius ex meis votis ill. DE JACQVIN huic defectui communicatis mecum differentiis specificis pro *Systematis vegetabilium* editione 14.

x) *Loc. cit. Preface pag. 176.*

dum hanc normam quinque priores species Linneanae generis Sidae (*Spec. pl. p. 260.*) nominandae Sida *a*, Sida *e*, Sida *i*, Sida *o*, Sida *u*, loco nominum Sida spinosa, alba, rhombifolia, alnifolia, retusa; sexta Sidae species (S. ciliaris L.) dicenda Sida *ba*, septima (cordifolia) Sida *be*, vndecima (paniculata) Sida *ca*, decima sexta (Abutilon) Sida *da*, et sequentes S. *de*, *di*, *do*, et sic porro. Huic patellae ut dignum operculum imponatur, age cum auctore *Vocabulorum generum characteristicorum* Sidae genus *Iâ Wiwîpi y*) nominemus: quis crederet, nisi admonitus, per plantam iâ wiwîpi *ce* Sidam asiaticam L. intelligi. Quis delectabitur nominibus *Wâéfi* loco Nicotianae, *Ahê Ebharsvi* loco Teuerii, *Sâcnâsqk* loco Scorzonerae, *Saksâsazk* loco Staehelinae, quibus idem auctor utitur, licet quaelibet littera notam peculiarem characteristicam stupendo labore respiciat. Saepe dolui ingenium quorundam et ferream patientiam in minutiis et rebus usu omni cassis collocatam, quae si modo ad res generi humano proficuas fuisset directa, hi ipsi utilitate et merito plerosque longo intervallo post se relicturi fuissent. Loquimur et scribimus, ut intelligamur, et cuiuslibet, qui methodum tradit, est, eam, quantum fieri possit, et facilem et gratam reddere, allicere cultores non repellere, studium eorum inflammare non extinguere, quod certe in re herbaria fiet, si, loco vocis articulatae, qua brutis antistamus, raucos istos et hiulcos sonos

excu-

excutiamus, vel signa tantum, quâlisunque generis sint, adhibeamus, quae ipsa nec imaginationem fuscitare nec alere memoriam queunt, sed sine libri, quo comparent, perpetua praesentia nullius omnino usus sunt.

§. 12.

Si LINNEI nomina triuialia multos obtrectatores habuerint: non defuerunt e contrario summi viri, qui non solum suis libris eadem receperunt, sed et filum ab eo incoeptum in nouissimas vsque plantas protraxerunt. Nec hoc modo de viris valet, qui ex LINNEI schola propullarunt, sed et de aliis, quos nunquam neque patriae amor, nec sensus grati animi erga ill. virum, capere potuit. Et ita quidem botanici feriori temporis tantum non omnes, tam in libris quam in commutatione plantarum per commercia facta, absque vlllo nationum discrimine. Quin ipsi Francogalli, quibus facilius condonari posset tepor in LINNEI conatibus approbandis, quod iisdem immortalis TOVRNEFORTII merita nonnihil obfufcari viderent, haud inuiti haec nomina arripuerunt. Inter hos b. BERNARDVS IVSSIEV potissimum nominandus est, vtpote qui, in contemplatione naturae enutritus, nihil probare potuit, quod contra naturam esset, qui vero numerosis istis plantis nouis, quas, regia munificentia conquisitas, inter alios liberaliter dispersit, nomen triuiale concinnum suo ingenio enatum adscripserat. Nec dubitandum ab eodem cel. viro, qui

qui Aubletianum opus 2) pereximium, plantis recens detectis valde diues, expoliuit, multa huius generis nomina fuisse profecta. Imo adhuc nouissime Elogii in b. LINNEVM mascula eloquentia concinnati Gallicus auctor a), qui quidem varia paullo seuerius perstrinxit in b. viro, quae alius laudaturus fuisset, de hocce tamen eius auso blandissime ita iudicat: "*On avoit été jusqu' alors obligé pour designer une espèce quelconque, d'employer une phrase entiere: M. LINNEVS y a substitué un adjectif, qui, joint au mot generique, indique le caractère propre et distinctif de la plante; c'est ce qu'il a apellé le nom trivial. Cette idée l'a conduit à une reforme vraiment utile, parce qu'elle est independante de toute methode.*" Imitatus adeo haecce nomina lingua Gallica cl. BARBEV DV BOVRG b) multis exemplis, ad Floram Parisiensem pertinentibus, e. c. Pourpier potager, Bruyere barbue, Bruyere cendrée, Persicaire amphibie, Linaire rampante, Plantain elancé.

Quicquid igitur fuerit contumeliarum, quibus haec nomina affecta sunt, eadem illis felicitas contigit, ac ipsi methodo auctoris sexuali, et cuilibet tandem rei bonae, in vniuersalem vsum sensim tracta victoriam reportarunt, silente auctore ad tot conuicia, quo silentio magnanimo litigiosis acerbius longe vulnus infliges, quam si opprobria lautissimo foenore cumulata sis redditurus.

2) *Histoire des Plantes de la Guiane Françoisse.*

a) *V. Histoire de la Société de medecine, Tom. 2. pag. 37.*

b) *Le Botaniste François, Tom. 2.*

SECTIO POSTERIOR.

§. 13.

Ex supra (*Seç. I. §. 5.*) in medium prolatis nominum triuialium exemplis, quorum quaedam simul tanquam specimina eorum, quibus LINNEVS vsus fuit, considerari possunt, cognoscitur, non vnius sed plurium momentorum rationem esse habitam, scilicet characterum ipsi plantae inscriptorum, quibus vna species ab altera differt, patriae, soli, stationis, durationis, inuentorum, coloris, magnitudinis partium inter sese comparatarum vel totius plantae, saporis vel odoris, virium, vsus medici vel oeconomici, proprietatum quarundam, et historicorum variorum momentorum. Non igitur tanquam nomina vaga vel fluxa, pro arbitrio assumpta, triuialia specierum habenda, sed supponunt intimiorem plantae denominandae et congenerum cognitionem, et, praecipue, si characterem exprimere debeant, ingenium saepe haud leue, vt is coarctetur in vnâ vocem, quem pluribus alias enunciare opus esset.

§. 14.

Qui antecessorum LINNEI nomina in vniuersum cum eiusdem propriis comparet, videbit facile, quantum illi cordi fuerit seruare, quae ab istis iam fuerant excogitata, modo hocce obsequio ipsi scientiae vis non inferretur. Haecce eius in antecessores

res obseruantia enitet quam maxime in nominibus triuialibus recipiendis. Horum quaedam antecessoribus et LINNEO plane communia sunt, vt exemplis superioribus littera L. notatis constat; in aliis ex differentia specifica vocabulum, quod seruari posse visum est, vel immutatum vel sub exigua modo flexione extraxit, e. c. ex Verbena recta canadensi vrticae foliis MORISONI emerfit nomen Verbenae vrticifoliae LINNEI, — ex Acino thymi folio et facie floribus inexpanfis MORIS., Cunila thymoides L. — ex Hormino aegyptio minimo ramosissimo BOERHAAVII, Saluia aegyptiaca L. — ex Iride latifolia biflora BESLERI, Iris biflora L. — ex Gramine triticeo spica latiori compacta cristata BUXBAUMII, Bromus cristatus L. — ex Pittonia hirsutissima, et ramosissima baccis albis PLUMIERI, Tournefortia hirsutissima L. — ex lasminioide laureolae folio, flore candido interdum odorato DILLENII, Cestrum diurnum L. — ex Thapsia latifolia villosa C. BAVH. Thapsia villosa L. — ex Trifolio spinoso cretico C. B. Fagonia cretica L. — ex Viscagine hirta noctiflora floribus obsoletis spicatis DILL. Silene nocturna L. — ex Viscagine hirta gallica, flore etc. DILL. Silene gallica L. — ex Annona vliginosa foliis nitidis etc. BROWNII, Annona palustris L. — ex Lamio garganico subincano, flore etc. TILLI, Lamium garganicum L. — ex Lamio folio caulem ambiente minori C. B. Lamium amplexicaule L. — ex Nasturtio pratensi magno flore C. B. Cardamine pratensis L. — ex Virga aurea altissima ferotina, panicula speciosa patula MARTYNI, Solidago altissima L. — ex Populo

gemmis

gemmis balsamum odoratissimum fundentibus CATESBYI, Populus balsamifera L.

Sic igitur LINNEVS aequissimus omni aetati et nomini suum decus concessit, nec, meritis propriis satis fulgens, opus habuit, vel neglectui vel dirutae vndique et dilapidatae famae aliorum, instar doctoris nouitii ventosi, suam inaedificare.

§. 15.

Attamen flexilis ille et obsequiosus Praeceptoris animus huic vitio locum dedit, quod subinde nomina triuialia reciperet, quorum in locum, suum vnice ingenium sequens, aptiora potuisset excogitare. Et, quum semel haecce ipsa iure civitatis donasset, ipse alia subinde produxit, quae commutare in melius illi non arduum valde fuisset. Verum quum in generibus Proteae, Oldenlandiae, Crassulae, Mesembryanthemi, Polygalae, Hedyfari, Bidentis, multisque aliis Linneanis is nitor eaque elegantia nominum obtineat, vt non solum loco arbitrariae appellationis sint, sed et characteres, quibus diagnosis stirpium mirifice adiuuetur, et memoriae subueniatur, includant: tentabo, anne, prout iam dudum de nominibus genericis et differentiis specificis plantarum factum est, et nomina triuialia regulis quibusdam possint circumscribi. Etenim lacunam, quam obtingere iam a. 1751. LINNEVS edisseruit, scilicet "*Triuiale nomen legibus etiamnum carere*" a) nec seriori studio vllus fuit, qui
supple-

a) Phil. bot. §. 257.

suppleuerit. Haecce mihi conanti non scopus est, reformare centena aliquot nomina, quae aetas et vsus familiaris iam auctorauit, multo minus deprimere aliorum botanicorum meritum, quorum nomina a regulis mox suppeditandis discrepant. Sed quum, vt ex superiori (*Señt. I. §. 7.*) calculo constat, spes supersit, vt aliquot millenae stirpes etiamnum detegantur: operae pretium est determinare, quomodo quam aptissime denominari hae aduenae possint. Iuuat et normam proponi, secundum quam diiudicari possit pretium nominum triuiualium, plantis hactenus designatis tributorum. In hoc negotio praeuideo, varios canones similes futuros iis, quos LINNEVS in *Philosophia bot.* §. 256. 304. de differentia specifica concinnauit, quoniam haec ipsa a quibusdam vnico tantum verbo significata fuit; hinc breuitati studens rationes quasdam regularum subinde ex dicto fonte deducendas relinquam. Apparebit tamen simul, ab hisce in haud paucis discrepare meum iudicium, et complures alios me interseruisse canones, et argumentis eorum, qui vtrique nostrum communes sunt, nouum ex propriis obseruationibus fulcrum subdidisse.

Regulae vero sunt sequentes :

1) *Nomen triuiuale definitionem speciei suae differentiam specificam superfluum non reddit; hinc addenda haecce, quotiescunque opus sit exactius stirpem determinare.* Haec necessitas occurrit in systematica enumeratione stirpium, vel in amplioribus designationibus exoticarum siue indigenarum, in quibus comparatione

tione characterum carere non possumus; item in libris, qui de usu medico vel oeconomico plantarum agunt, ne lapsu memoriae vel festinatione scriptio-
nis confusio fiat specierum.

2) *Quodlibet nomen triuiale ex vno vocabulo constet.* Requirit id praecipue scriptio-
nis et dictio-
nis compendium. Displicent igitur nomina Chenopodium Bonus Henricus, Nyctanthes arbor tristis, Veronica Anagallis aquatica, Conuoluulus Pes caprae, Ipomaea Pes tigridis, Lyfimachia Linum stellatum, Pedicularis Sceptum carolinianum, Inula Oculus Christi. Commoda contra nomina ex duobus contracta: Clematis Vitalba, Solidago Virgaurea, Aconitum Anthora.

3) *Nomen genericum triuiale praeterito, nec ab hoc seiungitur.* Nam idea generis prius exsurgat, sequatur idea speciei. Hinc et eadem nomina triuialia in diuersis generibus ferri omnino possunt.

4) *Imponatur quoque nomen triuiale speciei in genere univae.* Vtinam LINNEVS in eiusmodi casu ubiuis praeter characterem, a flore vel fructu peti-
tum, alium etiam si succenturiatum ex reliquis partibus, vel synonymon commodum, in *Systemate* vel *Speciebus plant.* admisisset, quod ipsum deficientibus praecipue fructificationis partibus insignis saepe usus fuisset. Egregie hoc quidem praestitum in Aegiphila martinicensi (*Syst. Edit.* 13), Sirio myrtifolio, Bulbocodio verno, Rheedia lateriflora, Muntingia Calabura, Baltimora erecta. Si nomen
Opu/c. Vol. II. X triuiale

triuiale characterem respicit, commodum ex hoc additamento idem redundat.

5) *Optimum nomen triuiale est, quod notas discriminis a speciebus congeneribus includit, siue characteristicum est.* Numero, figura, situ, proportionem, hoc nititur. Ita nomen in ipsa stirpe legi quasi potest, et in plantis adeo nunquam antea visis adminiculum exstat. Rarius quidem integer siue sufficiens character vno nomine comprehendere potest, vt quidem in speciebus Phytolaccae: sed iam multum refert, partem characteris hocce expressisse. Nam hoc quoque notitiam stirpis egregie leuat, et memoriae subuenit eximie. Tanto minus integrum et adaequatum characterem vbiuis ex vnico vocabulo expectare poteris, quum subinde ne differentiae quidem specificae fusius expressae speciebus discernendis sufficiant, sed scrupulum relinquunt, donec prolixior descriptionem simul in auxilium transferas. Hoc vero subinde obtingit incommodum in epithetis characteristicis, vt supra iam monui, quod nouis speciebus accedentibus manca euadant. Tanto magis in selectu nominum prouidendum, id ne fiat. Quodsi vero factum, meminisse iuuat, posse seruari instar simplicis nominis: (Cfr. *Seet. I. §. 8.*), nec spernenda ob usum, quem nobis aliisque per longum tempus praeterlapsum attulere. Nec ego vel tum auctor essem, vt in melius, nisi summa incideret necessitas, mutarentur.

6) *Praestat ex horum censu nomen triuiale, quod et partem indicat, quae characterem efficit.* Hinc: laudan-

laudanda nomina Rhamnus pentaphyllus, Campanula heterophylla, Chrysoſplenium alternifolium, Lyſimachia thyriſſiflora, Lythrum petiolatum, Actaea racemofa, Papauer nudicaule, Sida umbellata, Pſoralea bracteolata, Celofia trigyna, Tabernae- montana cymofa, Peplis tetrandra, Panicum diſtachyon, Phyteuma comofa, Chironia baccifera, Dianthus prolifer, Lycium capſulare, Dolichos biflorus, Tillaea apetalâ.

7) *Minoris pretii ſunt nomina triuialia chara-
teriſtica, quae partem, quam reſpiciunt, reticent.* Ter-
minus artis, qui nomen horum intrat, ſaepe vnus
idemque diuerſis partibus tribuitur, floribus, foliis,
caulibus aliisque. Vnde niſi partis ſimul fiat mentio,
incerti ſumus, quam praeciſe character feriat; e. c.
Stipa ſpinifex, Androſace elongata, Cònuallaria
verticillata (de foliis), Angelica verticillata (de pe-
dunculis), Amaryllis vndulata item Ferraria vndu-
lata (de petalis), Aſclepias vndulata (de foliis),
Swertia corniculata (de corolla), Oxalis cornicu-
lata (de fructu), Dianthus deltoides (de petalis),
Alyſſum deltoideum (de foliis), Moluccella ſpinofa
(de calyce), Prunus ſpinofa (de ramis), Dolichos
ſeſquipedalis.

8) *Minoris et faciendâ nomina, quae petuntur a
partibus abditis, vel non perpetuis.* Radicum igitur
mentio nonniſi neceſſitatis caſu fiat, quae plerum-
que in herbariis deſunt, nec in recenti planta, niſi
iaſtura ipſius ſtirpis, indagari poſſunt, et ſaepe,
vt in tuberofis, ob ſitum profundioſiorem nonniſi ope-

rosius euelluntur. Ideo non satis commoda: Phlo-
mis tuberosa, Erigeron tuberosum, Ophrys monor-
chis, Glycine subterranea, Arachis Hypogaea. Fa-
cilis probandum nomen Rhizophora gymnorhiza,
quod radix terrae superiacet. — Nec lignum
commode ob causas dictis similes memoratur, e. c.
Lonicera Xylosteum, Bignonia Leucoxylon. —
Perpetua non est bulbilorum in caule vel flore prae-
sentia; unde displicet nomen Liliū bulbiferum. —
Nec maculae foliorum semper praesto sunt; minus
igitur commode Arum maculatum dicitur.

9) *Praestantissimum characterem herba submini-
strat, nominatim folia; et inflorescentia; item flos ipse.*
Rem hanc frequentes observationes confirmant,
quas legere est in LINNEI *Phil. bot.* §. 278 - 280.
Herba ideo quidem praerogativam meretur, quo-
niam per longissimum tempus adest. Fructus cha-
racterem speciei saepenumero praebet egregium,
sed expectationem longiorem desiderat, et fructus
stirpium calidiorum regionum saepe apud nos non
maturescit. Flos igitur fructui pro denominatione
est praefereendus. Eatenus exempla concinnorum no-
minum sunt: Anabalis aphylla, Staphylea trifolia,
Alisma cordifolia, Premna serratifolia, Telephium
oppositifolium, Zygophyllum sessilifolium, Crassula
perfoliata, Cr. nudicaulis, Cr. dichotoma, Ranuncu-
lus amplexicaulis, Arenaria trinerua, Conuoluulus
reptans, Solanum radicans, Verbena supina, An-
thericum ramosum, Agrostis stolonifera, Phyllis
stipularis. — Scandix nodiflora, Selago corym-
bosa,

bosa, Adromeda racemosa, Sida umbellata, Pforalea bracteata, Hieracium cymosum. — Valeriana dioica, Phytolacca octandra, Ph. decandra, Statice monopetala, Celosia trigyna.

10) *Nomina trivialia sunt vel Graeca vel Latina.* Graeca sunt ferenda, siquidem breuitatem commodam admittunt, et ex lingua eruditum decente petita. Repudianda vero sunt nimis longa, et affectationem redolentia, ut ista BELLEVALI *), quae recenset LINNEVS in *Phil. bot.* p. 230. e. g. Cynoglossum alpikochamaiantherythron; Glycyrrhiza macrorrhizopolyschides, Trachelium oreognopycnophyllum, et neotericorum quorundam nomina, quae lexici operosae perquisitioni potius quam ingenio originem suam debent. Quanto elegantiora: Hordeum hexastichon, Ruina octandra, Phyteuma hemisphaerica, Vitis heptaphylla, Scandix trichosperma, Scleranthus polycarpus, Semperuium arachnoideum, Euphorbia dendroides. — Latina modo, ob Graeci idiomatis decrescens studium, praefenda. Hinc et loco heterophylla subinde dicta stirps diuersifolia; loco polyanthemus, multiflora, loco tetraphylla, quadrifolia.

X 3

11) Si-

*) Serius videtur a viro meritissimo, conditore horti Monspeliensis, captum consilium characteres específicos nomine graeco ex pluribus vocabulis conferruminato exprimendi; nam in *Onomatologia s. nomenclatura stirpium horti R. Monspel. recens constructi*, Monsp. 1598. quam recensam duperrime cl. BROUSSONET (*Opuscules de PIERRE RICHER DE BELLEVAL, à Paris 1785. 8.*) curae debemus, nominibus usus est breuibus, nihil horridi vel calamistrati prae se ferentibus.

11) *Simile, unde diriuentur haecce nomina, sit notissimum*, vt cor (prout depingi solet), ferra, lanceola, digitus, vesica, papilio, sphaera, filum, cuneus.

12) *Non debet idea, quam nomen triuiiale inuoluit, aduersari ideae generis*; vt Chrysanthemum Leucanthemum, Sagittaria lancifolia, Parnassia palustris. Quis quaeret musas in ranarum domicilio; in pascuis praeterea satis elatis aliquando Parnassiam reperio.

13) *Sunt tamen quoque nomina quaedam admittenda, quae quidem characterem non respiciunt* ideoque in prima indagine suppetias non ferunt, sed recordationem stirpis leuant.

Huius generis est nomen inuentoris, generi additum, vel eius, qui ad propalandum stirpem aliquid contulit. Incitamento haud mediocri inseruit artis cultoribus, si eiusmodi honoris significatione memoria eorum seruatur. Et tanto attentior fit tyro ad stirpem, si nomen ad viri cuiusdam bene de arte meriti notitiam ducit. Laudanda igitur: Cactus Peireskia, Plantago Löflingii, Hieracium Kalmianum, Hyoscyamus Scopolia, Althaea Ludwigii, Malua Scherardiana.

14) *Nomen pharmaceuticum vt triuiiale locum habet.* Ita amicum inter Botanicen puram et medicinam connubium alitur, nec tyro cui, si Aesculapii castra sequitur, officinales plantae praecipue cordi sunt, opus habet, loco duorum nominum tria memoriae infigere. Huius igitur loci: Oxalis Acetosella, Papauer Rhoëas, Cochlearia Armoracia, Teucrium Marum et centena alia exempla.

15) *Nomen*

15) *Nomen spurii generis, si diu in usu fuerit, ut triviale seruari potest.* Sic gratificamur iis, qui hisce nominibus assueverunt, saluis tamen legibus systematis, quas ipsi sequimur. E. c. Dodecatheon Meadea, Dracocephalum Ruyschiana, Salvia Sclarea, Salv. Horminum, Paederota Bonarota, Verbascum Blattaria, Duranta Ellisia, Robinia Pseudo-acacia, Lonicera Dieruilla, Euphrasia odontites, Atriplex Halimus.

16) *Caue, ne prae obseruantia nimia in antecessores ex eorum differentia specifica nomen triviale minus commodum emergat.* In PLVCKENETI, PETIVERII, BARRELIERI, RUMPHII, RHEEDII aliisque latioris ambitus libris plantae variae memorantur, quae nonnisi recentiori indagine, qua supplentur partes ab hisce omissae, sufficienter cognosci possunt. Praestat hocce casu nomina horum modo instar synonymorum citare, quam vitia incurrere, quae hac scriptione vituperantur, nec, nisi liberum arbitrium in denominando sit, vitari possunt.

17) Quanto digniora sunt nomina, notas in ipsa stirpe obuias includentia: tanto minus imitanda ea, quae conditiones modo extra stirpem positas, sed cum eadem quodammodo nexas, spectant.

Aegrius igitur probanda nomina a patria stirpis petita. Nam stirpi patria nulla certa nota inscripta est, multis regionibus stirpes communes sunt, et itineratorum quoque studio deteguntur saepe stirpes, ubi antea non visae, et transmigratione improuisa in aliena saepe loca transferuntur. Nomina haecce insuper errores in cultura cient. Vulgares

iam sunt stirpes, in Germania Erigeron canadense, in Angliā et Noruegia Tamarix germanica, in Gallia Mespilus germanica, in Finnia Altragalus vralensis, in Zeylona Acalypha virginiana, hinc inde in Germania Iris sibirica.

18) *Nec soli nec stationis mentio nomen triviale ingrediatur.* In solo et statione saepe diuersissimis fatis commode degunt plantae, nec nisi rarius detegi haec possunt inspecta planta. Colligitur hinc, quid sentiendum de nominibus, ab arena, vligine, montibus, pratis, campis, agris, alpibus, muris, rupibus, littore, umbra rel. petitis.

19) *Tempus florendi excludatur merito a nomine triviali.* Hoc quidem, vt alia quaedam momenta, color, odor, statio, magnitudo, subinde in recentibus plantis aliquam lucem accendit, sed in ficcis florendi tempus plane nullam. Hyacinthus ferotinus, Helleborus hiemalis, Adonis vernalis, Leucocium aestiuum, Bignonia aequinoctialis, exempla sunt. Tanto maior labes cadit in nomina mensium, vtpote quum flos mox maturius mox serius pro varietate tempestatis emergat, quorum tamen valde pauca in Systemate adhuc supersunt, e. g. Conuallaria maialis.

20) *Coloris mentio in nomine censura digna est.* Valet hoc praecipue de colore florum, qui in vna eademque specie, quin in vno eodemque indiuiduo saepe variat, e. c. in Lantana aculeata. Et in alpinis et locis aliis elatis flores coerulei saepe in albos mutantur. Desunt insuper verba ad omnes colorum gradus determinandos. Non satis aptum igitur

igitur nomen *Polemonium coeruleum*. (saepe album), *Sophora alba* (saepe coerulea), *Ipomaea violacea* (saepe alba, purpurea, rubra), *Anthemis mixta*, *Lantana mista*. — In herba color plerumque constantior, exemplo *Basellae rubrae*, *albae*, *Chenopodii glauci*, *Amethysteae coeruleae*, *Iusticiae pictae*, *Chenopodii Atriplicis*, *Rumicis sanguinei*, *Eupatorii maculati*.

21) *Odor et sapor in epitheto excludendi*, ob inconstantiam, varians de hisce sensibus iudicium, defectum vocum, quibus omnes diuersitates insigniuntur, et sedem in stirpe multiplicem, quae breui vocabulo exprimi non potest. Attamen in usum transierunt *Anthoxanthum odoratum*, *Chenopodium ambrosioides*, *Iris foetidissima*, *Eupatorium aromaticum*, *Scoparia dulcis*, *Polygala amara*.

22) *Abstinentum a nominibus in patria stirpis obuiis*. Dissona haec a reliquis vsitatis nihil ad cognitionem stirpis praesentis faciunt, et plerumque, si barbaris gentibus propria, vtpote auditione vnice percepta, ne recte quidem scribuntur. Taxandus igitur ADANSONIVS, quod barbaris eiusmodi nominibus praestantiam tribuerit. Multa quidem huius generis adhuc seruantur: *Heliconia Bihai*, *Cerbera Ahovai*, *Mimusops Kanki*, *Daphne Torton-raira*, *Paullinia Curaru*.

23) *Quodquod nomen comparatione cum aliis stirpibus nititur, minus probandum*. Supponendum enim merito, vnam stirpem aequae ignotam esse tyroni ac alteram. Desinentia igitur in *oides*,

astrum, *ella*, similiaque plura non imitanda; nec nomina, folanifolia, hepaticaefolia, verbascofolia, hermannifolia, saluifolia, atriplicifolia, probanda sunt, tanto minus, quum subinde haec nomina non speciem comparatam in fronte gerant, sed integrum genus, sub quo species figura foliorum saepe dissimillimae militant. — Alia comparatio mensuras spectat, quae, nisi subsistat in collatione partium speciei denominandae, sed si respectum habeat aliarum specierum, merito caret. Pretio inferiora igitur nomina, *Plantago maior*, *Hera-cleum angustifolium*, *Seseli elatum*, *Melica altissima*, *Dracocephalum grandiflorum*, *Rubus parvifolius*.

24) *Nomina triuialia, depromta a duratione stirpis, non satis apta.* Non semper enim haec ipsa in planta apparet, et climatis siue culturae diuersitate aetas saepe prolongari potest. In siccis plantis arbores et frutices a reliquis plerumque tanto difficilius distinguuntur, quum ex hisce raro nonnisi ramulus succosus feruari possit, qui igitur obseruatori saepe imponit, vt credat cum herbacea planta rem esse. Subinde quoque ferius accedit vna vel altera noua species durationis eiusdem, ac ista, quam vni speciei propriam antea existimaui-mus. Iudicium igitur ferri potest de nominibus triuialibus: (Stirps) annua, biennis, perennis, fruticosa, arborea. Multo minus decet durationem adscribere stirpi, quae illi non competit, e. g. *Lunaria annua*, quae biennis est, aequae ac *Lunaria rediuiua*. L. — *Helianthus indicus* aequae ac *H.*
annu-

annuus L., *After chinensis* et *A. tenellus* aequae ac *A. annuus* L. per annum modo durant; pro istis igitur ultimo loco dictis aptiora nomina fuissent excogitanda.

25) *Non placent mihi nomina usum oeconomicum respicientia*, e. c. *Dipsacus fullonum*, *Vitis vinifera*, *Fragaria vesca*, *Hibiscus esculentus*, *Sorbus aucuparia*, *Vicia sativa*, *Galega tinctoria*. Aspecta enim planta de eo nihil constat, et applicatio eius pro hoc fine disci ex alio fonte debet, multae insuper plantae oeconomicae designantur absque ulla usus in vita communi mentione in nomine. Vnde ex collectis tantum nominibus triuialibus nullus completus index oeconomiarum formari potest.

26) *Similiter non probae notae sunt nomina a viribus vel usu medico petita*, ob easdem, quas nuperrime dixi, rationes; quibus addi potest, stirpem non vnam saepe sed plures virtutes praestare, et variare saepe virtutem pro discrimine partium stirpis. Exempla vituperii sunt *Nerium antidysentericum*, *Inula dysenterica*, *Chenopodium anthelminticum*, *Chaerophyllum temulum*, *Anthericum ossifragum*, *Ranunculus abortiuus*. Paucissima exempla huius generis in *Systemate Linneano* occurrunt.

27) *Non admittenda vocabula, quae conuenientiam soni vel idearum habent*. Nam specierum hisce facilis confusio nascitur; e. c. *Silene conoidea* et *conica*, *Silene nocturna* et *noctiflora*, *Corchorus hirsutus* et *hirtus*, *Fumaria capreolata* et *clauiculata*,

lata, siquidem vetustioribus botanicis capreolus et clauicula idem, scilicet cirrhus recentiorum, Conuoluulus pentaphyllus et quinquefolius.

28) *Quale pretium nominibus, discidia vel satyram redolentibus, vel historicum aliquod stirpis momentum respicientibus, statuendum, ex dictis hinc inde argumentis sponte patet.* Quorum quidem exempla facile colliguntur ex generibus quibusdam in cultorum artis memoriam denominatis.

§. 16.

Et hae quidem praecipuae regulae sunt, quae in denominandis speciebus botanicum dirigere poterunt. Non diffiteor, facilius leges dari, quam obseruari. Et qui tentauerit ipse stirpi aptum nomen triviale imponere, satis comperit, non leue negotium esse, praecipue si characterem eo exprimi cupiat, et eum quidem nouis forsitan accedentibus speciebus immutabilem, nec *vocabulo libero undequaue desumpto uti b)* velit. Quam libertatem LINNEVS quidem, dum primus ad haecce nomina animum aduerteret, concessit, a qua tamen in praxi subsequa alienior fuisse videtur. Ne quis vero mihi obiiciat, defectuum exempla recensendo, vituperasse me eum, cuius vindicias agere proposueram: iteranda admonitio est, LINNEVM saepissime in hisce vnice sequutum alios, pertaesum forsitan clamorum super innouatione nominum excitatorum.

b) *Phil. bot. pag. 22.*

XIX.

PRAESTET VNO MEDICO
AN PLVRIBVS IUNCTIM
VTI?

DISQVISITIO

ORATIONE ENVCLEATA.

BRADY AND WOOD

AN ALPHABETICAL

LIST

OF THE

LIBRARY OF THE

PRAESTET VNO MEDICO AN PLVRIBVS IVNCTIM VTI? *)

Sic igitur prouidit diuina voluntas, vt qui peregrinus et aduena ad hoc litterarum sacrum non alio quondam fine accederem, quam ad colligendos fructus ex doctrina inclytorum quorundam virorum, quorum plurima pars viuere iam desiit, sisterem heic pedem, et, ex vno in alterum academicorum honorum et officiorum gradum ascendens, in hunc tandem, qui reliquorum fastigium merito censetur, per tempus eueherer. Ancipitem haesisse animum meum, non diffiteor, quum praesentirem, serie et muneris aetate ita ferente, huncce magistratum in me olim deuolutum iri, vtrum reciperem illum, an potius, vt ab aliis quibusdam academiae nostrae doctoribus meritissimis factum est, modesta deprecatione declinarem. Deterret facile hominem verecundum, nec arroganter et superciliose de suis viribus sentientem, grauitas muneris, iurisiurandi religio, tot illustrium virorum eodem officio antea functorum

*) Quaestionem hanc d. 2. Iulii a. 1781., oratione, quum prorektoratum annuum capefferem, habita, succincte discussi.

rum fama et auctoritas, et in hac quidem academia, quae nouo quotannis decore et incremento efflorescit. Quae ipsa omnia obtutui meo sese quum sisterent, non parum timiditatis, et in consilio capiendo tarditatis, in me quoque crearunt. Reuocarunt autem reluctantem me animo, et oneri memet subducentem, Regiae voluntatis in his terris administrorum in academiam nostram indulgentia, et in difficilibus casibus componendis facilitas; compendiarum porro ista bonoque ordini fauentissima ratio, quae in academico iudicio, senioribus praecipue annis, in proponendis, perquirendis et sopiendis litibus, prout in reliquorum negotiorum administratione, usu venit; legum insuper vigor et, quod in consuetudinem fere transiit, earundem laetum obsequium. Nec minimam vim ad me in ambiguo constitutum erigendum et fiduciam concipiendam habuit, quod onus Prorectori impositum maturis senatus academici consiliis subleuetur, quibus et mihi ut in rebus grauioris ponderis adesse velitis, Vos praesertim, arctioris concilii assessores venerandi, pro Vestro in academiam studio et Vestra in me ipsum saepius comprobata beneuolentia, humanissime rogo.

Dum haecce sapientissima pariter ac amicissima Vestra consilia, quibus ipsis subuenturos Vos esse noui muneris difficultatibus sperare licet, cogitatione recolo, aliud quoddam consiliorum genus in mentem meam sese insinuat, prout saepe solemus

mus res, aliqua mutua similitudine praeditas, vna in memoriam reuocare et inter sese conferre, nempe hoc, quod alter medicus alteri ad lectos aegrorum suppeditat.

Quandoquidem in hocce consiliorum genere cuiuslibet, cui conseruatio vitae et sanitatis deperditae restitutio chara est, scire interest, praestet vno medico, an pluribus, iunctim vti: non vereor, ne, hancce quaestionem soluturus, argumentum oratione complectar, quod eorum modo cogitationem in se conuertere queat, qui in eodem campo colendo mecum desudant.

Quo vero commoda, incommoda, vel adeo damna, consultationum medicarum, coram et viua voce prolatarum, iustius librentur, meditatio in antecessum in quaedam momenta defigenda est, quae consiliorum in vniuersum conditionem feriunt. Hoc creberrima et quotidiana fere obseruatione comperimus, incidere casus, in quibus, etiamsi aliquis sanus sit, et aetatis flore, viriumque perfecto vigore constitutus, perspicaci praeterea ingenio, item rei peragenda commoda notitia et consuetudine instructus, aliena luce indigeat. Probabile enim est, tanto acrius omnia momenta, quae ad negotium dubii euentus perficiendum spectant, ponderari, et tanto felicius exerceri, quo plures homines sciti et idonei operam suam in eodem rimando deponant, et modum, quo tutissime

fieri possit, suggerant. Ast non inficiandum, eam humanae mentis rationem esse, vt lubentius consilia demus, quam accipiamus. Qui enim alteri consilium suppeditat speciem aliquam acrioris ingenii prae se fert, maturioris iudicii, solidioris scientiae, maioris item animi moderationis, sine qua et leuissimae saepe res in transuersum aguntur. Quod igitur meriti consultori accedit, consilium efflagitanti vel accipienti decedere videtur. Quicquid vero huius ratiocinii sit: nihilominus tamen rerum peragendarum multitudo et grauitas, multiplex in iis procurandis ratio et modus, argumentorum vel dissuadentium vel suadentium in consilio capiendo varietas, anceps denique et vel praeter nostram culpam aduersus euentus, commisceri studia et iunctas vires intendi saepissime iubent. Hinc nec eos, qui summum dignitatis et potestatis fastigium in hoc terrarum orbe tuentur, principes, pudet, consultores quosdam sibi adiungere horumque nomina publice profiteri, ita vt, etiamsi princeps proprio nomine bella inferat, pacem concludat, rei nummariae subueniat, pecuniae erogationes iniungat, annonae charitati succurrat, pestis auertendae vel suis cancellis includendae praesidia inculcet, et quaecunque alia grandia facta sint, quilibet nouerit, haec illum non propria vnice sagacitate et prudentia adornasse, sed intelligentia simul et iudicio plurium aliorum vsum fuisse, qui commodi harum rerum arbitri esse videbantur.

Verum quidem est, communione eiusmodi consiliorum et momentorum, quae animum in iudicio formando et re perficienda dirigunt, exacta consideratione, in eiusmodi factis praecipue opus esse, quorum euentus ad multorum salutem, vitam, vel et detrimentum, cladem et interitum, pertineat. Quidni vero miscenda consilia et suffragia ferenda etiam tum, quando de vnus hominis, non dicam principis modo, sed et priuati, morbo detenti, vita et integritate agitur, si illi combinata plurium opera melius prospici, quam vnus, vero simile sit. Quilibet enim homo eadem humanitatis iura sibi vindicare potest. Nec priuata et simplex dici potest iactura, si respublica ciue vtili orbatur, coniux marito, liberi patre. Quam ob rem non in principum modo aulis et apud magnates, dum morbo grauiori et ancipiti prosteruntur, sed apud alios quoque lautioris fortunae, plures medici conuocari solent ad suppetias ferendas; nec facile vel opinioni vulgi vel amoris erga aegrum satisfecisse arbitrantur cognati, moriente isto, si vnus medici prouidentia et cura acquieuerint.

Ast, si in villo delectu vel oscitantiae vel praecipitis nimis consilii poenam luas: certe in delectu medici est. Quod iudicium si in ore eius, qui ipse medicinam exercet, possit aliqua ostentationis nota suspectum censeris: PLINIVM audiamus, qui "Tam blanda est, diserte inquit, vnicuique pro se

„sperandi dulcedo, ut cuicumque se medicum pro-
 „sistenti statim credatur, quum sit periculum in nullo
 „mendacio maius.” Quanto igitur maiori cautione
 opus est, si primum vocato medico vnus vel plu-
 res alii adfociandi sunt. Sed dabitis, spero, Au-
 ditores, mihi hoc tanto lubentius, postquam mo-
 menta potiora enucleauero, quae considerari de-
 bent, antequam subsidiariam istam opem exposcas,
 ne, quum aegri bonis consulere cupias, ea contra
 in discrimen veritas vel dilapides, Si inter haec
 quaedam Vobis appareant leuidensia, et praeiudi-
 cio, peruersitate, malignitateque hominum potius,
 quam recta ratione et christianae pietatis rigore
 constare: perpendite quaeso, nos inter homines
 viuere et mundum considerari debere pro ea im-
 becillitate, opinione vel prauitate, qua regitur,
 non vero pro ea intelligentia, probitate, aequi-
 tate, qua regi posset.

Ad hanc rem, de qua in vtramque partem
 disputari potest, dirimendam, dispiciendum initio
 est, quodnam inter aegrum et medicum vinculum
 obtineat, quod si ita comparatum sit, ut vterque
 suis officiis obstringatur, omnia ea vitari debent,
 quae vel honori medici vel tranquillitati animi
 eiusdem vim inferre possunt. Negari nequit, si
 absque partium studio rem diiudices, in subsidium
 vocato alio medico, famam prioris vel maiori vel
 minori de parte periclitari. Eo enim declaras
 multique cognatione vel necessitudine tecum iuncti
 declara-

declarabunt, non sufficere eum morbo, quem tu vel merito vel ex errore grauem existimas, aueruncando. Tanto magis vero eum laceffis, quo inferior illo alter subsidiarius medicus est, scientia, studio, moribus. Non perinde enim ingenuo homini esse potest, quo laborum socio potiatur, et quo pede tu eum metiaris. Inter renunciationes quidem publicas in recens creatos doctores ius, consultationes cum aliis medicis ineundi conferimus, doctos autem ex voto, honestos, humanos, reddere non possumus. Fac nouiter inuitati medici culpa morbum incrementa capere vel succumbere ei aegrum, tum prioris medici fama aequae vacillat, quippe in quem ut honoris, si fauste res cedat, ita et dedecoris pars, si sinistre, transit. Est forsitan subsidiarius iste medicus homo arrogans, iactantia plenus, loquax, litigiosus: quidnam tu iuris habes, eiusmodi confociatione turbandi animi tranquillitatem eius, qui meditationes suas et vires omnes ad te, vel quos in vita carissimos habes, sanandos intendit, somno nocturno, prandio, consuetudini cum suis, recreationi animi, dulcissimas horulas subtrahit. Eo maioris culpae reum te reddis, si alium medicum, siue rerum gnarus sit, nec ne, clam consulas, et inscio vetere medico, medicamina a nouo suppeditata ingeras, simulans prioris te uti medicina, et de effectu eiusdem fiste respondens. Imo noui medicos, eo gradu mercenarios, ut famulantium adeo officia praestarent aegro vel eius cognatis, medicamenta ipsi in pera sua ex pharmacopoliis petentes, quo celarent astutiam,

tiam, parum curantes, an honestum virum pharmacopolae, eiusque ministrorum, ludibrio exponerent. Sed hi erunt fere, quorum malitiosa fraus, fulguris instar in proprium caput saepe relabitur, et dum Aesculapios se esse putant, delinquentes in munere, vindicta iusta alterius infra tyronis medici auctoritatem deliciuntur. An tu, qui indecorum eiusmodi seruitium admittis; existimas, boni medici, et suae scientiae conscii, famam adeo venalem esse, ut aliquot aureis redimi possit, vel ideo minuti opprobrium, quod medico, quem fugillasti, liberum sit, discedere a sua statione et continuatam aegri curam renuere. Etenim, si quid ego sentio, vnum fere idemque est, eiici domo, ac verbis vel factis ita vrgeri, ut sponte illam linquam.

Verum quum procliuiores vulgo simus ad eas noxas fugiendas, quae proprium verticem petunt, quam quae in aliorum praecordia saeuiunt, in eam iam argumenta inquiram, quae ad aegri ipsius salutem spectant, quibus, nisi egomet insigniter fallar, non parum inest ponderis. Circumspicientes institutorum vel negotiorum genus quodcunque, illa, nisi humeris vnus singularis hominis iusto grauiora sint, melius procurari experimur et expeditius, quae vnus intelligentis et boni viri curae et administrationi, quam quae plurium, committuntur. Si vni committitur opus, etiamsi peregrinae rei illi inuigilandum sit, hoc ipsum tanquam propriam prolem considerat, alit, fouet, ornat, perficit.

perficit. Adfociato vero alio in curae vel administrationis communionem, languescit impetus, quum inter plures meritum, et laus, et vituperium diuidatur. Id quoniam naturae humanae proprium et fere perpetuum est: non miremur, concitis pluribus medicis torpescere vulgo singulorum studium, neruos in quodlibet morbi et remedii momentum antea intentos iamiam relaxari, omitti varias et regulas et suppetias aegro profuturas vel ideo, quod alter ab altero sollertiam expectet, quam vterque pertaesus negligit. — Concedi porro debet, in re ardua et ancipiti exactius nos persequi posse difficultates quasuis per partes suas, et auxilia necessaria eruere felicius, si soli nobisque relictis meditationibus nostris inhiamus. Fac vero ad lectum aegroti nobiscum adsidere hominem loquacem, scientia sua tumidum, rixosum, sectae cuidam medicae mancipatum: nonne, ab hoc alterius doctioris medici cogitandi vis labefactatur, et quae vni alias rei esset intenta iam ad plures diuertitur, et nonne haecce tanto minus in aegri leuamen impendi potest, quum, nisi ipse stipes vel truncus sit, quod in doctum medicum cadere nequit, haud sine dedignatione histricas eiusmodi scenas audire et oculis vsurpare queat. Non diffitemini vero, plurimum interesse, medici animum existere pacatum, nec vlla commotione fortiori conturbatum. Hic, quum alias cum vno duntaxat hoste pugnandum illi sit, nimirum morbo, cum alio certare debet, futili socio. Huc spectat

prouerbum, qualis fidei, iam videtis, "inter duos litigantes tertium mori." *).

Sed dices medicum moratum et ingenuum ea animi fortitudine esse instructum, ut alterius iactantiam, cauillationes, tripudia, vilipendat, spernat, et praestare sequacem esse, quam morosum. Sed an tu obsequium laudabis, quo propria tua, vel patris, vel familiaris, vita periclitatur, quod iis in casibus, in quibus celeri eoque efficacissimo auxilio opus est, ut in apoplexia, haemorrhagiis, arthritide ad interna conuersa, tanto plus detrimenti secum trahit. — Accedit, quod ad lectum aegrorum, ad quem consultationes medicae plerumque habentur, et, quid agendum, decernitur, tempus iusto angustius plerumque sit, ad omnia exploranda, lustranda, libranda, praesertim si medicina, quae commendatur, minus usitata est, vel varietate rerum praescriptarum farcta, nec experientia communi confirmata. — Quid dicam de multiplicatis istis praeter rem et necessitatem remediis, quae confluere

*) Lepidam narrationem nuper in ephemeridibus politicis de consultatione medicorum super ultimo morbo Ducis DE CHOISEVL, rerum Gallicarum administri primarii, qui haud ita pridem morti occubuit, legimus. Duci scilicet prognosticon olim fuerat formatum hoc, fore, ut in seditione periret. Quod quidem, licet morbo decederet, eatenus confirmatum fertur, quod inter medicorum, quorum duodecim conuocati, de conuenientissima ducem mortis faucibus eripiendi via litigantium, strepitus turbasque enatas vitam ille finiret.

fluere plerumque solent, dum plures medici in aegri auxilium conuocantur, quorum singuli ingenio suo inhaerent, ut bene de aegro mereri censeantur. Hinc cubile eius intrans, ob copiam scatularum, vitrorum, pyxidum per fenestras mensasque dispersarum, pharmacopolium te intrare crederes, nisi vel aegri gemitus, vel odor alienus, te errasse te condocefacerent, et, qui verum medicinae scopum ignoret, existimaret, nos non profiteri artem salutarem et beneficam, sed praedatricem et oculorum emundtricem. Haec vero medicaminum multitudo ambiguum et inscium saepe reddit aegrum, quo tempore, quo ordine, quo vehiculo, utatur singulis. Combinantur sic haud raro multa sibimet natura sua aduersa, vel quorum alterum alterius vim infringit. Fitque hoc tanto facilius, quando, ut saepenumero contingit, auxilia, absente alterutro medico, suppeditantur.

Videtis igitur, quam iuste ADRIANVS moriens peruulgatum istud exclamauerit: “multi medici Regem sustulerunt” *).

Veruntamen tantum abest, ut in vniuersum castigarem, damnarem, conuentus istos ad lectum aegrorum medicos, ut potius, sub varia conditione, illos et aegri et medicorum causa proficuos maxime esse lubens agnoscam. Quis vitio vertet aegro, si initio morbi, quum mitis eiusdem incessus imponeret, iunioris nec satis periti medici operam desider-

Y 5

dera-

*) Πολλοὶ ἰατροὶ βασιλέα ἀπώλεσαν.

derauerit, postea, crescente malo et in apertam flammam erumpente, maturius consilium imploret. Nec potest aliquod dedecus in medicum inde redundare, quod, quando vel ipse morbo laborat, vel aliquis cognatione intimiori sibi iunctus, non proprio suo ingenio et doctrinae fidat, sed collegarum adiumentum efflagitet. Quodsi ipse aegrotet: morbo haud raro cogitandi vis tantopere hebetatur, vel omnino sufflaminatur, ut sibi ipse succurrere plane non valeat; si coniux, liberi, parens: tantum saepe ille malis, quibus excruciantur, gemitu, clamoribus, deliquiis animi, convulsionibus, afficitur, ut in suetissimis adeo suppetiis cespitet. Et quoniam non sufficit, a medico praecipi proba et explorata auxilia, sed opus est, ut sedulo et follerter ab aegro usurpentur: cognatis plerumque difficiliori casu melius consulitur peregrino medico, qui abstinens ab omni praepostera indulgentia, et rarius per diem conueniens aegrum, praeceptis suis tanto maiorem auctoritatem maiusque pondus impertit. Quod ad alios aegros attinet, dabit medicus moratus quandoque aliquid desiderio aegri, et, si animaduertit, eiusmodi consociationem conferre aliquid ad tranquillandum eius vel cognatorum animum, de futuro euentu anxium, non tergiuersabitur, bene conscius, non parum ad morbi sanationem facere mentis aegroti tranquillitatem. Aliam obsequii causam subinde praebet malitia hominum, cui ut obuiam eatur, ferendum, ut alius medicus socium laborum sese adiungat, ne, si praeter eius culpam euentus

malus

malus contingat, opprobriis malignorum allidatur vel adeo confodiatur. Tandem confiteri oportet, si peritus medicus cum perito, bonus cum bono consilia confert, multum bonae frugis in aegri, morbo vehementiori correpti, salutem emergere. Tot enim complicationes morborum existunt, tam abditae saepe eorundem causae, tam varia hominum in peculiaribus casibus sagacitas, tantus medicaminum vel propria experientia vel aliena exploratorum apparatus, ut non mirum, in morbo quodam grauiori vel proprio ingenio et experientia vel lectione aliquando id constare, quod saltem tum, quum eius adhibendi necessitas subest, in alterutrius mentem non incurrit. In morbis praeterea rarius obuiam venientibus, quorum obseruandorum medico etiam largissimae praxeos subinde vix per vitam occasio suppetiit, exemplo diabetes, leprae Arabum, rabiei caninae, tetani, catalepseos, non omnino iniusta praesumptio est, eum, qui antea vel pluries eundem difficilem morbum, in quo generales regulae pro norma esse nequeunt, tractauerit, hunc in illius curatione tanto plus dexteritatis habere.

Sed finem iam huic dicendi argumento pono, rediens ad id, unde exorsa mea oratio est. Vos nominatim, Commilitones suauissimi, iam compellendi estis. Quae a nouo Prorectore expectare possitis, mox audiistis. Et haec praestiturus essem, etiam si

etiamfi nullo iureiurando adstrictus. Illud enim desiderium iustitiam tuendi, tranquillitati publicae prospiciendi, saluti et incolumitati Vestrum inuigilandi, et scopum, quo apud nos degitis, promouendi, ille ardor cuilibet bono inesse debet. Quum autem accesserit sollemne sacramentum, tanto certiores de vigilantia mea, sollertia, constantia, fide, reddimini. Sicuti vero Vos omnes studio, amore, beneuolentia, officio, demereri, quantum in me est, annitar, id vel maxime cauebo, vtne vlllo partium studio duci videar. Haec ipsa omnia quum, me interprete, Georgia nostra Vobis hodie iterum spondeat: spondebitis et Vos, carissima capita, legum, ab augustissimo Rege in Vestra vnice commoda latarum, sanctum obsequium, quae quales sint, iam tum quidem, quum in ciuium academicorum numerum coaptaremini, legere Vobis datum fuit, nunc vero auribus Vestris excipite. Accede propterea, Vir consultissime, qui huic academiae ab actis es, et pro more ex legum codice praecipua earundem capita clara voce concioni huic lectissimae praelege.

(*Leges*)

Haec igitur legum academicarum capita Vos sollerter obseruatueros esse, Commilitones optimi, a praestantia animi Vestri, fas est sperare, quae apud Vestrum tantum non omnes ita enitere solet, vt qui contra legum tenorem peccent, casu potius vel subitaneo impulsu, quam consilio praecogitato
vel

vel malitia delinquere existimandi sint. Atque hoc ex praecipuis bonis est, quae academiae nostrae gratulanda arbitror, quod ciues non numerosos solum sed eorum plerosque suo complexu teneat, qui bene agunt, non poenae formidine, sed amore boni et honesta ambitione, imo et sermone, habitu, consortio, vestitu, elegantiam quandam produnt, quae, nisi cancellos excedat, amabilem cum literis connubium init, et ad capiendos eorum animos facit, a quorum voluntate fortuna pendet.

Tu vero, summe Deus, qui Patrem patriae, Regem augustissimum et Rectorem academiae suae magnificentissimum, Georgium tertium, tua tutela haecenus beasti, hoc gentium ocellum et exemplum perge, vna cum augustissima Regina et tota regia domo; Tuo sinu fouere; nec perge solum, tot hostilium armorum, quae regnis eius insidias struunt, vim reprimere, sed fac, vt, post gloriose partam victoriam, terra marique aurea pax cum flore commerciorum, bonarum artium et litterarum, omniumque reliquorum bonorum affluxu, redeat. Regis porro in hisce terris amicorum, de patria immortaliter meritorum, et praecipue horum, quos curatores huius academiae veneramur, incolumitatem, Tuae curae et prouidentiae commendatam cupimus. Serua demum hanc academiam ciuesque omnes, qui in ea vel docendi vel discendi causa commorantur, abesse iube ab eius pomoeiis languorem, luxuriam, putidam lucri cupidinem, discidia intestina, morum prauitatem, hostiles strepitus,

pitus, et quicquid existimationem et felicitatem eius, quam ipsa Tua clementia illi comparavit, obscurare vel minuere potest; concede contra, ut in remotissima tempora usque et litterarum et virtutum domicilium permaneat instructissimum, fructuosissimum. Dixi.

XX.

DE

VERMIBVS IN LEPRA

OBVIIS

IVNCTA LEPROSI HISTORIA.

OBSERVATIONES
DE
VERMIBVS IN LEPROA
OBVIIS *)
SVBIVNCTA LEPROSI HISTORIA.

Praefatio.

Disquisitio de vermibus, quibus homines lepra contaminati infestantur, non tum modo, quum illi operam darem, illustris MICHAELIS, insignis academiae nostrae decoris, quaestione, doctis istis viris, tum in Arabiam Regis Daniae munificentia missis, proposita, memorabilis euasit; sed variis postea illustris A LINNÉ scriptis a), quibus leprae originem ex vermibus probabilem reddere annisus est. Naturam horum vermium arbitror hacce opella aliquid lucis assequutam esse.

Quod

*) Oblatae Societati R. scient. Gotting. d. 13. Nouembris a. 1762. et typis expressae a. 1769, quo ipso historiam leprosi primum addidi.

a) V. in primis *diff. de lepra, resp. ISACO VDDMAN* 1765. *Syst. nat. Ed. 12. Tom. I. p. 1075. n. 4. vti et dissertatio recentior: Rariora Noruegiae, resp. HENRICO TONNING* 1768. p. 17.

Quod vero non nouum nec ab vlllo antea visum vermium genus in vlceribus leprosi hominis, de quo egi, detexerim, sed vulgarem modo omnibusque spretam muscae domesticae laruam, non plus obseruationibus meis pretii derogat, quam illis SPALLANZANI, quod in vulgaribus cochleis, non Indicis, primum cognouerit, cochleae caput, sine vitae dispendio, abscindi posse, quin aliud caput, suis tentaculis instructum, prioris in locum succrescere. Cuilibet enim ingenuo naturae inuestigatori illam, prout sponte sese offert, indagare, non alienum illi fucum, etiamsi famae apud quosdam magis inferuaret, allinere, conuenit. Hisce vermibus scrutandis occupatus nonnulla momenta cognoui, quae originem laruarum, ex quibus muscae fiunt, incrementum, vitae genus structuramque illustrent, et clarissimorum olim REDI, REAUMVRIQUE selectioribus obseruationibus confirmandis conducunt, quorum celer iste crescendi modus, fuga, quam versus transmutationis suae tempus capiunt, rel. pertinent; ansamque praebui aliis, quibus fauentior quam mihi in naturam harum laruarum inquirendi suppetit occasio, quaedam e. c. an gradus putredinis varius diuersas muscas alliciat, an delectum semper carnis pro varia sua specie instituant, alia, de quibus nondum satis constat, indagandi.

Nec vereor, ne quis historiam ipsius morbi, in quo vermes descripti comparauerunt, quam ferius addidi, vel superfluam, vel a praesenti tractatione alienam, existimet. Quum nuperrime de
ista,

ista, postquam typis iam expressa esset, sermo cum illustri MICHAELE incideret, enarrare isti placuit, se, inter alias quaestiones de morbi natura homini leproso motas, de macula, qua, aegris futuri mali nesciis, morbi initium fieri passim legitur, eum esse percontatum, Ad quod aeger regeffit, exanthema eiusmodi diu, antequam alia morbi vestigia sentiret, quin annis circiter 10 antea, in vultu erupisse. Addere hoc momentum historiae meae, qua ipsa re obstrictissimum me censeo, celeberrimus vir permisit, copiamque mihi concessit, plagulam istam Commentarii sui, qui iam sub prelo sudabat, super *Iobo b)* perlustrandi, in qua de diuini viri morbo agens, tam huius maculae, quam aliorum nonnullorum, quae ad casum a me delineatum spectant, mentionem fecit.

§. 1.

Contigit mihi, humanitate ill. VOGELII, quod rarius medicis Europaeis, etiamsi per protractionem vitam aegrotorum lectis intersint, solet, hominem, Graecorum elephantiasi, seu Arabum lepra c), affectum,

b) V. ill. viri *Uebersetzung des Buchs Hiob mit Anmerkungen für Ungelehrte. Amerk. p. 4.*

c) Etli nihil de morbi huius vel affinium natura referre, nec de statu ipsius aegri alia memorare, quam quae materiam, quam pertractandam suscepi, illustrent, constitueram: de nomine tamen quaedam dicere opus erit. Lepra primum Graecorum, ab elephantiasi Graecorum, distinguenda est: Lepra ista, secundum LOMMIVM (*Observ. med. L. 2. p. 258.*) impetiginis species

affectum, videre, et in naturam huius morbi penitus inquirere. Ipsum vero illum, quem nominavi, tetrum

et pessima quidem est; quod et CELSVS (*Lib. 5. cap. 28. Sect. 17.*), quamuis nomen silentio praetereat, sensisse videtur. Nunquam tamen in illa tam profunde malum serpit, ac in elephantiasi, et cutis praeterea in lepra magis, quam in elephantiasi, in squamas secedere solet. Hanc tamen ex illa fieri posse arbitror, prout psora, tertia, secundum CELSVM et LOMMIVM, impetiginis species, in lepram transire potest; ita ut gradus mali nomen mutet. Lepra vero Arabum cum elephantiasi Graecorum, quantum, descriptiones vtriusque mali comparando, indagare potui, eadem est. Quo exemplum afferam, *Lib. 4. Fen. 3. Tractatus 3.* AVICENNAE, qui de lepra agit, cum ARETAKI *Libr. 2. capite 13.* conferatur. Nec HILLARY (*Observations on the changes of the air and the concomitant epidemical Diseases in the Island of Barbados, p. 323.*), qui lepram sollerter descripsit, ne alios attingam, discrimen agnoscit. Non confundi vero debet Graecorum elephantiasis cum illa Arabum, quae alias pes elephantii, quia crus aegri ad pedis elephantini similitudinem et mole et scabritie accedit, dicitur; licet inter alia dira mala, quae in Graecorum elephantiasi insistant, tumor etiam ingens pedum adsit. Legantur de hac Arabum elephantiasi RHAZES (*Division. ad Mansor. Lib. 1. cap. 107. et de re medic. ad Mansor. Lib. 9. cap. 93.*) et AVICENNA (*Lib. 3. Fen. 21. Tract. I. cap. 16. 17. 18.*). Inter alios recentiores describunt illam PROSP. ALPINVS (*Medicina Aegypt. p. 56.*) et KÄMPFERVS (*Amoenitat. exot. Fasc. 3. Obs. 8.*) sub hyperfarcosis vlcerosae pedum nomine, Malabaribus vernaculam. Et ill. LINNEO (*Skånska resa, p. 275.*), per Scaniae iter facienti, ancilla sese obtulit, eodem affectu correpta. — Utique legi merentur, quae de teterrima ista lepra serius memoriae prodiderunt, partim ex propria experientia, cl. RAYMVND (*Histoire de l'Elephantiasis, à Lausanne 1767.*), praecipue autem cl. SCHILLING (*De lepra commentationes, recensuit Hahn. LB. 1778.*).

tetrum morbum afflixisse aegrum, nec aliud mitius exanthematum genus, lepram puto Graecorum vel vitiliginem, agnouit ill. VOGEL, in rimandis veterum libris studiosissimus, agnouit quoque ill. MICHAELIS, qui similitudinem hunc morbum inter et Iudaeorum lepram inuestigandi cupidus, statim, quum accederet, lepram Arabum esse, enunciauit. Nec sane, cui licuit descriptionem, quam ARETAEVS de hoc malo memoriae prodidit, illamque succinctam CELSI, cum aegri nostri conditione conferre, de nomine diutius ambiguus esse potest; etsi diriora quaedam symptomata, consumptionem nimirum ossium, capillorum defluuium, cutis fissuras, animam foetidam, alia, quae modo, si malum sibi solum relinquitur, vel peruersa medela agitur, vel inueteratum nimis est, vel, ad mentem quorundam, regione nimis calida se exserit *d*), incidere existimo, defuisse non diffiteor *e*).

Z 3

§. 2.

- d*) "Coelum, inquit MEAD, et victus ratio morbos omnes, in cute prorumpentes, in peius euehant" (V. *Commentar. de morbis biblicis, cap. 2. p. 15. Ed. OED.*) et alibi (*loc. cit. p. 12.*), "Saeuior vero, ait, semper, erat in Syria et Aegypto, vtpote regionibus calidioribus, quam in Graecia et aliis Europae locis.

Aduersa hisce esse videtur lepra in Islandia (*Den saa kaldede Islandske Skiörbug beskr. af PETERSEN, Soroe 1769. Conf. summe vener. DE TROIL Bref öfver Island Epist. 11. et Epist. 24. concinnata ab ill. Equ. BÄCK*) item in Noruegia (V. *infra §. 16*), quin in quibusdam Sueciae locis maritimis, (v. ODHELIVS in *K. Vet. Acad. Handl. 1779. p. 222. et 1783 p. 226.*) endemia, quam mirom aliquando vi et foeditate non cedere leprae climatis calidissimi.

- e*) Nemo in vno eodemque aegro omnia symptomata, quae in libris de elephantiasi memorantur, expectabit.

Nam

§. 2.

Decreueram initio statim, quum ad totum huius affectus decursum rite attendere, tum in primis periculum facere, an quod illustris Eques LINNEVS, patriae ornamentum, in scabiei pustulis, obseruauit, alii in aliis exanthematibus, nescio eadem fide factum sit, in horrida huius cute detegere, et quod doctissimus quondam Abbas, AVGVSTINVS CALMET, de leprae origine coniectura assequutus est, idem ego ipso sensu assequi possem. Notum scilicet est, LINNEVM, vna cum BONOMO aliisque, scabiem, CALMETVM autem lepram, ab animalculis quibusdam deriuare. Haecce meditans in acta academiae Regiae scientiarum Suecicae anni 1760. f) incidebam, vbi cl. MARTIN, medicinae cultor, coniecturam suam de lepra, in Norvegia inter homines frequenti, proponit, quippe quam a vermium quadam specie, in piscibus morbosis, et leprosis quasi, antea tantummodo reperta, repetit; et ex lectione nouo stimulo ad hanc rem persequendam afficiebar. Perspexeram quidem obseruationem eiusmodi non sine magna opera et difficultate fieri posse, quae tamen incommoda speratum successum abunde compensaturum esse mihi

Nam nec in vilo alio morbo eiusmodi symptomatum omnium connubium sit. Hinc cl. HILLARY scribit: „I have here described all the symptoms, which attend „this loathsome disease, not that every Patient, who „labours under it, has every symptoms here described. „but some have more, and others have fewer of „them” (*V. loc. cit. pag. 327*).

f) *Kgl. Vetensk. Acad. Handl. 1760. p. 308, 311.*

mihi persuadebam. Sed vtut languorem excutere studui, spe tandem successus destituebar, quum circa ipsum aegrum versarer, et, quid ad hanc indaginem requiratur, curatius perpenderem. Vt foetorem propius intuenti tanto molestiorem, taceam, metum contagii me fouisse non inficior. Nam quamuis nonnulli illud plane negent, ne tamen ad minimum contactu contrahi posset, verebar, siquidem sunt, qui hoc contendunt g). Quodsi enim

- g) "Per inspirationis communionem. ARETAEVS ait, facilis infectio" (V. *Curatio elephantiasis cap. 13.*). LOMMII verba hac de re sunt: "contagione etiam id malum contrahi (non solum sponte) intimoque corporis vitio potest; idemque a parentibus transire ad natos, vel ab ipso etiam natali potest" (*Med. Obs. Libr. I. p. 60.*). De hoc forsitan morbo locum habet, quod HILLARY de lepra, *the Taws* dicta, profert: "*This Disease is known to be infectious, but there is also a peculiar Aptitude in some Constitutions to receive it more readily, than in others, and probably in the same Person to receive the infection more readily at one time, than at another time, as is also observed in the Small-pox*" (*v. loc. cit. pag. 343.*). Conf. PONDOPPIDAN's *natural history of Norway Libr. 2. p. 263* (Danicum exemplar enim non adfuit). Quodsi animalcula lepram producerent, ex acarorum genere illa esse coniicio. Huius generis sunt, quae BONOMO sub teredinis nomine (*Aët. Natur. Curios. Append. ad A. 10. Dec. 2. p. 33.* vbi ea describit et depingit) pro scabiei causa habet. Ill. LINNEVS pariter acaris scabiem tribuit (*Faun. Suec. Ed. 2. Spec. 1975, β, vti et Amoen. acad. Vol. 3. p. 333, nec non Vol. 5. pag. 95.*). Sed nisi mihi vitio vertatur, quod meam quoque sententiam interponam, quae hac in re iudicem, indicabo. In scabie acaros repertos fuisse, nemo, qui LINNEVM huius rei testem esse nouit, in dubium vocabit.

enim vere animalcula lateant, certe tam magna non sunt, vt nudis oculis vsurpari, et primo aspectu detegi possent; sed repetita et microscopio adiuta indago requiritur, sub qua, vt, pro indigentia, situs partis, scrutinio subiectae, oculo accommodetur, contactus vitari nequit. Sunt et alia, quae, etsi minutiae videntur, iis tamen, qui eiusmodi obseruationibus indulgent, impedimentum saepe haud mediocre struunt. Si enim aeger vel ob naturalem morositatem, vel ob molestias, quas aër alluens faceffit, nudatam manum vel pedem obtutui longiori porrigere detrectat, vel cubiculum, in quo decumbit, non satis lucidum est, quod
vtrum-

Quando vero anquiritur, an mali huius causa sint: mihi probabile videtur, quod, antequam exanthemata in cute erumpant, corrupte a quaedam humorum vel labes solidorum saltem in superficie corporis semper praecedat, quae si ad certum terminum peruenit, acaros in caseo siue farina latentes (nam eiusdem speciei sunt) allicit, vt in cute nidum quaerant, vel iisdem aditum faciliorem parat. Ingressis autem istis cutem, rosione sua et excretis liquidis malum eos peius reddere existimo. Obseruamus enim muscas naturae instinctu eam modo carnem inuadere, quae iam putrescere incipit. Sic vermes, qui in intestinis nidulantur, non alios, quam quibus peculiaris ad eos recipiendos corporis constitutio est, vexat. Vidit ill. LINNEVS in Lupulo, quod, si ille a larnis phalaenae, radices erodentibus, morbidus factus fuerit, aphides accedant, quae liquido, quod eiciunt, (rorem mellis, Honungsdagg. coloni vocant) Lupulum perdunt (LINN. *Skånska resa* p. 49.). Hoc et alia exempla sententiae meae quocummodo patrocinari videntur. Accedit, quod quidam inter scabiosos versantes, nec admodum sollester contactum vitantes, immunes tamen ab infectione persistant.

utrumque hic non omni culpa vacauit, ne alia obstacula tangam, a conatu sine dubio desistendum erit.

§. 3.

Verum improuiso, versus finem morbi, quum mane aegrum inuiferem, mihi narrat, ingentem vermium copiam in pedibus et circumuolutis linteis apparuisse. Auidus igitur ad lintea propero, quoniam pedes iam probe ab illis liberauerat, et aliquot eorum colligo. Domum reuersus festinante eos penicillo delineabam, et quas, microscopii ope, videre licuit, minutas partes verbis describebam. Nec tamen tum temporis in mentem mihi venit, fore, ut haec ipsa in alios, quam in proprios usus transferrem, quoniam non satis digna, quae publice ederentur, iudicabam. Sed victus tandem fratris suauissimi, JOANNIS PHILIPPI MURRAY, Philosophiae Professoris et Regiae scientiarum societati a secretis, persuasionibus, utcunque antea renueram, accuratiori adhuc inquisitioni vermes hosce subiicere, et alia quaedam, quae huius vermium generis naturam et generationem magis illustrant, conquirere decernebam; tanto magis, quum ab eo perciperem, illustrem MICHAELEM inter alia momenta, quae nouisse e re litteraria esse, eruditis illis viris, in Arabiam munificentia Regis Daniae profectis, commendasse, ut inquirerent, an in ulceribus hominum elephantiasi laborantium vermes interdum nascerentur. Quod quum ad aures illustris viri perueniret, coepta rata habere eademque nutu suo promouere

haud dubitauit. Quaestio vero ipsa, quam soluendam peregrinantibus proposuit, et quam postea, typis expressam, legendi copiam habui, hisce continetur *h*): „Iobus vermium passim meminit. Hoc „unicum morbi eius momentum est, quod in ver- „terum elephantiasi non deprehendo. Tanto magis „pernoscere aueo, an in vlceribus hominum, ele- „phantiasi detentorum, vermes nonnunquam pul- „lulent. Quod si ita esset, ab insectis sine dubio, „in vlcera haec oua sua deponentibus, deriuare „illos licebit, cuius rei accurata inquisitio naturae „scrutatoribus haud ingrata certe foret.”

§. 4.

Aliquot dies post, quam dicti isti vermes sese conspiciendos darent, quum puellam, dysenteria correptam, conuenirem, mater queritur, insignem filiam vermium cohortem deiecissee, quorum vero omnes iam e medio sustulerat. Ex illis *i*), quos meo consilio postero die seruauerat, duo modo supererant; nam ceteri subdole ex carcere suo au- fugerant. Hosce cum prioribus comparans eiusdem

h) *Fragen an eine Gesellschaft gelehrter Männer, die auf Befehl Ihro Majestät des Königs von Dänne- mark nach Arabien reisen, 1762. p. 104.*

i) Quum hic et alibi vermium voce vtor, sciat lector initio statim velim, me familiari illam significatione sumere, quae nec laruas insectorum excludit. Animalia, quae proprie vermes vocantur, LINNEVS ac- cephalata, apoda, androgyna, tentaculis instructa definit; cuius generis sunt, quae in hominum intestinis victi- tant (*Syst. nat. Ed. 10. Tom. I. p. 641.*).

dem plane generis esse animaduvertebam, sed comprehendere animo non poteram, qua ratione illi, a vulgaribus, qui in humano corpore sedem figunt, tam diuersi, in corpus vel oui forma, vel iam transmutati, licet exigui, delati essent. Quum redirem, errorem commissum fuisse mater mihi refert, quum scilicet, quos a filia secessisse putarat, vermes in spurcitie pauimenti, ad lectum collecta, nati, in vas, cui insidere solita esset, transiissent. Quibus ea de causa paullo diutius immoror, ut inexercitati, in eiusmodi obseruationibus, cauere sibi a fallaciis discant; quibus maximam partem narrationum, quae in actis naturae Curiosorum et aliis in locis de vermibus exstant, adscribendam censeo. Et horum quidem vermium, qui secessisse a puella perperam credebantur, cum illis, quos in leproso homine reperi, comparatio, proxime dictorum naturam tanto manifestius declarabit.

§. 5.

Eodem fere tempore in theatro anatomico occasio cadauer ouinum *k*) videndi mihi nascebatur, quod vermibus scatebat, primo intuitu ceteris hucusque inuentis, quoad omnes partes, similibus. Discrimen tamen aderat, quod postea indicabo.

§. 6.

- k*) Quod, quum ei quaedam hermæphroditici sexus notae inesse crederentur, allatum erat, in quo vero dein nihil singulare repertum, quam quod vræthra non in glande colis, sed inferius sub eius basi orificium suum haberet.

§. 6.

Proximum nunc est, vt notas vermium istorum suppeditem, quae mihi, partim oculo nudo, partim iuuante microscopio simplici, quod vocant, comparuerunt. Illud vero commodum ex hac scriptione redundaturum esse spero, vt nimirum exinde indoles vermium, qui vel in leprosis prognati passim leguntur, vel in hominibus maligno vlcere laborantibus, cognoscatur; vtque laruarum, quae in muscas sese transmutant, historia nonnihil plenior euadat. Nouo quoque fulcro vermium ex ouo generatio firmabitur, quam, etsi et ratione et experimento stabilita satis videtur, a nonnullis tamen, iisque doctis viris, nec hodie sine omni scrupulo assumi, expertus sum.

§. 7.

Dicam prius de vermibus, in aegro inuentis, quos in omni re, illis, qui secundo ordine a me prolati sunt, similes fuisse, retuli. Non omnes eiusdem longitudinis erant: sed alii ad dimidium pollicem mensurae Parisiensis accedebant, alii vario gradu minores erant; quod certe a diuerso nascendi tempore dependit. Figura eorum conum referebat, ex vndecim annulis compositum, si extrema antica pars, quam vaginam vocabo, separatim numeretur. Acuta pars, siue anterior, dente vel vncino vnico, nigro, adunco, acuto, deorsum reflexo, et palato duplici infixio, munita erat. Condebatur cum vagin superius bifida, quam vermibus attactus vna cum vncino intra anulum vicinum retra-

retrahebat. Praeter illum vero usum, quem ad lancinandam et arripiendam escam vncinus illè habet, alius quoque est, qui sub rependo conspicitur. Vermis enim chartae impositus asperae eius superficiei illum infigebat creberrime, quo infixo, reliquum totum corpus anteriora versus adducebat. Inter haec tamen eminentiae istae abdominis circulares, de quibus mox loquar, non plane otiosae erant. In limine inter annulum primum et secundum, vtrunque ad latus, pars, canaliculum referens, conspiciebatur, compressa, antrorsum libere propendens, et stigmate obscurioris coloris recta. Obtusus siue posterior vermis terminus non vi quasi abscissus, sed leniter decrescente latere circinatus apparebat, et media quadam fovea notatus. Huius foveae superiori parti indita erant tubera duo, sibi inuicem contigua, solidioris compagis, perforata, brunoque colore tincta, quae pro lubitu vermis aliquantulum retrahere et extorere poterat. Inter canaliculos illos anteriores et tubera posteriora decurrebat vtrunque, sub variis flexuris, vas album, quod ad latus innumera vascula, ramusculis transversis inter se communicantia, spargebat. Respirationi esse haec organa 1) dicata, apud auctores legitur. Annuli crassitie sensim, non vero, eadem ratione, longitudine decresebant. Per tenue corporis velamen viscera subtus sita, forma macularum, translucebant. Sub abdomine, inter quoduis articulo-

1) SWAMMERDAMI *Biblia naturae* p. 697; et REAUMURI *Memoires pour servir a l'histoire des Insectes*, Tom. 4. pag. 168.

calorum par, membranacea cutis, ambitu fere dimidii circuli, ad accelerandum progressum extendebatur, ita vt a latere pedes bifulci, quod in postremo pare in primis notabile erat, conspici viderentur. Pone vltimum pedem sub pressione mucus aliquo loco prodibat, qui ipse ani suspensionem mouet. Color vermīs, qui primum griseus erat, dein in pallide luteum mutabatur, defectui pabuli fortassis tribuendum. Velocissime repebat, et nonnunquam omni opinione citius, contractis prominentibus abdominis partibus, ad latus se volutabat.

§. 8.

Discrepare hos vermes in quibusdam ab illis, qui ouem depascebantur, innui. Ostendendum igitur est, in quo discrimen consistat. Longitudo aequae ac crassities in his insignior erat. Quamdiu epulis suis fruebantur, colorem in rubrum vergentem habebant, qui vero postea in pallide griseum transibat. Neque vasa illa alba in his tam conspicua erant, nec membranacei pedes tam notabiles, vt in superioribus. Sed quod ad discrimen constituendum memoratu dignius est; vncini hic duo in ore aderant, paralleli, nonnihil a se inuicem remoti: et obtusus finis decliuīs, et in margine duodecim eminentiis acutis notatus erat. In duobus vero istis tuberibus posticis tres rimas conspiciebam, quarum margo paullulum elatior et obscurius coloratus erat. Pes postremus praeterea valde mobilis erat, et ad latus inaequalis figurae.

Accidit, quod bonam licet eorum partem in vitro, subere tecto, collectam seruarem, quotidie tamen eorum numerus minueretur. Latere illos inter carnem oblatam initio putabam. Quum vero mane, aliquot dies post, vitrum intuerer, omnes vnico excepto, reliquis paullo minore, aufugerant. Cognoscebam tum, eos per rimam inter suberem vitrique collum, vt aëris accessus pateret, relictam, emigrasse, quod fane singulare, quoniam tam angusta erat. Nec vllibi transfugas illas reperire poteram. Idem REDO *m*) contigisse postea legi. Et REAVMVR *n*) narrat, vermes, quos in cistula habuit, papyrus, illam tangentem, perforare incepisse, vt sibi exitum pararent. Vagabantur autem vndique horum loco, in vitro meo, vermes minuti, qui ouorum, vt puto, forma a prouidis matribus illuc per eandem rimam vitri, qua ceteri vermes egressi erant, delati fuerunt. Isti, ad quod probe velim attendi, nullo modo ab eorum figura, quos ex aegro seruaueram, abludebant.

§. 9.

m) *Experimenta circa generat. Insect. 12. Ed. Amstel. pag. 28.*

n) *Memoires, Tom. 4. p. 286.* Postquam enim vermes isti sine laruae ad incrementum summum peruenerint, putridam escam, quae ante in deliciis illis fuit, respiciunt, et commodiorem locum, quo sese in puppas transmutent, quaerunt. Alio modo generosissimi DE GEER dispendium istud aliquot vermiculorum, quod in larnis Tabani expertus est (Vid. *K. Vetensk. Acad. Handl. 1760. pag. 280.*), explicat. Quum nimirum, 8 etii larnis in vitrum immisiss, 3 modo superstites manserint: illas, quae deerant, a reliquis deuoratas arbitratur; nam charta ita fuit vitrum obtectum, vt emigrandi via omnino illis intersepta esset.

§. 9.

Quaestio nunc oritur, ad quod animalculorum genus cognitum vermes hi referri queant? Sane non adeo semper facile est animalcula ista, quae proprie a naturae scrutatoribus vermes vocantur, ab illis, quae apud eosdem laruae audiunt, distinguere. Verum multo difficilius est, alteram larvam ab altera, ob mutuam nempe similitudinem, discernere, et exinde insectum futurum cognoscere. Quod testimonio eius, cuius summa in hac re auctoritas est, illustris LINNEI o) congruit. „Haud miraberis, inquit, nullam ad hunc usque diem, methodum esse inuentam, qua larvata haec et parentibus, penitus dissimilia dignoscantur animalcula, cum plurimam eorum partem ita sese occultare natura docuerit, ut vix unquam aperta luce appareant.” Hoc vero incommodum ei in primum obuiam ibit, qui muscarum laruas distinguere adgreditur p), Vnde peculiarem in discernendis muscarum laruis operam REAUMVR collocavit q), et duas earum classes constituit, alteram, quae capitis figuram mutant, alteram, quae eam immutatam semper seruant; quas vtrasque diuerso dein modo iterum diuidit. Nani obseruauit, nonnullas pedibus instructas, alias vero iisdem esse destitutas, nonnullis competere pedes

o) *Amoenit. acad. Vol. 5. p. 238. Conf. REAUMVR l. c. p. 161. vti et p. 357.*

p) Vt exemplum afferam, velim conferatur apud SWAMMERDAMVM (*Biblia Nat. Tab. 43.*) effigies vermiculi, in caseo reperiundi, cum Figura 2. et 3. Tabulae 26. apud REAUMVRIVM (*l. c.*).

q) *Memoires, l. c. p. 163.*

pedes membranaceos, aliis squamosos, aliis vtrumque pedum genus. Ratione praeterea capitis formae, corporis mobilitatis, compagis integumentorum, indolis organorum respirationis, genera sua condit. Sed dolendum, paucas eum modo descripsisse larvarum species, et alios auctores pariter, muscas licet ipsas probis et exactis characteribus definiuerint, paucarum tamen larvas prosequutos esse.

§. 10.

Quod ad vermes, in oue repertos, attinet, eos larvas muscae, quam ill. LINNEVS *carnariam* vocat, habeo. Definit eam r) per "*muscam antennis plumatis, pilosam, nigram, thorace lineis pallidioribus, abdomine nitidulo tessellato, maiorem.*" Magna has larvas inter et illas, ex quibus *Musca Caesar* nascitur, quas egregie REAUMVR s) definiuit et depinxit, similitudo intercedit. At magnitudine differunt, in his insigniori, cuius tamen rationem habendam esse, idem eximius naturae scrutator monet t). Optime in illas RAYI u) descriptio quadrat. Nec aliam larvam FRISCHIVM x) loco infra citato intellexisse

r) *Faun. Suec. Spec. 1832.*

s) *Memoires, Tom. 4. pag. 165. seqq. Cfr. Tab. 12. Fig. 1. 2. 5. 6. 8. 9.*

t) *Loc. cit. pag. 174.*

u) *Vid. Histor. Insector. pag. 270. vbi sub nomine muscae carnariae vulgaris, the common Flesh-fly, venit.*

x) *Beschreibung von allerley Insecten. Part. 8. pag. 21. Vocat muscas illas Schmeiß - Fliegen mit grau und schwarzwürfflichem Hinterleibe. V. et Tab. 14.*

tellexisse puto, etsi effigies eius aliquantulum has ipsas magnitudine superat. Est haec laruarum species vna ex iis tribus *y*), quibus in primis natura officium, putrida cadauera, et sub diuin proiecta, consumendi commisit, ne per longam moram ibi relicta aërem insano suo halitu contaminarent.

§. 11.

Vermes aegri, cutis illa foeditate detenti, muscarum pariter laruas esse, vt primum eos intuerer, iam existimaui; eiusque generis fuisse ne vllus quidem, etiamsi ad muscarum laruas antea non attenderit, dubitabit, cui auctores nominatos, et REAVMVRIVM praecipue, cum mea descriptione conferre volupe est. Quatenus vero species praecise fuerit, in illa descriptionum inopia determinare nequeo. Maxime hisce et quoad figuram et magnitudinem illa larua congruit, cuius muscam REAVMVR ita describit: *z*) "*elle a des antennes prismatiques; elle est brune, et de l'espece de ces petites mouches, qui nous incommodent en été dans nos appartemens, ou d'une espece tres - semblable.*". Sed laruam duobus vncinis depingit, dum ego in meis vnum modo animaduerti, et obtusus insuper finis nimis abruptus, et vi quasi abscissus, in icone conspicitur. Nec nouisse illi, qui LINNEANO in definiendis rebus natura-

y) Vid. Dissertatio de Politia naturae praef. LINNEO a cl. H. C. D. WILKIO propugnata. Reliquae duae sunt laruae muscae Caesaris, et muscae vomitoriae. Cfr. Faun. Suec. Spec. 1828. et 1831.

z) Vid. Memoires, l. c. p. 393. et Tab. 26. Fig. 1. 2. 3. 5.

turalibus acumine delectatur, sufficit, vtrum musca haec, illa praecise, quae domestica vocatur, sit, an alia eidem maxime affinis. Musca domestica a cel. LINNEO a) dicitur "*M. antennis plumatis, pilosa, nigra, thorace lineis obsoletis; abdomine nitidulo testellato, minor.*" Et a carnaria eo praeter alia signa differre notat, "*quod illa duplo minor sit; quod sub volatu bombos non edat; quod non ita putrida quae-rat; quodque aliter generetur;*" nec alia signa, accuratius intuenti se silentia, excludit. Ad metamorphosin obseruandam, laruas istas, ex aegro captas, non commodo quidem loco, quod doleo, reclusi, omnibus spiritui vini statim immixtis. Sed rationes adsunt, cur credam, quod ex ouis muscae domesticae prosectae sint. Incredibile fere est, quanta muscarum domesticarum b) copia continuo ad lectum aduolarent, aegrumque suctu suo torquerent,

Aa 2

a) Faun. Suec. Ed. 2. Sp. 1833.

b) Vix existimauerim in harum consociatione Conopem calcitrantem (*Syst. nat. Ed. 10. T. 2. p. 604.*) fuisse, quam frequentius longe, in aedibus etiam hominum munditiei studioforum, Gottingae, quam in Suecia olim, reperi. Non memini enim, eam obuiam mihi venisse, quae licet magnitudine, figura, colore, omnino cum musca domestica conueniat, puncturis tamen pedum molestissimis, quas aestate ad finem vergente, et pluuia instante, exercet, quin nobis inuitis, facile dignoscitur, quarum rationem attentior in rostro acutissimo eoque duro, muscam domesticam deficiente, detegit. Ex larvarum natura nihil lucis desumi potest, quum ea nos adhuc lateat, adeo ut ne acutissimus quidem insectorum scrutator, cel. GEOFFROY, (*Histoire abrégée des Insectes, qui se trouvent aux environs de Paris T. 2. pag. 538. Tab. 18. fig. 2., vbi nomine Stomoxys describitur*) notitiam eius habuerit.

querent, vt in clamorem vsque nonnunquam erumperet. Hinc venenatum liquorem ad illas necandas ipsi lecto imponendum curauerat; quod, quum nihilominus tamen non sufficeret, puerum adstare iusserat, qui continuo a facie muscas flabello abigeret. Operti quidem pedes, quoad plurimum tempus, stragulis erant. Sed quum lintea mutarentur, muscae facile accedere et oua sua deponere potuerunt. Indicaui praeterea, laruas, quae per rimas, ouorum forma, vitrum in fenestra positum intrauerant *c*), ab hisce nulla in re discrepasse; nec sane tum temporis, quantum equidem scio, in conclauis meo, praeter muscam domesticam, aliud muscarum genus aderat.

§. 12.

Nullum, spero, morabitur, quod nonnisi in aegri pedibus vermes descripti occurrerent, quum tamen muscis, ouis grauidis, facilius ad faciem et manus, pari vlcerum foeditate conspurcatis, aditus esset? Contigit enim fortasse, vt et hic muscae quaedam oua exonerarent; quoniam facies vero et manus, crebrius magisque sollicitè, mundabantur: necata forsitan vel deterfa tempestiue fuerunt. Nescio praeterea, an muscis hae partes aequè commodae

c) Vidit REDVS circa foramina fistulae, cui putridam carnem immiserat, partim oua, partim vermes, odore foetido inuitatos. (*Experimenta circa generationem Insector. pag. 43.*) et quum carnem in vase velo Neapolitano tenerrimo tecto, et, intra arculam eodem subtili velo obductam, recondito seruaret, in superiori velo vermes circumuagari obseruauit (*l. c. p. 57. sq.*)

modae ad foetus suos recipiendos visae sint? Nam scimus insecta curam semper habere, ut oua in loca, proli suae fouendae et nutriendae aptissima, deferantur. Hinc muscae laruae, licet carnis avidissimae sint, nonnisi illam tamen, quae iam incertum quendam putredinis terminum vergit, in deliciis habent *d*). Carnem quaerunt humidam, in modico calore constitutam, et contra aëris iniurias probe defensam. Iucundum est experimenta REAVMVRII hac de re facta *e*) legere. Alligauit nempe femori columbae viuae, plumis euulsis, frustum carnis bubulae, muscarum laruis refertae, ut tentaret, an laruae istae ipsum femur corripere. Sed non multo post escam suam deseruerunt, et qui remanserant, perierunt omnes; quum scilicet caloris gradum maiorem paterentur, quam cui ferendo pares erant. Alio experimento immediate ad columbae musculos corruptam carnem applicuit, quin intra ipsam cutem vermes intrusit. Verum hi citius adhuc quam priores aufugere coacti sunt, et qui in fuga languidi erant, intra horae spatium interierunt. Vnde notat, quod vermes, quibus mortuas carnes deuorare datum est, inferiorem longe iis calorem perferre queant, qui intra viua corpora nidulantur. Quando praeterea frustum illud carnis loco soli radianti et ventis obnoxio suspendebat, nunquam oua muscae potuerunt; quod vero contra factum est, si carnem

Aa 3

supra

d) REAVMVR *loc. cit.* p. 361.

e) *Loc. cit.* pag. 359. seq. uti et pag. 365. seqq.

supra terram humidam *f*) quieto loco exposuit. — Si vero semel vermes in carnem, indigentiae suae conuenientem, inciderint, eam humore illo glutinoso, quem excernunt, adhuc magis ad escam praeparant, eoque putredinem augent, quod coquis fat superque notum est *g*).

§. 13.

Fauebat maxime vermibus hisce generandis misera ipsius aegri conditio? Laborauerat ille per longum tempus insigni pedum et crurum oedemate, quod consuetum huius morbi symptoma est. Hactenus lymphæ intra cutem stagnans remanserat, postremis vero diebus vna cum virulento ichore ex pedum vlceribus, continuo fere riuo, profluebat. Quæ profusio non potuit non erodere cutem, aegrumque ob nudatos nervos alluentis aëris pertaesum reddere, ita ut tectis etiam pedibus de frigore quereretur. Qua de causa, ne quid de repentina coniugis, quæ hucusque curam eius gesserat, morte dicam, iusto parcius linthea mutata sunt. Huic accedit, quod eo temporis interuallo, quo vermes reperirentur, rigescerent pedes, et stuperent, ut ne levis quidem agitatio in lecto locum haberet, nec ex tot vermiculorum reptatu ac rosione aeger aliquid perciperet. Aderat simul calor, quo ad vermes generandos opus est, quum, ut ingratum frigoris sensum leniret, densis stragulis pedes contege-

f) Defectus requisitæ humiditatis in causa est, quod vermes carni fumo induratae parcant.

g) REAUMVR *loc. cit.* p. 370.

tegeret, et aëris tempestas nimis praeterea calida esset. Scilicet versus Augusti mensis finem vermes comparuere. Tanta exinde putredo oriebatur, ut quum stragulas attolleret, nares saepe quasi volatili afficerentur. Habebat insuper quoad plurimam partem in conclavi angusto, quod aër non libere perflare poterat, et quidem in infima domus contiguatione, ex humi substratae vaporibus humida. Notari meretur, quod tribus modo ante obitum diebus vermes isti pullularent. Non vero in pedibus modo versabantur, sed, casei vermiculorum magnitudine, in ipsa quoque stragula, ubi ichoris spurcitie inquinata erat, coaceruatim collectos eos deprehendebam. Vtrum vero muscae in ipsam stragulam ova sua posuerint, an haec ipsa de pedibus deterisa stragulae adhaeserint, non dixerim.

§. 14.

Plurimi horum vermium summum fere, quum primum aegro et adstantibus apparerent, magnitudinis suae fastigium iam attigerant, idque cum celeritate ista incrementi, quod muscarum larvis generatim competere observatum, probe congruit. Per biduum abfueram, ut, an eo tempore lintea mutata fuerint, dicere nequeam. Certum tamen est, quod non antea aeger, quam eo ipso die, quo illum iterum visibam, eos detexerit. Observatum est, vermem plerumque intra viginti quatuor horas, postquam ova posita fuerint, emergere *h*). De quibusdam vero muscis nouimus, quod praeter

Aa 4

oua

oua et viuos vermes edant; quod et REDVS *i)* iam notauit. Putat ille, quod non semper oua parent, a defectu commodi anni temporis, quod vim quandam maturantem secum vehit, dependere. Contra SCALIGERVM simul pugnat, qui omnibus muscis duplex hoc pariendi genus esse statuit. REAUMVR *k)* testatur, se in sex vel septem speciebus viuos vermes prodire vidisse. An hoc idem muscis domesticis proprium sit, ob tenebras obseruationum dicere nequeo. Si autem ita esset, maior adhuc lux affulgeret, qua ratione tam cito crescere potuerint; siquidem dies ille, qui alias maturandis ouis impensus fuisset, nunc in vermibus incrementum cederet. Quanta dein celeritate post partum crescant, REDVS quoque experimento nos condocet. Vermes enim, in pisce putrescente nati, postero die duplo maiores euasisse videbantur. Et, ponderans eos insequente die, singulos septem grana graues inuenit, quum tamen praecedente die viginti quinque ad triginta vermes vix vnicum granum pondere aequarent. Intra septem vero, et nonnunquam intra quatuor vel quinque dies crescere desinunt, et dein, quorundam dierum spatio interiecto, in puppas transeunt. Versus illud tempus dapes suas deferunt, et latibula, ad metamorphosin subeundam commoda, quaerunt.

§. 15.

Quod vero tam ingens vermium multitudo intra tam paruum temporis spatium in aegro nata fuerit,

i) L. c. p. 59.

k) L. c. p. 406.

fuerit, muscarum stupendae fertilitati tribuendum est. Cuius enim patet, quod muscae ingentem ouorum copiam in varios acervos deponant. Et qui eousque curiosi fuere, ut oua ista numerarent; narrant, se in quouis acervo duodecim oua, plus minus,prehendisse, et iunctos ducenta circiter oua complexos esse, quae omnia unicam tantum matrem agnouerunt *l*). Quae tamen sobolis multitudo inter insecta non magis mira est, quam seminum in stirpibus ex vna eademque radice prouenientium copia *m*), ut quae id utilitatis habet, ut, si quaedam sua vita destituerentur, alia remoram, ista inertia in propagatione suboriundam, refarcirent.

§. 16.

Verum ille aeger non primus inter leprosos fuit, in quo mali vehementia vermes producti sint; sed passim alia exempla exstant. Supra iam meminimus AVGVSTINVM CALMET *n*) sibi animalcula in lepra concepisse. Illa autem tanquam causam mali considerat, et tam parua fingit, ut sine microscopio detegi non possint; quum haec, de quibus loquor, effectus atrocis morbi sint, et nudo oculo conspici

Aa 5 queant.

l) REAUMVR *l. c.* p. 368.

m) Ex vnico e. c. Papaueris semine, 32000. et ex vno Nicotianae 40320 alia semina, vnica aestate emerferunt. Conf. ill. LINNEI *Philosophia botan.* p. 86.; uti et DODARTII *Commentationes de la fécondité des plantes*, in *Mem. de l'acad. des sc.* A. 1700 et 1701.

n) CALMETI *Dictionnaire historique de la Bible*, Tom. 2. p. 478., sub voce *Lepre*; et eiusdem *Biblische Untersuchungen*. Ed. MOSHEIM. *Unters.* 12. Part. 2. p. 162. seqq.

queant. Nam quoniam ex corruptela humorum quaedam in lepra obuia momenta, (quod nimirum contagium tam facile spargatur, quod praecipua labes in cute exferatur, alia,) non satis commodè explicari posse credit, ad animalcula confugit. Ipse tamen sub scribendo effatum suum aliquantulum restringere videtur o), quum dein, praeter animalcula, cacochymiam quandam corporis, leprae producendae opportunam, admittat; nisi discrimen, quod alio loco p) de lepra condit, heic lucem accendat. Aliam enim ab interna humorum corruptela dependere, aliam consortione cum eiusmodi aegris contrahi, affirmat. In hac proxima tantum specie animalcula accusasse eum existimo. Sed mittam coniecturas, et quae verae obseruationis rigor subministrauerit, indicabo. Inter alias sententias, quas auctores de morbi natura, quo Iobus laborauit, fouerunt, illa, quod elephantiasi Graecorum laborauerit, vero simillima esse videtur. ORIGINEM ita iam iudicasse ex Quaestionibus ill. MICHAELIS q) disco, cui et ipse adstipulatur. Nam quod nonnulli lue venerea eum affectum fuisse dicant,

p) *Untersuch. l. c. p. 171.*

p) CALMETI *Dictionaire, l. c. p. 477.* „Je crois, dicit, „qu'il faut distinguer deux sortes de lepre; l'une, qui „vient d'une corruption interieure, et l'autre, qui se „gagne par le commerce exterieur avec un lepreux. „La corruption du sang peut etre a divers regards, „la cause et l'effet de la lepre.”

q) *Fragen an eine Gesellschaft, p. 101.* Cfr. MEAD de *morbis biblicis, p. 8. Ed. OEDER.*

cant, vix attentionem meretur; et quod MASSEY r) Iobo variolas a diabolo infitas statuatur, ridiculum sane est. Ad innumera illa mala, quibus castigabat illum diuina poena, vermes accessisse legimus et molestissimum vitae tormentum procreasse, vt queri cogeretur: "*Induit caro mea vermes*", et alio loco: "*Nocte ossa mea perfodiuntur.*" In obseruationibus medicis, quae studio medicorum quorundam Londinensium prodeunt s), pariter de vermibus, in lepra inuentis, mentio fit. Describit enim Gallicus quidam medicus naturam mali huius ex obseruationibus in vrbe, Martigues dicta, institutis, quae in ostio lacus inter Arelatum et Massiliam sita est, vbi ante longum tempus, in leproforum vsum, peculiare nosocomium exstructum fuit. Haec vero de vermibus habet: "*The surgeons, who have the care of dressing them, have assured me, that they have sometimes found worms in them, perhaps this might happen because they were too seldom dressed.*" Et cl. PEYSSONEL t), qui statum miserorum, quos in insula Guadaloupe lepra infestat, expiscatus est, "*in some, ait, the hair fell off; which was replaced by a finer kind: in others, worms were found in their ulcers.*"

Post hosce praestantissimos viros, Suecus quidam, MARTIN, medicinae cultor, in lepram Norvegis

r) Sermon, p. 6.

s) *Medical Observations and Inquiries by a Society of Physicians in London 1757. Vol. I. Obs. 19. p. 201.*

t) V *Philosophical Transactions, Vol. 50. Part. 2. for the Year 1757. Obs. 7. An account of a Visitation of the Leprous Persons in the Isle of Guadaloupe.*

vegis familiarem, quo par est, studio, inquisiuit. Descriptis istis *u*), quibus per tria sua stadia distinguitur, notis, causam mali indagare annisus est, et quum vulgaris inter gentem istam opinio obtineret, ex ingestis morbidis piscibus et pecoribus, et quidem leprae quodam genere inquinatis, illud oriri, ipsa haec animalia sollicitè examinauit. Constat tum, praeter alia multa piscium vitia, in Salmone alpino copiam vermium intra tubercula intestinorum delituisse; et in boue lepra enecto intra tubercula, per varia viscera dispersa, pariter vermes conspicerè sibi visus est. Hisce ductus tandem in coniectura substitit, anne omnis lepra tam in animalibus, quam in hominibus obuia originem suam a vermibus repeteret. Vere ita esse ex hisce paucis quidem concludere non vacat: ill. tamen LINNEVS *x*) nouis sine dubio postea testimoniis eo peruenit, vt "*vermes minutos Gordii facie in Noruegia elephantiasis excitare et ulcera cacoethica, ex observationibus Martini,*" pronunciaret *y*).

Prout

u) V. Kongl. Vetensk. Acad. Handlingar för år 1760. p. 306.

x) Amoenit. acad. Vol. 5. p. 103.

y) Probabilem adhuc magis hanc coniecturam reddere annisus est ill. A LINNE variis argumentis, quae tres circiter annos post in *Diff. de lepra*, resp. ISACO VDDMAN 1765. p. II. protulit, quae ipsa hic subicere non ab hac materie alienum est. Lepram ibi tribuit vermiculo cuidam, Norvegis *Queise* dicto, inter Gordios et Ascarides figura quasi medio, quem nomine Gordii marini nouissime (*Syst. Nat. Ed. 12. Tom. 2. p. 1075.*) descriptum inuenio. Est vero filiformis, in planum spirale conuolutus, albus, pollicis dimidii longi-

Prout autem ex dictis non vnum modo ver-
mium genus, siue istos causam tetrae luis agnoscas,
siue

longitudine. De hoc vermiculo venerandum in Nor-
vegia Theologum, STRÖM, in historia naturali et oe-
conomica Sundmoerae Norvegiae (HANS STRÖMS
*physisk og oekonomisk Beskrivelse over Fogderiet Sund-
mør i Norge*) significare refert, neminem eorum, qui
mare accolunt, esse, quin ab isto lepram provenire
existimaret. Quod quidem assertum STRÖMI menti
aduersum, expressis verbis declarat O. FR. MÜLLER (*von
Wärmern d. süß. und salzigen Wassers*, p. 112. sqq.)
Crebrum asseuerat LINNEVS Gordium esse in iecinere
Lucii, et in Clupeae omnibus fore partibus, ita vt
iplos musculos ad ossa usque peruadat. Haecce legens
indicare operae pretium iudico, me haud ita pridem
in Harengis exsiccatis (Bücking), qui in hac vrbe
vendebantur, copiam vermiculorum filiformium in ipsa
adeo piscis carne conspexisse, quos, quum mortui et
pariter exsucci plurimam partem apparent, quum
viueret piscis, illi iamiam inhaesisse iudico. Viuos
adeo in Harengis exsiccatis obseruauit cl. HANNES
(*von d. Friesel*, p. 93.) et dein animalcula haecce in
Harengis sale conditis reperit. Crebriori igitur haeris
esui in hominem transmigrare cel. A LINNÉ arbitratur,
idque nominatim ideo, quod piscis hic rarissime hoc
vermiculo immunis existit, quod vermibus in vniuer-
sum tenacissima vita competit, quod hic ipse vermicu-
lus praeter consuetudinem per viscera ipsa et musculos
piscium penetrat, quod tubercula, vbi haeret, istis
leprosoꝝ hominum non absimilia gignit, quod de-
nique in locis potissimum maritimis lepra grassatur.
Interim non diffitetur veri amantissimus vir pluribus
obseruationibus opus esse, autequam haec leprae in
hominibus origo extra omne dubium posita sit. Quae
de medicamentis, et leprae curandae et vermibus abas
necandis, oportunis refert, ex ipsa disputatione velim
lectores repetant. Tenaciter vero illustrem A LINNÉ
coniecturae dictae de causa Norvegorum leprae serius
inhaesisse, ex dissertatione nouissima, cui titulus *Læ-
riora Norvegiae*, resp. HENRICO TONNING Febr. 1768.
videre

siue inualefcente malo modo prognatos existimes, in lepra occurrere patet: ita et a cl. ROLANDRO in America australi facta obseruatione euincitur, vtqui teste LINNEO 3: in elephantiasi nigritarum singularem muscam pediculo minorem, quae et *Musca leprae* dicta fuit, animaduertit. Paucissima sunt, quae pro scopi ratione memoriae ill. LINNEVS hac dere prodidit. Vnde vtrum de larua huius insecti, an de ipsa musca, volucris iam facta, sermo sit, determinare nequeo.

§. 17.

Miror vero, quod veterum nemo inter leprae mala vermes recenscat, quum tamen alia, quae minoris momenti incommoda haberi possunt, non reticeant. An ideo eorum recensio, quod vulgaria vlcera saepe vermibus conspurcantur, illis superuacanea visa fuit? Nam in vlceribus, quando vel rarius, deligantur, vel in sordidis hominibus erumpunt, quod chirurgi tempore aestiuo in nosocomiis bellicis praecipue experiuntur, non raro vermes pululant. Vermium pullitiam in mortui corporis vulneribus ex muscis aduolantibus iam cognouit

HOME-

videre est. — Vero, quantum constat, propius accedunt, qui leprae, in septentrionalibus regionibus obuia, causam in vitae genere diaetaque peruersa quaerunt, quae ipsa vitia plurimam partem in esu nimio piscium salitorum vel male praeparatorum, phocarum, vel commoratione diuturna in aëre frigido et humida consistunt. Conf. cell. BÄCK et ODHELIVS *loc. cit.* p. 357. not. d.

2) *Syst. Nat. Ed. 10. T. 1. p. 598. (Ed. 12. T. 1. p. 994.)*

HOMERVS *), ACHILLEM producens occisi aere PATROCLI corpus ad arcendas muscas pallio contegentem, donec deferri inde cadauer et honorifice humari posset. Sed redeundum ad vermium, qui in viui corporis vlceribus obueniunt, considerationem. Horum GALENVS a) iam meminit: „unde in abscessibus, inquit, „multoties inueniuntur animalia, illis, quae ex putredine „generantur, simillima.” Medelam quoque contra ulcera, vermibus scatentia, commendat b). AEGINETA pariter docet, quomodo necari possint c). Recen-
tiorum hac de re testimonia litteris mandata non minus frequentia sunt; quos inter SENNERTVM d), BORELLVM e), PLATERVM f), POTERIVM, numero. Frustra vero apud plerosque, utpote qui vel solo nomine contenti, vel magnitudinis modo et coloris rationem habuerunt, exactam vermium descriptionem quaeras, quae tamen grata naturam scrutantibus futura fuisset, ut nimirum pateret, an semper laruae modo muscarum adfuerint, et ut, quodsi adfuerint, de specie praecise constitui posset. Accuratam tamen CHRISTIANVS A STEENEVELT g), vermium in vlcere repertorum descriptionem, adiecta

*) Iliad. 19.

a) Lib. de tumoribus praeter natur. Cap. 4.

b) De compos. medicam. per gener. Lib. 4. Cap. 10.

c) Lib. 4. Cap. 42.

d) Lib. 5. Part. 2. Cap. 11.

e) Obseru. Med. Cent. 2. Obs. 48.

f) Praxeos T. 2. cap. 17. p. 554.

g) V. EIVS Diff. de vlcere verminoso in BIDLOI Operibus omnibus et Icon p. 18.

iecta eius imagine, dedit, quibus et prima eorum forma, et proxime insequens in puppas, et ipsas muscas, transmutatio conspicua redditur. Recentiorum vero, non minus sollicitè factam, eiusdem generis observationem cl. FARION *h)* debemus. Memorat enim puerum, qui per aurem mensis spatium copiam puris emisit, improuiso insigni dolore correptum fuisse, adeo ut in convulsivos motus incideret. Dolore vero aliquantulum remittente, extrahi fuerunt 3 vermes, quos an metamorphosi obnoxii essent, ut experiretur, chartae inclusit. Quinque diebus praeterlapsis, in puppas transierunt, ex quibus tandem muscas prodisse dicit, maiores, quales aestate carnes putridas depascuntur. Quum viliorum istam larvarum muscarum speciem adfuisse narret: indicio est, maiorem in auris ulcere putredinem iam inualuisse *i)*, quam quae muscae domesticæ commoda est, de qua ill. LINNEVS leuiorem tantum putredinem ferre contendit.

Foetor

h) VANDERMONDE, *Journal de Medecine etc.* Mensis Augusti *A.* 1758. pag. 138.

i) Varia carniū genera ab una eademque musca consumi, per observationes, in primis REDI. manifestum est, qui non vulgares modo, quas comedimus, carnes, sed rariores, prout leonum, tigridum etc. uti et serpentum, ranarum et aliorum animalium, muscis exposuit. In his vero omnibus non nisi quatuor diuersae vermium species natae sunt. (Vid Eius *Experimenta circa generationem insectorum* pag. 27. seqq.) Sed non statim exinde concludere licet, muscas nullum plane delectum facere, sed quous putridae carnis genere contentas esse (Conf. REAUMUR *Memoires T.* 4. pag. 563): nisi locum habeat, quae animū meum subit

Foetor ulcerum sine dubio primum hisce casibus allexerunt muscas, ut ova illuc ponerent; qui quantam vim in haec insecta habeat, ipse pluries in *Stapeliae hirsutae* L. flore expertus sum, ut in quem cadauerini odoris non solum inter pilos muscae sua ova mittunt, sed his ipsis in larvas transmutatis hae undique depascere florem incipiunt. Eadem ratio videtur apud eos subsuiffe, quorum in naribus per tempus hospitantes vermes cephalalgiae dirissimae causa exsistere *).

§. 18.

Haecce sunt, quae ad ill. MICHAELIS quaestionem regerere possum, quibus et nouum vermium in lepra repertorum exemplum subministratur. Nolim tamen, hisce inductus aliquis existimet, me omne reliquum vermium genus a lepra excludere velle. Fieri enim potest, ut pro putredinis vario gradu, vel accessu aliis patente, alia insecta alliciantur, quod et alienis quibusdam a me allatis historiis probabile redditur. Nec omnino absolum videtur, in quibusdam lepra contaminatis aegris,

subit suspicio, fore, ut pro vario putredinis gradu carnes ita praeparari possint, ut diuersis muscis placeant. Cuius coniecturae vel veritatem vel falsitatem nondum licet experimentis firmare possim: firmandi tamen olim otium forsitan et occasio suppetent.

*) V. de hisce memorabile exemplum a cl. WOHLFAHRT (*Observ. de vermibus per nares excretis, Halae 1768.* 4.) enarratum aliaque similia, quae cum hocce coniungit, ex aliis auctoribus collecta.

aegris, duplex statuere vermium genus, quorum alterum pro causa, alterum pro effectu tetri morbi habendum esset. Quae vero, ut ulterius confirmantur, ut magis naturalis pariter ac medicae scientiae interest: equidem tamen, sciendi fatieta-tem aliorum miseris, nisi quousque officii ratio iniungat, redimere non gestiens, ut proprio ista studio indubia reddendi opportunitas exstet, non valde opto.

HISTORIA LEPRAE

IN QVA VERMES SUPRA DICTI COM-
PARVERUNT.

Haud ingratum lectoribus futurum spero, si superius a me recensitis, de vermibus in leproso homine repertis, observationibus, iam, quum istae typis mandandae sunt, ipsam tetri morbi historiam adnectam. Quum enim ipsa mali raritas ad istam consignandam inuitare videtur: tum vel maxime illustrandis variis de vermibus prolatis momentis inferuiet. Nec refragari licet iis haec mea legentium, qui rationem nominis, quo morbum nuncupauit, non auctoritate aliorum tantum, sed propria observatione nixam, exposcunt. Describam ideo cutis illud vitium, eadem quidem fide, quam aduersariis, quum eius spectator existerem, excepi, non vero, prout ibi factum est, secundum dierum seriem.

feriem. Quæ licet morbos delineandi ratio auctorum commoditati haud parum faueat: taedium tamen plerumque, ob amplius et interruptum dicendi genus et multa iam dicta repetendi necessitatem, in morbo præcipue chronico, lectoribus parit, obscuriusque longe ipsius morbi effigiem et neruum repræsentat.

*

*

*

Aeger, foedissimo isto cutis vitio affectus, fuit sartor Gottingensis, G***, homo annos circiter quinquaginta natus, matrimonio coniugi, et de mariti salute et rei familiaris augmentis sollicitæ, iunctus, et plurium liberorum pater, quorum filia dimidii anni ætatis ex phthisi neruosa, sub diro patris morbo, d. 11. Iulii mortua. Ea autem vitæ suppetiarum copia instructus erat, ut nec aerumnis eneruari, nec victu pauperiori et infalubri inquinari sensim, corpus posset, nec semel contracta valetudinis labes medicamentorum et necessariæ curæ defectu altiores radices agere. Temperies vero aegri cholERICA, in iras et turbas facile erumpens, corporis habitus plethoricus.

Primum cum die 10. Maii anni 1762. conspexi, quo, misero morbi spectaculo perculsus, de iis percontari eum statim coepi, quæ et originem et incrementum tetri mali illustrare possent. Quæ et haud inuitus enunciauit, pluries dein ab ipso mihi confirmata. Laborauerat ille iam annos aliquot antea crebra impetigine, quæ vero commoda

medela, iam a b. BRENDLIO, meritissimo viro, ipsi subministrata, euanuit. Per notabile tum temporis spatium cutis isto vitio liber mansit; paullatim vero noua exanthemata efflorescunt, quae, quoniam muneris ratio frigori et tempestatibus sese subtrahere eum non patiebatur, et copia et molestiarum vehementia in dies increuerant. Ex itinere: redux medicum aliquem statim adhibuit, quem vero, sulphuris floribus et interne et extrinsecus: frustra tentatis, paullo post dimisit. Successit: agyrta, Gottingensi plebi olim venerabilis, sub cuius curatione, vt agyrtam decet, arcana, herniam inguinalem (an potius bubo?) natam esse narrabat, sponte tamen euanidam. Excepit hunc chirurgus: quidam decrepitus, qui venereum fomitem latere: existimans, ad hunc extinguendum omnes neruos: intendit. Accita igitur vnguenta mercurialia *), purgan-

*) In lepra quidem pariter ac in lue venerea fomes malii membranam adiposam affectat, quod, vt vnice in casu, mihi obuio, maneam, ex copia effusi per vlcera manus puris cum decremento tumoris ipsius brachii coniuncta, ex consumptione adipis in vola manus, et ex rugis sub progressum morbi in pedibus conspectis, satis apparet. Sagaciores tamen medici mercurium non refrænare malum, sed incitare animaduenterunt, etiamsi illud aliquando pro tempore eo mitigari videatur. Congruit hoc cum obseruationibus cl. PEYSSONEL (*Phil. Transactions Vol. 50. pag. 40.*) quibus cel. HILLARY (*Observations on the changes of the air and the concomitant epidemical diseases in the Island of Barbados pag. 329.*) subscribit. Eiusdem sententiae cl. IOANNIS est, qui lepram in vrbe Martigues Gallo-Prouinciæ enatam descripsit. (Vid. eius narratio de eadem in *medical Observations and Inquiries Vol. I. pag.*

purgantia eiusdem indolis, quæ ipsum adeo turpethum minerale receperunt, quibus non mirum, quod ptyalismus fuscitaretur, quæ inter tamcn externe calcis aqua, alumen aqua solutum, aliaque eiusdem fecis adhibita. Perperam vero eum virus venereum accusasse, tum inde cognoscitur, quod istae partes, in quibus omnium primo sese manifestare debuisset, integrae fuerunt, tum et quod mercurialium vsus non correxit morbum, sed deteriorem reddidit. Idem chirurgus dein succos herbarum recentium, cum spiritu vini hauriendos, propinauit. Quum inter horum vsum malum inualeceret, et alius Dransfeldi degens eiusdem tenoris homuncio magnam peritiae suae existimationem excitasset, priorem repudiauit, sed alter succedens, qui liquore cuidam corrosiuo manus

B b 3 crebro

pag. 210.) Nec TURNERO (*Treatise of diseases incident to the skin. Vers. Germ. pag. 84. sqq.*) aliisque, quos memorat, experimenta in leprosis cum mercurio successerunt. Sollicite ideo cel. SCHMIEDEL (Vid. *Diff. de lepra. Erlangae 1750*, quæ exstat in *coll. Halleriana Disput. pract. Vol. 6. pag. 83.*) in duobus aegris, lepra Græcorum inquinatis, vestigiis aliorum territus, mercurium vitauit. Non conducere eum sed officere in hoc morbo experimentis suis quoque certiores euaserunt cl. ODHELIUS (*Vet. Acad. Handl. 1774. pag. 266.*) et SCHILLINGIUS (*de Lepra pag. 36*). Quo vero et exemplum salutaris mercurii in lepra virtutis ex testimonio recentioris medici citatur, cl. WESZPREMI (*Observationes med. Trai. 1756. insertae coll. Hall. cit. Vol. 6. pag. 817.*) nominandus est; et nouissime cl. THOM. HEBERDEN, elephantiasin in Madera obuiam perite describens, testatus est. mercurii vsu, contra vulgarem opinionem, lepram nullo modo exasperatam fuisse. Vid. *Medical Transactions Tom. I. 1768. pag. 39.*

crebro immergendas suaserat, idem mox pro merito fatum tulit. Quod et postea contigit tonsori Gottingensi, cuius pulueres, quorum duo modo sumfit, deiectiones alui vehementissimas excitarunt.

Tandem illi vogel, Regiæ Maiestatis Archiatri, auxilium, ad reparanda tot damna, quæ perueria curatio creauerat, et ad subigendum malum, ipsa mora obstinatius factum, quod in uniuersum secundum LOMMII *) effatum, *increscens depelli remediis non potest*, efflagitatur. Qui celeberrimus vir postea ad finem vsque vitæ curam eius gerens, me tum temporis, quo nec doctoris titulo, nec publico quodam munere instructus eram, comitem sibi benigne associauerat.

Ego vero, qui 14 diebus serius accessi, ægrum miserrima iamiam memoranda conditione decumbentem reperi. Nulla quidem febris, quam tamen, comitibus delirio et colica, tempus aliquod ante cl. medici accessum laborauerat, iam sentiebatur; nec vlla in functionibus, quibus peragendis sani pares sumus, labes. Sed facies tuberculis orbicularis et conuexæ figuræ, fuscis, insignitis supra reliquam cutem eleuatis, foedata erat, quæ nasi præcipue pinnas, labium superius et mentum occupauerant. In pectore exanthematum diuersi erat magnitudo, eorundemque inter sese contraguum, partim rubentium, partim nigricantium. Maxima erant et teterrima, quæ manus et brachia infestabant.

*) *Observat. med. pag. 60.*

infestarant, ut quæ ad floreni magnitudinem fere accedebant, marginemque valde inflammatum coloremque liuidum præ se ferebant, copiam ichoris pellucidi, quin hinc inde verum pus, fundentia. Horum tamen interstitia sana apparebant, excepta compage cutis consueta nonnihil duriori. In dorso manus et carpi confluerant quasi exanthemata, saniesque cutem profunde exederat: et ipsa manus insigniter intumuerat, digiti autem modo ad phalangem primam, metacarpo vicinam. Volæ contra ea manus efflorescentiæ omnino pepercerant. Pedum par ac manuum ratio erat, eo modo discrimine, quod in illis hinc inde colliquatio insignior, cum erosione profundiori et inflammatione exanthematum maiori coniuncta, existeret. Nec abdomen dorsumque liberum erat, sed totum corpus, natis et pudendis, aegro narrante, exceptis, efflorescentiis infestatum. Auxerunt miseriam pruritus dolorque, quem in locis exulceratis sentire se querebatur, et foetor aegro pariter ac adstantibus molestissimus. Quum multum emolumenti in lepræ sanatione a viperis *), inde a veterum tem-

Bb 4

pore,

*) Viperæ GALENI iam, ARETAEI, ANTONII MVSÆ apud PLINIVM, Arabumque medicorum in lepra superanda laudes tulere, quæ, quicquid PALMARIVS et FERRELLIVS, et haud ita pridem cl. WILH. HEBERDEN (*Medical Transactions Vol. I. pag. 39.*) contradicant, a multis recentiorum, dignorum fide, in lepra et affinis cutis vitiis confirmantur. His merito adnuerandi sunt MEADIVS (*Opera med. Tom. 2. de venenis pag. 51. Ed. Gott.*), MORGAGNI (*de sedib. et caus. morb. Epist. 55. art. 15.*), et HAENIVS (*Rat. med. Tom. 9. p. 246.*), quamvis inter encomia quibusdam minus

pore, præctici experti sint: hæc statim tentare cel. medicus constituit, easque ideo per totum Maii mensē continuā serie, quam dein aliquoties m. Junio interruptit viperarum defectus, vario modo, in decocto, in puluere, in vino ingerendas curauit, non neglectis simul aliis, quæ corruptelam humorum refrænandi et corrigendi, et per excretorias vias eliminandi, vim habent; quorsum vel in miscela viperarum, vel seorsim, cortex Winteranus, radix Dulcamaræ et Bardanæ, herba Saponariæ, cortex Peruvianus *) et Myrrha spectant. Quæ omnia initio quidem haud exiguam spem excitarunt, continuato vero usu **) et tempestatis calore adulescente, quo generatim ingrauescere cutis vitia solent, eam iterum frustrata sunt. Iuncta hisce externe foliorum Boni Henrici recentium applicatio, quæ in eliciendo pure, cui haud raro ipse cruor successit, et exulceratis locis depurandis, efficacissima initio fuere, pruritum autem insigniter aux-

minus profuisse (*Tom. 10. pag. 311. Tom. 12. p. 228. sqq.*) non diffiteatur. In nostro efficaces initio sese præstiterunt (nisi effectus pars et reliquis simul vsurpatis remediis tribuenda) licet siccatae exhiberentur, quæ vero non possunt non recentibus in iusculo coctis, vel instar piscium paratis, virtute longe inferiores esse.

*) Analogia, quæ inter lepram, et gangraenam, vulnera, præcipue vero strumas, intercedit, in quibus omnibus corticis peculiarem vim esse notum est, ductus, in leprosis eum quoque cl. TH. HEBERDEN (*l. c. pag. 34. 36.*) vtiliter adhibuit.

**) De parili successus, initio spei blandientis, fallacia querelas mouet cl. TH. HEBERDEN (*loc. cit. pag. 36.*).

auxerunt. Victus vero tenuis blandusque, ex lacteis cibis praeprimis constans, praescriptus est.

Sub horum remediorum usu in squamas dissolui hinc inde cutis, locis quoque a lepra liberis, prout in manus vola et in brachiis, coepit; ipsum autem exanthema liuidum antea vel profundissime rubrum, tumidum praeter ea insigniterque durum, partim siccescere, partim emolliri, et crustas formare. Conspicuae hae crustae, eaeque durae et densae, praesertim in facie erant, ubi quibusdam in locis vnicum quasi tegmen effecerant, in palpebra scilicet sinistri oculi superiori, quae inde omnino rigescebat, et in mento, ex quo facile separabatur, relicto loco sicco et paullum modo rubicundiori, quam ipsa cutis. Quae vero in naso erat crusta, eum totum fere obtexit, et quum linteo eam deterfisset, copiam puris latere percepit, succrescente dein prioris in locum noua crusta, idque postea in decursu morbi aliquoties. Labium superius valde inter haec intumescebat, et auris externa tuberculis ulcerosis foedabatur. Ex manus ulceribus profluebat, quum folia Boni Henrici auferrentur, copia puris eaque maior, quam quae ibi stagnare potuisset, sub quo vero effluxu tumor exanthematum ad cubiti flexuram enatorum subsedit; unde per telae cellulosae cauernulas ad manum descendisse pus euincitur. Manus ulcera sensim pura euadebant, et, maculis albidis siue cicatricibus enatis, cutis sanam referens succedebat. Quibusdam in partibus, nominatim in pectore, maculae

B b 5 rubrae,

rubrae, instar impetiginis, pullulabant, quarum quaedam inconspicuo modo euanescebant, aliis autem, nonnisi post crustas relictas, pereuntibus. Noua, quae successerant subinde, exanthemata tuberculatam potius quam planam figuram habebant. Foetor inter haec mitior. Quod non minus, quam sudores versus matutinum praecipue tempus copiosi, spem curationis alebat. Semel quoque leue sanguinis per nares stillicidium incidit, quod per multos tamen annos non expertus fuerat. Lotium pallidum et plerumque clarum, aliquando etiam turbidum.

Ad initium Iunii, quo viperæ pharmacopoliis defuerunt, malum in deterius vergere fatis manifestum erat, siue hoc a defectu viperarum, siue inualefcente tempestatis calore, dependeret. Iam iam enim ipsam capillatam capitis partem tubercula occupabant, nec superciliis parcebant. Qui olim modo primas digitorum manus phalanges corripuerat tumor, iam ad apicem digitorum sese transferebat; et eodem tumore pedum digiti afficiebantur. Intumescere quoque coepit facies et rubere sub pruritu; qui vero tumor dein mox euanescebat, mox renascebatur; in palpebris constantior, et tam insignis, ut oculorum fere usum tolleret. Quum lintea auferrentur, hinc inde sanguis effluxit. Emergebat variis in locis exanthema, ubi antea perceptum non fuerat, et pristinis locis repullulabat, quod et copiosius quam antepus eructabat. In vola manus, ob pinguedinem con-

consumtam, profunda in media eius parte fouea conspiciebatur. Allatae quidem postea viperæ, quarum autem in locum, infuso earum vino per breue modo tempus iterum usurpato, ob carum, quo vendebantur, pretium, alia remedia substituere opus erat. Fuerunt ista, præter corticem Winteranum, decoctum ex Hellebori nigri radice, et tandem, ineunte Iulio, tinctura cantharidum, interposito per vices regulo antimonii medicinali.

Ex decocto Hellebori *), in quo eiusdem Extractum solutum erat, leuis diarrhoea orta, quam et alere operæ pretium videbatur. Omissa dein hac medela sponte successit. Alternatim cum ipsa postea, tinctura cantharidum dabatur, quarum effi-

*) In huius quoque medelae præscriptione veteres præeuntes habemus, etiamsi nec b. SCHVLZII (*Diff. de elleborismis veterum*), nec cel. LORRY (*Libri de melancholia P. 2. cap. 3.*), opera extra omne dubium positum sit, quænam præcise stirps veteribus Hellebori nomine venerit. Quod vix mirum, quum nec planta, ex qua nostro tempore pharmacopoliorum Hellebori nigri radix desumatur (desumi vero ex Helleboro nigro flore roseo C. B. f. Helleboro nigro Linn. deberet), satis vbiuis cognita sit. Sed de hisce quidem ample alibi (*Appar. medic. Vol. 3. pag. 44. sqq.*) disserui. Helleborus (ἐλλέβορος) tamen et albus (λευκός), et niger (μέλας), ab ARETÆO (*Oper. Ed. Boerh. p. 136.*) et Veratrum nigrum, quod idem apud Latinos significat, a CELSO (*de med. Libri Ed. KRAVSIJ p. 177.*) impense in elephantiali commendabantur. Cui consilio auscultans cel. SCHMIEDEL (*Diff. cit. de lepra Coll. HALL. T. 6. p. 82.*) extracto Hellebori nigri venalis duobus aegris leprosis opem maxime conspicuam attulit.

efficacia, MEADII *) præcipue auctoritate, tantum inclaruit. Ab huius vsu lotium initio eadem modo, qua ante, copia perfluxit, aucta autem dosi, copiosius. Eousque sensim eam augere utile iudicatum, donec ardorem in lotii viis aeger perciperet. Tantopere autem in progressu mali natura cantharidibus assuevit, vt larga etsi copia ingestæ, sub frustraneo interdum mingendi conatu non vrinam, sed alui deiectiones satis profusas, cièrent. At apparens modo ad prima tentamina leuamen attulere. Tumor in facie, rubente insigniter, in sinistra præsertim eius parte, et in manibus obuius, mox subsedit, mox iterum creuit. Exanthemata mox siccescere et squamas contrahere, mox nouum puris profluuium edere visa sunt. Palpebrae ex ichore mali progressu erodebantur. Quæ olim viguerat ciborum appetentia iam prosternebatur. Pedes insignes rugas formabant. Adiungebant se hisce molestiis m. Augusto anxietas, pectoris oppressio, ardor internus, tormina; febrisque post meridiem leuis incidebat. Lotium erat croceum, aliquando tamen et pallidum, subinde foetens et vitro tenaciter adhaerens. De borborygmis simul et ructibus crebro querelas mouebat. Quum mitescere existimaret mala, neglectis cantharidibus: per duas fere hebdomades tinctura suspendebatur; substitutis regulo antimonii medicinali **), cum cortice

*) *De morb. bibl. p. 20. oper. Ed. Gott. T. 2.*

**) Antimonialia, prout in morbis cutaneis generatim ab expertissimis medicis egregia habita: ita in lepra nominatim peculiarem sibi fidem vindicarunt. Quin omni-

cortice Peruuiano et Winterano commisto, et viperis.

Febris dicta quotidie horroribus leuibus, sed in summa tantum cute perceptis, stipata ingruit, quam mox aestus intensissimus internarum partium excepit, adeo ut halitus ex ore emissi ardentes quasi illi viderentur. Longior dein quilibet paroxysmorum fiebat, imo per totam noctem durans. Accessit medio fere Augusto mense stupendus pedum crurumque tumor, ut peponem potius, quam pedem, referrent, ex quibus per vlcera enata largissime lymphæ, totum fere lectum inundans, profuebat. Sensus quoque horum, sub immobilitate, paulatim peribat. Foetor vero fere intolerabilis, stragulis præcipue eleuatis, quem calidi coeli vis auxerat. Frustra ad lenienda tot mala tincturam cantharidum iterum ingessit. Sed in nouum eorum cumulum die 30. Augusti vermes isti, superius a me descripti, primum comparauerunt; quorum historiae id modo hic addo, quod per octo horas spiritu vini licet illos seruassem, exempti tamen priusnam

omnibus reliquis in hoc malo remediis illa cl. HILLARY (*Observat. on the air and Diseases of Barbados*, p. 329.) præfert tempestiue et debito more si data fuerint, varieque in vino antimoniali, tinctura, et in electuario præscripsit.

Numerum remediorum variorum, quæ contra lepram inclaruerunt, supra passim significata, serioribus annis auxit Ledi infusum ex experimentis in Suecia captis (Vid. ODHELIVS in *K. Vet. Acad. Handl.* 1774. p. 266. 1779. p. 218. 1783. p. 224.) Ab iteratis experimentis fidem expectamus.

stinam alacritatem recuperarent. Quo ipso die, vitae summe pertactus, cuius aerumnas coniux, nuperrime subita morte illi erepta, nonnihil leuaverat, testamentum composuit. Querebatur die post de impotentia inferiorem corporis partem movendi et articulorum rigiditate. Tandem febre inualecente, nocturnam quietem crebris insomniis et locutionibus interpellantibus, lingua die 1. Septembris, ut in balbutientibus, sub loquela titubante, et viribus sensim pedetentimque contritis, mentis tamen omnino compos, die 2. eiusdem mensis, mane versus horam 7. animam efflauit. Et verissimum esse, quod CELSVS *) memoriae mandavit, comperi, *febriculam, quae facile tot malis obrutum hominem consumit, totius tristissimae scenae finem esse.*

*) Ed. KRAVSII pag. 177.

TAB. II.

Figura 1. Vermis ex aegro defumtus, qualem a tergo se sistit.

- a. Pars antica acuta.
- b. Pars postica obtusa, glabra et superius concava.
1. Dens siue vncinus, quo escam lacerat, et se proripit, palato bifido infixus.
2. Vagina bifida, mobilis, quae vncinum recondit.
3. Canaliculi, siue larynges, qui fines anteriores trachearum sunt.
4. Tra-

4. Tracheae, quae secundum longitudinem serpunt, et ad latera innumera vasa dimitunt.
5. Maculae ex visceribus subiectis.
6. Tubera duo, perforata, in quae tracheae posterius desinunt.

Figura 2. Vermis ex aegro, prout lateri incumbens apparet.

1. Pedes bifurci, ex producta abdominis membrana formati.
2. Pes postremus, maximus, prope quem posterius anus est.

Figura 3. Vermis ex oue, prout conspicitur, quando capiti insitens tenetur.

1. Pes postremus a ceteris figura recedens.
2. Cutis abdominalis.
3. Superficies posterior declivis duodecim eminentiis acutis notata.
4. Tubercula posteriora tribus rimis interscissa.
5. Maculae ex visceribus.

Figura 4. Idem vermis lateri incumbens, versus acutum finem abscissus.

1. Pes postremus.
2. Eminentiae illae acutae.

* Ad observanda haecce in vermibus microscopium quidem adhibui, sed, ut clariora omnia evaderent, illa dein, pro arbitrio, proportionis iustae tamen ratione habita, ampliaui.

Figura 5. Vermis ex aegro naturali sua magnitudine repraesentatus.

Figura

- Figura 6.* Effigies vncinorum binorum, palatis suis infixorum, ex SWAMMERDAMIO, qui has partes in casei vermiculo obseruauit.
1. Vncini. 2. Palatum cum suis apophysis. 3. Ligamenta, quae palatum vtrumque copulant.

Figura 7. Vermiculus casei, ex quo musca prodit, ex SWAMMERDAMIO, per microscopium ampliatus, sed heic in minorem formam redactus. Hanc formam assumit, quando saltui intentus est.

- a. Pars antica.
- b. Pars postica eminentiis suis distincta.
1. Vncini, quibus posteriorem partem prensat, quum subfilire vult.
2. Larynges, f. trachearum extimae partes, extra cutem propendentes.
3. Tracheae.

Figura 8. Puppa vermiculi huius, externo velamine exuta.

Figura 9. Musca ex casei vermiculo emergens, microscopii ope delineata.

Figura 10. Naturalis muscae huius magnitudo.

* Figg. 6-10. eo fine hic delineatae occurrunt, vt et conuenientia intra muscarum laruas appareat, et vt quaedam in vermibus a me descriptis praeteruisa per analogiam cognoscantur.

XXI.

OBSERVATIONES

DE

LVMBRICORVM SETIS.

1896

CHURCH & DWIGHT

50

AMERICAN FELLOWS

OBSERVATIONES

DE

LUMBRICORVM SETIS. *)

§. 1.

Lumbrici, siue vermes teretes longi, qui in intestinis hominum nidulantur, cum illis, qui terram perfodiunt, specie conueniant, an discrepent, valde olim disputatum est. Istis vermibus (f. intestinalibus L.) color albidus, hisce brunus, competit; quod vero discrimen non maius nobis eos diuellendi ius impertit, quam quod coloris diuersitas, quae inter aethiopem et album hominem intercedit, duas a se inuicem distinctas hominum species statuendi, erogat, vel quod botanicus sibi vindicare potest, ob floris in colore diuersitatem, stirpes specie congruentes a se inuicem dirimendi. Lumbricus autem humanus durior semper ad attactum terrestri est. Nec etiamsi viuus ex humano corpore euerratur, ita modo arctare annulos suos, modo expandere, vt terrestris, conspicitur. Deficit illum praeterea annulus insignior, qui, cinguli vel ephippii forma, terrestrem versus anticam partem plerumque circumdat. Quin ex-

Cc 2

stitere

*) R. Societati scientiarum Gottingensi d. 9. Apr. a. 1768. oblatae.

stiteri alii, probatissimae fidēi viri, REDI, VALLISNERI, TYSON, WILLISIVS, A DOEVERN, qui internam horum vermium structuram indagantes, diuersitatem maxime conspicuam reperere. An vero haec omnia discrimina a diuerso isto nutrimenti genere, calore, humiditate, vel aliis momentis leuioribus, quibus lumbrici in intestinis vacant, deriuanda sunt? Vix credibile. Vtrumque horum lumbricorum ill. Eques A LINNÉ a) aculeis siue setis instructum affirmans, haec ipsa arma nouum cognationis arctissimae argumentum exhibet. Quod ad setas istas attinet: fateri oportet, me hucusque aequè parum, ac celeberrimos viros TYSON, PALLAS, alios vt taceam, in lumbrico humano illas conspexisse. Forsitan ideo, quod mihi quidem nunquam nisi *Ascarides lumbricoideas* obseruare, LINNEO autem veram lumbricorum terrestrium varietatem, datum fuerit †). Veruntamen, quum ne lumbricorum quidem terrestrium aculeos curate satis definitos a naturae indagatoribus reperirem: aestate praeterita, casu magnam eorum copiam in horto aedibus meis vicino animaduertens, setarum istarum indoli et formae inuestigandae pro virili intentus fui; praesente vero aestate obseruationes antea iam factas repetii. Vnde euenit, vt iamiam et plenius et correctius, quam a reliquis, quotquot consulere auctores mihi contigit, factum est, de horum aculeorum natura disputare possim.

Pedes.

a) V. *Systema nat.* Ed. 10. Vol. I. p. 648. Ed. 12. Tom. I. P. 2. p. 1077.

†) V. supra *Opusc.* Vol. 2. Comm. II. §. 16. 17. p. 36. sq.

Pedes modo vel asperitates eos vocat acutissimus alias TYSON *b*). Paullo curatius eos definit RAIVS *c*), quippe qui ad vtrumque vermīs latus eorum duplicem seriem, et quidem conspiciue satis inter sese distantem, animaduertit: interim tamen asperitatum voce in iis designandis vtitur. Pedunculos vero eos WILLISIVS *d*) appellat, et quadruplici serie per totam lumbrici longitudinem existare notat. Ex ill. LINNEI *e*) testimonio aculei isti triplicem seriem constituerent, in quarum qualibet aculei posticam vermīs partem respicerent. Eandem quidem cum isto aculeorum directionem cel. PALLAS *f*) agnoscit, sed quadruplici ordine decurrere affirmat. Ehem, quanta intra viros istos doctos obtinet discrepantia! et a singulis non minus propriae meae obseruationes deflectunt, siue numerum aculeorum, siue directionem, siue loca,

Cc 37 quae

b) "Feet, asperities". *Philosophical Transactions* 1683. Nro. 147. p. 155. Ita et SWAMMERDAM *Bibl. nat.* 2. p. 739.) "Sic, inquit, *lumbrici pluribus sanè gaudent pedibus et alio modo constitutis, quàm vulgo pedes solent.*"

c) "In lateribus vtrique duo ordines asperitatum." *Historia insector.* p. 1.

d) "Pedunculi serie quadruplici per totam longitudinem, lumbrici disponuntur." *De anima brutor.* Cap. 3. ea sectione, qua lumbricus terrestris describitur. Delineauit vero eos *Tab. 4. fig. 2.*

e) "Lumbricus trifariam retrorsum aculeatus" *Syst. nat.* Ed. 12. loc. cit, p. 1076.

f) "Corpus quadrifariam retrorsum aculeatum" *Diss. de infestis vinentibus intra vinentia*, p. 13. inserta cel. EDVARDI SANDIFORT *Thesauro Dissertationum Vol. I.* inde a pag. 247.

quae obsident, spectes, vt de breuitate descriptionum nihil dicam,

§. 2.

In eo quidem RAIQ, WILLISIO, et celeberrimo PALLAS adstipulor, quod setae istae quatuor ordinibus secundum corporis longitudinem decurrant. Sed singulum ordinem duplici setarum serie constantem vidi. Vnde apparet, quemlibet annulum octo fetis transuersim collocatis munitum esse g).
Ordines

g) Factis iam, quas subministro, in lumbricis obseruationibus, nouissima mihi Systematis ill. A LINNÉ editio mittitur; in qua a quodam ARGILLANDRO fusiorem lumbricorum descriptionem insertam video. Mentio ibi quoque fit aculeorum, quos auctor "vtrinque binos sub singulo corporis segmento, excepto annulo" delineat. Quantum ex hisce intelligo, quatuor quidem in vniuersum series setarum agnoscit; quod vero quaelibet series duplex sit, auctorem fugit. Probe autem perspexit, annulum carnosum insigniorem s. cingulum hisce armis destitui.

Litteris postea gratiose mihi missis, perillustis et generosissimis L. B. OTTO A MÜNCHHAVSEN, quem historiae naturalis et oeconomiae periti, ob felicissimum nouis vtramque scientiam inuentis locupletandi acumen, aemulo studio grati venerantur, obseruationes meas de setarum numero et serie confirmavit, quas, lecta relationum litterariorum Gottingensium plagula 82. a. 1768. Ipse repetere generosissimus vir haud grauatus est. Addidit praeterea, setas istas lumbricis sub reptatum semper adiumento esse, quod lumbrico chartae vel manui nudae, vt prorepere possit, imposito, facile cognosceretur.

Subscripsit et cel. O. FR. MÜLLER meis obseruationibus (*Verm. terrestr. et fluuiatil. Hist. Vol. I. P. 2. p. 25. et von d. Würmern d. süßen u. salz. Wassers p. 161.*).
Quod

Ordines interiores duo magis quam exteriores a se inuicem distabant, licet nec hoc reticendum, distantiam setarum in vniuersum pro vario vermis motu insigniter variasse. Omnes et singulae harum setarum inferiorem modo vermis partem obsidebant, ea plaga excepta, quam cingulum ambit: in qua eo loco, quo alias duo ordines medii decurrunt punctula tantum quaedam siue spiracula videre erat. Attamen postica vermis parte situm tam altum setae istae tuebantur, vt superficiem tabulae, cui lumbricum imponebam, rependo non attingerent. Vagina exigua reclusae videbantur. Iis enim omnibus emissis, circa earum basin cutis manifeste prominebat, tumque quadrangularis forma inferius conspicua erat. Magnitudine ad duas fere tertias lineae Parisiensis accedunt; quod vero non de ista parte, quam extra cutem extrudunt, intelligendum, sed de tota longitudine. Nempe cultri ad digitum appressi ope euellere aculeum alterum post alterum in extremis haud difficile erat, et ita veram longitudinem et figuram oculis vsurpare. Quum tabulae vitreae istos imposerem, fluidos et splendentes inueni, acutos ad apicem, sensim versus mediam partem latiores dein ad basin vsque cylindricos. In euulsis quoque fetis cognoui, quod pars ista earum intra corpus recondita mollior longe et flexilior altera esset. Quanto enim robore istae altera parte extra corpus propendente in verme

Cc 4

prae-

Quod vero, prout ille (proxime citato libro) refert, WILLISIVS prior octo setas in singulis annulis viderit, equidem ab eo ipso indicatum non inuenio.

praeditae sint, strepitus, quum digitum contra earum directionem ducerem, vel quum vermis in tabula proreperet siue vi retraheretur, manifeste subortus, indicabat; quin tantus setarum renixus erat, vt sub hilce experimentis istae potius sese reflecterent, quam vi illatae cederent. Directionem earum longe aliam, quam qui me in huius rei scrutinio praecefferunt; reperi, vtqui eas ab antica parte deflexas delinearunt. Quo vero, quae directionis ratio sit, tanto exactius cognoscatur, cogitatione velim lumbricus in tres aequales partes dispartiat. Isti scilicet aculei, qui extrema obsidebant, vtrinque mediam partem respiciebant; qui vero mediam partem occupabant, his erectus situs contigit, licet, fixos harum partium et constantes limites poni non posse, vel me non monente palam sit. De nouissime autem descripto eorum situ et oculo et tactu certior euasi. Digitum enim hinc inde supra vermis ventrem ducens, versus vtrumque extremum resistantiam sensi. Manifeste insuper animaduerti, quod vermi potestas competat, aculeos mox emittendi, mox retrahendi. Postquam autem per tempus aliquod eum contrectassem, vim istos emittendi amisisse videbatur; nam tum tota eius superficies ad attactum glabra erat. In vniuersum setae tanto luculentius oculis sese exhibuerunt conspiciendas, quo plus vitae vigorisque vermi reliquum erat. Interim nec in vermibus omnino mortuis istae obscurae erant; quippe quae paralyti forsitan quadam musculorum, qui eas retrahunt, orta, proruperunt.

§. 3.

In hisce obseruationibus instituendis lumbricis grandioribus, dodrantem plurimam partem supraque longis, vsus sum, etiamsi, nec in minoribus, aculei sese oculo subduxerint. Cuiuslibet obtutui facile sese exhibebunt, modo vermis supra digitum ita reflectatur, vt venter eius sursum spectet.

§. 4.

Aculeörum copiam, qui animo secum reputat, efficacissimum lumbricis adiumentum in migrationibus, praesertim per terram duram, lapillis saepe, ligno, aliisque solidis obuallatam, et cuniculis effingendis, iis accedere fatebitur. Nani ex ill. LINNEI computo quilibet vermis centum, ex RAY^{h)} autem calculo, centum et quadraginta annulis circiter conflatur; ita vt octingenti fere, vel mille centum et viginti aculei cuiuslibet vermi competant; a quibus summis paruum modo fetarum numerum cingulum, quod aculeis carere dixi, aufert. Videntur cum copia in eundem finem collimare aculeorum acumen, quo fit, vt vncorum quasi ope affigere modo hanc modo illam partem corporis possit, et vltius sese proripere i), robur porro et memorabilis in plagam oppositam directio. Sine

Cc 5

ea,

h) Cel. iste olim vir 30 ad 32 annulos ante cingulum et 108 circiter pone illud numerauit, quamuis nec diffiteatur, variare hunc aliquando numerum.

Perillustris L. B. A. MÜNCHHAUSEN in dictis supra litteris, se in lumbrico, quem dum scriberet, coram habuit, 140 annulos numerasse, mihi declarauit.

i) Conf. WILLISIVS de anima brutor. loc. cit.

ea, saltim me iudice, motum corporis retrogradum non tam facile exerceret, quem toties in tabula obseruare mihi contigit. Non vnicum tamen lumbricorum ad reptatum perficiendum auxilium in hisce aculeis collocatum existimo, sed alia sese confociant. Nouimus enim, quod vermis annulos, ex quibus constat, modo ampliare modo arctare, corpus suum horsum vorsum agitare, et motus gyrantes peragere queat, quibus ipsis loca a se superanda perterebrat.

§. 5.

Olim arbitratus sum, fateor, (Scribo haec a. 1785.) conciliari hisce de setis lumbricorum obseruationibus dissensum, qui antea inter LINNEVM et recentiores quosdā inualuit, vtrum eadem instrumenta et lumbricis humanis competant, nec ne. Quotusquisque enim est, qui illa in terrestribus, vtut vulgatissimis, animaduernerit, et quam pauci inter eos, qui eadem oculis vsurparunt, veriores sibi de eorum natura ideam comparare valuerunt? Credi igitur posset, quod, prout setae istae in terrestribus subinde minus conspicuae appareant, idem et contingat in lumbricis humanis, et quod sub indagine vnus obseruatoris istae intra corpus vermis delituerint, quum feliciori casu alii sine mora sese manifestarent. Ad setarum istarum in intestinalibus hisce vermibus praesentiam agnoscendam procliuiores tanto reddimur, quum multa, quae verminantes patiuntur incommoda, eo facilius mente concipi queant. Copia scilicet sua et acumine non possent non

non insigniter molestias, rosionis reptatusque sensum, quin tormina, spasmos, inflammationem et excoriationem constrictionemque intestinorum tam sensilium excitando, augere, et vim remediorum ad eosdem expellendos ingestorum eludere; idque tanto efficacius, quum raro solitarii sed magna plerumque caterua sociati occurrant. Sed quid iuuat multis ornare sententiam, quae, nisi obseruationibus veris innixa fuerit, quicquid fuci adlinatur, consistere nequit. Et fatendum, haecenus in istis vermibus intestinalibus, qui in systematibus *Ascaridis lumbricoideae* nomine insigniuntur et vulgò lumbrici apud medicos appellantur, setas istas non fuisse conspectas, licet sollertissimo scrutinio pluries tam a me quam aliis subiecti fuerint. Nec etiam si subtilitate insigni instructae essent, aciem oculorum effugerent, quum, vtut subtiles setae istae in quibusdam *Nereidibus* et *Naidibus MÜLLERI* sint, microscopio tamen detegi queant, et de subtilioribus longe internis partibus istius vermis hocce auxilio constiterit. Hinc quoque defectus setarum, praesentia autem oris trilabiati, optimi pro discernendo hoc verme a lumbrico terrestri characteres visi sunt. Si igitur in vermibus similibus forma et longitudine, ex homine excussis, verae setae deprehensae fuerint, diuersam speciem et quidem veram varietatem lumbrici terrestris siue γ , intestinale λ , quae plerisque saltem locis rarissime occurrit, subfuisse intelligitur. Sed in hanc rem supra *k*) fusius commentatus sum.

k) Vid. *Opusc. Volum. 2. p. 37.*

TABVLA III.

Figura 1. repraesentat lumbrici terrestris partem mediam, magnitudine insigniter aucta, ita collocatam, vt venter aculeis confitus obtutui sese exhibeat.

aa, bb, cc, dd. Quatuor ordines fetarum, quorum quilibet duplex.

eeee. Annuli ex quibus lumbricus constat.

Figura 2. posterius lumbrici extremum delineat, prout sese obtulit, dum complures annulos vna obseruator intueretur.

a, b, c, d. Anguli quatuor, quibus insident setae.

e, f, g, h. Series quadruplex fetarum.

Figura 3. lumbricum exhibet a latere, aculeis fursum conuersis, vt directio eorum conspicua euaderet.

a. Extreum posterius aculeis mediam partem respicientibus.

b. Pars media aculeis erectis.

c. Extreum anterius aculeis versus mediam partem directis.

d. Annulus crassior vermis, cingulum f. ephippium referens.

Figura 4. Lumbricus dorso innixus, et eo fine delineatus, vt totus fetarum complexus appareat.

a. Extreum posticum.

b. Annulus crassior.

c. Extreum anticum.

d, e, f, g. Setae.

Figura 5. Seta cum cute adiacente, eleuata.

XXII.

DE

MATERIA ARTHRITICA

AD VERENDA ABERRANTE

DISQVISITIO.

DE
MATERIA ARTHRITICA
AD VERENDA ABERRANTE. *)

SECTIO PRIMA.

§. I.

Vix vllus morborum fomes exstat, tot et tam varias mirasque scenas in corpore humano ludens, ac arthriticus, quippe qui mox partem, in qua sedem tenacius capit, valdopere excruciat, et haud raro motus impotentia, tumore, nodis, vlceribus, labefactat, mox stimulo suo febrem di-ram accendit, mox vage in corpore oberrans ful-minis instar ex vno loco in alterum transuolat, mox plura loca simul moleste afficit, imo, quod pessimum omnium est, leuidensi subinde de causa pristina latibula superficiei corporis propiora dere-linquit, et in eius intima penetrans apoplexiam adeo, cephalalgiam, vertiginem, anginam, item tusses pertinacissimas, oppressiones pectoris, hae-moptyses, porro tormina, digestionis ciborum vitia, profluuia aluina, flatus in intestinis, item conuul-siones

*) Duobus Programmatibus a. 1785. hocce argumentum persequutus sum. Iam tertiam sectionem, inspersis et praecedentium bigae variis additamentis, adiungo.

siones, affectiones hypochondriacas et hystericas, melancholiam, paralyfes, vitia verendorum varia aliaque multiplicis generis et euentus mala fuscitat. Habet id quoque illud virus vitii, quod pluries aliis natura multo dissimilibus morbis sese associet, eorumque decursum et medelam valdopere mutet, et difficiliorem tanto reddat, quum contra duplicem hostem diuersissimis subinde armis pugnandum sit. Nulla igitur fere valetudinis labes incidit, cuius materia arthritica accusari non posset vel genitrix vel comes. Et tanto magis metuenda est, quum laruatam saepe faciem prae se ferens, alios maxime discrepantes morbos mentiatur, et post longas inducias et reconciliatam, vt videbatur, amicitiam ex recessibus suis profiliat, et hominem, specie vel sanissimum et robustissimum, eneruatum prosternat. Quicquid olim disputatum fuerit de eius ingenio et natura, item de peculiari parte, quam in articulis eorumque confiniis corripit, vtrum sit capsula, ligamenta, tendines, periosteum, tela cellulosa, an nerui transcurrentes vel cuti vicinae immersi; item quicquid de causa, cur in articulos sese crebrius deponat, agitatum fuerit: nondum eo deuentum est, vt sine onini contrarii metu de hisce momentis pronunciari possit. Praestat igitur in iis indagandis subsistere, quae sobria et attenta obseruatione de eiusdem vi et multiplici, quo incedit, habitu, cognoscuntur.

Nec hacce luce praeunte errare mihi videor, si, contra vulgarem sententiam, eiusdem quoad mate-

materiem indolis rheumatismum et arthritidem reputem, parum curans, quae serius in vocum inventione vel significato nouata fuerunt, nec aliud discrimen admittam, quam quod arthritis articulos obfideat, rheumatismus partes extra articulos sitas, musculos scilicet cum obuoluentibus eosdem membranis aliasque forsitan morbosa modo de causa sensiles, item neruos aliquando grandiores, sicuti in ischiade neruosa; siue ceteroquin febris adsit, siue desit, siue fixus inhaereat dolor, siue vagis insultibus infestet. Etenim et ego animaduerti, subinde alternos quoad loca mox definita cruciatus vnum eundemque hominem inuasisse, dolores, coxam vel scapulam vel thoracem occupantes, nictu oculorum fere citius descendisse in genu vel articulum pollicis pedis, mox iterum eadem velocitate ascendisse in articulos manus vel digitorum vel pristina loca musculosa petiisse; item aliquando simul dolorem vtramque sedem afflixisse. Nec minor caugarum et symptomatum praecipuorum communio deprehenditur. Arguit insuper remediorum eorundem in vtroque morbo efficacia similem horum naturam. In vtroque nimirum, si acuti vel inflammatorii generis est, sanguis large emittitur et reliquae curationis antiphlogisticae suppetiae summi momenti sunt, subiunctis post coërcitam febrem blandis diaphoreticis; si frigidae autem vel chronicae indolis est, eadem efficacia resoluentia, demulcentia, blande per cutem aliasque colatorias vias acres stimulos euacuantia, item ad superficiem corporis reuellentia adhibendi, et eadem robori prima-

rum viarum per stomachica prospiciendi, opportunitas et necessitas prostat; sic et vtrobius, si complicatio subest, ad accessoriam causam vel aduentitium malum tollendum eadem medendi conamina requiruntur. Non tamen negauerim, vtrumque malum ob diuersam fabricam partium quaedam priua habere et rheumatismum citius contrahi arthritide, vt quae fomitem lentius conceptum altioresque radices agentem hincque difficilius aegriusque subigendum statuere videtur. Malo vero in hacce scriptione arthritidis voce, quam rheumatismi, quod nomen inter Graecos ALEXANDER TRALLIANVS omnium primus adhibuit, vti, quum vetustate famaeque HIPPOCRATIS, ARETAEI, GALENI rel., isto priorum tempore, excellentia plus auctoritatis habeat, et omnes istas affectiones, in quas, tanquam species arthritidem et rheumatismum senioribus temporibus medici distinxerunt, sub se apte complectatur.

§. 2.

Et horum quidem malorum materies inter multiplices morbos, quos effingit, nullus fere molestior cognituque quoad originem difficilior est, quam qui ex eadem, ad verenda conuersa, affectiones aphrodisiacas in viris, quorum praecipue ratio hic habetur, aliquando et in foeminis, aemulatur, Nascitur inde facile contagii venerei concepti suspicio, quod si in matrimonio contingat, ambigua euadit apud maritum coniugis, vtut insontis, fides, vel simili iure illius apud hanc, nec potest non apud
eos,

eos, quibus sancta tori iura sunt, laxari vel omnino solui amicum coniugii vinculum simulque rei familiaris integritas totiusque reliquae vitae tranquillitas et beatitudo in transuersum agi. Aeger autem doloroso spurco et ancipiti morbi genere correptus, vt famae et exiltimationi suae prospiciat, intempestiue saepe recondere solet mala, quae patitur, vel, si in hisce angustiis opem quaerat, confugere ad medicastros, qui ob arctos doctrinae cancellos verae eorundem originis ignari temerario consilio, vt fieri ab hisce consuevit in vitiis pudendorum venereis, morbum mercurialibus, iniectionibus adstringentibus, balsamicis aliisque eiusdem fecis pluribus, tractant, quae, tantum abest, vt in huius generis metastasi leuamen medelamque afferrent, vt potius aegrum aptiori medela sanabilem conterant. Quin, si ex silentio plerorumque, qui in arthritidem commentati sunt, auctorum concludas, ad rariores euentus in vniuersum translatitia haec labes esset referenda; saltim aliquando tam peregrinum et reformidandum habitum induit, vt et scienti et exercitato medico aqua haereat.

§. 3.

Non igitur vereor, ne inutilem operam aggreddiar, si lege et consuetudine permotus iam iterum calamum arripiam, et in abstrusum hocce malum nec pro dignitate sua haecenus explanatum curatius inquiram. Cui quidem argumento persequendo ansam dedit casus singularis, qui meae curae obuiam venit, omnibus reliquis similibus,

Dd 2

quos

quos memoriae proditos deprehendi, vehementia superans, et quem vel eo consilio publici iuris facere non dubito, vt, quum successus medicationis voto meo omnino responderit, habeant nonnulli normam, qua aliis in iisdem difficultatibus opitulari queant.

§. 4.

Verendorum autem affectionum, de quibus hic sermo, eadem est varietas et multitudo, qualem in viris alias, impura venere inquinatis, obseruamus. Et id commune habent istae cum vitiis hac causa contractis, quod quidam aegri grauius, alii mitius, corripiantur, quidam pluribus alii paucioribus molestiis conflidentur. Qui leuius ex hacce translatione aegrotant, mingendi difficultatem modo experiuntur, aliquando tam mitem, vt tantum solito plus temporis mingendo consumant. Alios grauis dysuria male habet; vel gonorrhoea spuria erumpit, qua scilicet circa glandis coronam smegma foetens flauo viride transmittitur, subinde haud sine molestissimo pruritu dolore et excoriatione glandis et praeputii cum vtriusque partis intumescencia et phimoseos metu. Sunt, quibus catarrhus quidem ex vrethra enascitur, sed absque ardore vel remora sub mictum. Et hoc quidem muci profluuium in aliis copiosius, in aliis parcius, est, et per interualla recurrens, vt tamen et aliquando simul dolor in inguine alterutro vel teste eiusdem lateris sentiatur. Non tamen perpetuum est, quod in colem ipsum vis morbi vrgeat; aliquando vicinas partes petit, vt scrotum, quod

quod molestissimo pruritu tentatur, vel testes cum epididymide, qui inde dolent et intumescunt, imo, vt multa suadent, subinde ex hac causa hydrocelen vel sarcocelen contrahunt. In quibusdam praecipue glandulam prostaticam occupat, in aliis ad vesicam vrinariam primaria vis defertur.

Imo nullum fere in Gonorrhoea venerea, rectius omnino Leucorrhoea s. Blennorrhoea venerea verendorum dicenda, molestum symptoma incidit, quin et huc referri posset. Id quod satis superque ex historia, quam infra ex propria obseruatione vberius sistam, apparebit. In qua quidem simili, ex causa arthritica, affectione curatius considerata opera mea praeprimis in praesenti versabitur. Sufficit, vtne repetitione taedium pariam, heic tantum nexus causa in antecessum significasse, praeuio sensu titillationis dolorem ardoremque in vrethra enasci, sub mictum, diriozem, et sensim eo ingrauescente profluuium mucosum varii coloris et spissitudinis subsequi, conatum crebrum mingendi grauare saepe vel frustraneum vel paucis lotii stillicidio iunctum, glandem vna cum praeputio dolorose intumescere, inflammationis stimulum ad testes quoque et inguina se dispergere ibidemque tumores et dolores ciere, febrem adeo nonnunquam suscitari, noctu somnum erectionibus colis frequentibus iisque dolorosis turbari, lotium vel crasso mucoso sedimento vel nebulis obfuscari, vel filis laciniisque eiusdem naturae scatere, imo ipsam glandulam prostaticam in consensum inflammationis trahi, cui, nisi tempestiua

et efficaci medela subueniatur, in scirrhum et carcinoma transire proclive est. In quibusdam catarrhus iste mentulae, postquam mucus limpidus et fluidior euaserit, sensim cessat, in aliis, deuictis etsi reliquis malis comitantibus, haemorrhoidum mucosarum ex vrethra exundantium forma perseverat. Redit et in iis, qui periculum eluctati sunt, aliquando mingendi conatus frequentior cum leui dysuria, et diu post non rarae sunt nebulae lotii, quas modo dixi, mucosae, vel filamenta fluctuantia, item nebulae ex tenuissimis filis mucosis fere vnice conflatae.

§. 5.

Nec foeminae tutae ab hacce arthritica labe sunt, de qua quidem rarius ob verecundiam, nisi malum ingrauescat, constat. Mitius autem hasce affligere solet, et, inter alias arthriticas affectiones, stranguria item albo ex sinu profluuium, quo ipso mitescunt priora morbi incommoda, cognoscitur.

§. 6.

Hanc igitur labem, si vehementius viros tentat, ita ut stillicidium mucosum vrethrae cum ardore sub mingendum ingrauescente comitem habeat, *Gonorrhoeam arthriticam*, ob causam, ex qua proficiscitur, merito cum cl. CLERK *a)* dixeris, vel Pyuriam arthriticam cum cl. SAUVAGES *b)*, qui quidem et

a) In *Essays and Observations physical and literary*, Vol. 3. p. 445.

b) *Nosol. method. T. 3. P. 2. p. 208.*

et Pyuriam viscidam et P. mucosam *c*) tanquam diversas species memorat, quae vero, si ad historias ab eo in medium prolatas, ex quibus vbiuis fomitem arthriticum subfuisse intelligitur, respiciam, nescio, quomodo inter se et ab eius P. arthritica discrepent.

§. 7.

Sed sunt praeter venereum et arthriticum miasma alii stimuli, qui idem multiforme malum suscitare valent; de quibus disquirere hoc loco non alienum est, quum tanto melius inde pateat, quanta vis stimulo arthritico insit.

Non multum moror dysuriam istam et mucis vberiore cum lotio excretionem, quam aliquando cerevisia recens copiosius bibita vel acriores cibi, sale vel aromate nimium conditi, quorsum et esus Ranae temporariae L. loco esculentae L. pertinet, excitant, viresque similes diureticorum et purgantium fortiorum.

Dentitionem difficilem per consensum partium aliquando accusari debere, graui testimonio *d*) constat.

Ad rariores vero origines pertinet epidemica aëris constitutio, qua ex aestu feruidissimo in tempestatem humidam et frigidam mutato bilis vitium

D d 4

con-

c) L. c. p. 205. 206.

d) JO. HUNTERI in EJ. *practical Treatise on the diseases of the teeth*, p. 146.

contractum videbatur, vnde plures simul gonorrhoea absque alio quodam vitio correpti *e*). Maxime memorabilia sunt nouissima à cl^{mo}. NOEL *f*) narrata exempla, qui in oppidulo quodam Galliae aestate a. 1769. sexaginta fere homines, viros et foeminas omnis aetatis et temperamenti, vidit, eodem fere temporis momento absque vllius culpae suspitione profluuium hocce correptos; haud aliter ac catarrhus nouissime epidemicus in numerosissimos homines eadem vespéra primam vim infestam exseruit *g*). Fuit quoque vir catarrhis capitis et vicinarum partium alias obnoxius, in quo bis viride profluuium ex mentula cum phimosi contigit *h*). Memorantur praeterea febres variae, quarum sequela haec labes fuerit *i*). In istis igitur morbis videtur irritamentum quoddam acre ex massa humorum ad verenda fuisse depositum.

— Ast et aliae exstant causae, quae propius iam initio hasce partes feriunt, nec translatitio tantum stimulo officiunt. Huius generis est calculus vesicae lotii, qui aliquando stillicidium simile creat *k*).

Ludunt

e) BASSII (*Observatt. anatomico-chir. med. p. 286.*) observationibus pondus addiderunt similes MORGAGNI (*de sed. et caus. morb. Epist. 41. Art. 9.*) et clmi NOEL.

f) *Journ. de Medecine, T. 51. p. 336. sqq.*

g) LENTIN *Beobacht. einiger Krankh. am Oberharze, p. 9.*

h) METZGER *verm. medic. Schriften, Vol. I. p. 92.*

i) OFFERDINGER *Anleitung für d. Landvolk, Ed. 1773. p. 475.*

k) PLENCK *de morb. vener. p. 31.*

Ludunt aliquando eandem scenam cum toto molestiarum, quae a contagio venereo alias proveniunt, comitatu haemorrhoides interceptae 1), in quibus dum sanguis per anum ob resistantiam vasorum prodire nequit, partim communione vasorum, virilibus prospicientium, partim stimulo circa anum enato consensuali, mucosa eluuius ibidem transcolatur. Forsitan et hic quibusdam in casibus acre quoddam vellicans simul subest.

Vehementia quidem cedit ista gonorrhoeae species, quae in sano homine a repetita nimis, vel nixu effreno peracta *), venere oritur; pertinax tamen non raro et curatu difficilis, praecipue si onaniae nefandum vitium in deliciis fuerit.

— Specialius considerandi stimuli acres, qui extrinsecus immediate muci fontes irritant, Quorum e numero est spurcities ipsius virilis, cui occasionem praebet tegmen balani antice tam coarctatum, ut denudari illa nequeat, unde humor consuetus vinctuosus inter utramque partem dictam colligitur,

Dd 5

ligitur,

1) De qua origine vix praestantius aliquid iis dici potest, quae BRENDelio (*Diff. de haemorrhoidibus interceptis morbos verendorum aphrodisiacos simulantibus*, Gott. 1744.) debemus.

*) Immodicam venerem cum abusu spirituosorum iunctam praesertim in iis, qui antea crebro gonorrhoea virulenta laborarunt, tanquam causam frequentissimam accusat ill. CULLEN (*First Lines of the Practice of Physic*, Vol. 4. Ed. 1784. p. 391.) non tamen negans, aliquando et in viris neque gonorrhoea nec alio vitio venereo unquam correptos, contingere eluuiem venereae similem.

ligitur, moraue acris factus et glandem et praeputium inflammat et glandulas ad vberiore secretionem sollicitat *m*). Non igitur heic fons eluviei spurcae in ipsa vrethra quaerendus est.

Ipsa mulier, etiamsi non venerea, eiusmodi acrimoniam in sinu suo fouere potest, qua virile contaminetur. Ex venere cum foeminis Indarum regionum id aliquando contingere legitur *n*); quo nominatim de vitio, non adiicitur. An spurcitiem quandam acrem calor climatis vel generauit vel auxit? prout idem extra istas regiones, sirio ardente, aliquando obseruatum *o*).

Quidam exercitium venereum, praesente menstruo fluxu *p*) vel eo desinente, vel lochiis nondum omnino cessantibus, in culpa habent.

Certius adhuc leucorrhoeam mulierum, etsi virus venerei omnis expertem, accusamus, quippe quum constet, quantum molestiae illa subinde mulieribus ardore, excoriatione, dysuria rel. faceffat.

§. 8.

m) Phimosis eiusmodi cum sequelis subinde natua est, nec in adultam modo aetatem cadit, cuius rei casum narrat cl. ALIX (*Obff. chir. Fasc. 2. p. 63.*), sed et in infantilem, vt casu infantis triennis constat, a cl. PLENCK (*de morb. vener. p. 30.*) significato.

n) HALLERVS (*Elem. physiol. T. 7. p. 476.*) citat HAILLY *Voyage aux cotes d'Afrique.*

o) *Richtiger Gebrauch d. Bleiextracts in äusserl. Zufällen, p. 339.*

p) V. eiusmodi exemplum inter FR. HOFFMANNI *Consult. in Oper. omn. T. 4. p. 284. Cas. 94.* Sed nonne mulier menstrua iam fundens simul contagio venereo delibuta esse potest?

§. 8.

Quanta igitur, sub hac causarum gonorrhoeae varietate, scientia, perspicacia et prudentia opus est ad indagandos absconditos eius natales, ne quid ignorantia originis et verae naturae committamus, quod in discrimen doctrinae nostrae vel vrbanitatis, vel dedecus et periculum aegri, cedat. Nimirum quicquid membranam, interne vrethram succingentem, vellicare et inflammare potis est, vim habet sinus mucosos, quibus ista insigni numero distinguitur, et qui a MORGAGNIO nomen habent, ad vberiore secretionem sollicitandi, et sic veram gonorrhoeam excitandi; siue extrinsecus ille stimulus contactu accedat, siue illuc ex humoribus deferatur. Simili ratione gonorrhoeam spuriam enasci sponte intelligitur; dum irritamentum istud glandulas sebaceas coronam glandis cingentes petat. Rarius contingit, saltim ex stimulo extus allato, quod eluuius profundior in vrethra prouentum, ex glandulis Cowperianis, vel glandula prostata, quin ex vesiculis feminalibus, habeat, sed plerumque in iis modo lacunis mucosis vrethrae subsistit, quae glandi proximae sunt. Quo acrius istud irritamentum est, et quo tenacius inhaeret, eo grauior est, quae illud excipit, inflammatio, et eo vehementius, quod illam comitatur, symptomatum satellitium.

Multum lucis accendit, quoad originem et naturam huius profluvii, audax cl. SCHWEDIAVER q) in

q) *Practical Observations on the more obstinate and inveterate venereal complaints, p. 32. §qq.*

in se ipso captum experimentum. Hic enim solutionem caustici alcalini compressa mentula pone frenulum, vtne ultra vulgarem gonorrhoeae limitem descenderet, in vrethram syringae ope bis iniecit, vnde mox dolor vehementissimus, vt et syringam extrahere cogeretur et liquidum efflueret, et paullo post lotium emittendi conatum, quod quidem primum suppressit, dein, quum emitteret eo loco, quo iniectum liquidum substiterat, dolorem intendi manifeste animaduertit. Die postero et subsequen-
tibus materia puriformis sucti in gonorrhoea coloris profluxit, dolore quidem ad priorem locum sensim imminuto, sed succedente die quinto noua inflammatione profundius exorta, quae similem eluuiem per sex dies durantem post se traxit, quibus exactis omnes fere molestiae siluerunt; verum ecce subsequuta tertia inflammatio, a margine proximae circa caput gallinaginis ad vesicae vrinariae collum sese extendens cum eodem ardoris sub mingendum et effluxus copiosi connubio, donec et haec post octiduum desaeuaret, nullo alio malo pedissequo. Idem itaque ex hocce stimulo arte applicato effectus redundauit, qui consequitur, si suppressa gonorrhoea virulenta, ad peiora incommoda arcenda vel tollenda cereolo, mucosa eluuiie alius similis aegri oblito, resuscitatur.

§. 9.

Largiar facile exempla adesse, quod, etiamsi vna vel altera supra dictarum potentiarum virile alluerit, vir tamen ab inquinamento isto immunis manse-

manferit. Sed non ideo causae allatae in dubium vocandae sunt; quidni enim eodem iure infectionem ex amplexu mulieris tabo venereo delibutae metuendam neges, quod aliquis impune eandem meretricem adierit, quae tamen aliorum imprudentiam pessime mulctauerit, vel quod rariori exemplo quidam, vaga licet et suspecta venere vsi, nullam contagii adliti notam deportauerint. Corporis scilicet vel partis ad recipiendum fomitem noxium vel consensualem stimulum opportunitas praecedat necesse est, quae quidem aliquando deficere deprehenditur. Id porro monendum, interdum solitariam quandam ex dictis causam malo gignendo non sufficere, dum contra ea pluribus viribus coniunctis sese efferat. Sic causa haemorrhoidalis cum arthritica combinari potest, neutra tamen gonorrhoeam fuscitante, nisi extrinsecus vis quaedam accedat, vtramque istam ad sedem subsequenteris labis determinans.

§. 10.

Iam vero descripto (§. 4.) gonorrhoeae arthriticae decursu et similitudine demonstrata, quam habet cum aliis mali huius speciebus ex diuersissima licet causa oriundis (§. 7.), notae considerandae sunt, quibus eruitur, miasma arthriticum in culpa esse.

Diagnosis difficilior redditur complicatione venerea, haemorrhoidali, vel alia, vnde proclive maxime est, accusare vitium, quod reliquis manifestius est, et olim maxime aegrum, alia etiam si
facie

facie, afflixit, vel cui prae reliquis patuit. Si quis gonorrhoea olim venerea tentatus in arthriticam incidit, ambiguitas enascitur, etiamsi vere ab ista sanatus fuerit, anne ex priori malo semina quaedam superfuerint, quibus hoc ipsum recrudit, vtpote quum notum, post inducias mox longiores mox breuiores nonnunquam renouari venereum profluvium. Ita qui illicitam venerem exercuit in suspicionem contagii venerei contracti incidere potest, si paullo post arthriticam hancce labem experitur, licet foemina contagii expers fuerit. Nec in maritis arthriticae indolis illam esse certo, saltim initio, pronunciari potest, nisi de intemerata vita vxoris certissime constet, quum rarissime suppetat oculorum indagine vitii venerei immunitatem in foemina explorare.

Fac vero haec omnia scrupulum non mouere, tum in primis dubii reddimur, si absque vllius *Arthritidis regularis*, quam scholae vocant, siue istius, quae primam vim in exteriori corporis parte, plerumque artubus, exserit, praeuiis signis verenda miasma arthriticum petit, praecedente forsitan extrinsecus vellicante quadam potentia, quae illud alliciat. Quidni hanc ipsam a consueto naturae ordine aberrationem, tanquam primitiuam admitteremus, quum constet, pluries in corpore, ad istum temporis terminum quoad speciem integro et immuni, exsurgere morbos, quorum origo fomiti arthritico insidioso, nec consuetis cancellis antea vnquam circumscripto, debetur, quam quidem *Arthritidem anoma-*
malam

malam vere obtinere, diferte MVSGRAVE *r*) innuit, confirmauit sua experientia cl. CLERK *s*), qui posterior peculiari nomine eandem insigniuit, siue arthritidis anomalae *imperfectae*, item cl. WHYTT *t*). Quam aegre autem haec ipsa eruatur, inde cognoscitur, quod ipse MVSGRAVE significat, "eius symptomata et eorum interpretationes supra captum humanum videri." Quod quidem sine dubio in causa est, quod ratio arthritidis anomalae imperfectae in vniuersum ab auctoribus modo paucissimis habita fuerit. Lucem aliquam me iudice in hisce spissis tenebris de labe ista, in quam hic commentor, accendere possunt negatium iudicium, dum scilicet nulla reliquarum gonorrhoeae causarum post percontationem accuratissimam accusari potest; praesentia earum virium, quibus alias arthritis enascitur, nimirum hereditas, contagium, diaetae vitia, rel.; subsequentes forsitan in externo corpore arthritici cruciatus, silente vel mitescente altera labe, vel hanc ipsam comitantes; item, quae quidem ferius paullo adminiculum in diagnosi praebet, efficacia medelae in sanationem adhibitae. Cl. CLERK stranguariam vel saltim mingendi difficultatem *u*) pluries indicem latentis arthritidis cognouit. Quae quidem signa plerumque in connubio vitiorum officinae digestionis sese manifestarunt, sed memorabile maxime est, quod addit, effatum "No doubt, the disease

r) *De arthritide anomala*, p. 3.

s) *Essays and Obs. phys. and literary T. 3. p. 427.*

t) *Essays l. c. p. 466.*

u) *Eff. l. c. p. 442.*

disease may sometimes be lodged about the bladder or urethra, without affecting any other of the bowels." Alii ex filamentis mucosis in lotio fluctuantibus, insidias arthritidis hostiles diuinare conantur. Sunt haec sine dubio *σαρχια μικρα τριχοειδεα* HIPPOCRATIS, vel carunculae paruae, quas cum capillis (*ωσπερ τριχες*) comparat. Eiusmodi de renibus cum lotio crasso aliquando excerni in Aphorismis *v*) indicat, alibi autem *w*) dilucidius arthriticis adscribit. Multum tribuit hisce in dignoscenda arthritide clandestina cl. CLERK *x*), pater, qui ficcata haec fila speciem calcis prae se ferre innuit. Hisce apparentibus cl. BERGIVS *y*) diligentiam summam in praecauenda arthritide inculcat. Pluris hoc signum facerem, nisi et in aliis morbis aliquando obuium esset. Nam similia fila ex haemorrhoidibus albis vesicae in lotio conspecta *z*). Mirum auctores, qui ex instituto de gonorrhoea venerea egerunt, vix horum filorum mentionem inieciſſe, in qua tamen quoque aliquando comparent *a*).
Planior

v) Sect. 4. aph. 76. Oper. Ed. LIND. Vol. I. p. 89.

w) De nat. hum. Sect. 26. loc. cit. p. 279.

x) In PRINGLE'S *Diseases of the army* secundum citationem CLERKII, filii, in *Ess. and Obs.* cit. qui vero locus in *Ed.* 7. Pringliani libri omissus est.

y) *Svar på frågan om orsakerna til Gikt och dess Förvarings- och Bote-medel*, p. 12.

z) FR. HOFMANNI Oper. omn. phys. med. Tom. 4. Cas. 88. in *Consult. et resp. med.* p. 277. vbi tunica interior atrola et excoriata, sed perperam, accusatur; et *Cas.* 93. p. 283.

a) Memorat eadem HALLERVS in *Element. physiol.* Tom. I. p. 476.

Planior omnino in hisce salebris ad cognitionem mali via est, si labes ista obscoenorum nonnisi post varia alias in externo corpore obuia incommoda praegressa vexat, vel, ut cum CLERKIO loquar, *arthritidem anomalam perfectam* constituit. At interuallum, hanc transpositionem et regularis arthritidis insultum intercedens, subinde tam longum est, in annos complures vsque protractum, ut hic fere in obliuionem cesserit, quando ista postliminio contingit. Interdum dimidiato quasi impetu prodit, miasmate non omnino partem, quam primum inuasit, derelinquente. Si vero, cruciatibus in externo corpore vel interna quadam parte disparentibus, confestim incommoda ista in verendis sentiuntur, tanto magis firmatur iudicium nostrum. Et haec quidem communia cum qualibet alia arthritica metastasi sunt, quamcunque partem internam aggrediatur, item cum exanthematibus siue acutis siue chronicis ad interiora retrocedentibus. Leuatur igitur vel omnino tollitur pristina affectio hacce noua succedente. Item hacce euanescente recrudescit *b)* interdum prior. Attamen aliquando sub ipso decursu huius labis arthritidis abditae signa aliquot sese exserunt. Sunt qui pro distinguenda gonorrhoea arthritica a venerea et hoc criterium censent, quod haec inficiat, ista vero non *c)*: an iure, dubito; quidni enim acrimonia, quae

b) SAUVAGES *l. c.* p. 208.

c) Ita sentit cel. TODE (*Kenntniss an. Heil. v. gemeinen Tr. p. 9.*), qui gonorrhoeam veneream describendo *Opusc. Vol. II.* Ec omni-

quae ad vrethrae mris membranam translata mucosae eius cryptas sollicitandi eamque in febrem usque diram inflammandi vim habet, si in foeminae sinum transmittitur, eosdem ibidem effectus procreare posset, et vere aliquando procrearet, nisi tormenta, quae patitur aeger ex ista morborum fomitis digressionem, et mentis deiectionem, ob incertam eorundem indolem et euentum, libidinem refrigeraret vel omnino exstingueret. Addo, prout in aliis morbis subdolae et larvatae indolis vera eorum natura et causa saepe a remediis vel iuuantibus vel nocentibus peti potest, haec pariter in hac ambiguitate dirigere diagnosin nostram posse. Id quod quidem non ad primum stadium siue inflammationis, sed ad alterum relaxationis variasque sequelas spectat. Nam quamdiu istud vrget, qualiscunque fuerit fomes vel stimulus praegressus, venereus, arthriticus, haemorrhoidalis, rel. (§. 7.), eadem ubiuis medendi methodus requiritur, scilicet ea, quae inflammationem subigere valent, et, si acrimoniae indicia adsint, ea, quae eandem diluendi, obuoluendi, et vna cum lotio eliminandi, vim habent. In altero autem stadio, et sequelis variis, quae deuicto primario morbo subinde supersunt et speciem noui morbi prae se ferunt, acquiescere non licet vniuersaliori ista curandi via, sed pro causa specialiori variandum est, e. c. in digressionem haemorrhoidalem sanguis in consuetos cancellos sanguifugis aliisque commo-

omnibus reliquis auctoribus accurratione antistat, item cel. PLECK (*de morbis vener.* p. 35.). de gonorrhoeis extra causam veneream ortis generatim.

commodis reuocandus est; si venereus fomes peccauerit, mercurialia saepe in pertinaciori malo opportuna; si arthriticus, vix sine specificorum arthritidi aduersorum adiumento sine tuo potieris. Commutatio horum auxiliorum absque causae latentis respectu manifeste nocebit, tam in morbo ipso, quam in subsequenter ex eodem fonte malis. Quis e. c. sine damno, arthritide in glandulam prostatam delata eaque tumida et indurata, impune mercurialibus topicum hocce vitium impugnabit. Tanquam aliquid singulare et diagnosticon in stranguria arthritica notauit cl. CLERK *d)* hoc, quod, licet vesicatoria alias facile stranguriam excitent, haecce tarsis applicata ad efficacissima in eadem tollenda remedia referri debeant.

§. II.

Quemadmodum vero quaelibet arthritidis anomala, ob laesas nobilioris partis functiones, remotiorem ab effectu externorum remediorum sedem, et vim maiorem, quam parti labefactatae affert, difficilior curatu magisque ambigui euentus est, quam ista, quae exterius corpus obsidet: ita et haec, quam iam persequor. Per se tamen liquet, quum eadem mox mitius mox grauius vexet, quin a leui stranguria ad lethale vsque prostaticae carcinoma potentia eiusdem se extendat, non semper eam aequae timendam esse. Blandius, quod de eius natura quidam iudicium ferunt *e)*, sine dubio

Ee 2

ad

d) L. c. p. 444.*e)* TODE et PLENCK II. c.

ad leuiiores morbi gradus pertinet, vt ad strangu-
riam, gonorrhoeam spuriam, vel exiguum modo
per vrethram profluuium; quae quidem mala mox
longioris mox breuioris morae sunt et interdum
aliquoties recurrunt. At multo plus negotii et
aegro et medico faceffit malum; si comitem sese
adiungit vera vrethrae inflammatio, quae si adeo
descendit versus vesicam et prostatam pariter corri-
pit, ambiguum exitum reddit. Sed ne tunc qui-
dem desperandum; quin nonnunquam natura hisce
turbis videtur tanquam crisi vti ad euerrendum acre
arthriticum et inducias ab affectione consueta in
externo corpore longas conciliandas. Ipsa induratio
et intumescencia prostaticae resolutionem admittit,
modo recens sit et efficacibus remediis impugnetur.
Sed carcinomatis in ea enati eheu haecenus, quan-
tum constat, nullum remedium inuentum est.

§. 12.

Non posset vero fomes iste arthriticus ad haecce
loca transferri, nisi iste mira subtilitate, qua mi-
nima vasa et exilissimos nervos permeat, praeditus
esset. Inter multas causas, quae transmigrationem
eius ex vno loco in alterum excitare queunt, me-
morandus heic nominatim est nixus partis cuiusdam
intensior, qui ipse vel stimulando vel debilitando
partem ad suscipiendum virus alicubi latens oppor-
tunam reddit. Sic animaduerti, ischiadem dolen-
tissimam neruofam in viro rheumatismo siue arthri-
tidi obnoxio exortam, quum manu dextra, quam
feri posset altissime exporrecta, nodos expediret
laqueo-

laqueorum aulaei fenestrae praetexti digitis pedis eiusdem lateris insistent; et alia occasione vehementissimus dolor eiusdem naturae scapulam subito torfit, dum hieme pallium pelle ponderosiori instructum ipse humeris suis summa velocitate super caput iniiceret, vt, decori causa, honorati viri auxilium anticiparet. Obseruaui quoque incuruatione dorsi in terram subitanea virus hocce ex coxa, vbi, sensim licet desaeuiens, antea haeserat, mox ad pectus conuersum, et ibidem praesentiam suam primum haemoptysi, dein hac sopita sub variis insidiarum clandestinarum indicibus in remotis partibus, tussi pertinaci cum sreatu muci coloris multiplicis manifestasse. Elucet itaque ex hisce, quanta vis sit nixus verendorum intensioris et stimuli ad illa extrinsecus allati ad virus arthriticum alliciendum. Casus infra vberius a me enucleandus, vti et alius, quem cl. POVTEAU *f*) de viro recenset, a gonorrhoea spuria nonnisi viduitate liberato, rem illustrat.

§. 13.

Pluries quoque obseruatum est, arthriticum miasma, alia etfi, quam quae descripta haecenus a me fuit, facie, miro nisu in lotii vias ferri. ARETAEVS *g*) iam notauit, communicari arthritidem inter alias, quas memorat partes, renibus quoque et vesicae, et CAELIVS AVRELIANVS etiam *h*) consensum vesicae declinante priori paroxysmo arthritidis

Ee 3

tidis

f) *Oeuvres posthumes, Tome I. p. 363.*

g) *De morbis acut. et diuturn. Ed. BOERH. p. 66.*

h) *De morb. acut. et chron. p. 559.*

tidis accusat. Sic SYDENHAMVS et BOERHAAVIUS; in quos immortales viros hic morbus tyrānnidem suam exercuit, lumbaginem rheumaticam describentes mentionem faciunt incommodorum nephriticorum et tenesmi vesicae molestissimi, qui sub descensum calculi a rene alias infestare solet. Possunt quoque quodammodo huc trahi veri calculi vrinarii, quos saepe arthritici concipiunt, et quorum cruciatus haud raro cum arthriticis tormentis alternant, de quibus alibi fusius differui *i*). Magis vero huc spectat critica per lotium euacuatio, quae interdum in arthriticis contingit, vrina scilicet mucosa, lactea, cretacea, sabulosa, copiosius secedente. Fuit arthriticus *k*), qui, postquam vrinam crassam copiosam, paullo post in spissitudinem gelatinae densatam, eminxerat, valetudinem suam recuperavit. Alius *l*), cui leues paroxysmi per intervalla redierant, subito reddidit lotium lacteum, quod post horam pellucidum euasit, deiecto ad fundum vasis sedimento albicante copioso sensim in cretae vel gypsi duritiem indurescente, quae scena rediit per octo vel nouem menses *m*). Fateor tamen haec magis ad renes spectare, quam inferiorem viarum vrinae cum vicinis partibus

i) *Diff. de cognatione inter arthrid. et calcul. recus. in Opusc. med. Vol. I. p. 186. Conf. CULLEN'S first Lines of the practice of Physic. Ed. 4. Vol. 2. p. 67.*

k) BAGLIVI *Opera omn. p. 117.*

l) *Histoire de l'acad. R. des sciences 1747. p. 56.*

m) *Conf. et casus a cl. ADAMI recensitis, quem recusum in HALL. coll. pract. dispp. T. 8. p. 783. sqq. enucleauit in Opuscul. meorum med. Vol. I. p. 201.; item casus similes, quos allegauit l. c. p. 209.*

partibus tractum. Ad hunc vero pertinet affectio ceruicis vesicae ex arthritide deuiante, dolorem stranguriam et catarrhum vesicae creans, item labes quaedam intestini recti mox dolore solo huius partis sese declarans mox tumoribus haemorrhoidalibus; quod vtrumque vitium aliquando alternas cum articulorum inflammatione vices agit *). Ita vexauit dolor vesicae cum febre adolescentem quendam arthriticum vel simplex dysuria, quam excepit vrinae crassae sedimentum albidum viscosum, sensim copiosius n). Item huius loci est historia monachi o), qui post inducias podagrae per vndecim annos concessas subito vrinae suppressione corripiebatur, quam catheteris repetita applicatio aliaque subsidia vincere non potuerunt, donec arthritidis pedes manusque afficeret, redeunte pedetentim spontanea lotii excretionem. Inter ea, quae anatome in arthriticorum cadauere aliena detegit, refert quoque ill. LIEVTAVD p) prostatam tumidam. Cui obseruationi vel ideo multum tribuo, quod idem vitium in casu mihi metipsi obuio occurrit. Haec quoque in memoriam reuocat aliud memorabile exemplum q),

Ee 4

senis,

*) CVLLEN l. c. p. 74.

n) SAUVAGES l. c. p. 207.

o) *Diff. sistens casum ischuriae ex materia podagrica ad vesicam delata*, resp. PETERSEN, Argent. 1772. p. 1. sq.p) *Synops. prax. med.* T. I. p. 74.q) Vid. scriptis ADOLPHI MURRAY *Diff. de paracentesi cystidis vrinariae* Ups. 1777. p. 6. sqq. et historia sectionis cadaueris, quam ex communicatione cl. chirurg. MEYER, qui Tiguri aegri curam chirurgicam gesserat, vna cum prolixiori de morbo expositione, publici iuris fecit praestantissimus vir iuuenis J. JAC. RÖMER in *Abhandl. d. Schwed. Acrzte* Vol. I. p. 260. sqq.

senis, doloribus rheumaticis vagis per tres annos conflictati, tandem ischuria pertinacissima correpti, quam, catheteris applicatione et paracentesi per perinaeum aliaque per intestinum rectum facta reliquisque frustra tentatis, tandem hypogastrio acutriquetra super symphyssi ossium pubis perfosso auerruncare datum fuit. Quoniam vero postea naturale urinae iter nonnisi catheteris ope lotium trans mittebat, per hocce artificiale reliqua senis vita alere transitum lotii oportuit, id quod coalescente vesica cum vulnere externo et callo circa tubulum immissum enato facile fuit. Post mortem constitit, glandulam prostaticam pugni minoris magnitudine intumuisse et lardosae naturae fuisse, eiusque excrescentiam in vesicam protuberasse, qui igitur tumor compressione sua lotio viam interceperat. Verum euidetiora exempla nifus istius fomitis arthritici in haec partes historiae continebunt, ad gonorrhoeam arthriticam spectantes, quas secundae sectioni destinaui.

SECTIO SECVNDA.

§. 14.

An te biennium circiter vir quidam, in matrimonio degens et aliquot liberorum sanorum pater, quadragenario maior, temperamenti cholericus, munere et vitae integritate conspicuus, me ob profluuium ex urethra cum ardoris sensu iunctum hac in urbe consuluit. Fuerat iste in vitae genere, quod exercitium corporis necessarium saepe interdixit, plures annos

annos antea per interualla affectionibus arthriticis, vel, si malis, rheumaticis tentatus; quae plerumque vel lumbos vel scapulam, aliquando et pectus; occupauerant, saepe quoque vagos insultus ex vno artuum articulo in alterum fecerant. Haemorrhoidum indicia non alia vnquam adfuerant, nisi quod aliquando etsi rarissime leuiusculum pruritus circa sedem, vel nodulum ibidem brevis durationis nec villo modo molestum, sentiret, et quod, dum liberis operam daret, aliquot sanguinis stillas subinde postea per lotii iter eiiceret *a*). Contagii ex impura venere contracti suspicio neque in eum neque in vxorem vlla cadere poterat, quum et fama et amor vtriusque coniugis mutuus id vetaret, nec sane, si hac in re peccatum fuisset, sciscitanti mihi debita cautione et sine notitia causae ambiguum valde futuram curationem serio declaranti, sub aegritudine animi, quae vtrumque coniugem ob molestum hocce malum angebat, id celassent, persuasissimi silentium medicum religionis instar mihi esse. Vxor quoque, si leue leucorrhoeae, cui alias obnoxia erat, vestigium eximas, sanissima fuit, nec ad eandem tollendam medicinae capiendae vlla necessitas proffitit. Negotiorum ratio iter et absentiam marito vltra dimidium annum iniunxerat. Rediit hieme adolescente sanus, praeterquam quod et absens aliquando rheumatismo sibi familiari correptus fuisset, et mali ischiadici reliquiis aliquot et-

E e 5

iamnum

a) Id quod BRENDelius (*Diff. de haemorrhoidibus interceptis etc. p. 8. §. 6.*) inter symptomata haemorrhoidum refert.

iamnum vexaretur. Sed eheu gaudium ex reuivisa chara coniuge cum prole perceptum, et post longam abstinenciam coniugali officio quoque declaratum, ante finem duarum hebdomadarum obscuravit praeter opinionem, quin deleuit in verendis enata labes. Initium illa ceperat sensu mox titillationis, mox doloris vrethrae. Paucos dies post sub ingressum noui anni, mane glans humida apparuit cum ardore circa orificium vrethrae et inflammatione, per insignem ab eodem distantiam sese extendente, et, quum comprimeretur, mucum albidum eructauit, quod stillicidium sponte per diem prorupit, maculas albas, flauidas, viridescentes in linteo relinquens, cum dolore non solum circa os vrethrae, sed et media eius parte, et versus vesicae collum saeuiente, in eiulatus vsque molesto et crebro mingendi conatu strangurioso. Postridie accessit dictis modo incommodis intumescencia glandis et praeputii, et proxime subsequen-
tibus diebus, sub aucta eluui mucosa sensim spissiori et incremento pristinorum symptomatum nominatim ardoris sub mictum, dolor tumorque in glandula infima dextri inguinis, quum attingeretur, et corpore commoto tensionis sensus in eodem inguine, item lancinans sed fugitiuus in femore dextro inde a trochantere maiori. Mature quoque molestae erant erectiones colis nocturnae, quae somnum iam sponte valde inquietum adhuc magis turbarunt, et constrictionis vel compressionis anipraecipue versus anteriora sensus, demum obstructio aluina. Tertio die, postquam profluium
primo

primo compareret, a quo ipso initium morbi computabo, versus vesperam post pandiculationes et somnolentiam febris incidit, horrore, calore, sudore et vrina turbida nidorosi odoris, sese manifestans; quae sexto (secundum hunc calculum) die noctu recruidit absque praeuio horrore sed insigni calore cum siti stipata, vnde et dolor in antica vrethrae parte insigniter auctus et in infimam eius partem ad anum vsque protensus. Ad quem, fere intolerabilem, mitigandum quum venam in brachio sinistro secandam curarem, phlogistica crusta densa tectus sanguis apparuit; et initio dolor quidem mitior, dein iterum acutior, euasit, nec inde decreuit febris. Iam initio profluuii, vt dolorem et mingendi difficultatem lenirem, decoctum Hordei perlati, Theam cum lacte, item infusum panis fecalini tosti, infusum seminum Cannabis similiaque copiose bibenda suaferam, et, quum haec voto non satis responderent, subsequenter diebus mixturam ex oleo Amygdalarum dulcium, et Gummi arabico, exceptis aqua Petroselini et syrupo, subiunxi. Febre vrgente emulsio, cui tantillum nitri additum erat, ingesta. Oleosae mixturae quoque subinde ad lubricandam aluum Mannam loco syrupi admiscui. Verum haec omnia tentamina iuncta cuni diaeta antiphlogistica parum modo auxilii praebuerunt, sed praeter frequentem et difficilem mictum et ardorem vehementiorem vrethrae, versus anum praecipue vrgentem, quem prae reliquis Camphora a grano dimidio ad integrum per bihoria data, sub eo regimine, vt sudor erumpere non posset, solabatur,

batur, rigiditas frequens dolorosa: colis per noctem afflixit, in primis autem aluum egerendi conatus creber irritus cum pruritu, tensione, ardore et obstructione pertinaci flatibusque ad anum stagnantibus, aegrum misere excruciauit. Quae quidem mala circa sedem percepta clysmata tepida emollientia oleosa nonnihil mitigarunt, sed non diutius quam haec ipsa retinerentur, etsi semper feces aliquot duras prouocauerant, cui fini et subinde solutio Mannae et salis mirabilis Glauberi satisfecit. Inter haec exsudauit smegma foetidum circa glandem, glans circa vrethram valde inflammata et vasa maiora penis valde turgida, et perrexit catarrhus colis per interualla mox vberiori mox pariori riuo, et consueta coloris varietate. Plurimum autem interest commemorare, in hoc decursu aliquando fugitiuos dorsi dolores, noctu quasi oculi celerius accedentes et sese rursus subtrahentes, incidisse, et per vices quoque genu sinistrum, pollicis sinistri pedis articulum, postea coxam sinistram tentasse, in qua parte tenacius resedit dolor, adeo vt rigiditas et claudicatio succederet; aliquando et fauces doluerunt. Lotium plerumque pallidum item initio turbidum, dein autem sedimento mucofo deiecto pellucidum. Diaetae rigor, insomnes noctes, metus de euentu, vires insigniter prostrauerant, licet cibi appetitus haecenus non decreuisset. Inter haec quidem febris quaedam indicia subinde conspicua fuerunt, sed manifestiori iterum impetu post noctem praegressam valde inquietam erupit tertia vice die 16. post prima effluuii initia, quo post horrorem

rorem incaluit aeger vehementer per totam diem cum cephalalgia dira in seram noctem pergente et mictu longe magis doloroso et difficiliore et tenesmo multo grauiori, quam per multos dies antea. Undenam haecce in peius mutatio? An a die ante ad mouendam aluum, quae rarissime sponte successit, data mixtura ex tinctura Rhei et sale mirabili, cuius quidem effectus blandus fuit, an a binis vitris vini Gallici ad refocillandas vires per prandium potis? Binis subsequenter diebus sudor matutinus foetidus attentionem praecipue in se conuertit et digestionis ciborum ea inbecillitas, vt et Dauci radices rite emollitae non concoquerentur, detumescente interea praeputium sensim. Praecipue vero aegrum iam diuexabat tenesmus fere assiduus cum sensu ardoris, tensionis, titillationis, doloris lancinantis intra anum, ita vt, qui adhuc et postea perseuerabat vrethrae sub mictum, praesertim eo exeunte, dolor vtut dirus, hunc pro exiguo modo tormento haberet comparatione facta cum tenesmo eiusque tristi satellitio. Metuendum inde erat, ne inflammatio glandulae prostatae subesset. Quae suspicio et confirmata exploratione per anum facta; nam tumor antea sentiebatur ouatus, mollis, tactu dolens. Ad hunc igitur discutiendum summa sollertia intendenda erat. Praeter superius dicta itaque clysmata emollientia sedulo adhibita, vapores decocti feminum Lini admissi et cataplasma ex foliis Maluae et seminibus Lini, vel et additis floribus Sambuci, perinaeo tepide et diligenter applicatum; infusi feminum Cannabis etiam plus quam antea

antea ingestum. Leuamen inde insigne conciliatum aegro, praecipue sub corporis situ supino, quum contra ea sessio vel statio et deambulatio molestias valdoperè augetet. Nouum iam in lotio phaenomenon apparuit, scilicet laciniae quasi membranaceae, item fila fluctuantia. Die 22. inflammationi prostatae accessit febris (quae ipsa quarto per decursum descriptum obrepfit) eaque valida, ad quam refrenandam venae sectio administrata sanguine valde phlogistico, item emulsio nitrata per aliquot dies ingestae. Hisce, potulentis blandis, et emollientibus admotis, sub summo dietae rigore, succedente et vrina critica, dilparuit inflammatio, tenesmus mitescere coepit, lotium vberius fluxit et aliquando sine dolore, alius subinde sponte soluta, etsi plerumque dura fecibus non cohaerentibus et frustula plana cristata referentibus, muci excretio parciore et modo per vices copiosior, remanente tamen tensione vrethrae praepressis in perinaeo et sub tactum dolorosa item rubedine et ardore circa vrethrae orificium; mentis quoque hilaritas rediit.

Inter haecce bona signa autem me anxium valdopere reddidit superstes tumor prostatae iam, d. 26., pyriformis, indolens, durus, latitudinis quatuor transuersorum digitorum, latiori extremo sursum verso. Nullum amplius dubium supererat, ex inflammatione prostatica in tumorem durum transiisse. Lotium saepe turbidum crassum foetens, plerumque tamen pallidum, sed semper dictis lacinis filisque refertum, in hac noua scena comparuit.

paruit. Quid in ista prostatica induratione extractum Cicutae valeret, tentare iam constitui incitatus laudibus, quibus illud cl. CLERK in arthritide anomala cumulauerat, a qua omnes in hocce aegro subortas miseras deriuabam, et spe fretus, fore vt hocce remedio tumor ipse, vtpote adhuc recens, dissipari posset. Ast extracti etiam si vncijs tribus cum dimidia consumtis, initio paruis dosibus factis, neque decreuit nec mollior euasit tumor, sed sensim, quod adhuc magis sollicitum reddidit animum, fornicationis punitionis vel tensionis aliusque molestus sensus sese associauit. Vnicus effectus, quem praestitit Cicuta, fuit in pellendo lotio, et, quin scrupuli duo extracti per diem ingererentur, caput nonnihil tentatum. Quod gonorrhoeae symptomata sensim disparerent, profluuium crassum albicans in pellucidum et fluidius transiret, erectiones colis inferiores dolore destituerentur eiusque incuruatio sub iisdem pariter cessaret: haec omnia etiam absque Cicuta potuisse impetrari, nullum dubium est. Singulare et, licet aeger sub abstinentia longiori pollutionibus nocturnis alias saepius tentaretur, sub tanto stimulo tamen iisdem per sesquimensem caruisse, compressis sine dubio per tumorem viis, per quas sperma transire posset. Verum et haec postea patulas euasisse, effectus docuit. Nec plus praestitit substituta dein miscela ex extractis Cicutae et Corticis Peruuiani, sed contra pedetentim magis protuberare incepit tumor, ita tamen, vt nunquam perinaeum protruderet, et tenesmi molesti recruderunt. Suspecta quoque adhuc magis reddebatur

debatur aegri conditio, quum vesperi per plures diēs febricula emergeret.

Cicutae igitur post mensis fere integri vsum d. 20. Martii Tincturam antimonii Thedenii substitui, prout in pharmacopolio nostro academico parata erat, a guttis decem bis per diem ad guttas viginti ter per diem capiendam. Sub eius vfu, abundantius lotium manavit, itidem membranulis filisque vel nebula mucosa mixtum, sed alius subinde stricta, quod si fieret, durior et prominentior tumor sentiēbatur, eliminatis autem fecibus cum flatibus antea in intestino collectis mollior et planior. Superstites adhuc materiae arthriticae insidias declaravit fugitius mox in dextro mox in sinistro genu aliquando perceptus dolor. Decimo etiam die post captam hancce tincturam nodulum coeruleum magnitudine pisī prope anum aeger animaduertit, cuius neque aliorum haemorrhoidalium symptomatum vestigia vlla antea adfuerunt. Post continuatam ultra tres hebdomades hanc medicinam, ita tamen, ut vno vel altero die negligeretur, manifeste quidem decreuisse tumor visus est, attamen, etsi doloris expers, tensionis et ponderis sensu et retardatione deiectionum aluinarum molestus esse perrexit.

Quum vero nodulus prope sedem perseveraret et per vices vagi dolores arthritici infestarent, hirudines circa anum applicandas et tincturae antimoniāli Gummi Guaiaci interpolandum die 17. Aprilis decreui. Inter plures hirudines, quarum tum
heic

heic aderat penuria, vna modo adhaesit nodulo, eo tamen effectū, vt admissis vaporibus aquae calidae sanguis per $1\frac{1}{2}$ horam postea stillaret in debilitationem aegri vsque notabilem. Gummi Guai. praescripsi vel in pilulis ex Gummi huius, vel potius Resinae, vncia dimidia et Saponis Alonensis (Alcantini vulgo) non rancidi drachma vna, quarum, puluere radicis Glycyrrhizae probe subactarum (ne in scatula concreverent), decem ponderis granorum duorum mane et totidem vesperi sumtae; vel in mixtura ex Gummi Guai. vncia dimidia, Gummi arabici drachma vna s. vitelli ouorum q. s., aquae Petroselini vnciis quinque, Saponis Alonensis drachma vna, Syrupi capillorum veneris vncia dimidia, cuius mixturae cochlearia duo dictis temporibus ingesta. Ex hisce enim dosibus duae vel tres alui deiectiones pro scopo quotidie subsequutae. Melius quidem soluebatur Gummi Guaiaci vitello oui, quam Gummi arabico, sed sapor longe ingrator, vnde et aegro forma pilularis longe magis placuit, eamque alternatim cum mixtura concessi; pilulis tamen non aequae ex voto alius respondit. Iunctus cum Gummi Guaiaci potus copiosus aquosus, qui tamen non prohibuit, ne tempestate calidiori incidente corpus ingrate incalesceret, congestiones ad caput fierent, anxietas sentiretur et nocturna quies turbaretur. Ex protracto eius vsu quoque ventriculus labefactari coepit. Differre hinc medellam per aliquod tempus constitutum: sed vix abstinuerat aeger ea per triduum, quum rediret punctio et pulsatio intra anum et profluuium vrethrae, quod

quidem per totum hoc spatium non omnino siluerat, pressione glandis potius emulgendum quam sponte erumpens, mox albidius mox tenuius. Faciendum tamen in iracundiam conceptam, cuius causa crebra dabatur, partem culpae esse coniiciendam. Applicari ideo octo hirudines iussi, aliunde petitas, quae ipsae non solum intra semihoram auide sanguinem hauserunt, sed et delapsae eius per duas horas stillicidium reliquerunt, ex quo dispendio aeger languorem haud mediocrem passus est. Tum demum ad Gummi Guaiaci et Tincturae antimonii reuersum est, qui ipse per duodecim fere hebdomades interuallis aliquot concessis continuatus, consumptis in vniuersum Tincturae antimonialis vnciiis duabus et dimidia, et Gummi Guaiaci vnciiis fere quatuor in miscela saponis. Praestitisset sine dubio, curationis hocce genus diutius protrahere et renouare istud post aliquod tempus ad fomitem arthriticum omnino subigendum et eliminandum. Sed vires coctionis inde valdopere laedebantur, vt et iis subuenire elixiriis amaris oporteret. Et quum nihil superesset pristinorum incommodorum, quam rubedo circa orificium vrethrae subinde cum pruritu iuncta, guttula alba mane ex eadem protuberans et fluctuatio laminarum vel filorum in lotio: finis medicationi impositus est. Adiuuit sine dubio eius efficaciam aestas calidior, sub qua calor per plures dies ad 80 imo 94 gr. Fahr. ascendit, vnde insudauit aeger copiosissime, Pars quoque materiae arthriticae lotio critico videtur eliminata per decursum morbi fuisse; etenim iumentosum aliquando appa-

apparuit lotium, crassum, foetens, vt de mollitie alui, quae ope Gi. Guaiaci alebatur, nihil dicam. Versus autumnum quidem et hieme subsequente novos arthritidis vagae insultus aeger sensit, item anno postea, quin etiamnum nonnunquam aliquot eius vestigia leuiora sese exserunt, verum a mucoso profluuiio omnino liber euasit, modo quod subinde adhuc tenella fila in lotio conspiciantur. Ast quod curationis fastigium fuit, nimirum, vt carcinoma prostaticae exitiosum auerteretur, id diuina auxiliante gratia attigi. Et insuper cruciatus arthritici, praecipue dolorosa ischias, longe rarius postea et mitius aegrum affligerunt.

In narrationem hancce multis commentari, non opus est. Prolixitatis nimiae eam non ream facient mecum persuasi, gonorrhoeam arthriticam multo rarius reliquis affectionibus verendorum et vicinarum partium, ex eodem fonte profectis, incidere, hinc rationem asserti per partes reddendam fuisse. Id sane exinde constat, fontis arthritici labem descriptam fuisse, cui molimen haemorrhoidale aliquid virium adderet. Etenim, quoad materiem arthriticam, haec ipsa tam ante quam sub ipsum decursum imo et postea sese declarauit, mitius vero affecit aegrum hacce metastasi facta et arte sensim deuicta; sana inter haec vxore. Duplex forsitan subfuit causa, quae illam ad locum affectum allexit, scilicet officium coniugale post longam abstinentiam et leucorrhoea vxoris, vtut mitis. Atrociora vero tanta in aegrum saeuuit, vt vix cederet tormentis

ex gonorrhoea venerea grauissimis; quin non subsisteret pone glandem, sed ipsam prostatam in conubium traheret, et quatuor manifestos insultus febriles suscitaret. Quam in muci vrethrae colore varietatem animaduerti, et quae in simili affectu venereo semper cernitur, haec muco in vniuersum communis est, narium quoque et pulmonum, ex quibus scretu reiectus viridis pariter mihi pluries occurrit, vt inde nulla singularis malignitas in huius generis affectionibus colligi possit. Id quoque in hoc aegro obseruauī, licet albus initio esset, siccatum adsciuisse colorem viridem. Filorum et pellularum in lotio origines fateor mihi obscuras esse; an ex renibus, quod de arthriticorum filis in lotio iudicat HIPPOCRATES *b)* excretae; an in vesica urinaria enatae? an ex mora muci in vrethra collapsa vel compressa per prostatam tumidam hic ipse ad latera concreuit, dein riuo a tergo vrgentis lotii derasus? Per ductulos prostatae in vrethram delatas esse, vix probabile. Mucosae naturae fuisse nec ramenta membranae internae vrethrae acrimoniae vi-erosae, quod quidem aliis casibus olim male existimatum *c)*, cognoui colatione, qua facta in puriformem materiam conteri et resolui sese patiebantur. Dolor in alterutro inguine et teste, item in summa cute femoris cum tumore in eiusdem inguinis glandula, consensualis modo fuit. Quod recruduerit mingendi difficultas, quae iam cessare videbatur, intumesceniae glandulae prostatae tribuas, vt quae

pressione:

b) Vid. supra *Señ. I. §. 10. p. 432.*

c) Vid. supra *§. 10. not. 2).*

pressione sua iter lotio interceptit d). Obstructiones huius glandulae quantum periculi secum ferant, tam ex fabrica eius singulari, quae tenacem stipitam telam cellulofam constituit, imo scirrhosam carnem, cognoscitur, quam ex euentu, nisi inflammatio praegressa tempestiue discutiatur. Abscessus scilicet, fistulae, scirrhi, fungi, cancri, haud rari pedissequi sunt, rarius gangraena malum terminat. Forma tumoris, quam descripsi, probe respondet figurae prostatae naturali, ut quae versus vesicam latior; hinc superiori parte digitus explorans latiorrem deprehendit.

Quod ad curationem attinet: ad duplicem periodum, nempe inflammationis in vrethra et dein in prostata contingentis, et indurationis huius glandulae, respiciendum erat.

Primum igitur non alia poteram moliri, quam quae et in gonorrhoea venerea opportuna sunt, ut nimirum, sub rigore dietae, potulentis aquosis blande inuoluentibus acre vellicans dilueretur, obtunderetur et cum lotio eliminaretur; et, quum manifestior euassisset inflammatio, ut haecce praeterquam potulentis dictis, venae sectione, acidiusculis,

F f 3

nitri

d) Legi de hac causa stranguriae merentur casus a cl. FABRE (*Nouvelles observations sur les maladies veneriennes* p. 20. sqq.) consignati; quod malum alias in gonorrhoea ex inflammatione vrethrae, et serius a collapsu interno eius pariete, proficiscitur, cui cereoli optime medentur. Nam tuberculorum s. caruncularum progenies valde rara est. — Cf. et MORGAGNI *de sed. et caus. morb. Epist. 41. Art. 13. 14.*

nitri et camphorae parca copia, et externis emollientibus et discutientibus subigeretur. Pro potu et ego seminum Cannabis infusum (quod fere aquosum lactescens apparet, supernatantibus globulis oleosis) efficacissimum in leniendo ardoris in vřethra sensu reperi; quum illis et mucilaginosae et oleosae partes cum anodynis insint; sed palato valdopere displicet. Nitrum et medicamina aluum per os purgantia, vtut blanda, haud sine stimuli augmento vini suam exseruerunt, oleosae mixturae autem illum egregie mitigarunt.

Verum, induratione prostatae percepta, deflectere a vulgari norma, nec solum discussionis tumoris sed et causae arthriticae rationem habere oportuit. Cicutae non diu institi, effectū destitutus, et quoniam ipse CLERKIVS inter laudes passus fuerat saepe non iuuare, annuente quoque WHYT-TIO *e*). Hirudines applicare e re duxissem, etiamsi abfuissent indicia ista pauca haemorrhoidum latentium, memor laudum, quas ill. MORGAGNI *f*) iisdem in tumoribus prostatae impertit. In tincturam autem antimoniam THEDENII insignem fiduciam collocaui, lectis paullo ante historiis, quas meritisimus hic senex de efficacia eius in obstructionibus glandularum tam internarum quam externarum et doloribus arthriticis euulgauerat *g*). Hocce praeco-

e) *Ess. and Observ. phys. et lit. Vol. 3. p. 469.*

f) *L. c. Epist. 41. Art. 11. 14.*

g) *N. Bemerk. u. Erfahr. z. Berelcherung d. Wundarzn. u. Arzneyg. T. 2. p. 87 sqq.*

præconio incitatus litteris illi perscripsi casum, meae curae tum submissum, ad quas respondens, et iudicium meum de origine morbi et medendi methodo confirmavit et vnciam vnam tincturae antimonii a se ipso paratae simul mihi misit, adiuncta succincta expositione casuum aliquot similium sibi obuiorum, de qua paullo post vberius dicam. Discrepabat eius tinctura valde ab illa venali pharmacopolii nostri academici, quam ante praeceperam; illa enim longe obscurior erat saporis saponaceo salini, nec ardentem sensum ori vel faucibus impressit, prout haec, ita vt vix vestigium alcoholis sapore cognosceretur. Quae, hac quantitate consumpta, in vsum trahebatur ex dicto pharmacopolio petita propius ad eam Berolino missam accedebat. Nolo hic disquirere, an huic tincturae vere particulae regulinae antimonii insit, quod mihi quidem probabile, nec ne, de qua re discidium proximis hisce annis enatum: saltim plura praestitit, quam quae a solutione mera terrae foliatae tartari in spiritu vini expectari possint. Gummi Guaiaci vsum coniungere, explorata eius serieribus praeprimis annis efficacia antarthritica valde suasit. Loco saponis amygdalini, cum quo cel. THEDEN *h)* gummi hoc commiscere solet, quoniam hic non prostat, saponem Alonensem adieci.

§. 15.

Subiungam narrationi huic aliquot alias de eodem morbi genere, vt tanto certius constet, me

Ff 4

in

h) L. c. p. 204.

in historia, quam supra (§. 4.) praestiti, vniuersaliori imaginem ipsius naturae, nec ludentis fingentisque ingenii, sub specie veri, expressisse. Non autem heic eos auctores curo, qui simplici effato se gonorrhoeam arthriticam vidisse rem expediunt, sed casus per partes consideratos in re tanti momenti nec vulgaris obseruationis requiro, vt fides extra dubium ponatur.

In litteris THEDENII, quas modo commemorauimus, vir aestumatissimus certiore me fecit, sibi septem vel octo casus similis fere indolis, ac iste, quem, iam descriptum, illi significaueram, obuenisse. Horum tres exitum habuerunt infaustum, licet acciti fuissent medici peritissimi, quum malum in carcinoma prostaticae inueteratum, quod et in anum et perinaeum vim suam sparserat, transisset. Reliqui sanitati restituti, quamuis in duobus eluuires vrethrae remanserit, quae ipsa non tam pro gonorrhoea, quam potius pro haemorrhoidibus mucosis per vrethram habenda erat, quibus pariter materies arthritica vel rheumatica sese adsociasset. Addit, remedia supra a me indicata hisce plurimum auxilii attulisse.

§. 16.

Reliqua, quae subsequuntur exempla, quorum summa modo capita enucleabo, malum quidem mitiori impetu grauans sistunt, sed huius omnino loci.

Ita narrante fratre cariss. ADOLPHO MURRAY, Professore med. Vpsl., cl^{mo}. HERRENSVANDT, medico Parisiensi, obuenit vir arthriticus, qui sub febre maligna ex vrethra profluuium viridi flauum cum nigro mixtum habuit, neutiquam venereum nec stranguria iunctum, quod ipsum tandem febre sublata absque vllis malis sequelis cessauit.

Alius vir, lumbagine variisque symptomatibus arthriticis passim correptus, exiguum vrethrae profluuium aliquoties recurrens expertus est cum dolore in inguine sinistro, qui subinde in testem eiusdem lateris sese extendit i). Idem, qui haec memoriae prodidit, fide dignissimus WHYTIVS, significat, arthritidem mox dysuria difficili mox pruritu scroti molesto anomalam suam demonstrasse. In tribus aegris dolor acutus testium ex eadem causa enatus erat, iuncta in horum vno intumescencia testium insigni: sed arthritide in pedes translata vtrumque incommodum periit.

Foemina innupta k), olim et fluore albo modice detenta, pollicis pedis suo dolenti et tumenti spiritum vini infricuit, vnde retrocessit arthritis in dorsum, et quum et hocce inepte spiritu eodem oblineret, praeter nauseam vomitum et tormina subsequuta est stranguria pertinax, repetitis vicibus cum reliquis dictis affligens, tandem sola superstes,

F f 5

resu-

i) WHYTT in *Works* p. 556. et 561, et *Essays and Observ. phys. et lit.* Vol. 3. p. 468.

k) CLERK in *Ess. and Obs. phys. and liter.* l. c. p. 429.

refuscitata in genubus arthritide; nam ad pollices pedum descensus nulla arte promoueri potuit.

Aliam foeminam innuptam *l*) ex arthritide anomala inter alia redundantis intro mali signa, stranguria subinde male habuit, qua praesente a reliquis incommodis vel omnino libera exstitit vel mitius iisdem affecta.

Iterum alia foemina *m*) podagrae mitibus insultibus per aliquot annos laborauit, quos ipsos fugare solebat pedibus gelidae aquae immixtis. Tandem poenam imprudentiae suae luit spasmodis aliisque incommodis ventriculi, accedente miti stranguria. Fluori quoque albo etiam obnoxia fuit.

Vir quidam ex patre arthritico natus *n*), refrigerio spasmos intestinorum et mingendi difficultatem per plures annos durantem contraxit, sed absque dolore comitante. Cicuta praecipue curatus est.

Propius reliquis proxime dictis ad casum mihi met ipsi obuium accedit ille *o*) viri, quem post varia ventriculi incommoda et podagrae mites insultus, quum ista citius sueto cessarent, gonorrhoea copiosa ex muco male colorato nec spisso, absque stranguria et ardore urethrae vexauit. Intra decem vel quatuordecim dies quidem conualuit, sed

l) *L. c. p. 433.*

m) *L. c.*

n) *L. c. p. 434.*

o) *L. c. p. 438.*

sed successit, forsitan ex equitatione, forsitan et arthritica de causa, insignis intumescencia et inflammatio testis, a qua pariter liberatus fuit absque ullius mercurialis medicinae auxilio.

Eiusdem originis fuit sanies ista foetida *p*) inter glandem et praeputium ex glandulis sebaceis in viro quodam casto pluries per multos annos cum pruritu molesto et inflammatione praeputii exundans, postquam rheumatismum in pectore ex refrigerio conceperat hocque paralyfin crurum per tempus creauerat.

Idem vitium verendi contraxerat vir quidam *q*), qui, redux ex itinere aliquot mensium, amplexibus vxoris amabilis et culpa omni carentis sese dederat. Dolores ischiadicos mites antea senserat, qui ipsi post eluuiem significatam diu siluerunt, donec in pectus translocarentur.

In mercatore quodam *r*), praeter hancce spurcitiam pluries redeuntem, ex materiae exundantis acrimonia excoriatio internae tunicae praeputii enata erat, et hocce phimosis minabatur. Postquam viduus factus fuerat, non rediit gonorrhoea ista spuria, sed eius in locum herpes doloresque cum intumescencia faucium successerunt.

p) POVTEAU *Oeuvres posthumes*, T. I. p. 357. p. 360.

q) *L. c.* p. 361.

r) *L. c.* p. 363.

SECTIO TERTIA.

Addere lubet ob argumenti grauitatem alias quasdam fomitis arthritici ad verenda conuersi historias, ab amicis, qui sectiones priores prelo paullo ante traditas legerant, per litteras mecum communicatas, licet non praecise mucosum per colem, quale in gonorrhoea, profluuium, cuius causa hic praefertim agitur, respiciant, sed alia potius genitalium et vicinarum partium vitia. Quod haec ipsa non ex venerea causa suam originem traxerint, huius fides apud auctores esto. Aliis quibusdam, litterarum commercio mihi iunctis, visum est vera gonorrhoeae arthriticae exempla se obseruasse. Quoniam autem rem mihi non per partes exposuerunt, aliena ab hocce loco sunt.

§. 17.

Dolet ill. Eques AB ACREL (Litt. d. 2. Nov. a. 1785.) frequentiam in Suecia obuiam vitiorum partium genitalium ex translata illuc acrimonia rheumatica vel arthritica, et compagem vasculosam praecipue, quorsum testes et epididymis pertinent, corripi queritur. Eiusmodi casus eius curae, dum scriberet, commissus fuit, hominis scilicet, qui quidem ante nouem annos gonorrhoea laborauerat (puto, veneream esse intellectam), sed inde ab eo tempore sanus. Probabile quoque iudicat ex hac acrimonia natales suos ducere pleraque sarcocèles et hydrocèles exempla, quae vitia nisi discussa, vel si male tractata, fuerint, vasa epididymidis et tuni-

cam

cam albugineam obstruerent, et serum in cauum tunicae vaginalis rel. exprimerent. Ipse iam antea intumescendae testium, ex hoc fonte enatae, in actis R. Academiae scient. Stockholmiensis *) mentionem iniiciens memorat aliquando illam sponte disparuisse, et aliquoties testem mox vna mox altera parte per vices fuisse distentum et pellucidum.

§. 18.

Iam sequantur momenta quaedam ex litteris binis (d. 25. Jul. et 27. Sept. a. 1785. exaratis) cel. WICHMANN, medici Reg. aulae experientissimi et veteris inde ab academicis annis amici, huc spectantia.

Casus, qualem Tu descripsisti, hactenus quidem mihi non obuenit, et fere contagionem veneream subfuisse suspicarer, nisi Tua fides obstaret et medicus quidam Cellensis exemplum Tuo simile se obseruasse mihi narrasset.

Haud infrequentia autem exempla eaque gravissima mihi occurrerunt aegrorum, in quibus arthritica materies in contentas pelvis partes, nominatim vesicam lotii et glandulam prostaticam, sese coniecerit. Reminiscor inter alios viri 60 vel 70 annorum, qui ex hacce causa in ceruice vesicae tam molestum pruritum sensit, ut saepe subito ex lecto exsiliret et ambabus manibus glandem fortiter comprimere et fricare cogeretur, dysuria simul affectus fuit et saepe catheteris applicatione indiguit. Valde crebra

*) Kongl. Vet. Acad. nya Handlingar 1780. p. 129. sq.

crebra apud nos est suppressio urinae perfecta ex prostatica intumescence, id quod ex sectionibus quoque cadaverum quinque vel sex didici. In quo malo etiam saepe suspicio mihi enascitur, quod haemorrhoides, et materia arthritica cum iis crebro coniuncta primam huic indurationi ansam prae-buerint. Raro autem aliud auxilium, quam mercurius, openi tulit, et huius adiumento in connubio balneorum rel. etiam praeterito adhuc anno virum militarem superioris ordinis (Maior) manifesto vitae periculo eripui. Explorata nimirum mox sub primum suppressionis insultum prostata per intestinum rectum, haec magnitudine ouum anserinum retulit, lotium simul perpetuo turbidum fuit et mox deposuit, non vt in haemorrhoidariis consuevit, sedimentum mucosum, sed pus fluidum. Sed nunquam haec materies absque urina comite profluxit, vt ideo in illam gonorrhoeae nomen non caderet.

Quum autem viro experientissimo dubium mouerem, anne induratio prostaticae in tanta frequentia, cuius meminit, potius a fomite venereo, quam materia arthritica vel haemorrhoidali causa profecta fuerit, sequentia regeffit:

Ingenuus fateor, hoc difficile fuisse ad dirimendum. Etenim malum diuturnae plerumque durationis fuit. Senes semper sunt, in quibus haec indurationes deprehendo, quos quidem non omnino a peccatis iuuenilibus absoluerem. Verum quoque

quoque persuadeor, ex gonorrhoea simplici ante triginta pluresue annos concepta prima sua incubula trahere posse. Quae ipsa tamen ad inductiones prostaticae propensio non prohibebit, quin et iidem aegri aliquando arthritide vel haemorrhoidibus laborarent, et sic vetustum malum cum nouo sese combinaret, et complicatione pertinacius vel periculosius euaderet.

§. 19.

Celeberrimo LENTIN, Medico Regiae aulae et Physico Luneburgensium meritissimo, debeo casum, m. Octobri anni 1785. mecum communicatum. Est quidem hic:

Vir 63 annorum, qui post finitam expeditionem bellicam septennem diaetae legibus conuenienter vixerat, attamen doloribus arthriticis et furunculis obnoxius, inde ab aliquot annis ob frustra conceptas spes et praemia pro officiis fide praestitis neglecta moeroris latentis sensum perpessus erat grauissimum, appropinquante autumno pluribus eiusmodi mutuo sese excipientibus tumoribus post praegressos dolores arthriticos correptus est. Nouissimus vero posticam colli partem occupauerat. Hic quum in vigore suppurationis esset, ad sodalitium aeger inuitatus est, cuius consortes liberalius poculis indulserunt, vnde et ille tantum potui dare coactus est, vt inebriatus domum duceretur. Excandescendi autem ira causa inter pocula adfuit perpetua. Biduo post accersabar, vt obstrangu-

stranguriam vehementem, quae simul deiectiones aluinas et flatus interciperet; opem ferrem. Recurrit mihi tum in memoriam, eum hieme praeterlapsa simili vitio laborasse, quod secessu materiae puriformis per aluum tum breui sese terminauit. Praecesserat autem iam reciduum hocce malum priapismus nocturnus molestissimus absque voluptatis sensu vel absque lotii accumulatione, qua colicis labe ille etiam aliquoties antea detentus fuerat. Abscessus ad collum enatus opinione citius coaluit. Quo adueneram die praecepi mixturam salinam ex arcano duplicato et nitro, solutis in emulsione amygdalata tenui, item ptisanam ex radicibus Graminis et Taraxaci copiose bibendam; postridie autem mane Manna aluum subducendam curauit. Ex hisce quidem suppetiis licet aliquod leuamen sensisset: recruidit tamen stranguria pristina vehementia. Vnde petroleum perinaeo inungi, et balneum vaporum admitti iussi, quorum et auxilium promptum eatenus fuit, ut copia lotii conspicua emitti posset: sed breui nimis duratione. Accidit sub inunctione huius olei, ut ichor puriformis (eiteraehnliche Jauche) ex vrethra inde a perinaeo protrudi premendo posset. Quod experimentum etiamsi crebrius iteraretur, nunquam tamen materies defuit. Exploratione ani per digitum nihil alieni repertum, nec vnquam haemorrhoidibus aeger laborauerat. Noua lotii interceptio catheteris applicationem suavit, qui ipse tamen neutiquam in vesicam deferri potuit. Itaque vlcus vestigia nulla potuerunt inueniri. Regio supra vesicam
tenfa

tenſa quidem et dura ſed non valde doloroſa exſtitit. Increuit iam febris. Hinc venae ſectionem iniunxi, veſicatorium loco antea exulcerato impoſui, et aquam Selteranam cum emulſione amygdalina potandam exhibui. Sanguis cruſta viridi ſlaua obductus comparuit. Clyſmata, quicquid moliretur chirurgus, ob impedimentum ignotum illi obnitens applicari non poterant. Impoſitum meo conſilio cataplaſma Goulardi cum camphora veſicae, antea linimento volatili perunctae, aliudque emolliens perinaeo. Aluo per pulpam Tamarindorum ſoluta, et mixtura ex ſale ammoniaco et nitro per diem data, veſperi Laudani octo guttas exhibui, et corpus bene tegendum ſuaſi. Propoſueram mihi poſtridie mane iterum ſanguinem mittere, ſed mutaui tum conſilium, quoniam pulſus deſederat, velox et debilis erat, et facies non-nihil collapſa.

Iam absque frictione maior quantitas ichoris ſupra dicti puriformis ex vrethra prodiit. Miſtio liberior euasit. Quum deiectiones aluinae tantopere foeterent, et vires tam manifeſte collaberentur, decoctum ex cortice peruiano cum Tamarindis et oxymel minerale propinaui. Sed omnia vana, viribus vtpote coram euaneſcentibus. Deceſſit de vita d. 16. Octobris per integrum fere diem antea mentis uſu priuatus.

In cadauere omentum fere omnino sub ventriculo delituit, viscera omnia sana reperta, excepta vesica lotii, quae omnino inflammata, et valde turgida comparuit. Lotii fere libra vna per vrethram exprimi potuit, et sub finem vnciae circiter tres profluuii puriformis in conspectum venire. Post sectionem vesicae quatuor fere vnciae eiusdem spongia eximi potuerunt. Superficiem eius internam pallide rubram, externam autem plane inflammata deprehendi, attamen inflammatio neque in intestinum rectum, neque in alia intestina sese disperferat. Contra ea membrana, peluim interne succingens, antrorsum et ad latera, et vaginae vasorum spermaticorum, vna cum internis inuolucris scroti, vti et tela cellulosa perinaei, in inflammationis communionem intrauerant. Extrinsecus tamen in scroto nulla eiusdem nota adfuit. Vrethram totam vsque ad vesicae collum disseccandam curavi, sed nulla purulenta collectio ibidem sese manifestauit. In vniuersum nullibi pus quam in vesica ipsa comparuit, nec vllibi macula sphacelosa.

Nonne hoc casu materies arthritica, quae alias forma furunculorum conspicua esse solet, immediate ex sanguine secreta et huc translata fuit? — fortassis iam ante inflammationem vesicae, et probabiliter et praesente inflammatione?

Et haec quidem ille.

§. 20.

Subsequens narratio m. Augusto a. 1785.

mihi missa auctorem habet. cl. F. H. BRÜCKMANN
M. D. quem olim egregium auditorem dilexi,
iam, inter optimas spes et exempla felicitis artis in
vrbe Brunsvicensi exercitii, febre putrida morta-
libus nuper ereptum lugeo.

Vir 62 annorum, habitu corporis tenuis sed
mente alacris, inde a multis annis alui obstructione
laboravit, adeo pertinaci, vt vix vnquam absque
artis auxilio eadem succederet. Ante binos annos
quoque affectiones varias diriores hypochondriacas
perpeffus est, diuque obstinata psorophthalmia eum
male habuit. Quae omnes molestiae vsu commo-
dorum remediorum et diaetae rigore obseruato
omnino conticuerunt, excepta tarditate alui, quam
laxare quotidie apta medicina etiamnum opus est.
Sed medio circiter Februario h. a. alia incidit scena,
quum aeger, qui antea subinde catarrhis et rheu-
matismis correptus fuit, ex refrigerio, quantum ap-
paret tempestate aduersa concepto, subito testem
dolorosum et tumidum cum motibus febrilibus con-
traheret.

In naturam huius mali sollertius inquirenti
mihi enarrauit aeger, se iuuenili aetate semel go-

norrhoea intempestiue suppressa laborasse, et inde ab eo tempore testem sinistrum dextro fuisse maiorem, et, quum vr̃ethrae angustatio lotii viam praeccluderet, cereolos crebro applicandi necessitatem adfuisse. Sequenti quoque tempore lotii suppressio serio aegro molesta fuit, huicque vt subueniret, tum nonnisi chordam tenuem ex intestinis paratam melle oblitam per breue tempus in vr̃ethram immittere solitus est, eo successu, vt lotium paullo post nec aegre manaret. Mox post malum descriptum in teste ortum adhibita sunt epithemata calida ex herbis discutientibus, et ingesta per os remedia refrigerantia et blande aluum moventia. Incrementibus autem doloribus post aliquot dies, et aegro valde de doloribus dorsi, torminibus et tensione perinaei, conquerente: praeter cataplasmata abdomini imposita et fomentationes partium genitalium, in auxilium capta sunt clysmata, venae sectio, et vesicatoria furis imposita. Hisce et mox tam febris quam dolores euanuerunt, accedente sudore fauente. Nullum vero cibi appetitus decrementum sensit. Post decem dies tumor per protractum vsum herbarum discutientium, quibus sapo venetus largius admiscebatur, conspicuum in modum deminutus exstitit, iamque suspensorium commodum applicabatur. Sed non multo post rediit mingendi difficultas, qua ipsa sanguinis exagitatio et inquietudo suscitata, contra quae mala chordae memoratae per aliquot minuta temporis iterum inmissae. In eundem finem et ad statum

in

in vasis spermaticis testiculi resoluendam, vti et ad emendandam acrimoniam sanguinis in vniuersum, praescriptae sunt pilulae ex sapone veneto, resina Guaiaci et extracto Aconiti, quae ipsae praecipue mictionem adiuuarunt, posteaque chor-
dis istis amplius non opus fuit.

De lotio adhuc monendum habeo, quod sedimento insigni instrui soleret, et copiam florum natantium conspectui offerret.

Quoniam tamen intumescencia testis rediit, quae nominatim praeterito mense iterum valde increuit, sedulo reuertimus ad fomentationes discutientes cum sapone, vnde quidem post aliquod tempus iterum detumuit testis, sed levis tamen epididymidis et funiculi spermatici induratio super-
fuit. Exhibitae igitur ad hanc soluendam pilulae mercuriales cum sapone veneto sub commodo corporis regimine. Inde ab aliquo tempore acrimonia testem sinistrum reliquit, et iam dexter eodem gradu intumuit. Et hac quidem ratione abditum malum ex vno loco in alium vagatur, sub quo circuitu saepe annulus abdominalis intumescit et dolores lancinantes patitur. Praeter significata remedia per aliquot hebdomades pediluvia ex feminibus Sinapi, et postea balnea ex fonte quodam vicino sulphureo, adhibenda curavi.

Verum haecenus curatio non constans fuit, adeo ut, vel hisce diebus tumor, detumesciente denuo teste sinistro, in dextrum transierit, unde vesicatorium femori impositum et reliqua externa dicta in auxilium haud sine prompto auxilio tracta. Pitisanam ex stipitibus Dulcamarae pro potu simul praecepi. Constabit olim, anne effectus in posterum plus constantiae habiturus sit.

XXIII.

SVCCI ALOËS AMARI
INITIA

1848

2000 2000 2000

1848

SVCCI ALOËS AMARI INITIA. *)

§. I.

Aloës genus praeter speciosum habitum nobilitat succus iste insigniter amarus gummi resinosae naturae, qui ex foliis quarundam sub eo militantium stirpium fauciatis exundans, et caloris ope densatus, in varium medicum scopum, sub varia forma et praeparatione, adhibetur. Optio inter plures plantas in colligendo isto data est, prout alia exempla in censu medicaminum exstant succorum, natura similium, sed quoad originem disparium; quorsum Sanguis Draconis, gummi Euphorbii, succus Catechu, Camphora, gummi Arabicum, gummi Guttae, pertinent; nec errare mihi videor, si illuc et Cautschuc siue resinam elasticam referam. Hisce diuersis eorum natalibus merito diuersos integritatis et efficaciae gradus adscribas, ita vt vel inde appareat, quantum intersit medici, speciem, cui optimum pharmacum debeatur, rite nosse, et historiam medicamenti, vtut chemica analysi et virtutum medicarum recensu ornatam, ignorata specie capite quasi destitui. Dolendum, hoc vitio historiam Aloës adhuc laborare, quod infra vberius exponam, postquam occasione

G g 5

speciei

*) Progr. sub finem a. 1785. editum.

speciei singularis, quae huius census est et quam prolixius describere hic animus, de genere ipso quaedam momenta praemiserim.

§. 2.

Haud parum difficultatis hocce olim botanicis peperit, nec serius studium omnem, quae scrutinio sese offert, tollit. Etenim licet iamiam in eo consensus sit, quod genus corolla monopetala, tubulosa, infera, et insertione filamentorum in ipso eius fundo pone germen absque adhaesione ad latera, potissimum ab affinibus generibus discrepet: olim tamen non dubitarunt Agaues Aletresque ad illud referre, imo aliquot stirpes cognatione longe remotiores ex Yuccae et Crassulae genere. In insigni autem numero plantarum istarum, quae iure Aloës voce insigniuntur, aegre subinde cognoscitur, quae Species dicenda, quae Varietas.

Non multa bonae frugis ad cognitionem illarum attulit MÜNTINGIUS suo *Aloidario* a), in quo paucae modo eaeque et oscitanter descriptae et minus accuratae depictae, omissis quarundam floribus, sistuntur. Icones alius EIVSDEM libri b) pictoriae et sculptoriae artis plus produnt, non vero fidei. Longe plura praestitit CASPARUS COMMELINUS c), quippe

a) *Annexo Diff. hist. med. de vera Herba Britannica, Amstelod. 1698. 4.*

b) *Beschryving der Aardgewassen 1696. Fol.*

c) *In Praeludiis botanicis; Horti med. Amstelod. plantis rarior. et exoticis; et Horto med. Amstel. Fol.*

quippe cuius opera, verbis et figuris expressa, in cognitionem bene multarum specierum peruenimus, licet nec illi contigerit, singularum flores oculis usurpare. Reliqui botanici, excepto vno ad temporis seriem infra nominando, pauciores modo Aloës prolixius persequuti sunt, vel vnius modo vel alterius dedita operationem habuerunt; quorum eminet DILLENIVS *d*). TREWII *e*) de numerosis huius generis plantis meritum in examinandis floribus sigillatim subsistit; ut verior character generis, quam qui antea inualuerat, informaretur. Id quod et HALLERVS *f*) sibi exsequendum proposuerat. Omitto indices hortorum botanicorum, quorum nonnulli quidem numerosiorem recensum harum stirpium continent, sed absque descriptionibus propriis concinnis in sola allegatione nominum aliorum acquiescentes, quorum TILLI *Hortus Pisanus* *g*) BOERHAAVII *Index alter plantarum horti* *L. B. h*). Largior hisce longe est enumeratio a COMMELINO *Praeludiis* *i*) suis praefixa, contra quam vituperium singulare LINNEI *k*) directum est, auctorem ex Aloë perfoliata tot fere species formasse, quot indiuidua.

Pluri-

d) In *Horto Elthamensi*.

e) *Commerc. litt. Noric. 1744. p. 321. 345. 375. cum iconibus tab. 2. 3.*

f) *Enumer. plant. horti et agri Gotting. p. 70. sq.*

g) *Pag. 6.*

h) *Tom. 2. p. 128. sqq.*

i) *Pag. 39. sqq.*

k) *Hort. Cliffort. p. 131.*

Plurimum adiumenti in hisce cognoscendis debemus LINNEO, Equiti, qui propriam indaginem cum aliorum tentaminibus iunxit. Initium huius negotii iam in *Horto Cliffortiano* fecerat; a quo ipse in multis postea in *Speciebus plantarum* deflexit; ultimam autem limam in *Systemate vegetabilium* 1) admouit. Auxit species ab eo lustratas FORSKÅHLIVS m) aliquot aliis, de quarum cœrtitudine ob breuitatem descriptionum non satis iudicare licet; ferius THVNBERGIVS n); iterum tribus, quibus quartum f. Aloën maculatam nuperrime o) tanquam vere nouam addidit. Vtut véro LINNEI summi viri collocata in hoc genere determinando opera eniteat, confiteri tamen oportet, eum in reducendis quibusdam plantis instar varietatum ad species iusto fuisse rigosiores, id quod nominatim valet de variis sub Aloë perfoliata et Al. disticha significatis stirpibus, in quibus, comparatis inter sese floribus vel foliis, insignis discrepantia apparet, eaque constans, nec cultura nec ætate mutabilis. Quod ad Aloën perfoliatam attinet, non in omnibus illi subiectis plantis flores corymbosi sunt, sed in aliis racemosi, in aliis spicati, variante scilicet in diuersis stirpibus sub hac specie a LINNEO comprehensis pedicellorum longitudine. Nec com-

mode

1) Ed. 13. pag. 278.

m) *Flora Aegyptiaco-arab.* p. 73.

n) In LINN. fil. *Suppl. plant.* p. 250. sq. Conf. *Syst. veget.* Ed. 14. p. 237.

o) *Diff. de Aloë*, resp. ANDREA HESSELIO, *Upsal. m. Junio a. 1785.*

mode me iudice in speciem vnam compingi possunt stirpes scapis vel pedunculis simplicibus aliaeque compositis, caulescentes et acaules, ut ne in subtiliora corollarum quoad profunditatem laciniarum, in quam limbus diuiditur, figuram istarum, etc. descendam, vel manifestiora discrimina in foliis quoad proportionem latitudinis ad longitudinem, superficiem, marginem, compagem, directionem, basin etc. obuia, commemorem.

Quum itaque in hoc genere florum figurae et nominatim rationis inter pedicellorum et florum longitudinem s. inflorescentiae, quam vocant, tanta sit dignitas (quod praecipue in Systemate b. LINNEVS agnouisse videtur): molestum valdopere est, quod flores in quibusdam harum plantarum, quarum Africa tantum non omnes patriam agnoscunt, ut fieri plerumque solet in exoticis succosis, quae in hypocaustis hortorum hospitantur, rarius erumpant, et dum emergant, id saepe contingat tempore, quo non prostant aliae ad comparisonem requisitae. Accedit aliud incommodum, quod sub siccatione formam situmque valdopere mutant, nec ea integritate in collectionibus ficcis plantarum seruari possint, ac aliae ficcioris compagis stirpes. Laudabili igitur consilio cel. THUNBERG, quum in Africa in promontorio bonae spei versaretur, hoc quoque difficile genus floribus condecoratum solo natali scrutatus, non nouis modo speciebus eruendis operam dedit, sed et vetustiores iteratae curae subiecit, characteres limauit, pluresque stirpes olim instar

instar varietatum coniunctas disiunxit specierumque iure instruxit. Et huius indaginis fructum nouissime tulimus *p*). In qua quidem re arduum est omnibus et singulis botanicis pro diuerso iudicio de partibus ad characteres específicos adornandos maxime idoneis, satisfacere. Probe tamen nominatim, a specie Aloës perfoliatae, vt in hoc maneam, aliquas Varietates Linneanas ϑ . λ . μ . ν . seiunctas esse nomine Aloës pictae, quum in hisce flores meo iudicio corymbum forment, in reliquis racemos, folia latiora, maculis fasciata et amaritiae longe inferiora sint, quae masticatione potius corticis eorum, quam succum sponte profluentem gustando, cognoscitur Aloën succotrinam angustifoliam spinosam, flore purpureo COMMEL, autem f. Aloën perfoliatam LINN. ξ , quam THUNBERGIUS Aloën sinuatam tanquam peculiarem speciem dixit, equidem non separassem a reliquis Al. perfoliatae varietatibus.

§. 3.

Succi aloëtici tres species, vt notissimum, officinae pharmaceuticae seruant, Aloën scilicet succotrinam, hepaticam et caballinam, quae quidem colore, odore, sapore, duritie, puritatis gradu, differunt. Sunt qui discrimina haec a praeparationis diuerso artificio repetunt *q*); alii, vt COMMELINUS *r*) et post eum LINNEUS *s*) cum multis aliis

p) *Dissertatione* modo citata, quae pagg. 14 comprehendit.

q) JO. BAVHINUS in *Histor. plant. univ. Tom. 3. p. 697.*
SPIELMANNUS in *Mat. med. p. 626.*

r) *Praelud. p. 46.*

s) *Mat. med.*

aliis singulos succos tribus diuersis stirpibus tribuunt, ita tamen vt iste non dubitet, ex aliis speciebus huius generis amaro succo scatentibus Aloën colligi posse, hic vni, Al. perfoliatæ varietati, quam Aloën *veram* vocat t) et cui nomen Aloës vulgaris c. B. adiungit, praerogatiuam tribuat.

Igitur primum de plantis, quae succum istum largiantur, dein de modo eundem eruendi et seruandi, tum de variis, quae ad naturam eius et patriam pertineant, dispiciamus: vnde patebit, quousque in eius cognitione hætenus peruentum fuerit, et quid adhuc in desideriis votisque circa historiam eius remaneat.

Fateor cum aliis haud paucis, me Aloën istam perfoliatam veram LINN. f. Aloën vulgarem c. B. non satis nosse, nec summum virum post editum *Hortum Cliffortianum* diagnosin eiusdem vlllo modo leuasse. Nec sitim restinxit peregrègius THVNBURG, qui in *Dissertatione cit.* huius varietatis nullibi mentionem facit. Quas MÜNTINGIUS et BESLERUS u) de ea praestiterunt figuras, et quam illustrationis causa LINNEUS allegat ex *Horto Malabarico* x) sub nomine Kadanaku f. Catevala, hae adeo inter se differunt, vt non possint ad eandem plantam referri. Tanto minus vero huius loci videtur esse stirps ista malabarica, quum ibidem præcise significetur, foliis eiusdem saporem aqueum subdulcem competere. Quae sub nomine L'Aloës succo-

trin

t) *Spec. pl. p. 458. Var. π.*

u) *Hort. Eystett.*

x) *T. II. pag. 7. tab. 7.*

trin in REGNAULTI *Botanique* comparet icon, cui nomen dictum Bauhinianum adscriptum est, satis quidem cum Linneana descriptione congruit. Auctor vero *Horti Romani* y) adeo characteris Aloës immemor fuit, vt nomen istud, item nomen Al. perfoliatae Gall. L' Aloës succotrin, adscripserit Agavi Americanae. FORSKÄLIVS z) Aloën quandam, quam officinalem vocat, et ab Aloë vera LINN. distinguit, matrem succi Aloës succotrinae officinarum existimat, quod folia diffracta foetorem similem spargerent, forma praeterea differrent. Sed THUNBERGIVS non coniectura tantum, sed autopsia in promontorio bonae spei ductus optimum succum Aloës a), siue, vt alibi eundem nuncupat hepaticum b), ex specie quadam, Aloë spicata a se dicta, erui auctor est. Paucis modo verbis eandem in *Supplemento* c) descripsit, amplius in *Dissertatione cit.* nec vllibi synonyma addidit, vnde ab eo primum fuisse exploratam, tanto confidentius colligo. In interioribus autem huius terrae regionibus nonnullos incolas succum ex Aloë linguaeformi tanquam optimum et purissimum adhibere idem significat *). Maximam tamen Aloës copiam, quae ex promontorio isto Africae transferatur, parari ex Aloë perfoliata innuit: varietatem

y) Vol. 6. tab. 75.

z) Loc. cit.

a) LINN. Suppl. l. c.

b) Diff. cit. p. 10.

c) Loc. cit.

*) Diff. de medicina Africanorum, Ups. 1785. p. 7.

tem quidem non denominat, sed in omnibus hortis botanicis obuiam pronunciat *d*). Cui effato cel. SPARRMAN *e*) eatenus aduersus est, quod ad *Supplementum* respiciat, unde, illi de Aloë spicata THVNB. sermonem esse, probabile.

§. 4.

An rectius subsequenti speciei nomen Bauhianum tribuatur, iam agite anquiramus.

ALOE ELONGATA *Mihi*.

Floruit vere anni 1784. et iterum nouissime elabentis anni in caldario horti botanici Aloës species, quae quidem iam dudum in eo hospitium habuit, sed intra hosce septendecim annos, quibus illi praefectus fui, pluresque florentes rariores species vidi, antea non flores tulit. Inter Linneanas non designatam inueni, certe, si acquiescendum in descriptione LINNEI breui et citata ab eo ex *Horto Malabarico* icone, non pro Aloës perfoliatae varietate s. Aloë vera π , cui adiecit, vt dixi, nomen Aloës c. B. agnosci potest. Describit nimirum LINNEVS hanc per *Aloën foliis confertis dentatis vaginantibus planis maculatis*: sed in mea stirpe folia non maculata sunt, si tenellorum furculorum folia eximas, nec vaginantia sed amplexicaulia. Legens breuem Aloës spicatae THVNB. *f*) descriptionem, eandem cum

d) *Physiogr. Sällskapetets Handl. P. 1. pag. 112.*

e) *Resa till Goda Hopps-Udden, p. 742.*

f) In LINN. *Supplem.*

cum mea stirpe esse fere credidissem, nisi flores campanulatos vocasset, tantoque magis, quum mea pariter succo valde amaro turgeat. Sed ne quid temere agerem, imaginem florum vna cum animaduersionibus quibusdam super hac stirpe per litteras cel. viro misi, ad quas regeffit, vtramque vere differre floresque suae non campanulatos modo esse, sed istis meae longe breuiiores. Vix vero, arbitror, neglexisset, mihi simul declarare, meam eandem cum ista in Africa vsitatissima esse, si vere fuisset. Quum vero alios auctores consularem, in quos probabili coniectura deueni possem, ad duos praecipue substiti, quorum et obseruationes et figurae probe in meam Aloën quadrant. Alter est ELISABETHA BLACKWELL g), cuius icon quidem pedunculum simplicem repraesentat, quum in vno meorum exemplo diuaticatus esset, et spicam breuiorem, sed bene corollas ringentes depingit. Alter cl. REGNAULT, sub nomine Gall. Aloës commun, cuius quidem figura pariter spicam solitariam exhibet, nec corollam satis curate quoad lacinias expressam, stigma insuper bifidum, quod non in mea est. Sed in plerisque conueniunt hae imagines cum stirpe, de qua loquor: quo autem iure vterque adscripserit nomen Aloës vulgaris c. b. non dixerim: certe icones aliorum in Blackwelliano opere citatae, praeter Trewianam h), non ad illam, quae ibidem depingitur, applicari possunt; et REGNAULT tanto audacius nomen BAVHINI illi addidit, quum idem illud

g) *Herb. tab. 229. Ed. TREW.*

h) *Ex Commercio Norico.*

illud iam tribuerit alii speciei Aloës, quam Aloës succotrin vocat. Adiuncta ab isto descriptio parui momenti est; maioris ponderis est illa ab editoribus Blackwelliani operis expedita, quamvis characterem non expleat. Anne autem ab hacce stirpe vere in vsum officinarum succus natali loco, vel quocunque per culturam transmigravit, colligatur, sub defectu descriptionum, qui hactenus inualuit, nonnisi a peregrinatoribus fidis extra omne dubium poni potest. Ita esse varia suadent, scilicet praeter copiam succi amari, quo turgent folia, et experimenta mea cum eodem infra (§. 11.) suppeditanda, statura insignior, quae tamen sub dio in climate calidiori non potest non praeualere; cl. BROWNE *i*) praeterea Aloï in Jamaica vſitatae spicam (non racemum vel corymbum) adſcribit; et cl. HUGHES *k*) floribus Barbadenſis plantae, ob ſuccum amarum inclytæ, colorem flauum tribuit notatque aliquando caulem floriferum bifurcari. Quicquid ſit, magis exactam, quam quae hucusque prodiit, delineationem meretur, ex qua ſimul conſtabit, non poſſe tanquam varietatem Al. perfoliatae conſiderari, ſed in dignitatem peculiaris ſpeciei euehi debere. Sequentibus igitur notis inſignitur:

ALOË floribus ſpicatis tubuloſo-triquetris ſubringentibus oblique dependentibus, foliis aggregatis dentatoſpinofis. MIHL.

Hh 2

ALOË

i) Nat. History of Jamaica p. 197.

k) Nat. History of Barbados p. 154.

ALOË *n. IX.* TREW in *Comm. nor.* 1744. p. 324.
tab 3. fig. 18-21., vbi modo spica et flores
 singulares repraesentantur.

ALOË *vulgaris*; BLACKWELL *Herb. Ed.* TREW
Cent. 3. tab. 229.

ALOËs *commun*; REGNAULT *Botanique cum fig.*

Figuram propriam, quam adornare elegantem
 curavi, in aliud opus seruo. Epitheton illi dedi
 ob spicam longam cylindrico-pyramidalem. Haec
 forma illi, dum vegeta est, competit, sensim vero
 breuior apice latiori euadit, pereuntibus et cadi-
 tibus inferioribus floribus, vnde diuersitas figura-
 rum. Floruit a medio m. Martio ad finem Aprilis.

Radix fibrosa subacidi saporis, non amari,
 fibris mox calamum crassis, mox exilioribus. Cras-
 flores spargunt copiam fibrillarum sub angulo ple-
 runque recto.

Truncus fere spithameus, sesquipollicem cras-
 sus, teres, obliquus, annulatus ex reliquiis folio-
 rum tam circulis prominulis quam cingulis albidis,
 apice foliiferus.

Folia aggregata, quaquauersum dispersa, con-
 tigua, amplexicaulia, sed non vaginantia, bipe-
 dalia, oblonga, ex basi lata sensim attenuata, car-
 nosa pulpa molliori, basi crassissima et plana, dein
 concaua, tum canaliculata, apice oblique flexo com-
 presso denticulato-spinoso, margine sinuato-den-
 tata, dentibus terminatis in spinam compressam
 apice

apice brunam rectam, glauca sed non maculata; superiora patentissima et recta, media horizontalia, infima dependentia, altero dimidio apicem respiciente reflexa.

Surculi foliiferi ex radice plures maculis albidis paucis oblongis.

Pedunculus ex centro foliorum congestorum oblique emergens, strictus, subangulatus, purpureo-viridescens, sesquipedalis, basi subcompressus, ibidemque altero margine crista subcartilaginea notatus, infra nudus, supra bracteatus, vel simplex vel diuaticatus apice in duos ramos spiciferos, et vbi floribus contegitur, sulcatus.

Bractee latae, acuminatae, amplexicaules, albido-flavae, lineatae, persistentes, marcidae, adpressae in summa pedunculi parte, item sub singulis pedicellis, vbi concaui reflexique.

Spica pedalis, cylindrico-pyramidalis, terminata congerie bractearum marcidarum, constans ex floribus numerosissimis approximatis, dum dependent, contiguus.

Flores ante explicationem horizontales, dein oblique dependentes.

Pedicellus uniflorus, teres, lineam circiter longus, basi latior, per articulum flore iunctus, patens.

Calyx nullus.

Corolla monopetala, pollice longior, extus pallide lutea lineis viridibus, interne albida, tubulo-

bulofo - triquetra angulis binis superioribus, vno inferiori prominulo et acutiori, ex basi breuissima angusta ventricoso-teres, ad duas tertias diuisa in sex lacinias lanceolatas erectas alternis latioribus et paulo longioribus apice nonnihil reflexo, in formam corollae ringentis dispositis, ita vt tres sursum, duae ad latera, vna deorsum, collocentur. Singulae harum lineis tribus viridibus medio pictae, originem ex basi corollae seorsim trahentibus et pone apicem laciniarum conuergentibus. Corolla dissecta intus polypetala apparet ex laciniis latioribus, margine vsque ad basin solutis. Scatet copia nectaris in guttas magnas depluentis et folia inquinantis.

Genitalia extra corollam longe prominentia, basi inflexa.

Stamina sex, quorum tria maiora cum tribus minoribus sed inaequalibus situ alternant. *Filamenta* basi corollae inserta, subulata, deorsum albidolutea, compressa. *Antherae* oblongae, incumbentes, coloris aurantii.

Pistillum vnum, staminibus fere aequale. *Germen* obouatum, obsolete triquetrum, sexsulcum, superum. *Stylus* cylindricus, versus apicem flauidior. *Stigma* non distinctum, sed stylus in extremo coarctatus in apicem obtusum.

Fruſus non maturuit. Sed iam ex germine constitit, esse capsulam trilocularem multis seminibus refertam.

Animad-

Animadversiones.

Plura huius stirpis exempla possidet hortus Reg. botanicus, nam ex radicibus furculorum crebra pullities, qui terrae infixi facile adolescunt. Sed vnicum modo exemplar idque procerius et robustius post tot annorum moram floruit idque duobus sese subsequenter annis, quod tanto gratius fuit, quum primo anno pedunculus esset bifidus et duas consequenter spicas ferret, altero simplex et monostachyos; quod nisi contigisset, fallax facile character euasisset. Scilicet pedunculus primo antheseos anno diuasicabatur apice in duos ramos, quorum vnus longior et crassior truncum sub angulo valde obtuso quasi continuatum sistebat, alter exilior et lateralis. Qui hunc excipiebat anno post pedunculus monostachyos angulum obtusissimum versus spicae basin formabat. Si igitur in prius dicto pedunculo mente demas spicam alteram minorem et lateralem cum pedunculo, omnia similia salua plantae integritate habebis. Videtur tamen simplicior structura vulgatiores esse, nam ea simplicitate BLACKWELLIA et REGNAULTVS hanc Aloën depingunt, et cl. HVGHE'S de sua, vt supra dictum, aliquando modo pedunculum bifurcari narrat.

Proxime venit Aloï perfoliatae LINN. β . Sed folia in hac minora proportione, angustiora, magis reflexa, vaginantia in formam infundibuli, basi distantia et truncus pluribus pedibus altior, nec perpendicularis sed contortus vel volubilis. Vtriusque folia valde amara cum halitu graui. Praeferri

ferri me iudice pro collectione succi Aloë elongata meretur, quum ampliora folia gerat, hinc plus succi eroget.

§. 5.

Sapor tamen foliorum stirpium huius generis non in vniuersum amarus est. Qui comparare gustu plures huius generis plantas vna serie cupit, ad subito delendam molestam amaritiam commodissime scopo potietur. colluendo os primum tantillo aceto vini, dein aqua. Ita mox perit amarities, nec acor remanens sub nouo experimento fallit. Hocce praesidio vsus exploraui Aloës diuersas in horto botanico obuias. Et probo, sedulo a COMMELINO et saporis plantarum huius generis a se descriptarum rationem esse habitam. Id tamen notandum, in quibusdam compactioris structurae, licet succus exundans vix amari sensum linguae inprimat, masticatione tamen corticis foliorum amaritiam percipi, vt in Aloës distichae varietatibus diuersis, quae tamen stirpes nullo modo succi collectioni aptae sunt habendae.

Ita succum insipidum vel subsalsum vehunt Aloë spiralis L. Aloë retusa L. Aloë pumila α , margaritifera β , f. africana margaritifera COMMEL. δ , arachnoidea; dulcem Aloë viscosa L.; subdulcem Aloë variegata L.; initio nonnihil amaricantem, sed mox dulcem Aloë humilis L. f. var. σ , perfoliatae EIVSD. Amaritiae autem praeprimis instruuntur Aloës istae variae, quae Al. perfoliatae nomine veniunt,

veniunt, sub ea tamen restrictione, qua THVNB-
GIVS vtitur, seiunctis nimirum variis Linneanis va-
rietatibus in aliam speciem, quam Aloën pictam
vocavit, quae amaricantes modo sunt et exiguum
modo succi per vasa corticis foliorum transmittunt.
Aloës distichae L. varietates complectuntur partim
plantas amaras, quorum var. β . f. Aloë folio ma-
culis albicantibus ab utraque parte COMMEL. cuius
succus valde amarus et foetidus est, et var. ϵ . f. Aloë
plicatilis L.; partim insipidas, quorum var. γ , f.
Aloë folio triangulari et verrucis albicantibus COMM.
item var. δ , foliis planis verrucosis MART. Ceteris
vix cedunt amaritiae Aloë sinuata THVNB. f. Al. per-
foliatae L. var. ξ , quae est Al. succotrina angusti-
folia COMM.; Aloë spicata THVNB.; Aloë linguae-
formis L.; et Aloë elongata MIHL.

§. 6.

Male autem vulgo intelligitur amarities folio-
rum, dum eandem in tota eorum compage quae-
runt, quum contra ea modo in parte corticali vi-
ridi, siue tenaci ista membrana crassa externa, quae
in foliis Aloës elongatae quartam circiter lineae
partem efficit, contineatur. Haec superficie inter-
iori amplis vasis instruitur, quae in recenti seg-
mento transversim facto punctulis quidem distin-
guitur, manifestius vero, quum in eiusmodi seg-
mento succus spissescit, sicque simul profundior
colorem adipiscitur; vel in iis stirpibus, quibus
succus profundioris coloris est. Parallelae haec
per longitudinem folii decurrunt, ut per pelluci-
dam

dam pulpani mediam sub situ obliquo dissecti folii facile cognoscitur. Ex hisce vasis resectis funditur limpidus tenuisque latex. Ast, quum sibimet tam proxime sita sint, plures guttulae mox confluunt vnaque destillant. Vasa haec remotiora deprehendi in speciebus, quae blandioris sunt succi vel amaritiae omni destitutae. Reliqua pars media folii pulpani constituit albam pellucidam aquosam vel viscosam insipidam, cuius liquor aliquando in longa fila trahi potest. Similiter sese rem habere in pedunculo deprehendi, quippe in cuius corticali velamine et in hoc vnice vasa similis naturae et succi obseruavi; vnde verum reperi, quod PLINIVS¹⁾ indicat, quosdam suo tempore et caulem ante maturitatem seminis incidisse succi gratia.

In horum vasorum natura ratio vulgaris fucum colligendi modi, qui apud barbaros obtinet, continetur, dum scilicet non vi insigni illum excutere tentant, sed sponte exundare sinunt; simulque patet, alia consilia, quae in frustula foliorum dissecta prelo submitti suadent, esse vana, et proportionem, quam inter gummosas et resinosas partes succi probi esse conuenit, turbari.

§. 7.

In collectione succi aloëtici consueta ad duo momenta respicias, alterum, quo succus prolicitur, alterum, quo in siccam molem densatur.

Quod ad prius attinet, in plerisque artificium apud diuersas istas gentes, quarum clima calidius
solum-

¹⁾ *Hist. nat. Lib. 27. c. 4. p. 1194. Ed. DALECH.*

solumque vel spontaneum prouentum vel culturam sub dio concedit, vsitatum conuenit. Scilicet, vt tanto plus Aloës lucrentur, eliguntur stirpes proceræ, quarum folia valde succosa; et in Africa quidem per totum annum huic negotio indulgent, persuasi tamen tempore anni pluuioso vel paullo post vberiore succum prostare et tempestatem serenam et tranquillam praeferendam procellosae. Folia tum succosiora, ad basin vbi crassissima sunt, praecisa vel in dolia situ erecto collocantur, vt quidem in insulis Barbados *m*) et Jamaica *n*) fit, vel supra grandius folium substratum, quod receptaculi vel canalis vices gerit, situ decliui vtrinque ad numerum decem duodecim et plurium, vnum supra alterum ponuntur, qui mos in promontorio bonae spei *o*) inualuit. Vt qui adhuc intra folia latet succus abundantius profluat, antequam auferantur, per manus folia transmittunt.

Succo sic prolicito, ad eundem densandum accedunt, sed diuersa encheiresi. Optima sine dubio haec est, quod intra vasa lignea plana nec alta caloris solaris adiumento ad iustam crassitiem exhalet, vnde et in Jamaica haec Aloës species summo in pretio habetur. Quum vero lente sic res procedat, ibidem pro vulgari Aloë folia singula praecisa in frusta dissecantur et sic in vasa, qualia descripsi, proiiciuntur, vt succus sponte

li 2

exundet,

m) HUGHES l. c.

n) BROWNE l. c.

o) THUNBERG et SPARRMAN ll. cc.

exundet, quibus factis manibus ille vltcrius exprimitur, tumque iste aquae tantillo mixtus coquitur. In promontorio bonae spei succum ex integris foliis elicatum absque additamento aquae coctione densant. Inspissatio continuatur, donec guttula laminae instillata solidescat vel non amplius destillet a bacillo, dum attollitur, sed frigidus frangatur. Sub coctione saltem Capenses in superficie haerentes fordes despumant, sed colationem non praemittunt. Dum eousque res peruenit, infunditur succus immediate, siue post refrigerationem in alio vase, vel in cucurbitas amplas vel loculos ligneos, quo vltcrius densetur, ibidemque pro usu seruetur. Hac ratione ex tribus partibus succi fluidi vna solida remanet. Quem ipsum Jamaicenses in massis pintam vnā ad viginti gravibus, Capenses autem ponderosioribus plerumque trecentarum quadringarum vel quingarum librarum, transmittunt. Aliam quidem adhuc encheiresin proponit JO. BAVHINVS *p*), quod scilicet folia in frustula dissecta et contusa per 25 dies in vase retineantur, sub qua mora spumam attolli innuit inutilem et abiiciendam, reliquam vero succi partem rite pro diuerso puritatis gradu segregatam seruari. Non vberiore autem prouentum succi fieri ex concisis foliis hisce noscunt rustici Africani, qui tamen in eo mihi lucro suo obstare videntur, quod plagas foliorum sectas aurae calidae vi exponant, vnde iusto praecocius exsiccatus succus orificia vasorum praecisorum claudit, quum contra

ea

p) Hist. plant. T. 3. p. 697.

ea secundum morem in insulis americanis receptum continuo ad iacturam succi perfectam vsque succus primum exstillans alium nouum rium post se trahat.

Varii itaque haecenus propositi modi praeparationis succi huius sunt, pro quorum discrimine, etiam si planta sit vna eademque, iste non potest non notis §. 3. significatis, imo virtute, variare. Alia igitur est natura Aloës sponte exundantis, alia coacte ex foliis dissectis et conquassatis erutae, alia, si succus sole densatur, alia rursus, si id sit coctione, quae, quo fortiori igne perficitur, tanto facilius empyreuma contrahit, iacturam odorarum partium patitur et, vt in quolibet alio succo inspissato contingit, tanto profundiori colore tingitur; alia, si sordes coctione ascendentes demuntur, alia si absque despumatione densatur. Adde admisceri aliquando aliena ponderis augendi causa a lucro intentis hominibus, de qua fraude iam conqueustus fuit DIOSCORIDES, Gummi vel Acaciae miscelam redarguens; prout in Belgio aliquando succum Liquiritiae addi nouimus q).

§. 8.

Fallacia ista tria nomina vltatissima sunt, quae aloëtici succi speciebus in officinis imponuntur, dum alter e. c. illam Aloën hepaticam vocat, quam alter succotrinam, et conuersa vice. Quis iisdem primus vsus fuerit, non dixerim. HIPPOCRATES et

Ii 3

THEO-

q) FERBER n. *Beyträge zur Mineralgesch. Vol. I. p. 366.*

THEOPHRASTVS ERESIVS Aloës plane non mentionem faciunt. Crebro eam memorat CELSVS *r*), qui omnibus catharticiis eam misceri iubet, sed absque epitheto vel diuersitatis illius notis in medium productis. DIOSCORIDES *s*) tamen duas significat, alteram eamque primariam, quae, vt interpretis, SARACENI, verbis utar, ad iecinoris imaginem vergit, subflauam, friabilem, quae facile humescit; alteram viliorem nigram, fractuque contumacem, arenosam. Subtiliores fuerunt Arabes, qui a patria sibi nota, h. e. variis Asiae regionibus, species effinxerunt, quos inter AVICENNA *t*) succotrinam tanquam meliorem nominat. Nullibi vero apud hosce nomina cetera vulgaria occurrunt, vt adeo subscribere nequeam asserto meritissimi SPIELMANNI *u*), haecce ab Arabibus inuenta esse. Nec notae tam faciles sunt, quibus singulae inter se distinguantur, ac vulgo putatur. Si tamen illae a cl. LEWIS *x*), viro alias in eiusmodi rebus haud mediocris grauitatis, traditae valeant: Aloï succotrinae, quae censetur optima, competit color flavido-ruber, in purpureum inclinans, sed postquam in puluerem redacta fuerit, aureus, superficies splendens, friabilitas, sapor cum amaritie aromaticus, odor myrrham quodammodo referens, et nonnihil pellucida est; hepatica autem distinguitur

r) Ed. KRAVS. p. 84.

s) Mat. med. Lib. 3. cap. 25.

t) Oper. Ed. VENETI Lib. 2. tract. 2. cap. 66. p. 105. b.

u) Mat. med. p. 626.

x) Experim. History of the Mat. med. Ed. 2. p. 31.

guitur colore profundiori, superficie non tam splendente, compage firmiori nec ita transparente, amaritie magis nauseosa et odore fortiori magisque ingrato; caballinam, quae vilior reliquis declaratur, nec in omnibus officinis obuia, demum dignosci innuit foetore ingratisimo: addunt alii, quod cum specimine iam praesenti conuenit, colorem longe profundiozem fere nigrum, et manifesta sordium et arenarum indicia, vnde et compactior et ponderosior apparet. Id omnino verum est, venales istas tres species saepe differre valdopere, si cum aliis eiusdem nominis ex alia officina petitis comparentur, tam colore, quam aliis momentis indicatis, ita vt vix ambigam ternarium istud discrimen pro inani et inutuli declarare, et eodem iure plures diuersitates et nomina agnosci debere sustineam.

§. 9.

Facilis esset explicatu et expedita res, si remanentes in ternario numero subscribere possemus JO. BAVHINI supra (versus finem §. 6.) quoad partem significatae narrationi, quod latex ex foliis elicitus sua sponte in tria liquida diuersae indolis, strata totidem formantia, sese disiungeret, quorum superius concha haustum et exsiccatum Aloën succotrinam constitueret, alterum in medio consistens Al. hepaticam, infimum, siue foecem, Al. caballinam. Ast fontem huius narrationis nobis non indicat egregius vir, vnde fides valde ambigua in re, quae nonnisi ab autoptis testibus decerni potest.

§. 10.

Nisi igitur tota diuersitas succorum aloëtico-
rum in praeparationis diuerso modo, qualiscun-
que fuerit, consistat, vel statuendum sit, eandem
Aloën pro diuerso solo et climate vel aetate vel
collectionis succi tempore diuersum succum suppe-
ditare: nihil superest, quam vt discrimen Aloës a
stirpibus specie vel varietate discrepantibus repeta-
mus. Ita quidem in plerisque libris, qui medica-
menta censent, factum esse deprehenditur. Et mi-
ror tantum consensum et conspirationem de vul-
gari succorum istorum origine obtinere, ita vt
Aloë hepatica Aloï vulgari c. B. Al. succotrina Aloï
Americanae ananae floribus suauerubentibus PLVCK.
Al. caballina Aloï Guineensi caballinae COMMEL.
adscribatur. Sollertius inquirens, qua auctoritate
hoc assertum nitatur, non aliam inueni, quam
coniecturam CASPARI COMMELINI y), qui quoad
Aloës hepaticae originem vulgari opinione acquie-
scit, esse ex Aloë vulgari c. B. quoad ceteras autem
nonnisi conuenientia saporis et odoris recentium
succorum stirpium modo dictarum cum succis aloë-
ticis ficcis venalibus diuersi istius nominis trahitur.
Quam lubricum hocce iudicium sit, non opus est
multis demonstrare. Interim recte fatetur, etiam
ex aliis Aloës speciebus succum commodum colligi
posse; quod quidem nuperioribus obseruationibus
supra expositis praecipue confirmatur. Ipse quo-
que vidi in succis a me ex variis amaris Aloës spe-
ciebus collectis colorem variare valdopere, mox
esse viridi-luteum, mox rubellum, mox brunum.

§. 11.

y) *Praelud. bot. p. 46.*

§. II.

Characteres Aloï succotrinae a cl. LEWIS adiudicati perapte applicari possunt ad succum inspissatum, quem praeterita aestate ipse ex Aloë elongata elicui. Experimentum hoc autem repeti potest quocunque anni tempore, nam hieme eandem fere vbertatem succi ac aestate foliis inesse deprehendi. Scilicet vegeta aliquot folia ad basin praecidi, eadem in vitro amplo cylindrico filis suspendi, vnde mox profluxit succus ad marginem plagae viridi luteus, fere citrinus, quem colorem chartae tenuem in modum illitus adhuc seruat, qui autem succus in vitro crassiorem in molem collectus rubicundus euasit instar vitri antimonii hyacinthini, et similiter omnino pellucidus. Odorem eundem grauem sed non ingratum sparsit siccatus, qui melioris notae succis aloëticis venalibus inest, et eadem illi infedit amarities. Aqua adeo frigida, modica quantitate affusa, facile solui se passus est, non alio adiumento, quam miti agitatione vitri, et aqua inde induit colorem grate obscure rubrum, in luteum nonnihil inclinantem, pellucidum, odorem croceum; exigua eius pars resinosae naturae in fundo vasis solutionem respuit. Solutio haec magis diluta, quae colore grate carneo tingebatur, statione protractiori et accessu aëris, prout prior, profundiorum colorem obtinuit. Alcohol vini eius tantillum modo soluit, spiritus vini tenuis autem plurimum, sed colore badio. Calore fortiori sese inflauit et flammae admota tota in cineres tenellos fugaces redacta est.

Conuenit hic quoque succus probe cum eo, quem FABIVS COLVMNA z) ex foliis ipse elicit, et solaris caloris ope densauit, vti et cum Jamaicensi praestantioris notae, eadem arte parato. An haec Aloë illa lucida, cuius passim apud auctores mentio fit? Attamen et Capensis Aloë, licet coctione densata, in minoribus frustis et ad marginem pel-lucida, et vitrum luteo brunum referens, a cl. SPARRMAN a) describitur, qui idem coniicit, Aloës species venales profundioris coloris, vt saturate viridis, et opacas grumosasque, pressione foliorum fuisse progenitas. Non tamen meam stirpem ean-dem esse, quae in Africa colligendo succo inseruit, vel inde patet, quod folia plana (excepta antica parte) nec concaua sint, vnde neutiquam vulne-ratis foliis pro excipiendo succo substerni possunt.

§. 12.

Si denominationes desumendae a loco, vnde hodie in Europaeas regiones succus iste transfertur, praeter Aloën Succotrinam et Barbadensem (quo nomine quoque Al. hepatica venit), quae hodie praecipue clarent, omnino Capensis notatu dignis-sima est, vtpote quum in promontorio bonae spei hodie vberrima eius praeparatio fiat in lucrum societatis orientalis mercatoriae Belgicae, cuius quidem historiam celeberrimi ciues mei THVNBERG b) et SPARRMAN c) egregie illustrarunt. Quod ad Succo-

z) *Ecphrasis stirp.* p. 41.

a) *Resa* p. 145.

b) *Physiogr. Sällskapetets Handl. P. I. p. 112. sqq.*

c) *Resa til Goda Hopps - Udden* p. 742. sqq.

Succotrinam attinet, olim quidem ex insula Zocotra, Zoccotera vel Socotora, oceani orientalis translata fuit, hodie vero haec ipsa vox aloëtico succo per excellentiam datur, prout alia varia medicamina praestantioris efficaciae primam originem in nomine gerunt, etiamsi alius patriae sunt e. c. Opium Thebaicum, Terebinthina Veneta, Crocus orientalis, Senna Alexandrina aliaque. Etenim a cl. BROWNE d) edocemur, praestantissimam Aloën in Jamaica emergentem Succotrinam nuncupari.

§. 13.

Et haec quidem pro scopo et occasione praesenti. Peregrinatorum doctorum et veri cupidorum est, adicere quae adhuc desunt in historia naturali medicamento, iam antiquitus celebrati et multis nominibus iure depraedicandi, non raro autem praeter vulgarem opinionem vel lenta iniuria noxii. Ab hisce exspectamus, quo omnes defectus vna complectar, ut stirpes singularum regionum accuratissime definiant, ex quibus Aloë vernalis transmittatur, nec verbis modo sed iconibus novis adiectis vel aliis, si iam prostant accuratae, citatis; porro praeparationis modos exactissime describant, attendentes primum ad colorem succi liquidi ex sauciato folio exundantis, dein inquirentes, utrum pro usu succum sponte ex vna plaga stillare sinant, siue ex foliis in minutas partes sectis, an potius expressione eliciant; porro utrum mox post prouentum succi eum densent, an contra stationem

d) *Nat. Hist. of Jam.* p. 198.

tionem illi quietam prius concedant, vt crassioribus partibus prius subsidentibus fluidius liquidum separare queant, vel et antea colent; dispiciant insuper, vtrum calore solari modo illum siccent an coctione cum vel sine aqua, et si hac vtantur, an spumam prius separent, nec ne, an coctio mitiori igne an vehementiori fiat, an vbiuis in eundem spissitudinis gradum eam continuent, antequam vasis transferendis indantur; demum explorent varios Aloën adulterandi modos, additamenta peregrina tempusque miscelae. Hisce qui intenti sint significant simul mutationes singulas, quas pro diversis istis momentis Aloë quoad colorem, odorem, saporem, soliditatem, puritatem, solubilitatem, subeant. Tum et certiora euadent ipsa experimenta in aegris capienda, quae, nisi superstruantur medicamentis integerrimae notae, iisdemque, quae inter plures artis peritos vsu veniunt, et magistrum et aegrum fallunt.

ERRATA

VOLVMINIS I.

- Pag. 174. lin. 9. loco ileo leg. ilio.
 200. lin. 10. — arthritidis — arthritis.
 211. lin. 15. — mucilaginiis — muci.
 235. lin. 5. — fauente — fauenti.
 240. lin. 2. — innotuerant — innotuerunt.
 366. lin. 14. — eodem — eadem.
 377. lin. 28. — tertiae — tertii.

VOLVMINIS II.

- Pag. 17. not. lin. 3. loco 20. leg. 21.
 33. lin. 22. loco putatitios — putatos.
 153. ad citationem not. s) add. Cfr. *K. Vet. Acad. Handl.*
 1776. p. 327. et p. 333. vbi cllrum SCHEELE et BERGMAN analysis chemica calculorum velicae vrinariae.
 344. not. lin. 4. loco morti — morte.

Murray Opusc. Vol. II.

Tab. 1.




Fig. 1.




Fig. 2.




Fig. 3.



Fig. 4.




Fig. 6.




Fig. 5.




Fig. 7.



Fig. 8.



Fig. 9.



Fig. 10.





Fig. 1.



Fig. 2.



Fig. 3.




Fig. 4.




Fig. 5.



